

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

Das Nibelungenlied

Zarncke, Friedrich

Leipzig, 1856

Der Nibelunge Liet

[urn:nbn:de:bsz:31-142134](https://nbn-resolving.org/urn:nbn:de:bsz:31-142134)

DAZ IST
DER NIBELUNGE LIET.

Faint, illegible text, likely bleed-through from the reverse side of the page.

DER NIBELUNGEN
ZWEITER THEIL

Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.

(Von de
Von S
Wie S
Wie S
Wie O
auf de
schnitt

VERZEICHNISS DER AVENTIUREN.

I AVENTIURE.	
(Von den Nibelungen) *)	Seite 1
II AVENTIURE.	
Von Sivrige, wie der erzogen wart	4
III AVENTIURE.	
Wie Sivrít ze Wormze kom	8
IV AVENTIURE.	
Wie Sivrít mit den Sahren streit	22
V AVENTIURE.	
Wie Sivrít Kriemhilt alrêste sach	40
VI AVENTIURE.	
Wie sich Gunther gein Islande hin ze Prünhilt bereite	49
VII AVENTIURE.	
Wie Gunther ze Islande mit sinen gesellen kom	59

*) Die Ueberschrift der ersten Aventure bezieht sich wahrscheinlich auf den Inhalt des ganzen Gedichtes; auch in der Klage führt der erste Abschnitt den Gesamttitel: *Aventure von der Klage*.

VIII AVENTIURE.	
Wie Sivrit nâh den Nibelungen sînen recken fuor	Seite 74
IX AVENTIURE.	
Wie Sivrit ze Wormez in botscheffe fuor	80
X AVENTIURE.	
Wie der kûnee Gunther ze Wormze mit frou Prûnhilt prûtte	88
XI AVENTIURE.	
Wie Sivrit sîn wîp heim ze lande fuorte, und wie si sît dâ heime brounten	105
XII AVENTIURE.	
Wie Gunther Sivriden und Kriemhilt ze Wormze mit bete brâhte, dâ man in ouch sît ersluoc	110
XIII AVENTIURE.	
Wie Kriemhilt mit ir man zer hêchgezîte fuor	118
XIV AVENTIURE.	
Wie die kûneginne mit einander zerwurfen	124
XV AVENTIURE.	
Wie man ze Wormze widersaget	133
XVI AVENTIURE.	
Wie Sivrit ermort wart	139
XVII AVENTIURE.	
Wie Kriemhilt ir man klagte, und wie man in begruop	152
XVIII AVENTIURE.	
Wie Kriemhilt dâ bestuont und ir sweher dannen reit	162

XIX AVENTIURE.

Wie der Nibelunge hort ze Wormze bräht wart Seite
167

XX AVENTIURE.

Wie der künec Ezele nâh froun Kriemhilt ze Wormze sînen boten sande 175

XXI AVENTIURE.

Wie Kriemhilt von Wormze schiet dô si gein den Hiunen fuor 197

XXII AVENTIURE.

Wie Kriemhilt und Ezele brüten in der stat ze Wienne 204

XXIII AVENTIURE.

Wie der künec Ezele und diu frowe Kriemhilt nâch ir friunden ze
Wormez sanden 211

XXIV AVENTIURE.

Wie die boten ze Rîne quâmen und wie si danne schieden 217

XXV AVENTIURE.

Wie sich die kûnege ze den Hiunen huoben 230

XXVI AVENTIURE.

Wie si mit Elsen und Gelpfrâten striten und wie in dô gelanc 243

XXVII AVENTIURE.

Wie der marcgrâve die kûnege mit ir recken in sîn hûs enpfie und wie
er ir sit pflac 253

XXVIII AVENTIURE.

Wie die Nibelunge ze Ezeln bûrge kômen und wie si dâ enpfangen
wurden 262

XXIX AVENTIURE.

Wie Hagene und Volkêr vor Kriemhilde sal sâzen. 268

	Seite
XXX AVENTIURE.	
Wie die küneger mit ir recken släfen giengen und wie in dô geschach	278
XXXI AVENTIURE.	
Wie die herren ze kirchen giengen	283
XXXII AVENTIURE.	
Wie Blöedel mit Danewart an der herberge streit	294
XXXIII AVENTIURE.	
Wie Danewart diu mæz ze hove sinen herren brächte	299
XXXIV AVENTIURE.	
Wie Irinc mit Hagenen streit, und wie im sit an im gelanc	311
XXXV AVENTIURE.	
Wie die dri küneger mit Ezele und ir swester umbe die suone reiten	319
XXXVI AVENTIURE.	
Wie Rüedegêr erslagen wart	327
XXXVII AVENTIURE.	
Wie des herren Dietriches recken alle wurden erslagen	342
XXXVIII AVENTIURE.	
Wie der herre Dietrich Gunthern und Hagene betwanc	355

U
us ist
von belec
von freuc
von kien

E
wuo
dig in all
Kremit
der umb

Ir yllige
Gunther
und Gis
für trov

Ein rich
ir vuter
sit nich
der ou

I AVENTIURE

VON DEN NIBELUNGEN.

Uns ist in alten mæren wunders vil geseit
von heleden lobebæren, von grôzer arebeit:
von freude und hôchgezîten, von weinen unde klagen,
von küener recken strîten muget ir nu wunder hœren sagen.

Ez wuohs in Buregonden ein vil edel magedîn,
daz in allen landen niht schœners mohte sîn,
Kriemhilt geheizen: diu wart ein schœne wîp.
dar umbe muosen degene vil verliesen den lîp.

Ir pflâgen drî kûnege edel unde rîch,
Gunther unde Gêrnôt, die recken lobelîch,
und Gîselher der junge, ein wætlicher degene.
diu frowe was ir swester: die helde hêtens in ir pflegen.

Ein rîchiu kûneginne frou Uote ir muoter hiez:
ir vater der hiez Dancrât, der in diu erbe liez,
sit nâch sîme lebene, ein ellens rîcher man,
der ouch in sîner jugende grôzer êren vil gewan.

Die herren wären milte, von arde höch erborn, 1
mit kraft unmâzen küene, die recken ūzerkorn.
dâ zen Burgonden sô was ir lant genant.
si frumten starkiu wunder sit in Etzelen lant.

Ze Wormze bi dem Rine si wonten mit ir kraft, 2
in diente von ir landen vil stolziu ritterschaft
mit lobelichen êren unz an ir endes zit.
si starben jæmerliche sit von zweier frowen nit.

Die dri kûnege wären, als ich gesaget hân, 3
von vil hôhem ellen: in wären undertân
ouch die besten recken, von den man hât gesaget,
stare und vil küene, in scharpfen striten unverzaget.

Daz was von Tronege Hagene und ouch der bruoder sîn 4
Dancwart der snelle, von Metzen Ortwin,
die zwêne marcgräven Gêre und Eckewart,
Volkêr von Alzeie, mit ganzem ellen wol bewart,

Rûmolt der kuchenmeister, ein ūzerwelter degen, 5
Sindolt unde Hûnolt: dise herren muosen pflegen
des hoves und der êren, der drier kûnege man.
si heten noch manegen recken, des ich genennen nienen kan.

Dancwart der was marschale: dô was der nefe sîn 6
truhseze des kûneges, von Metzen Ortwin:
Sindolt der was schenke, ein wætlicher degen: *Le 270/1*
Hûnolt was kamerære. si kunden hôher êren pflegen.

Von des hofes êre und von ir witen kraft, 7
von ir vil hôhen werdekeit und von ir ritterschaft,
der die herren pflegen mit freuden al ir leben,
des enkûnde iu ze wære niemen gar ein ende geben.

In disen hôhen êren troumte Kriemhilde, 1
 wie si zûge einen valken starc schœn und wilde,
 den ir zwêne arn êrkrummen, daz si daz muoste sehen:
 ir enkûnde in dirre werlde leider nimmer geschehen.

Den troum si dô sagete ir muoter Uoten. 2
 sine kundes niht beschaiden baz der guoten: *L. f. d. r. d. e.*
 'der valke, den du ziuhest, daz ist ein edel man:
 in welle got behûeten, du muost in schiere vloren hân'.

'Waz saget ir mir von manne, vil liebiu muoter mîn? 3
 âne recken minne sô wil ich immer sîn.
 sus schœn ich wil belîben unz an mînen tôt,
 daz ich von recken minne sol gewinnen nimmer nôt.'

'Nune versprich ez niht ze sêre.' - sprach ir muoter dô - 4
 'soltu immer herzenliche zer werlde werden vrô,
 daz kumt von mannes minne: du wirst ein schœne wîp,
 ob dir got gefûeget eins rehte guoten ritters lîp.'

'Die rede lât belîben, vil liebiu frowe mîn. 5
 ez ist an manegen wîben vil dicke worden schîn,
 wie liebe mit leide ze jungest lônem kan: *L. f. d. r. d. e.*
 ich sol si mîden beide, sone kan mir nimmer missegân.

Kriemhilt in ir muote sich minne gar bewac. 6
 sît lebete diu vil guote vil manegen lieben tac,
 daz sine wesse niemen, den minnen wolde ir lîp.
 sît wart si mit êren eines vil werden recken wîp.

Der was der selbe valke, den si in ir troume sach, 7
 den ir beschiet ir muoter. wie sêre si daz rach
 an ir nâhesten mâgen, die in sluogen sint!
 durch sîn eines sterben starp vil manec muoter kint.

II AVENTIURE

VON SIVRIDE, WIE DER ERZOGEN WART.

Dô wuohs in Niderlanden eins edeln küneges kint 1
 - des vater der hiez Sigemunt, sin muoter Sigelint -
 in einer richen bürge witen wol bekant,
 nidene bi dem Rine: diu was ze Santen genant.

Sifrit was geheizen der snelle degen guot. 2
 er versuochte vil der richen durch ellenthaften muot:
 durch sines libes sterke suochter fremediu lant.
 hey, waz er sneller degene sit ze Buregonden vant!

Ê daz der degen küene vol wüehse ze man, 3
 dô hêt er solhiu wunder mit siner hant getân,
 dà von man immer mære mac singen unde sagen,
 des wir in disen stunden müezen vil von im gedagen.

In sinen besten zîten, bi sinen jungen tagen, 4
 man mohte michel wunder von Sifriden sagen,
 waz êren an im wüehse, und wie schœne was sin lip.
 des hêten in ze minne diu vil wâtlichen wîp.

11 Man zôh in mit dem vlîze, als im daz wol gezam: 5
 von sin selbes tugenden waz zuht er an sich nam!
 des wurden sit gezieret sines vater lant,
 daz man in zallen dingen sô rehte hêrlîchen vant.

Vil selten âne huote man riten lie daz kint; 1
 in hiez mit wæte zieren sîn muoter Sigelint;
 sîn pflâgen ouch die wîsen den ère was bekant:
 des moht er wol gewinnen beidiu liut unde lant.

Nu was er in der sterke, daz er wol wâfen truoc: 2
 swes er dâ zuo bedorfte, des lag an im genuoc.
 dô begunder sinnen werben schœniu wîp,
 die trûten wol mit èren den sînen wætlîchen lîp.

Dô hiez sîn vater Sigemunt kûnden sînen man, 3
 er wolde hôchgezite mit lieben friunden hân.
 diu mære man dô fuorte in vremder kûnege lant.
 den gesten und den kunden gap man ros und ouch gewant.

Swâ man vant deheinen, der ritter solde sîn 4
 von art der sînen mâge, diu edeln kindelîn
 diu ladet man zuo dem lande durch die hôchgezit:
 mit samt dem jungen kûnege swert genâmen sie sit.

18. L. v. Ed.

Von der hôchgezite man môhte wunder sagen. 5
 Sigemunt und Sigelint die kunden wol bejagen
 mit guote michel ère: des teilte vil ir hant.
 des sach man vil der fremden zuozin riten in daz lant.

Vier hundert swertdegene die solden tragen kleit 6
 mit dem jungen kûnege. vil manec schœniu meit
 mit werke was unniêzec, wandê si in wâren holt.
 vil der edeln steine die frowen leiten in daz golt,

Die si mit porten wolden wûrken ûf ir wât 7
 den stolzen swertdegenen: des enwas niht rât.
 der wirt der hiez dô sidelen vil manegem kûenen man,
 zeinen sunewenden, da er die hôchgezite wolde hân.

Dô gie zeinem münster vil manec rîcher kneht 1
 und vil der edeln ritter. die wîsen hêten reht,
 daz si den tumben dienten, als in was ê getân.
 si hêten kurzwîle und ouch vil maneger vrôuden wân.

Got man zen êren eine messe sanc. 2
 dô wart von den liuten vil michel der gedranc,
 dâ si ze ritter wurden nâch ritterlicher ê
 mit alsô grôzen êren, daz wætlich immer mê ergê.

Si liefen dâ si funden gesatelt manec marc: 3
 in hofe Sigemundes der buhurt wart sô starc,
 daz man erdiezen hôrte palas unde sal:
 die hôchgemuoten degene hêten vrêlichen schal.

Von wîsen und von tumben man hôrte manegen stôz, 4
 daz der schefte brechen gein dem luften dôz:
 trunzûne sach man vliegen für den palas dan.
 dâ sâhen kurzewîle beidiu wîp und ouch die man.

Der kûnec bat ez lâzen: dô zôch man dan diu marc. 5
 man sach ouch dâ zebrochen vil manege buckel starc,
 vil der edeln steine gevellet uf daz gras
 ab lichten schildes spangen: von hurten daz geschehen was.

Dô giengens wirtes geste dâ man in sitzen riet; 6
 vil der edeln spîse si von der müede schiet
 und wîn der aller beste, den man mit vollen truoc:
 den fremden und den kunden bôt man êren dâ genuoc.

Solcher kurzewîle si pfûlgen al den tac. 7
 vil der varnden diete ruowe sich bewac:
 si dienten nâch der gâbe, die man da rîche vant.
 des wart mit lobe gezieret allez Sigemundes lant.

Der herre hiez dô lihen sinen sun den jungen man 1
 lant unde pürge, als er ê hêt getân.
 den sinen swertgenôzen gab dô vil sine hant:
 dô liebt in dô diu reise, daz si kômen in daz lant.

Diu hôchgezît dô werte unz an den sibenden tac. 2
 Sigelint diu rîche nâch alten siten pflac
 durch ir kîndes liebe geben rôtez golt:
 si kundez wol gedienen, daz si ir sune wâren holt.

Lützel deheinen varnden armen man dâ vant: 3
 ros unde kleider daz stoup in von der hant,
 sam si ze lebene hêten mêr deheinen tac.
 ich wæne ie ingesinde sô grôzer milte gepflac.

Mit lobelichen êren schiet sich diu hôchgezît. 4
 von des landes herren hôrte man wol sit,
 daz si den jungen wolden zeime vogete hân:
 des enwolde in dô niht volgen Sifrit der wætlîche man.

Sit daz noch beide lebten, Sigemunt und Sigelint, 5
 niht wolde tragen krône noch ir liebez kint:
 doch wolder wesen herre für allen den gewalt,
 des in den landen vorhte der degen küen unde balt.

In dorfte niemen schelten, sit dô er wâfen nam: 6
 jâ geruwete vil selten der recke lobesam
 suochte niwan strîten. sin ellenthaftiu hant
 tet in zallen zîten in vremeden rîchen wol bekant.

III AVENTIURE

WIE SIVRIT ZE WORMZE KOM.

Den herren muoten selten deheiniu herzenleit. 1
 er hórte sagen mære, wie ein schœniu meit
 in Burgonden wære, ze wunsche wolgetân.
 dâ von er sît vil freuden und ouch arebeit gewan.

Diu ir un mâzen schœne was vil witen kunt, 2
 und ir vil hôch gemüete zuo derselben stunt
 an der juncfrouwen sô manec helt ervant:
 ez ladete vil der geste in daz Guntheres lant.

Swaz man nâch ir minne der werbenden sach, 3
 Kriemhilt in ir sinne ir selber nie verjach,
 daz si deheinen wolde zeime trûte hân:
 er was ir noch vil vremde, dem si wart sider undertân.

Dô gedâht ûf hôhe minne daz Sigelinde kint. 4
 ez was ir aller werben wider in ein wint:
 er mohte wol verdienen schœner frowen lîp.
 sît wart diu edel Kriemhilt des starken Sîfrides wîp.

Im rieten sîne mâge und genuoge sîne man, 5
 sît daz er ûf minne vlîzen sich began,
 daz er eine nâme, diu im môhte zemen.
 dô sprach der herre Sîfrit 'sô wil ich Kriemhilt nemen,

Die edeln juncfrouwen ðz Burgonden lant, 1
 durch ir vil grôzen schoene. von sage ist mir bekant:
 nie keiser wart so rîche, der wolde haben wîp,
 im enzæme wol ze minnen der jungen kûneginne lîp.

Disiu selben mære vernam dô Sigemunt. 2
 ez reite sîn gesinde: dâ von wart im kunt
 der wille sînes Kindes was im grimme leit,
 daz er werben wolde die vil hêrlîchen meit.

Ez gefriesch ouch Sigelint, des edeln kûneges wîp. 3
 si hête grôze sorge umbe ir Kindes lîp:
 den vorhte si verliesen von Gunthers man.
 den gewerp man dô dem degene sere leiden began.

Dô sprach der starke Sîvrit 'vil lieber vater mîn, 4
 âne edeler frowen minne wolde ich immer sîn,
 ich enwürbe dar mîn herze vil grôze liebe hât.'
 swaz ieman reden kunde, des was deheiner slahte rât.

'Sît du niht wil erwînden,' - sprach der kûnec dô - 5
 'sô bin ich dînes willen înneclichen vrô,
 und wil dirz helfen fûegen sô ich beste kan.
 doch hât der kûnec Gunther vil manegen übermüeten man.

Ob ez ander niemen wære wan Hagene der degene, 6
 der kan mit übermüete der hôchverte pflegen,
 daz ich vil sere fürhte, deiz uns werde leit:
 jâ ist mir solher mære dicke vil von in geseit.'

'Waz mag uns daz gewerren?' - sprach dô Sîfrit - 7
 'swaz ich friwentliche niht ab in erbit,
 daz mac doch mit ellen erwerben wol mîn hant.
 ich trow im an ertwîngen bêdiu liut unde lant.'

Dô sprach der fürste Sigemunt 'din rede diu ist mir leit; 1
wan würden disiu mære ze Rîne geseit,
dune dorftes nimmer geriten in daz lant:
Gunther unde Gêrnôt sint mir lange wol bekant.

Mit gewalte niemen erwerben mac die meit.' 2
- sô sprach der künec Sigemunt - 'daz ist mir wol geseit.
wellen aber wir mit recken riten in daz lant,
unsern besten frîwenden sol diu reise sîn bekant.'

'Des en ist mir niht ze muote,' - sprach dô Sifrit - 3
'daz mir sûln recken ze Rîne volgen mit
durch deheine hervart: daz wære mir leit:
dâ mit ich solde ertwingen die vil hêrlîchen meit.

Si mac sus wol erwerben dâ mîn eines hant. 4
ich wil mit zwelf gesellen in Gunthers lant:
dar sult ir mir helfen, vater Sigemunt.'
dô gâp man sînen degenen ze kleiden grâ unde punt.

Dô vernam ouch disiu mære sîn muoter Sigelint. 5
si begunde trûren umbe ir liebez kint:
jâ vorhte si vil sêre die Guntheres man.
diu edele kûneginne dar umbe weinen began.

Dô kom der herre Sîvrit dâ er die frowen sach. 6
wider sîne muoter gûetlîch er sprach
'irn sult niht weinen durch den willen mîn:
jâ wil ich âne sorge vor allen wiganden sîn.

Nu helfet mir der reise in Burgonden lant, 7
daz ich und mîne recken haben solch gewant,
daz sô stolze degene mit êren mûgen tragen:
des wil ich genâde iu mit trîwen immer sagen.

'Sît du niht wil erwînden,' - sprach dô Sigelint - 1
 'sô hilf ich dir der reise, mîn einigēz kint,
 mit der besten wæte, die ritter ie getruoc,
 dir und den dînen degenen: ir sult ir fûeren genuoc.'

Des neig ir mit zûhten der vil kûene man. 2
 er sprach 'ich wil zer verte niemen mêre hân
 niwan zwelf gesellen: den sol man prüfen wât.
 ich wil versuoehen gerne wie ez umbe Kriemhilde stât.'

Dô sâzen schœne frouwen naht unde tac: 3
 lûtel deheiner muoze ir deheiniu pfac,
 unze si geworhten die Sifrides wât.
 er wolde sîner verte hân deheiner slahte rât.

Sîn vater hiez im zieren sîn ritterlîch gewant, 4
 dâmit er varn wolde in Burgonden lant.
 die ir vil liechten brünne die wurden ouch bereit,
 und ir vil guoten helme, ir schilde schœn unde breit.

Dô nâhet in ir reise zen Burgonden dan. 5
 sî hêten umbe in sorge, wiez im solde ergân,
 ob si immer wider solden komen in daz lant.
 dô soumte man den degenen von dannen wâfen und gewant.

Ir ros diu wâren schœne, ir gereite goldes rôt: 6
 lebte iemen übermüeter, des enwas niht nôt,
 denne were Sivrit und die sîne man.
 wie schône er urloubes gerte zen Burgonden dan!

In werte trûreclîche der kûnec und ouch sîn wîp. 7
 er trôste minnelîchen dô ir beider lip:
 er sprach 'ir sult niht weinen durch den willen mîn;
 immer âne sorge muget ir wol mînes libes sîn.

Ez was leit den recken, ez weint ouch manec meit. 1
 ich wæn in hête rehte ir herze daz geseit,
 daz in sô vil ir friunde dâ von gelæge tôt.
 von schulden si dô klageten: des gie in endeliche nôt.

An dem sehsten morgen ze Wormze ûf den sant 2
 riten die vil küenen. allez ir gewant
 was von rôtem golde, ir gereite wol getân:
 ir ros in giengen ebene, des herren Sifrides man.

Ir schilde wâren niuwe starc unde breit, 3
 unde lieht ir helme, dô ze hove reit
 Sifrit der vil küene in Guntheres lant.
 man gesach an heleden nie sô hêrlich gewant.

Diu ort der swerte giengen nider ûf die sporn. 4
 ez fuorten scharpfe gêre die ritter ûzerkorn:
 Sifrit der fuort ir einen wol zweier spannen breit,
 der ze sînen ecken harte vreislichen sneit.

Die goldes rôten zeume fuortens an der hant, 5
 von siden fürgebüege. sus kômens in daz lant.
 daz volc si allenthalben kapfen an began:
 dô liefen in engegene des künec Guntheres man.

Die hôchgemuoten recken, ritter unde kneht, 6
 die sprungen in bejegene: daz was michel reht:
 und enpfingen dise geste in ir herren lant.
 sie nâmen in die mære und ir schilde von der hant.

Diu ros si wolden dannen ziehen an gemach: 7
 Sifrit der starke zuo den helden sprach
 'lât uns noch die mære eine wile stân,
 wir wellen schiere hinnen: des ich guoten willen hân.

Man sol ouch unser schilde ninder von uns tragen. 1
 wâ ich den künec vinde, kan mir daz iemen sagen,
 Gunthern den rîchen ûz Burgonden lant?¹
 dô sagetez im ir einer, dem ez rehte was bekant.

‘Welt ir den künec vinden, daz mac vil wol geschehen. 2
 ûf jenem sal wîten hân ich in gesehen
 bî den sînen degenen: welt ir zuo zim gân,
 ir muget dâ vor im vinden manegen ûzerwelten man.’

Dô wâren ouch dem kûnege diu mære nu geseit, 3
 daz ûf sînem hofe wâren ritter vil gemeit:
 die fuorten liechte brünne und hêrlîch gewant:
 si enkande niemen in der Burgonden lant.

Den wirt des hête wunder, von wanne kômen dar 4
 die hêrlîche recken, in wæte licht gevar
 und mit sô schôenen schilden niwe unde breit.
 daz im daz niemen sagete, daz was im grœzliche leit.

Des antwurte ein recke: der hiez Ortwin, 5
 starc unde kûene mohter wol sîn:
 ‘sît wir ir niht erkennen, sô sult ir heizen gân
 nâch mîme hôheim Hagene: den sul wir si sehen lân.

Dem sint kunt diu rîche und ouch diu fremden lant. 6
 mager si bekennen, daz tuo er uns bekant.²
 in hiez der künec bringen: mit den sînen man
 sach man in zûhteclîche ze hofe für den künec gân.

Waz sîn der künec wolde, des vrâgete Hagene. 7
 ‘ez sint in mîme hûse vremde degene,
 die niemen hie bekennet: ob ir si ê gesehen
 habt in vremden landen, des sult ir, Hagene, mir verjehen.’

‘Daz tuon ich sicherliche.’ zeinem venster er dô gie: 1
 sîn ouge er dô wenken zuo den gesten lie.
 wol behagete im ir geverte und ouch ir gewant.
 si wâren im vil vremde in der Burgonden lant.

Er sprach, von swannen fûeren die recken an den Rîn, 2
 ez möhten selbe fürsten oder fürsten boten sîn.
 ‘ir ros diu sint so schœne, ir kleider harte guot:
 swannen si joch riten, si sint vil hôhe gemuot.’

Alsô sprach dô Hagene ‘als ich mich kan verstan, 3
 swie ich Sifriden noh nie gesehen hân,
 sô wil ich wol getrouwen: swie ez sich gefüeged hât,
 sô ist ez der recke, der dort sô hêrlîchen stât.

Er bringet niwe mære her in ditze lant. 4
 die küenen Nibelunge sluoc des heldes hant,
 Schilbunc und Nibelunc, diu richen küneges kint:
 er frumte starkiu wunder mit sîner grôzen krefte sint.

Dô der helt aleine ân alle helfe reit, 5
 er vant vor einem berge - daz ist mir wol geseit -
 bi Nibelunges horde vil manegen küenen man:
 die wâren im ê fremde, unz er ir kûnde dâ gewan.

Hort der Nibelunges der was gar getragen 6
 üz einem holn berge. nû hœret wunder sagen,
 wie in teilen wolden der Nibelunge man:
 daz sach der degene Sîfrit; den helt es wundern began.

Er kom zuo zin sô nâhen, daz er die recken sach 7
 und ouch in die degene. ir einer drunder sprach
 ‘hie kumt der starke Sîvrit, der helt von Niderlant.’
 vil seltsæniu mære er an den Nibelungen vant.

Den recken wol enpfingen Schilbunc und Nibelunc : 1
 mit gemeinem râte die edeln fürsten junc
 den schaz in bâten teilen den vil küenen man,
 und bâtens in sô lange, unz er inz loben began.

Er sach sô vil gesteines, als wir hœren sagen, 2
 hundert kanzwegene ez möhten niht getragen;
 noch mê des rôten goldes von Nibelunge lant:
 daz solde in allez teilen des küenen Sifrides hant.

Dô gâben si im ze miete daz Nibelunges swert. 3
 si wurden mit dem dienste vil übele gewert,
 den in dâ leisten solde der vil küene man.
 ern kundes niht verenden: dô wart der helt von in bestân.

Den schatz er ungeteilet beliben muose lân. 4
 dô begunden mit im striten der zweier küenege man:
 mit ir vater swerte, daz Palmunc was genant,
 erstreit ab in der küene den hort und Nibelunge lant.

Si hêten dâ ir friunde zwelf küene man, 5
 die starc als risen wâren: waz kundez si vervân?
 die sluoc sit mit zorne diu Sifrides hant,
 und recken sibenhundert dwanger von Nibelunge lant.

Dar zuo die rîchen küenege die sluoger beide tôt. 6
 er kom von Albrîche sit in grôze nôt:
 der wânde sine herren rechen dâ zehant,
 unz er die grôzen sterke sit an Sifride vant.

Done kunde im gestriten daz starke getwerc. 7
 alsam die lewen wilde si liefen an den bere,
 dâ er die tarnkappen Albrîchen ane gewan.
 dô wart des hordes herre Sifrit der vil küene man.

Die dâ getorsten strîten, die lâgen alle erslagen. 1
den schatz hiez er dô balde fûeren unde tragen
dâ in ê dâ nâmen die Nibelunges man:
Albrîch der vil starke dô die kameren gewan.

Er muos im swern eide, er dient im sô sîn kneht: 2
aller hande dienste was er im gereht.
sô sprach von Tronege Hagene. 'daz hât er getân:
alsô grôzer krefte nimêre recke gewan.

Noch weiz ich an im mêre, daz mir ist bekant. 3
einen lîntrachen sluoc des heledes hant.
dô badet er in dem bluote: des ist der helt gemeit
von alsô vester hiute, daz in nie wâfen sît versneit.

Nu suln wir den recken enpfâhen deste baz, 4
daz wir iht verdienen den sînen starken haz.
sîn lîp der ist sô kûene, man sol in holden hân:
er hât mit sînen ellen sô menegiû wunder getân.'

Dô sprach der kûnec rîche 'du maht wol haben wâr. 5
nu sich wie degenliche er stêt gein strîtes vâr,
er und die sîne degene, der wunderkûene man!
wir suln im begegebe hin nider zuo dem recken gân.'

'Daz mugt ir' - sprach dô Hagene - 'wol mit êren tuon: 6
er ist von hôhem kûene, eines rîchen kûneges suon.
er stêt in der gebære, mich dunket, wizze Krist,
ez ensîn niht kleiniu mære, darumbe er her geriten ist.'

Dô sprach der wirt des landes 'nu sî uns willekomen: 7
er ist edel unde kûene, daz hân ich wol vernomen.
des sol ouch er geniezen in Burgonden lant.'
dô gie der kûnec Gunther dâ er Sifriden vant.

Der wirt und sine recken enpfingen sô den gast,
 daz in an ir zühten wêneç iht gebrast.
 des begunde in nîgen der vil küene man:
 man sah in zühteclîche mit den sînen recken stân.

‘Mich wundert dirre mære,’ - sprach der wirt zehant -
 ‘von wanne ir, edel Sifrit, sît komen in daz lant,
 oder waz ir werbet ze Wormez an den Rîn.’
 dô sprach der gast zem küenege ‘daz sol iuch unverdaget sîn.

Mir wart gesaget mære in mînes vater lant,
 daz hie bi iu wâren - daz hêt ich gern erkant -
 die küenesten recken - des hân ich vil vernomen -,
 die ie küeneç gewünne: darumbe bin ich her bekommen.

Ouch hôt ich iu selben der degenheite jehen,
 daz man küeneç deheinen küener habe gesehen:
 des giht iu vil der liute über elliu disiu lant.
 nune wil ich niht erwinden, unz ez mir werde bekant.

Ich bin ouch ein recke und solde krône tragen:
 ich wil daz gerne füegen, daz si von mir sagen,
 daz ich habe von rehte liute unde lant.
 darumbe sol mîn ère und mîn houbet wesen pfant.

Nu ir sît sô küene, als mir ist geseit,
 jane ruoche ich, ist ez iemen liep oder leit:
 ich wil an iu ertwingen swaz ir mugt hân.
 lant unde bürge, daz sol mir wesen undertân.

Den küeneç hête wunder, und sîne man alsam,
 umbe disiu mære, diu er hie vernam,
 daz er des hête willen, er næme im sîniu lant.
 daz hörten sîne degene: dô wart in zürnen bekant.

4 'Wie hête ich daz verdienet,' - sprach Gunther der degen - 1
 'des mîn vater lange mit êren hât gepflegen,
 daz wir daz solden vliessen von iemannes kraft?
 wir liezen übel schînen, daz ouch wir pflegen ritterschaft.'

'Ich enwil es niht erwinden.' - sprach aber der küene man - 2
 'ez enmüge von dînem ellen dîn lant den vride hân,
 ich wils alles walten: und ouch diu erbe mîn,
 erwirbestuz mit ellen, diu suln von rehte wesen dîn.'

Dîn lant und ouch daz mîne suln geliche ligen: 3
 sweder unser einer am andern mac gesigen,
 dem sol ez allez dienen, die liute und ouch diu lant.'
 dâ wider redet aleine der herre Gêrnôt zehant.

'Wir hân des niht gedingen,' - sprach dô Gêrnôt - 4
 'daz wir iht lande ertwingen, daz iemen drumbe tót
 gelige vor recken handen. wir haben richiu lant:
 diu dient uns von rehte, ze nieman sint si baz bewant.'

In vil grimmen muote dâ stuonden die friunde sin. 5
 dô was ouch dar under der herre Ortwin:
 der sprach 'disiu suone ist mir von herzen leit;
 iu hât der starke Sifrit unverdient widerseit.'

Ob ir und iwer brüeder hêtet niht die wer, 6
 und ob er danne fuorte ein michel küneges her,
 ich trowte wol erstrîten, daz der küene man
 die grôzen übermüete von wâren schulden müese lân.'

daz zurnde harte sêre der helt von Niderlant: 7
 'sich ensol niht vermezzen wider mich dîn hant.
 ich bin ein künec rîche, sô bistu küneges man:
 ja enzimt dir niht mit strîte deheinen mînen genôz bestân.'

Nâch swerten rief dô sêre von Metzen Ortwin: 1
 er mohte Hagenen swestersun von Tronege vil wol sîn.
 daz der sô lange dagete, daz was dem kûnege leit.
 dô understuondez Gêrnôt, der ritter kûene und gemeit.

Er sprach ze Ortwine 'lât iwer zûrnen stân. 2
 uns enhât der herre Sifrit solhes niht getân:
 wir mûgen ez noch wol scheiden mit zûhten, dêst mîn rât,
 und haben in ze friunde, daz uns lobelîcher stât.'

Des antwurte Hagene 'uns mac wol wesen leit, 3
 allen iwern degenen, daz er ie gereit
 durch strîten her ze Rîne. er soldez haben lân:
 im hêten mîne herren solher leide niht getân.'

Dô sprach aber Sifrit, der kreftige man, 4
 'muote iuch daz, her Hagene, daz ich gesprochen hân,
 sô sol ich lâzen kiesên, daz die hende mîn
 wellent vil gewaldec hie zen Burgonden sîn.'

'Daz sol ich eine wenden' sprach dô Gêrnôt. 5
 allen sînen degenen reden er verbôt
 iht mit übermûete, des im wære leit.
 dô gedâht ouch Sifrit an die vil hêrlîchen meit.

'Wie zæme uns mit iu strîten?' - sprach aber Gêrnôt - 6
 'swaz helde nu dar under mûesen ligen tôt,
 wir hêtens lûtzel ère, ob wir ez wolden tuon.'
 des antwurte Sifrit, des kûnec Sigemundes suon:

'Warumbe bîtet Hagene und ouch Ortwin, 7
 daz er niht gâhet strîten mit den friunden sîn,
 der er alsô manegen hie ze lande hât?'
 si muosen rede vermîden: daz was Gêrnôtes rât.

'Irsult uns wesen willekomen,' - sprach Giselher daz kint - 1
 'und iwer hergesellen, die hie mit iu sint.
 wir suln iu gerne dienen, ich und die mäge min.'
 dô hiez man den gesten schenken Guntheres win.

Dô sprach der wirt des landes 'allez daz wir hân, 2
 geruochet irs näch êren, daz si iu undertân,
 und si mit iu geteilet, lip unde guot.'
 dô wart der herre Sivrit ein lützel senfter gemuot.

Dô hiez man in behalten allez ir gewant. 3
 man gab in herberge, die besten die man vant,
 Sivrides knappen: man schuof in guot gemach.
 den gast man sit vil gerne dâ zen Buregonden sach.

Man bôt im michel êre dar näch ze manegen tagen, 4
 tûsent stunden mêre danne ich iu künde gesagen.
 daz hête verscholt sîn ellen. ir sult wol wizzen daz:
 in sach vil lützel iemen der im wære gehaz.

Sich vlizzen kurzewile die kûnege und ouch ir man: 5
 sô was er ie der beste; swes man dâ began,
 des kunde im volgen niemen: sô michel was sîn kraft,
 sô si den stein wurfen oder schuzzen den schaft.

Swâ sô vor den frouwen durch ir hõfscheit 6
 kurzewile pfâgen die ritter vil gemeit,
 dâ sah man ie vil gerne den helt ûz Niderlant.
 er hêt âf hõhe minne sîne sinne gewant.

Ze hofe die schõenen frouwen vrâgeten mære, 7
 wer der stolze vrende recke wære:
 'sîn lip der ist sô schõene, vil rîche sîn gewant.'
 dô sprâchen ir genuoge 'ez ist der kûneec von Niderlant.'

Swes iemen dá begunde, des was sin lip bereit. 1
 er truoc in sinem muote ein minneclíche meit,
 und ouch in ein diu frouwe, die er noch niene gesach,
 diu im in heinlíche vil dicke gütlíche sprach.

Swenne ufem hofe wolden spilen dá diu kint, 2
 ritter unde knappen, daz sach vil dicke sint
 Kriemhilt durch diu venster, diu küneginne hêr.
 deheiner kurzewile bedorfes in den ziten mêr.

Und wesser, daz in sêhe die er in herzen truoc, 3
 dá hêt er kurzewile immer ane genuoc.
 solt ouch er si schouwen, ir sult gelouben daz,
 daz im in dirre werlde kunde nimmer werden baz.

Swenner bî den recken uf dem hofe stuont, 4
 alsô noch die liute durch kurzewile tuont,
 sô stuont sô minneclíche daz Sigelinde kint,
 daz in durch herzenliebe trûte manec frowe sint.

Er dáht ouch manege zite wie sol daz geschehen, 5
 daz ich die maget edele mit ougen müge gesehen,
 die ich von herzen minne und lange hân getân?
 diu ist mir vil vremde: des muoz ich dicke trûrec stân.

Swenne die kûnege ríche riten in ir lant, 6
 sô muosen ie die recken mit in al zehant.
 dá mit reit ouch Sifrit: daz was den frowen leit.
 er hêt durch hôhe minne dicke michel arebeit.

Sus wonter bî den herren - daz ist al wâr - 7
 in Guntheres lande volleclích ein jâr,
 daz er die minneclíchen die zíte niene gesach,
 von der im sit vil liebe und ouch vil leide geschach.

IV AVENTIURE

WIE SIVRIT MIT DEN SAHSEN STREIT.

Dô kômen fremdiu mære in Guntheres lant 1
 von boten, die im verre wâren dar gesant
 von unkunden recken, die in truogen haz,
 dô si die rede vernâmen leit was in inneclîche daz.

Die wil ich iu nennen: ez was Liudegêr 2
 ûzer Sahsen lande, ein richer fürste hêr,
 und ouch von Tenemarke der kûnec Liudegast,
 an dem sînen vriunden ganzer helfe nie gebrast.

Ir boten komen wâren in Buregonden lant, 3
 die ir widerwinnen hêten dar gesant.
 dô vrâgte man der mære die unkunden man:
 dô brâhte man si balde ze hofe für den kûnec stân.

Dô sprach der kûnec Gunther 'nu sit willekomen. 4
 wer iuch her habe gesendet, des enhân ich niht vernomen:
 daz sult ir lâzen hœren.' sprach der ritter guot.
 dô vorhten si vil sêre den grimmen Gunthers muot.

'Welt ir uns, kûnec, erlouben, daz wir iu mære sagen, 5
 diu wir iu dâ bringen, sone suln wir niht verdagen,
 wir nennen iu die herren, die uns here habent gesant:
 Liudegast und Liudegêr die wellent suochen iwer lant.

Ir habt ir haz verdienet. ir sult gelouben daz, 1
 daz iu die recken beide tragent grôzen haz.
 si wellent herverten ze Wormze an den Rîn ;
 in hilfet vil der degene : des sult ir âne zwifel sîn.

Inre zwelf wochen ir reise sol geschehen. 2
 habt ir iemen vriunde, daz lât vil balde sehen,
 die iu vriden helfen die bürge und iwer lant.
 hie wirt von in verhouwen vil manec hêrlîcher rant.

Oder welt ir mit in dingen, so entbietet ez in dar : 3
 sone ritent iu sô nâhen niht die starken schar
 ze Wormez zuo dem Rîne âf herzenlichiu leit,
 dâ von verderben mûezen die guoten ritter gemeit.

‘Nu bîtet eine wîle,’ - sprach der kûnec guot - 4
 ‘unz ich mih baz versinne : ich kûnd iu mînen muot.
 hân ich getriwer iemen, die sol ich niht verdagn :
 disiu starken mâere sol ich mînen friwenden sagen.’

Dem kûnege disiu mâere wâren leide genuoc : 5
 die rede er tougenliche in sîme herzen truoc.
 er hiez gewinnen Hagenen und ander sîne man,
 und bat ouch harte balde ze hofe nâch Gêrnôte gân.

Dô kômen im die besten, swaz man der dâ vant. 6
 er sprach ‘man wil uns suochen her in unser lant
 mit starken herverten : daz lât iu wesen leit.
 ez ist gar âne schulde, daz si uns habent widerseit.’

‘Daz wern wir mit swerten.’ - sprach dô Gêrnôt - 7
 ‘dâ sterbent wan die veigen, die mûezen ligen tôt.
 dar umbe ich niht vergezzen mac der êren mîn.
 die unser widerwinnen suln uns willekomen sîn !’

Dô sprach der starke Hagene 'daz endunket mich niht guot. 1
Liudegast und Liudegêr die tragent übermuot. 2
wir mugen uns niht besenden in sô kurzen tagen: 3
- sô sprach der küene recke - 'wan muget irz Sîfride sagen?'

Die boten herbergen hiez man in die stat. 4
swie viênt man in wære, doch schône ir pflegen bat 5
Gunther der rîche - daz was wol getân -, 6
unz er ervant an vriunden, wer im wolde gestân. 7

Dem kûnege in sînen sôrgen was iedoch vil leit. 8
dô sach in trourende ein degen vil gemeit, 9
der niht wizzen kunde waz im was geschehen. 10
dô bat er im der mære den kûneec Gunther verjehen. 11

'Mich wundert harte sêre,' - sprach dô Sîvrit - 12
'wie habt ir sô verkêret die vrêliche sit, 13
der ir nu mit uns lange habt alher gepflegen?' 14
des antwurt im dô Gunther, der vil zierliche degen: 15

'Jane mag ich allen liuten die swære niht gesagen, 16
die ich muoz tougenliche in mîme herzen tragen. 17
man sol stæten friunden klagen herzen nôt. 18
diu Sîfrides varwe wart beidiu bleich unde rôt. 19

Er sprach zuo dem kûnege 'habt uf mînen eit: 20
ich sol iu helfen wenden elliu iweriu leit. 21
welt ir vriunde suochen, der sol ich einer sîn, 22
und trowe ez wol mit êren vol bringen an daz ende mîn. 23

'Nu lône iu got, her Sîvrit; diu rede mich dunket guot: 24
und ob mir nimmer helfe iwer ellen getuot, 25
ich frewe mich doch der mære, daz ir mir sît sô holt. 26
lebe ich deheine wile, ez sol werden wol verscholt. 27

Ioh wil iuch läzen hoeren, warumbe ich trúrec stân :
 von boten miner vînde ich daz vernomen hân,
 daz si mich suochen wellen mit herverten hie.
 daz getâten uns noch degene her zuo disen landen nie.

‘Daz lât iuch ahten ringe,’ - sprach dô Sîvrit -
 ‘und senftet iwer mûote; tuot des ich iuch bite :
 lât mich iu erwerben ère und ouch den frumen,
 è daz iwer vînde her ze disen landen kumen.

Swenne iwer starke vînde zir helfe möhten hân;
 drîzec tûsent degene, sô wold ich si bestân,
 hêt ich niwan tûsent: des lât iuch an mich.
 dô sprach der kûnec Gunther ‘daz dien ich immer umbe dich.’

‘Sô heizet mir gewinnen tûsent iwer man
 - sit daz ich der mînen bî mir niht enhân
 niwan zwelf degene -, sô wer ich iwer lant.
 iu sol immer dienen mit triwen Sîfrides hant.

Des sol uns helfen Hagene und ouch Ortwin,
 Dancwart unde Sindolt, die lieben recken dîn;
 ouch sol dâ mit rîten Volkêr der kûene man:
 der sol den vanen fûeren; baz ihs nieman engan.

Nu lât die boten rîten wider in ir lant.
 daz si uns dâ sehen schiere, daz tuo man in bekant,
 sô daz unser bûrge vride müezen hân.
 dô hiez der kûnec besenden beidiu mâge unde man.

Die boten Liudegêres ze hove giengen dô.
 daz si ze lande solden des wâren si vil vrô.
 dô bôt in rîche gâbe Gunther der kûnec guot,
 und schuof in sîn geleite des stuont in hôhe der muot.

‘Nu saget’ - sprach dô Gunther - ‘den vianden mîn,
 si mügen mit ir reise wol dá heime sîn;
 wellent aber si mich suochen her in mîniu lant,
 mîrn zerinne mîner friunde, in wirdet arbeit erkant.’

Den boten rîche gábe man dô für truoc:
 der hêt in ze gebene der rîche kûnec genuoc.
 dine torsten niht versprechen die Liudegêres man.
 urloup si dô nâmen und fuoren vrêlichen dan.

Dô die boten wâren ze Tenemarke komen,
 und der kûnec Liudegast hête daz vernomen
 waz si ze Rîne redeten, als im daz wart geseit,
 ir starkez übermüeten was im âne mâze leit.

Man saget im, daz si hêten manegen kûenen man:
 ‘dar under sach man einen vor Gunther stân,
 der was geheizen Sîfrit, ein helt ûz Niderlant.’
 ez leidete Liudegaste, dô er diu mære reht ervant.

Dô die von Tenemarke ditze hórten sagen,
 dô îlten si der helfe deste mê bejagen,
 só daz der kûnec Liudegast sîner mâge unde man
 wol zweinzec tûsent degene zuo der reise gewan.

Dô besande ouch sich von Sahsen der kûene Liudegêr,
 unz si vierzec tûsent hêten unde mêr,
 mit den si wolden rîten in Guntheres lant.
 dô heten ouch sich hie heime die drie kûenege besant

Mit den Buregonden und ander ir hôhen man,
 die si durch urluige fûeren wolden dan.
 si îlten sich bereiten: des gie den helden nôt.
 dar under muosen degene sider kiesen den tót.

Si vliżzen sich zer reise, dô si wolden dane. 1
 Volkêr dem küenen bevolhen wart der vane,
 dô sie varen wolden ze Wormze über Rîn:
 Hagene der starke der muose scharmeister sîn.

Dâmit reit ouch Sindolt unde Hûnolt, 2
 die wol gedienen kunden rîcher kûnege golt:
 Dancwart der snelle und ouch Ortewîn
 die mohten wol mit êren in der herverte sîn.

‘Her kûnec, sît hie heime.’ - sprach dô Sîvrit - 3
 ‘sît daz iwer recken mir wellen volgen mit,
 belîbet bî den frouwen und habet hôhen muot:
 ich trowe iu wol beherten beidiu êre unde guot.

Die iuch dâ wolden suochen ze Wormze an den Rîn, 4
 daz sol ich wol behûeten, daz si iu iht schade sîn.
 wir sulen in gerîten sô nâhen in ir lant,
 daz in ir übermûeten werde in sorgen erwant.’

Von Rîne si durch Hessen mit ir helden rîten 5
 gegen der Sahren lande: dâ wart sît gestrîten.
 mit roube und ouch mit brande wuosten si daz lant,
 daz ez den fûrsten beiden wart mit arbeit bekant.

Si kômen ûf die marke: die knehte zogeten dan. 6
 Sîvrit der vil starke vrâgen dô began:
 ‘wer sol des gesindes uns nu hûeten hie?’
 jâne wart den Sahren gerîten schedelîcher nie.

Sie sprâchen ‘lât der tumben hûeten ûf den wegn 7
 den vil küenen marschalch: der ist ein sneller degen.
 wir vliessen deste minre von Liudegêres man.
 lât in und Ortwînen hie die nâchhuote hân.’

‘Sô wil ich selbe rîten,’ - sprach Sifrit der degen - 1
 ‘unde wil der warte gein den vînden pflegen,
 unz ich vil rehte ervinde, wâ die recken sint.’
 dô wart gewâfent balde der schoenen Sigelinde kint.

Daz volc bevalh er Hagene, dô er wolde dan, 2
 und ouch Gêrnôte, dem vil kûenem man.
 dô reit er eine dannen in der Sahsen lant,
 dâ er diu rehten mære wol mit êren sit ervant.

Dô sah er here daz grôze, daz ûf dem velde lac, 3
 daz wider sîner helfe mit unfuoge wac:
 des was wol vierzec tûsent oder dannoch baz.
 der helt in hôhem muote sach vil frœlichen daz.

Dô hêt ouch sich ein recke von den vînden dar 4
 erhaben ûf die warte; der was ze vlîze gar:
 den sach der herre Sifrit, und in der kûene man.
 ietweder dô des andern mit nide goumen began.

Ich sage iu, wer der wære, der hie der warte pflac, 5
 ein liehter schilt von golde im vor der hende lac.
 ez was der kûnec Liudegast: der huote sîner schar.
 dirre gast vil edele ernante vil hêrlîchen dar.

Nu hête ouch in her Liudegast vîentlîch erkorn, 6
 ir ros si nâmen beide zen sîten mit den sporn;
 si neigten ûf die schilde die schefte mit ir kraft:
 des wart der kûnec hêre mit grôzen sorgen behaft.

Diu ros nâch stiche truogen diu rîchen kûneges kint, 7
 mit hurte fûr ein ander, sam si wæte ein wint.
 mit zeumen wart gewendet vil ritterlîchen dan:
 mit swerten ez ersuochten die zwêne grimme starke man.

Dô sluoc der herre Sifrit, daz al daz velt erdöz: 1
 dô stoup ûz dem helme, sam von brenden gröz,
 die heizen fiures vunken von des recken hant.
 dô streit vil mehteclichen der voget ûz Niderlant.

Dô sluoc ouch im her Liudegast vil manegen grimmen slac: 2
 ir ietwederes ellen ûf schilden vaste lac.
 dô hêten dar gehüetet wol drizec siner man:
 ê im der helfe kœme, den sic doch Sivrit gewan

Mit drin starken wunden, die er dem kûnege sluoc 3
 durch eine liechte brünne, diu was guot genuoc.
 daz swert an sînen ecken brâht ûz wunden bluot:
 des gewan der kûnec Liudegast einen trûrigen muot.

Er bat sich leben lâzen, und bôt im sîniu lant, 4
 und sagt im, daz er wære Liudegast genant.
 dô kômen sine recken: die hêten wol gesehen
 waz dô von in beiden ûf der warte was geschehen.

Dô er in danne fuorte, dô ward er an gerant 5
 von drizec sînen mannen: dô wert des heledes hant
 sînen rîchen gîsel mit ungefüegen slegen.
 sît tet schaden mære Sifrit der ûz erwelte degen.

Die drizec er ze tôde vil werliche sluoc. 6
 er liez ir leben einen: balde er reit genuoc,
 und sagte hin diu mære, waz hie was gescehn;
 ouch mohte mans die wârheit an sînem rôtem helme sehn.

Den von Tenemarke was vil grimme leit, 7
 ir herre was gevangen, dô in daz wart geseit.
 man seit ez Liudegêre: toben er began
 von ungefüegem zorne, wand im was leide getân.

Liudegast der rîche was gefüeret dan 1
 von Sifrides gewalte zuo Guntheres man.
 er bevalh in Hagene: der küene recke guot,
 dô er vernam diu mære, dô ward er frælich genuot.

Er hiez der Burgonden ir vanen binden an. 2
 'wol ûf!' - sô sprach Sivrit - 'hie wirt noch mê getân.
 è sich der tac verende, sol ich habn den lip,
 daz müet in Sahsen lande etliches guoten recken wip.

Ir helde von dem Rîne, ir sult mîn nemen war: 3
 ich kan iuch wol geleiten in Liudegêres schar.
 dà seht ir helme houwen von guoter helede hant,
 è daz wir wider wenden in der Burgonden lant.'

Zen rossen gâhte Gêrnôt und ouch sîne man. 4
 Volkêr der küene den vanen zuchte dan,
 der starke videlære: dô reit er vor der schar.
 dô was ouch daz gesinde ze strîte hêrlichen gar.

Sine fuorten doch niht mære niwan tûsent man, 5
 dar über zwelf recken. stieben dô began
 diu molte von den strâzen: si riten über lant.
 dô sach man von in schînen vil manegen hêrlichen rant.

Dô wâren ouch die Sahsen mit ir scharn komen, 6
 mit swerten wol gewahsen, als wir hân sît vernomen:
 diu swert diu sniten sêre den recken an der hant.
 dô wolden si den gesten wern bürge unde lant.

Der herren scharmeister daz vole dô fuorten dan. 7
 dà was ouch komen Sifrit mit den sînen man,
 die er dà mit im brâhte ûzer Niderlant.
 des tages wart in sturme vil manec bluotiger rant.

Sindolt unde Hünolt und ouch Gernôt, 1
 die vrumten in dem strîte vil manegen helt tôt,
 ê si daz reht erfunden wie küene was ir lîp.
 daz muose sît beweinen vil manec wêtlîchez wîp.

Volkêr unde Hagene und ouch Ortwin, 2
 die lascten im strîte vil maneges helmes schîn
 mit vliezendem bluote: ez wâren küene man.
 dâ wart von Dancwarte vil michel wunder getân.

Die von Tenemarke versuochten wol ir hant. 3
 dô hôrte man von hurte erdiezen manegen rant,
 und ouch von scharpfen swerten, der man dâ vil gesluoc.
 die strîtküenen Sahren tâten scaden ouch genuoc.

Dô die von Burgonden drungen in den strît, 4
 von in wart verhouwen vil manec wunde wît:
 dô sah man über setele vliezen daz bluot.
 sus wurben nâch den êren die ritter küen unde guot.

Man hôrte lût erhellen den helden an der hant 5
 diu vil scharpfen wâfen dâ die von Niderlant
 drungen nâch ir herren in die herten schar:
 si kômen degenliche mit samt Sifride dar.

Volgen der von Rîne niemen man im sach. 6
 man mohte kiesen vliezen den bloutigen bach
 durch die vil liechten helme von Sifrides hant,
 unz er Liudegêren vor sînen hergesellen vant.

Drie widerkêre hêt er nu genômen 7
 des hers an ein ende. nu was ouch Hagene komen:
 der half im wol ervollen in strîte sînen muot.
 des tages muose ersterben von in vil manec ritter guot.

Dô der starke Liudegêr Sifriden vant,
 und daz er sô hôhe truoc an siner hant
 daz vil scharpf wâfen, und ir sô manegen sluoc,
 dar umbe wart der küene vor leide zornec genuoc.

Dô wart ein michel dringen und grôz der swerte klanc,
 dô ir ingesinde zuo zein ander dranc.
 dô versuochten sich die recken beidenthalben baz,
 die schar begunden wichen: sich huop dâ grêzlicher haz.

Dem vogete von den Sahren was daz wol geseit,
 sîn bruoder was gevangen: daz was im harte leit.
 niht wesser daz ez tæte daz Sigelinde kint:
 man zêh es Gêrnôten vil wol ervant er ez sint.

Die slege Liudegêres die wâren alsô starc,
 daz im under satele strûchte daz marc.
 dô sich daz ros erholte, der küene Sivrit
 gewan in dem sturme einen vreislichen sit.

Des half im wol Hagene und ouch Gêrnôt,
 Ortwin unde Volkêr: des lag ir vil dâ tôt.
 Sindolt unde Hânolt, die zwêne küene man,
 von den vil manec frouwe schaden grôzen dâ gewan.

In sturme ungescheiden wârn die küene gêr,
 dô sah man über helme vliegen manegen gêr
 durch die liechten schilde von der degene hant:
 man sach dâ var nâch bluote manegen hêrlîchen rant.

In dem starken sturme erbêizte manec mân
 nider von den rossen. ein ander liefen an
 Sifrit der küene und ouch Liudegêr:
 dâ striten wol nach êren die heledê kûen unde hêr.

Dô flouc daz schiltgespenge von Sifrides hant. 1
 den sig gedâht erwerben der helt von Niderlant
 an den kûenen Sahsen: die dolten ungemach.
 hei, waz dâ liechter ringe der snelle Danewart zebrach.

Dô hêt der herre Liudegêr ûf eime schilde erkant 2
 gemâlet eine krône vor Sifrides hant.
 wol wesser daz ez wære der übermüete man:
 der helt zuo sînen friunden starke ruofen began:

‘Geloubet iuch des sturmes, måge unde man! 3
 sun den Sigemundes ich hie gesehn hân:
 von Niderlant den starken hân ich hie bekant.
 in hât der übel tiufel her zen Sahsen gesant.’

Die vanen wurden lâzen in dem sturme nider. 4
 frides er dô gerte: des werte man in sider,
 doch muoser werden gîsel in Guntheres lant.
 daz hêt an im ertwungen des kûenen Sifrides hant.

Mit gemeinen râte sô liezen si den strit. 5
 dÛrchel vil der helme und ouch der schilde wit
 si leiten von den handen: swaz sô man der vant,
 die truogen bluotes varwe von der Buregonden hant.

Si viengen swen si wolden: des hêten si gewalt. 6
 Gêrnôt der herre und Hagene ein degen balt
 die wunden hiezen bâren. si fuorten mit in dan
 zuo den Buregonden fünf hundert wætlicher man.

Die sigelôsen recken ze Tenemarken riten. 7
 do enhêten ouch die Sahsen sô hôhe niht gestriten,
 daz man in lobes jæhe: daz was den heleden leit.
 dô wurden ouch die veigen von friunden sêre gekleit.

Sie hiezen daz gewäfen wider soumen an den Rîn. 1
 ez hête wol erworben mit den recken sîn
 Sîfrîr der starke hêt ez guot getân:
 des im dô jehen muosen alle Guntheres man.

Gegen Wormez sande der herre Gêrnôt: 2
 heim ze sîme lande den friunden er enbôt,
 wie im gelungen wære und den sînen man.
 ez hêten die vil küenen wol nâch êren getân.

Die garzûne liefen: von den wart ez geseit. 3
 dô freuten sich die schœnen, die ê hêten leit,
 der vil lieben mære, diu in wâren komen.
 dâ wart von edeln frouwên vil michel frâgen vernomen,

Wie gelungen wære des rîchen küneges man. 4
 man hiez der boten einen zuo Kriemhilde gân.
 daz geschach vil tougen: jane torstes überlût,
 wan si hête dar under ir vil liebez herzen trût.

Dô si den boten kumenden zir kemenâten sach, 5
 Kriemhilt diu vil schône gûetlichen sprach
 'sag an liebiu mære: jâ gib ich dir mîn golt.
 tuostuz âne triegen, ih wil dir immer wesn holt.

Wie schiet ûz dem strîte mîn bruoder Gêrnôt 6
 und ander mine friwende? ist mir iht maneger tôt?
 wer tet dâ daz beste? daz soltu mir sagen?
 dô sprach der bote biderbe 'wir hêten nînder eimen zagen.

Ze vorderst am strîten reit niemen else wol, 7
 vil edeliu küneginne, - sît manz iu sagen sol
 sô der gast vil küene ûzer Niderlant:
 dâ worhte michel wunder des herren Sîvrîdes hant.

Swaz die recken alle in strite hânt getân, 1
 Dancwart und Hagene und anders küneges man,
 swaz iemen streit nâch êren, daz ist gar ein wint
 wider Sifriden, des künec Sigemundes kint.

Si frumten in dem sturme der helde vil erslagen, 2
 doch enkünd iu daz wunder niemen wol gesagen,
 waz dâ worhte Sifrit, swenn er ze sturme reit:
 den vrouwen an ir mâgen frumet er diu grœzlichen leit.

Ouch muoste dâ beliben vil maneges wibes trût. 3
 sine slege man hôrte uf helmen alsô lût,
 daz si von wunden brâhten daz vliezende bluot.
 er ist in allen tugenden ein ritter kûen unde guot.

Dâ hât ouch vil begangen von Metzen Ortewin: 4
 swaz er ir mohte erlangen mit den handen sîn,
 die muosen wunt beliben oder meistec tût.
 dâ tet iwer bruder die aller grœzisten nôt,

Diu immer in den stürmen künde sîn geschehn. 5
 man muoz der wârheite den ûzerwelten jehn:
 die stolzen Burgonden die habent sô gevarn,
 daz si vor allen schanden ir êre kûnnen wol bewarn.

Man sach dâ von ir handen vil manegen satel blôz, 6
 dâ von den liechten swerten daz velt vil lût erdôz.
 die recken von dem Rîne die habent sô gestriten,
 daz ez ir vîanden wære bezzer vermiten.

Die kûenen Tronegære die tâten grôziu leit, 7
 dâ man mit volkes kreften zuo zein ander reit:
 dâ vrumte manegen tûten des kûenen Hagenen hant,
 des vil ze sagene wære her zer Burgonden lant.

Sindolt unde Hünolt, die Gêrnôtes man 1
 und Volkêr der vil küene, die hântz só guot getân,
 daz ez Liudegêre mac immer wesen leit,
 daz er den minen herren hêt ze Rîne widerseit.

Strit den aller höhsten, der inder dâ geschach, 2
 ze jungest und zem êrsten, den ieman gesach,
 den tet vil willeliche diu Sifrides hant.
 er bringet riche gîsel in daz Guntheres lant.

Die twanc mit sînen ellen der wâtliche man, 3
 des ouch der küene Liudegast schaden vil gewan,
 und ouch von den Sahren der küene Liudegêr.
 nu hoeret miniu mære, vil edeliu küneginne hêr.

Si hât gevangen beide diu Sifrides hant. 4
 ez enwart nie meneger gîsel brâht in ditze lant,
 só nu von sînen schulden kumet an den Rîn.
 ir enkunden disiu mære nimmer lieber gesin.

Man bringet der gesunden fünf hundert oder baz, 5
 und der verchwunden, frowe, wizzet daz,
 wol ahzec rossebære in Burgonden lant,
 die meistec hât verhouwen des küenen Sifrides hant.

Die durch ir übermüeten widersageten an den Rîn, 6
 die müezen nu gevangen die Guntheres sîn.
 die bringet man mit freuden her in ditze lant.
 da erblüet ir liehtiu varwe, dô si diu mære reht ervant.

Ez wart ir lieht anlütze vor liebe rôsen rôt, 7
 dô mit liebe was gescheiden ûz der grôzen nôt
 der minneliche recke, Sivrit der junge man.
 si vreit ouch sich ir frunde: daz was von schulden getân.

Dô sprach diu minneclîche 'du hâst mir wol geseit: 1
 du solt haben dar umbe ze miete richiu kleit,
 und zehn marc von golde heiz ich dir tragen.'
 des mag man solchiu mære richen frowen gerne sagen.

Man gab im sîne miete, daz golt und ouch diu kleit. 2
 dô gie an diu venster vil manec schoeniu meit.
 si warten ûf die strâze: riten man dô vant
 vil der hôchgemuoten in der Burgonden lant.

Dâ kômen die gesunden, die wunden tâten sam. 3
 si mohten grûezen horen von vriunden âne scham.
 der wirt gein sînen gesten vil vroelîchen reit:
 mit vreuden was verendet daz sîn vil grœzliche leit.

Do enpfie er wol die sîne, die vremen den tet er sam; 4
 wan dem richen kûnege anders niht enzam
 wan danken gûetliche, die im wâren kômen,
 daz si den sig nâch êren in sturme hêten genomen.

Gunther bat im mære von sînen friunden sagen, 5
 wer im an der reise ze tôde wær erslagen.
 dô hêt er vlorn niemen niwan sehzec man:
 verklagen man die muose, sô sît nâch heleden ist getân.

Die gesunden brâhten verhowen manegen rant 6
 und helme vil verschrôten in Guntheres lant.
 si stuonden von den rossen nider für den sal:
 ze liebem antpfange man hôrte vroelîchen schal.

Dô hiez man herbergen die wegemüeden man. 7
 der kûneec sînen gesten danken vil began:
 er hiez der wunden hûeten und schaffen in gemach,
 wol man sîne tugende an sînen vianden sach.

Er sprach ze Liudegère 'nu sît mir willekomen. 1
 ich hân von iwern schulden schaden vil genomen:
 der wirt mir nu gebüezet, ob ich gelücke hân.
 got lône mînen friunden: si hânt mir liebe getân.'

'Ir mugt in gerne danken.' - sprach dô Liudegêr - 2
 'alsô hôher gisel gewan nie künec mêr.
 umbe schoene huote wir bieten michel guot,
 daz ir genædeclîche an mir und mînen friunden tuot.'

'Ich wil iuch ledec lâzen' - sprach der künec - 'gên. 3
 daz mîne vîande hie bi mir bestên,
 des wil ich haben bürgen, daz si mîniu lant
 iht rûmen âne hulde.' des sichert dô ir bêder hant.

Man brâhte si ze ruowe und schuof in guot gemach. 4
 den wunden man gebettet vil gütlichen sach:
 man schancte den gesunden met und guoten wîn.
 dô kunde daz gesinde nimmer vrœlicher sîn.

Ir zerhowen schilde man behalten truoc. 5
 bluotiger setele der was dà genuoc:
 die hiez man ouch verbergen, daz weinten niht diu wip.
 dô kom hermüede vil maneges küenen ritters lîp.

Der wirt pflac sîner geste vil grœzliche wol: 6
 der vrenden und der kunden was daz lant dô vol.
 man hiez der sêre wunden vil gütliche pfegn:
 dô was ir übermüeten vil harte ringe gelegn.

Die erzenie kunden, den bôt man grôzen solt, 7
 silber âne wâge, dar zuo daz liehte golt,
 daz si die helde nerten nâch des strîtes nôt.
 dar zuo der künec den gesten gâbe grœzliche bôt.

Die wider heim ze hûse der reise hêten muot, 1
 die bat man noch beliben, alsô man friunde tuot.
 der kûnec gie ze râte, wier lônste sinen man:
 si hêten sinen willen nâch grôzen êren getân.

Dô sprach der herre Gêrnôt man sol si rîten lân: 2
 über sehs wochen, si in kunt getân,
 daz si komen widere zeiner hôchgezît:
 so ist maneger geheilet, der nu vil sere wunder lit.

Dô gert ouch urloubes der helt von Niderlant. 3
 dô der kûnec Gunther den willen sîn ervant,
 er bat in minneclîche noch bi im bestân:
 wan durch Kriemhilde, sô wær ez nimmer getân.

Darzuo was er ze rîche, daz er iht næme solt; 4
 er hêt daz wol verdienet: der kûnec was im holt,
 sam wâren sîne mâge: die hêten daz geschn,
 waz von sînem ellen in dem sturme was geschehn.

Durch der schœnen willen gedâht er noch bestân, 5
 die er vil gerne sâhe. sît wart ez getân
 al nâch sînem muote: si wart im wol bekant.
 sît reit er vrœlîche heim in sînes vater lant.

Der wirt hiez zallen zîten ritterschefte pfegn: 6
 daz tet dô willeclîche vil manec junger degn.
 die wîle hiez er sidelen vor Wormze an den sant
 den, die im komen solden zuo der Burgonden lant.

In den selben zîten, dô si nu solden komen, 7
 dô hêt diu vrowe Kriemhilt diu mære wol vernomen,
 er wolde hôchgezîten mit mâgen unde man.
 dô wart vil michel vlîzen von schœnen vrouwen getân

Mit wæte und mit gebende, daz si dâ solden tragen. 1
 Uote diu vil rîche diu mære hôte sagn
 von den stolzen degenen, die dâ solden komen.
 dô wart ûz der valde guoter wæte vil genomen.

Durch ir kinde liebe hiez si dô snîden kleit: 2
 dâ mit wart gezieret vil frowen und manec meit
 und vil der jungen recken ûz Burgonden lant.
 dâ wart ouch vil der vrenden bereitet hêrlîch gewant.

V AVENTIURE

WIE SIVRIT KRIEMHILT ALRËSTE ERSACH.

Man sach si tegelîche nu rîten an den Rîn, 3
 die zer hôchgezîte gerne wolden sîn,
 die durch der kûnege liebe kômen in daz lant.
 man gap dâ genuogen bêdiu ros und ouch gewant.

In was ir gesidele allen wol bereit, 4
 den hôhsten und den besten, als uns daz ist geseit,
 zwein und drîzec fûrsten dâ zer hôhgezît:
 dâ zierte sich engene vil manec juncfrowe sît.

Ez was vil unnûezec Gîselher daz kint: 5
 die vrenden und ir mâge vil gûtliche sint
 enpfînger unde Gêrnôt und ouch ir beider man.
 jâ gruozten si die degene als ez nâch êren was getân.

Die goltvarwen setele si brähten in daz lant, 1
 die zierlichen schilde und hêrlîch gewant,
 durch des wirtes liebe zuo der hôhgezît.
 vil manegen ungesunden sach man vrelîchen sit.

Die in den peyen lâgen und hêten wunden nôt, 2
 die muosen des vergezzen, wie herte was der tôt:
 die siechen ungesunden die muosen si verklagen.
 si freuten sich der mære gein der hôhgezîte tagen,

Wie si lebn wolden dâ zer wirtschafft. 3
 wünne âne mâze mit freuden überkraft
 hêten al die liute, swaz man ir dâ vant:
 des huop sich michel wünne über al daz Gunthers lant.

An einem pfingestmorgen sach man für gân 4
 gekleidet wünneclîche vil manegen kûenen man,
 fünf tûsent oder mære, dâ zer hôhgezît,
 der lop vil volleclîche an den Burgonden lît.

Der wirt der hêt die sinne, im was wol bekant, 5
 wie rehte herzenlîche der helt von Niderlant
 sîne swester trûte, swier si niene gesach,
 der man sô grôzer schene vor allen juncfrowen jach.

Er sprach 'nu râtet alle, mâge und mine man, 6
 wie wir die hôhgezîte sô lobelîche hân,
 daz man uns drumbe iht schelte her nâch dirre zît:
 ein ieslich lop vil stæte ze jungest an den werken lît.'

Dô sprach ûzer Metzen der degen Ortewin 7
 'welt ir mit vollen êren zer hôhgezîte sîn,
 sô sult ir lâzen schouwen diu wünneclîchen kint,
 die mit sô vollen êren hie zen Burgonden sint.

Waz wære mannes wänne, des freute sich ir lip, 1
 ez entateten schone meide und hêrlichiu wip?
 ir lâzet iwer swester für iwer geste gån.
 der rât was ze liebe vil manegem degene getân.

Des wil ich gerne volgen, sprach der künec dô. 2
 alle die ez erfunden die wärens harte vrô.
 man saget ouch daz froun Uoten und ir tohter wolgetân,
 daz si mit ir megeden hin ze hove solde gån.

Dô wart ûz den kisten gesuochet guot gewant: 3
 swaz man in der valde der liechten wæte vant,
 porten unde pouge, des was in vil bereit.
 sich zierte minneclîche vil manec wætlichiu meit.

Vil manec recke tumber des tages hête muot, 4
 daz er an ze sehene den frowen wære guot,
 daz er dâ für nâme niht eines küneges lant:
 si sâhen die vil gerne, die si hêten nie bekant.

Dô hiez der künec rîche mit siner swester gån 5
 die ir dienen solden, wol hundert siner man,
 ir und siner muoter: die truogen swert enhant.
 daz was daz hofgesinde ûzer Burgonden lant.

Uoten die vil rîchen die sah man mit ir komen: 6
 diu hête frowen schone geselleclîch genomen
 wol hundert oder mære, die truogen rîchiu kleit.
 nu gie mit Kriemhilde vil manec wætlichiu meit.

Von einer kemenâten sach man si alle gån. 7
 dâ wart vil michel schouwen von recken dar getân,
 die des gedîngen hêten, ob künde daz gescehn,
 daz si Kriemhilde solden vrêlichen sehen.

Nu gie diu minneclîche alsô der morgenrôt 1
tuot ûz den trûeben wolken. dà schiet von maneger nôtt
der si dà truog in herzen und lange hêt getân:
er sach die minneclîchen nu vil hêrlîchen stân.

Jâ lûht ir von ir wæte vil manec edel stein, 2
ir rôsenrôtiu varwe vil minneclîche schein.
swer sô wûnschen solde, der enkûnde niht gejeht,
daz er in dirre werlde hæte schœners iht geseht.

Sam der liechte mâne vor den sternen stât, 3
des schîn sô lûterliche ab den wolken gât,
dem stuont si vil gelîche vor maneger frowen guot:
des wart vil wol gehœhet den zieren heleden der muot.

Die rîchen kamerære die sach man vor in gân: 4
die hôchgemuoten degene dine wolden daz niht lân,
sine drungen dà si sâhen die minneclîchen meit:
Sivride dem edelen was beidiu lieb unde leit.

Er dâht in sinem muote wie kunde daz ergân, 5
daz ich dich minnen solde, als ich gedingen han?
sol aber ih dich vrenden, sô wær ich sanfter tôt.
er hête von ir schulden tougen lieb unde nôtt.

Dô stuont sô minneclîche daz Sigemundes kint, 6
sam er entworfen wære an ein permint
von guoter meister listen, als man im dô jach,
daz man helt deheinen sô wætlîchen nie gesach.

Die mit Kriemhilde giengen, die hiezen von den wegen 7
wîchen allenthalben: daz leiste manec degn.
diu hôhe tragenden herzen freuten manegen lîp:
man sach in grôzen zûhten vil manec hêrlîchez wîp.

Dô sprach von Burgonden der herre Gêrnôt 1
 'der iu sînen dienest sô minneclîche bôt,
 Gunther, lieber bruoder, dem sult ir tuon alsam
 vor allen disen degenen: des râts ich nimmer mich gescham.

Ir heizet Sifriden, den Sigemundes suon, 2
 gên zuo Kriemhilde, ob ir wol wellet tuon.
 diu nie gegruozte recken, diu sol in grüezen pfegn,
 dâ mit wir zeinem vriunde habn den zierlichen degn.

Dô giengens wirtes mâge dâ man den recken vant. 3
 si sprâchen zuo dem kûnege ûzer Niderlant
 'der wirt hât iu erloubet: ir sult ze hove gân.
 sîn swester sol iuch grüezen: daz ist zen êren iu getân.'

Dô wart der degen guote der mâere vil gemeit. 4
 jâ truoger in dem muote lieb âne leit,
 daz er sehn solde daz wûnneclîche kint.
 mit minneclîchen tugenden si gruozte Sifriden sint.

Dô si den hôchgemuoten vor ir stênde sach, 5
 dô enzunde sich ir varwe: diu schene maget sprach
 'sît willekomen, her Sifrit, ein edel ritter guot.'
 dô wart im von dem gruoze vil wol gehæhet der muot.

Er neigir vlîzeclîche: bi henden si in vie. 6
 wie rehte minneclîche der recke bi ir gie!
 mit lieben ougenblicken ein ander sâhen an
 der herre und ouch diu frouwe: daz wart tougenlîch getân.

Wart iht dâ friuntliche getwungen wîziu hant 7
 von herzenlieber minne, daz ist mir unbekant:
 doch enmac ich niht gelouben, daz ez wûrde lân;
 si hêt im holden willen harte schiere kund getân.

Bî der sumerzîte und gein des meien tagen 1
 kunder in sinem herzen nimmer mê getragen
 minnelîcher freuden, denn er ir dô gewan,
 dô im diu gie sô nâhen, die er ze trûte wolde hân.

Dô gedâhte manec recke 'und wær mir sam geschehen, 2
 daz ich ir gienge in hende, sam ich in hân gesehn,
 oder bî ze ligene! daz liez ich âne haz,'
 ez gediente noch nie recke nâch einer kûneginne baz,

'Von swelher kûnege landen die geste kômen dar, 3
 die nâmen al gemeine niwan ir zweier war.
 ir wart erlobet kûssen den wætlichen man:
 im wart bî sinem lebene nie sô liebegetân.

Der kûnec von Tenemarke der sprach sâ zestunt 4
 'diss vil hôhen gruozes lit maneger ungesund
 - des ich vil wol enpfinde - von Sifrides hant.
 got enlâze in nimmer mære kômen in miniu fürstenlant.'

Dô hiez man allenthalben wichen von den wegen 5
 den minnelîchen frouwen. vil manegen kûenen degen
 sach man gezogenlîchen ze hofe mit ir gân.
 sît wart von ir gescheiden der vil wætliche man.

Dô gie si zuo dem mûnster: ir volgete manec wip. 6
 dô was ouch sô gezieret der Kriemhilde lip,
 daz dâ hôher wûnsche maneger wart verlorn:
 si was dâ z'ougenweide vil manegen recken geborn.

Vil kûme erbeite Sifrit, daz man dâ gesanc. 7
 er mohte sinen sælden immer sagen danc,
 daz im diu was sô wæge, die er in herzen truoc.
 ouch was er der schœnen holt von schulden genuoc.

Dô si kom für daz münster, sam er ê hête getân, 1
 man sah in friuntliche zuo Kriemhilde gân.
 dô begunde im danken diu vil schœniu meit,
 daz er vor ir mâgen sô rehte hêrlichen streit.

‘Nu lôn iu got, her Sifrit,’ - sprach daz schœne kint - 2
 ‘daz ir daz habt verdienet, daz iu die recken sint
 sô holt von wâren schulden, als ich si høre jehn.’
 dô begunder minnecliche an vroun Kriemhilden sehn.

‘Ich sol in immer dienen,’ - alsô sprach der degn - 3
 ‘und enwil mîn houbet nimmer ê gelegen,
 ich engedien ir hulde, als ich des willen hân.
 des ist ein teil, frow Kriemhilt, nâch iwern hulden ergân.’

Inre tage zwelfen, der tage al ieselich, 4
 sach man bi dem recken die maget lobelich,
 sô si ze hofe solde vor den fürsten gân:
 diu êre wart dem degene durch grôze liebe getân.

Vreude unde wünne, vil grœzlichen schal 5
 sach man dâ tegeliche vor Guntheres sal,
 dar ûz und ouch dar inne, von manegem kïenen man.
 Ortwin unde Hagene grôzer wunder dâ began.

Swes iemen pflegen solde, des wâren si bereit 6
 mit volleclicher mâze, die helde vil gemeit:
 des wurden von den gesten die recken wol bekant.
 dâ von was gezieret allez Guntheres lant.

Die ê dâ wunde lâgen, die sach man für gân: 7
 si wolden kurzwillen mit des küneges man,
 schirmen mit den schilden und schiezen manegen schaft.
 des hulfen in genuoge: si hêten grœzliche kraft.

In der hōchgezīte der wirt der hiez ir pflegn 1
mit der besten spīse: er hēte sich bewegn
aller hande schande, die ie künec gewan.
man sach in minneeliche zuo den sīnen gesten gān.

Er sprach 'ir guoten degene, ê daz ir scheidet hin, 2
sô nemt die mīne gābe: alsô stêt mīn sin,
daz ich ez immer diene. versmæht niht mīn guot;
daz wil ich mit iu teilen: des hān ich willigen muot.'

Die von Tenemarke sprāchen sâ zehant 3
'ê daz wir wider rīten heim in unser lant,
wir gern stæter suone und gebn michel guot,
und setzen iu des sicherheit, swie iuch des selben dunket guot.'

Liudegast geheilet sīner wunden was: 4
der vogt von den Sahsen nāch strīte wol genas.
ettesliche tōten si liezen dar enlant.
dô gie der künec Gunther dā er Sīvrīden vant.

Er sprach zuo dem degene 'nu rāte, wie ich tuo. 5
die unser widerwinnen wellent rīten fruo,
und gernt stæter suone an mich und mīne man.
nu rātâ, degen küene, waz dich des guot dunke getān.

Waz mir die helde bieten, daz wil ich dir sagen: 6
swaz fūnfhundert mære goldes mügen tragen,
daz geben si mir gerne, wold ich si ledec lān.'
dô sprach der herre Sīvrit 'daz wær vil ũbele getān.

Ir sult si ledeclīchen hinnen lāzen varn; 7
und daz die recken beide mære wol bewarn,
daz si immer mēr gerīten mit here in iwer lant,
des lāt iu sicherheite tuon der beider herren hant.'

‘Des rātes wil ich volgen.’ dā mite si giengen dan. 1
 den sīnen widerwinnen wart daz kunt getān,
 ir goldes gerte niemen, daz si da būten ē.
 dā heime ir lieben friunden was nāch den hermūeden wē.

Vil manege schilde volle man dar schatzes truoc: 2
 er teiltes āne wāge den friunden sīn genuoc
 bī fūnfhundert marken, und eteslichen baz.
 Gērnōt der vil kūene der riet Gunthere daz.

Urloup si alle nāmen, alsō si wolden dan. 3
 dô sach man die recken für Kriemhilde gān,
 und ouch dā frou Uote diu kūeginne saz.
 ez enwart noch nie degenen mēre geurloubet baz.

Herberge wurden lāre, dô si von dannen riten. 4
 noch bestuont dā heimē mit ritterlichen sīten
 der kūnec mit sīnen māgen, vil manec edel man.
 die sach man tegeliche für frown Kriemhilde gān.

Urloup ouch nemen wolde Sīvrit der helet guot: 5
 ern trūte niht verenden des er dā hēte muot.
 der kūnec daz sagen hōrte, daz er wolde dan.
 Gīselher der junge den degn vlēgen dô began.

‘War woldet ir nu riten, vil edel Sīvrit? 6
 belibet bī den degenen - tuot des ich iuch bite -
 bī Gunthere dem kūnege und ouch bī sīnen man.
 hie ist vil schōener frouwen: die sol man gerne iuch sehen lān.’

Dô sprach der starke Sīvrit ‘diu ros diu lāzet stān - 7
 ich wolde hinnen riten: des wil ich abe gān -
 und traget ouch hin die schilde. jā wold ich in mīn lant:
 des hāt mich her Gīselher mit grōzen triuwen erwant.’

Sus beleip der küene recke durch friwende liebe dâ. 1
 jā wær er in den landen ninder anderswâ
 gewesen alsô sanfte: dâ von nu daz geschach,
 daz er nu, swenner wolde, die schœnen Kriemhilde sach.

Durch ir un mâzen schoene der herre dô beleip. 2
 mit maneger kurzewile man im die zit vertreip;
 wan daz in twanc ir minne: diu gab im dicke nôt.
 dar umbe sit der küene lac vil jâmerliche tôt.

Iteniwe mære sich huoben umben Rîn: 3
 ez sprâchen zuo dem kûnege die hôsten mâge sîn,
 war umbe er niht ennæme ein wîp zuo sîner ê.
 dô sprach der kûnec rîche: 'ine wil niht langer biten mē.

Des wil ich mich berâten, wâ ich die mûge nemen, 4
 diu mir und mîme rîche ze frowen mûge zemen
 an edel und ouch an schœne: der gib ich miniu lant.
 als ich die reht êrvinde, si sol iu werden wol bekant.

VI AVENTIURE

WIE SICH GUNTHER GEIN ISLANDE HIN ZE PRÛNHILT
 BEREITE.

Ez was ein kûneginne gesezzen über sê; 5
 ir gelîche enheine man wesse ninder mē:
 diu was un mâzen schœne, vil michel was ir kraft;
 si schôz mit snellen degenen umbe minne den schaft.

Der Nibelunge Liet.

4

Den stein den warf si verre, dar nâch si wite spranc.
 swer an si wenden wolde, sinen gedanc,
 driu spil muoser an behaben, der frowen wol geborn:
 gebrast im an dem einen, er hêt daz houbet sin verlorn.

Des hêt diu küneginne unmâzen vil getân.
 dô gevriesch ez bî dem Rîne ein ritter wolgetân:
 der wande sine sinne an daz hêrlîche wip.
 darumbe muosen helede sit verliesen den lip.

Dô si eines tages sâzen, der künec und sine man,
 manegen ende si ez mâzen, beidiu wider und dan,
 welhe ir herre môhte zinem wibe nemen,
 diu im ze frowen tôhte und ouch dem lande môhte zemen.

Dô sprach der vogt von Rîne 'ich wil nider an den sê
 hin ze Prûnhilde, swie ez mir ergê,
 durch ir unmâzen schône, sô wâge ich minen lip:
 den wil ich verliesen, sine werde mîn wip.'

'Daz wil ich widerrâten.' - sprach dô Sîvrit - 5.
 'jâ hât diu küneginne sô vreisliche site,
 swer umb ir minne wirbet, daz ez im hôhe stât.
 des muget ir der reise haben wêrlîchen rât.'

Dô sprach der künec Gunther 'nie geborn wart ein wip 6
 sô starc und ouch sô küene, ine wolde wol ir lip
 in strîte betwingen mit mîn selbes hant.'
 'swiget.' - sprach dô Sîfrit - 'iu ist ir ellen unbekant.

Und wâren iwer viere, dine kunden niht genesen 7
 von ir vil grimmen zorne, ir lât den willen wesen:
 daz rât ich iu mit triuwen, welt ir niht ligen têt,
 sone lât iuch nâch ir minne niht ze sêre wesen nôt.'

* Nu si swie starc si welle, inê lâze der reise niht
hin zuo Prünhilde, swaz halt mir geschilt:
durch ir unmäzen schene muoz ez gewâget sin.
waz ob mir got gefüezet daz si mir volget an den Rîn?

‘Sô wil ich iu wol râten:’ - sprach dô Hagene -
‘ir bitet Sifride mit iu ze tragene
die vil starken sorge: daz ist nu mîn rât:
sit im daz ist so kündec, wiez umbe Prünhilde stât.’

Er sprach ‘wiltu mir helfen, degen Sifrit,
die minneliche erwerben? tuostu des ich dih bite,
und wirt mir zeinem trûte daz hêrlîche wip,
ich wil durch dînen willen wâgen êre unde lip.’

Des antwurte Sifrit ‘swie mir mîn dinc dâ kum;
gîstu mir dîn swester, sô bin ich dir frum,
die schœnen Kriemhilde, ein küneginne hêr:
ine ger deheiner miete nâch mînen arebeiten mêr.’

‘Daz lobe ich,’ - sprach dô Gunther - ‘Sîvrit, an dîne hant:
und kumt diu schœne Prünhilt her in ditze lant,
sô wil ich dir ze wîbe die mîne swester gebn;
sô mahtu mit der schœnen immer vrêliche leb’n.’

Des swuoren si dô eide, die recken vil hêr:
des wart ir arebeiten verre deste mêr,
ê si die wolgetânen brâchten an den Rîn;
des muosen die vil küenen starke sorgende sin.

Von wilden getwergen hân ich gehoeret sagen,
si sin in holn bergen, und daz si ze scherne tragen
einez heizet tarnkappen, von wunderlicher art:
swerz hât an sîme libe, der sol vil gar wol sin bewart

Vor slegen und vor stichen, in müge ouch niemen sehen, 1
 swenn er si dar inne. beide hoeren unde spehen
 mag er nach sinem willen, daz in doch niemen siht;
 er si ouch verre sterker, als uns diu aventure gih.

Mit im fuorte Sifrit die tarnkappen dan, 2
 die der helt vil küene mit sorgen gewan
 ab einem getwerge, daz hiez Albrich.
 sich bereiten zuo der verte die degn küene unde rich.

Alsô der starke Sifrit die tarnkappen truoc, 3
 sô hêt er dar inne krefte genuoc,
 zwelf ander manne sterke, als uns ist geseit.
 er gewan mit grôzen listen die vil hêrlichen meit.

Ouch was diu selbe tarnhût alsô getân, 4
 daz dar inne worhte ein ieslicher man
 swaz er selbe wolde, daz in doch niemen sach:
 sô gewan er Prünhilde. dà von im leide sit geschach.

'Du solt mir sagen, Sifrit, ê unser vart ergê: 5
 daz wir mit vollen êren komen an den sê,
 suln wir iht ritter fûeren in Prünhilde lant?
 zwei tûsent degene die werdent schiere besant.'

'Swie vil wir volkes fuorten,' - sprach dô Sifrit - 6
 'ez pfliget diu küneginne sô eislicher site,
 die müesen alle ersterben von ir übermuot.
 ich wil iuch baz bewîsen, degene küene unde guot.

Wir suln in recken wise varn ze tal den Rîn. 7
 die wil ich iu nennen, die daz suln sin,
 zuo uns zwein noch zwêne unde niemen mê;
 so erwerben wir die frouwen, swiez uns dar nach ergê.

Der gesellen sit ir einer, der ander sol ich wesn, 1
 Hagene sî der dritte: wir mugen wol genesn:
 Dancwart sî der vierde, der vil küene man.
 uns endurfen ander tûsent mit strîte nimmer bestân.

‘Diu mære ich wiste gerne’ - sprach der kûnec dô - 2
 ‘ê daz wir hinne schieden, des wære ich harte vrô,
 waz wir kleider solden vor Prûnhilden tragen,
 diu uns dâ wol gezæmen: daz sult ir mir bî zîte sagen.’

‘Wât die allerbesten, die ie man bevant, 3
 die treit man zallen zîten in Prûnhilde lant:
 des suln wir richiu kleider vor der frowen tragen,
 daz wîrs iht habn scande, sô man diu mære hære sagn.’

Dô sprach der degn guoter ‘sô wil ich selbe gân 4
 zuo mîner lieben muoter, ob ich erwerben kan
 daz uns ir schœne mægede helfen præuen kleit,
 diu wir tragen mit êren für die hêrlîchen meit.

Dô sprach von Tronege Hagene mit hêrlîchen siten 5
 ‘wes welt ir iwer muoter solher dienste biten?
 lât iwer swester hêren wes wir habn muot:
 si ist sô kunstrîche, daz diu kleider werdent gut.’

Do enbôt er sîner swester, daz er si wolde sehn 6
 und ouch der herre Sifrit. ê daz daz was geschœhn,
 dô hête sich diu schœne ze wunsche wol gekleit.
 daz si sie sehn wolden, des was si vrô und ouch gemeit.

Dô was ouch ir gesinde geziert als ir gezam. 7
 die fürsten kômen beide: dô si daz vernam,
 dô stuont si von dem sidele; mit zûhten si dô gie
 dâ si den gast vil edelen und ouch ir bruder enpfie.

‘Wilekomen sî min bruoder und der geselle sîn. 1
 diu mære wist ich gerne,’ - sô sprach daz magedin
 ‘waz ir werben woldet, sît ir ze hofe gât:
 daz lât mich beide hâeren, wiez iu hôhgemuoten stât.’

Dô sprach der künec rîche ‘frowe, ich wilz iu sagn: 2
 wir müezen michel sorgen bî hôhem muote tragn;
 wir wellen hobeschen rîten verre in vremdiu lant.
 wir solden zuo der reise haben zierlich gewant.’

‘Nu sitzet, lieber bruoder:’ - sprach daz küneges kint - 3
 ‘lât mich diu mære hâeren, wer die frowen sint,
 der ir dâ gert mit minnen in ander fürsten lant.’
 die âzerwelten beide nam diu frowe bî der hant.

Dô gie si mit den degenen dâ si selbe saz: 4
 matraz diu rîchen, ir sult gelouben daz,
 lâgen allenthalben an dem vletze nider.
 si hêten bî den frouwen guote kurzwîle sider.

Vil lieplîcher blicke und minnelîchez sehn, 5
 des mohte dâ in beiden harte vil geschehen:
 er truoc si imme herzen, si was im sô der lîp.
 er erwarp mit starkem dienste, daz si doch sider wart sîn wîp.

Dô sprach der künec Gunther ‘vil edel swester mîn, 6
 âne dine helfe sone kûndeZ niht gesîn.
 wir wellen kurzewîlen in Prûnhilde lant:
 dâ bedorften wir ze tragene vor frowen hêrlîch gewant.’

Dô sprach diu kûneginne ‘vil lieber bruoder mîn, 7
 swaz der minen helfe daran kan gesîn,
 des bringe ich iuch wol innen, daz ich iu bin bêreit.
 versagt iu ander iemen, daz wære Kriemhilde leit.’

Irn sult mich, ritter edele, niht sorgende biten :
 jā sult ir mir gebieten mit hêrlîchen sîten.
 swaz sô iu gevalle, des bin ich bereit,
 und tuon ez willeclîche. sprach diu hêrlîche meit.

Wir wellen, liebiu swester, tragen guot gewant :
 daz sol helfên prûeven iwer wîziu hant ;
 des volziehen iwer magede, daz ez uns rehte stat.
 wand ich dirre verte hân deheiner slahte rât.

Dô sprach diu juncfrouwe : ine wil iu niht versagn :
 ich hân selbe sîden ; nu heizet uns her tragen
 gestein uf den schilden, sô machen wir diu kleit,
 daz ir si traget mit êren für die hêrlîchen meit.

Wer sint die gesellen, sprach diu kûnegîn :
 die mit iu gekleidet ze hofe suln sîn ?
 daz bin ich und Sifrit und zwêne miner man ;
 Dancwart und Hagene die suln mit uns ze hofe gân.

Nu merket, liebiu swester, rehte waz wir sagen :
 daz wir vier gesellen ze vier tagên tragen
 ie drier hande kleider und alsô guot gewant,
 daz wir âne scande rûmen Prûnhilde lant.

Daz lobte si den recken : die herren schieden dan.
 dô hiez ir juncfrouwen drîzec meide gân
 ûz ir kemenâten Kriemhilt diu kûnegîn :
 die vil werkspâhen ze kûnste hêten grôzen sîn.

Aller hande sîden und wîz sô der snê,
 von Zamanc dem lande grûen alsô der klê,
 dar in si leiten steine : des wurden guotiu kleit.
 selbe sneit si Kriemhilt, diu vil minneclîche meit.

Von vremder vische hiuten bezoc wolgetân
ze sehn werden liuten, swaz man der gewan,
diu dachte man mit siden, golt dar in getragen:
man möhte michel wunder von der lichten wæte sagen.

Von Marroch tûz dem lande und ouch von Libiân
die aller besten siden, die ie mër gewan
deheines küneges künne, der hêten si genuoc.
diu frowe lie wol schinen, daz si in holden willen truoc.

Wande sis zer hovereise hêten sô gegert:
die herminen vedere dûhten si unwert;
pfelle dar obe lügen swarz alsam der kol.
daz noch snellen degenen stüende in hõchgeziten wol.

Uz Arâbischem golde vil gesteines schein,
der frowen unmuoze diu en was niht klein:
inre sehs wochen bereiten si diu kleit.
dô was ouch ir gewæfen den guoten degenen bereit.

Dô si bereitet wâren, dô was in uf den Rîne
gemachet vlîzeclîche ein starkez schiffelîn,
daz si tragen solde wol nider uf den sê.
den schõenen juncfrouwen tet ir arebeiten wê.

Dô sagte man den recken, in wâren nu bereit,
diu si dâ fûeren solden, ir zierlichen kleit.
alsô die helde gerten, daz was nu getân:
done wolden si niht langer bi dem Rîne bestân.

Nâch den hergesellen wart baldê dô gesant,
ob si schowen wolden niwez ir gewant,
ob ez den helden wære ze rehte kurz und lanc:
des sageten si den frouwen von schulden grœzlichen danc.

Für alle die si kômen, die muosen in des jehen, 1
 daz si ze der werlde hæten schœners niht gesehn:
 des mohten si sie gerne dâ ze hove tragen.
 von bezzer helde wæte kûnde iu nieman niht gesagn.

Vlîzeclîche danken wart dâ niht verdeit. 2
 urloubes von in gerten die recken vil gemeit:
 in ritterlîchen zûhten die herren tåten daz.
 des wurden lichtiu ougen weinens trûebe unde naz.

Si sprach vil lieber bruoder, ir môhtet noch bestân, 3
 und wûrbet ander frouwen - daz hiez ich wol getân -
 dâ iu sô sêre enwåge stüende niht der lîp:
 ir mugt hie nâher vinden ein alsô hôchgeborn wip.

Ich wæn in saget ir herze daz in dâ von geschach. 4
 si weinten al gemeine, swaz ieman drumbe sprach.
 ir golt in vor den brüsten wart von tråhenen sal:
 die vielen in genôte von den ougen hin ze tal.

Sie sprach herre Sivrit, lât iu bevolhen sîn. 5
 ûf triwe und ûf genåde den lieben bruoder mîn,
 daz im iht gewerre in Prûnhilde lant.
 daz lobt ir der herre mit guotem willen in die hant.

Dô sprach der degen küene ob mir mîn lîp bestât, 6
 sô sult ir aller sorgen, frowe, haben rât:
 ich bringen iu gesunden her wider an den Rîn,
 daz habt ûf mîme lîbe im neic daz schœne magedîn.

Ir goltrôten schilde, die truog man ûf den sant, 7
 und bråht in zuo dem schiffe allez ir gewant;
 ir ros hiez man in ziehen: si wolden varn dan.
 dô wart von schœnen frouwen vil michel weinen getân.

Dô stuonden in den venstern diu minneclichen kint.
 ir seif mit dem segele daz rüert ein höher wint:
 die stolzen hergesellen sâzen uf den Rîn.
 dô sprach der künec Gunther 'wer sol nu schifmeister sin?'

Dô sprach der starke Sivrit 'ich kan iuch uf der fluot
 hinnen wol gefüeren: daz wizzet, helede guot:
 die rehte wazzerstrâzen die sint mir wol bekant.'
 mit freuden si dô schieden ûz der Buregonden lant.

Der künec von Niderlanden eine schalten genam:
 von stade begunde schieben der helt vil lobesam.
 Gunther der küene selbe ein ruoder truoc.
 si huoben sich von lande, und wâren vrœlich genuoc.

Si fuorten rîche spîse, dar zuo den besten wîn,
 den man nder kunde vinden umben Rîn.
 Dancwart, Hagenen brüoder, der saz unde zôch
 an eime starken ruoder: er truoc den muot unmâzen hôch.

Ir vil starken segelseil wurden in gestraht;
 si fuoren manege mile ê daz ez wûrde naht:
 mit freuden si dô kômen vol nider an den sê.
 ir starkez arebeiten tet sit den hôchgemuoten wê.

Inre tage zwelven, sô wir hœren sagen,
 hêten si die winde verre dan getragen
 gein Isensteine in Prûnhilde lant:
 daz hêt von Tronege Hagene ê vil selten bekant.

VII AVENTIURE

WIE GUNTHER ZE ISLANDE MIT SINEN GESELLEN KOM.

Dô der künec Gunther sô vil der bürge sach 1
 und ouch die wîten marke, wie bald er dô sprach
 'sagt mir, friunt Sifrit, ist iu daz bekant:
 wes sint dise bürge und ouch daz hêrlîche lant?

Ine hân bî mînen zîten, ine wolde lûge jehn, 2
 sô wol erbowen bürge mære nie gesehen
 in deheinem lande, als ir hie vor uns stât:
 er mac wol wesen rîche, der si hie gebowen hât.

Des antwurte Sifrit 'ez ist mir wol bekant: 3
 ez ist frown Prûnhilt liut unde lant,
 und Isenstein diu veste, als ir mich hîrtet jehen.
 dâ muget ir noch hiute schoener frowen vil gesehen.

Und wil iu helden râten, ir habt einen muot, 4
 daz wir jehn gelîche - jâ dunket ez mich guot -
 swenne wir noh hiute für Prûnhilde gân
 - sô müezen wir mit sorgen for der kûneginne stân -

Sô wir die minneelîchen bî ir gesinde sehn, 5
 sô sult ir, helede guote, wan einer rede jehen,
 Gunther sî mîn herre, ich sî sîn eigen man:
 sô mag unser wille harte wol an ir ergân.

Des wären si bereite: swaz er si loben hiez, 1
 durch ir übermüete deheiner ez niht liez;
 si jāhen swes er wolde: dā von in wol geschach,
 dō der künec Gunther die schönen Prünhilde sach.

‘Ich enlob ez niht sō verre durch den willen dīn 2
 sō durch Kriemhilde, daz schöne magedīn:
 diu ist mir sam mīn sēle und sō mīn eigen līp.
 ich wil daz gerne dienen, daz si werde mīn wīp.’

In den selben ziten dō was ir schif gegān 3
 der bürge alsō nāhen: dō sach der künec stān
 oben in den venstern vil manege schōne meit.
 dō begunde vrāgen der recke küene und gemeit

‘Saget mir, friunt Sifrit, durch den willen mīn: 4
 bekennet ir die frouwen und ouch diu magedīn,
 die dort her nider schouwent zuo zuns uf die fluot?
 si gebārent dem gelīche, daz si hōhe sint genuot.’

Dō sprach der küene Sifrit ‘ir sult von hinnen spehn 5
 tougen in dem muote, und sult mir danne jehn,
 welhe ir nemen woldet, hētet irs gewalt.’
 ‘daz tuon ich.’ - sprach dō Gunther, der ritter küen unde balt-

‘Sō sihe ih ir eine in jenem venster stān, 6
 in snēwīzer wāte: diu ist sō wolgetān,
 die wellent mīniu ougen; vil schōn ist ir der līp.
 ob ich gewalt des hāte, si muose werden mīn wīp.’

‘Dir hāt erwelt vil rehte dīner ougen schīn: 7
 ez ist diu starke Prünhilt, daz schōne magedīn,
 die dīn herze minnet, der līp und ouch der muot.’
 elliu ir gebærde diu dūhte Guntheren gut.

Dô hiez diu küneginne üz den venstern gån
 ir minnelichen meide: sine solden niht dâ stån
 den vrenden anzesehene; des wåren si bereit.
 waz dô die frowen tæten, daz ist uns sider ouch geset.

Gegen den unkunden strichen si ir lip,
 des ie site habeten diu wætlichen wip.
 an diu engen venster kómen si gegån,
 dâ si die recken sâhen: daz wart durch schowen getån.

Ir wåren niwan viere, di dâ kómen in daz lant.
 Sifrit der starke ein ros zóch an der hant:
 daz sâhen durch diu venster diu minnelichen wip;
 des wart sît getiuret des künec Guntheres lip.

Er habt im dâ bi zoume daz zierliche marc,
 guot unde schóene, vil michel unde starc,
 unze der künec Gunther in den satel gesaz:
 alsó dient im Sifrit. des er doch sît vil gar vergaz.

Dô zôh er ouch daz sine von dem schiffe dan.
 er hête solhen dienst selten ê getån,
 daz er den stegereif gehabt ie helede mër:
 daz sâhen durch diu venster die frowen schóen unde hër.

Reht in einer mæze den rittern vil gemeit
 von snêblanker varwe ir ros und ouch ir kleit
 wåren vil geliche: ir schilde wol getån
 die lûhten von den handen den vil wætlichen man.

Ir setele wol gesteinert, ir furbüege smal:
 si rîten hêrlîchen für Prûnhilden sal:
 daran sô hiengen schellen von liehtem golde rôt.
 si kómen zuo dem lande, als ez ir ellen in gebôt:

Mit spern niuwe sliffen, mit swerten wol getân, 1
 diu âf die sporn giengen den wætlîchen man; 2
 diu fuorten die vil kûenen, scharpf und dar zuo breit: 3
 daz sach allez Prûnhilt, diu vil minneelîche meit. 4

Mit im kom ouch Danewart unde Hagene. 1
 nu hœret disiu mære, wie die degene 2
 von rabenswarzer varwe truogen richiu kleit: 3
 ir schilde wæren schœne, vil guot michel unde breit. 4

Von Indiâ dem lande man sach si steine tragen: 1
 die kôs man an ir wæte vil hêrlîche wagen. 2
 sie liezen âne huote ir schiffel bi der fluot: 3
 sus riten zuo der bûrge die helde kûen unde guot. 4

Sehs und ahzec tûrne si sâhen drinne stân, 1
 dri palas wite und einen sal wol getân, 2
 von edelm marmelsteine grûen alsam ein gras, 3
 dar inne diu kûeginne mit ir ingesinde was. 4

Diu porte stuont entslozen, diu burc âf getân. 1
 dô liefen in enegene die Prûnhilde man, 2
 und enpfîngen wol die kûenen in ir frowen lant; 3
 ir ros man hiez behalten und ir schilde von der hant. 4

Dô sprach ein kamerære 'ir sult uns geben diu swert; 1
 und ouch die liechten brûnne.' 'des sît ir ungewert.' 2
 sprach Hagene der kûene - 'wir selbe wellens tragen.' 3
 dô begunde in Sifrit dâ von diu rehten mære sagn. 4

Man pfligt in dirre bûrge, daz wil ich iu sagen, 1
 daz decheime geste hie wâfen suln tragen: 2
 ir sult si lân behalten; daz ist wol getân. 3
 daz tet dô vil ungerne Hagen der Guntheres man. 4

Den gesten hiez man schenken und schaffen ir gemach. 1
 vil manegen snellen recken man dâ ze hove sach
 in fürstenlicher wæte allenthalben gân.
 dâ wart nichel schouwen an die vil küenen getân.

Dô tet man Prünhilde kunt mit mæren, 2
 daz dâ vrende recken komen wæren
 in vil richer wæte gevlozzen uf der fluot.
 dâ von begunde vrâgen diu magt schœn unde guot.

‘Ir sult mich lâzen hœren,’ - sprach diu künegin - 3
 ‘wer die vil unkunden recken mügen sîn,
 die in mîner bürge sô hêrlîche stân,
 und durch welhe schulde die helde her gevarn hân.’

Dô sprach ein ir gesinde ‘frowe, ich mac wol jehn, 4
 daz ich ir deheinen nimêre habe gesehn,
 wan gelîche Sîfride einer drunder stât.
 den sult ir wol empfâhen: daz ist mit triwen mîn rât.’

Der ander der gesellen der ist sô lobelîch: 5
 ob er gewalt des hête, wol wær er künec rich,
 ob wîten fürsten landen, ob er diu möhte hân;
 man siht in bî den andern sô rehte hêrlîche stân.

Der dritte der gesellen der ist vil gremlich, 6
 und doch mit schœme lîbe, küneginne rich,
 von swinden sînen blicken, der er sô vil getuot,
 er ist in sînen sînnen ich wæn vil grimme gemuot.

Der der jungest ist dar under, der ist sô lobelîch, 7
 in magtlichen zûhten sihe ich den degen rich,
 mit guotem gelæze sô minneclîche stân:
 wir möhtenz fürhten alle, hêt im hie iemen iht getân.

Swie blide er pflege der zühte und swie schoen im si der lip, 1
 er möhte wol erweinen vil wætlîchiu wip,
 swenn er begunde zürnen. sin lip ist sô gestalt:
 er ist in allen tugenden ein degn küene unde balt.

Dô sprach diu küneginne 'nu brinc mir mîn gewant; 2
 und ist der starke Sivrit komen in daz lant
 durch willen mîner minne, ez gât im an den lip:
 ine fürht in niht sô sêre, daz ich werde sin wip.'

Dô wart diu küneginne schiere wol gekleit: 3
 dô gie mit ir dannen vil manec scheniu meit,
 wol hundert unde mêre; gezieret was ir lip.
 ez wolden sehen die geste diu vil minnelîchen wip.

Dâ mit giengen recken ûzer Islant: 4
 die Prünhilde degene die truogen swert enhant,
 fûnfhundert oder mêre; daz was den gestalten leit.
 dô stuonden von dem sedele die helde kûen und gemeit.

Dô diu küneginne Sîfriden sach, 5
 diu magt zühteclîche zuo dem recken sprach
 'sît willekomen, Sivrit, her in ditze lant.
 waz iwer reise meine, gerne hêt ich daz erkant.'

'Vil michel iwer genåde, mîn vrou Prünhilt, 6
 daz ir mich ruochet grüezen, fûrsten tohter milt,
 vor disem kûenem recken, der hie vor mir stât;
 wand er ist mîn herre: der êren hêt ich gerne rât.

Er ist geborn von Rîne, daz tuot er dir bekant: 7
 er hât durch dînen willen gesuochet ditze lant:
 er wil dich gerne minnen, swaz im dâ von geschîht.
 nu bedenke dihs bezîte; mîn herre erlæt dihs niht.

Er ist geheizen Gunther und ist ein künec hêr. 1
 erwürber dine minne, sone gert er nihtes mêr.
 ja gëbôt mir her ze varne der recke wolgetân:
 wan daz ich entorste, ich hietez gerne verlân.

Si sprach 'ist er dîn herre und bistu sîn man, 2
 diu spil diu ich im teile, und tarrer diu bestân,
 behabt er des die maisterschaft, sô minne ich sînen lîp:
 anders muoz er sterben ê ich werde sîn wîp.'

Dô sprach von Tronege Hagene 'frow nu lât uns sehen 3
 iwer spil diu starken. ê daz iu müese jehen
 Gunther mîn herre, dà müesez herte sîn:
 er mac noch wol gewinnen ein alsô schœne magedîn.'

'Den stein den sol er werfen und springen dar nâch, 4
 den gêr mit mir schiezen. lât iu niht sîn ze gâch:
 des bedenket iuch vil ebene:' - sprach daz vil schœne wîp -
 'gëbrist im an dem einen, ez gêt iu allen an den lîp.'

Sîfrit der starke zuo dem kûnege trat: 5
 allen sînen willen er in reden bat
 mit der kûneginne; ez kûnde im geschaden niht:
 'ez wirt al anders gendet, des sich ir übermuot versiht.'

Dô sprach der kûnec Gunther 'kûneginne hêr, 6
 nu teilt swaz ir gebietet; und wære es dannoch mêr,
 daz bestüende ich allez gerne durch iwern schœnen lîp:
 mîn houbet wil ich wâgen, irn werdet mîn wîp.'

Dô diu kûneginne sîne rede vernam, 7
 der spile bat si gâhen, als ir dô daz gezam:
 si hiez ir dar gewinnen balde ir stritgewant,
 eine yeste brünne und einen guoten schildes rant.

Ein wâfenhemde sidîn daz leit an sich diu meit, 1
 daz in deheime strite wâfen nie versneit,
 von pfelle üzzer Libiâ: ez was vil wolgetân;
 von porten licht gewürhte daz sach man schînen dar an.

Die zît wart disen recken harte vil gedreut. 2
 Dancwart unde Hagene die wâren ungefreut:
 wiez dem kûnege ergienge, des sorget in der muot.
 si dâhten 'unser reise ist uns recken niht ze guot.'

Die wîle was ouch Sivrit, der listige man, 3
 è ez iemen erfûnde, in daz schif gegân,
 dà er die tarnkappen verborgen ligen vant.
 dar in slauf er vil schiere: dô was er niemen bekant.

Er ilte hin widere: dô vant er recken vil 4
 dà diu kûneginne teilte ir hôhen spil.
 dar gie er tougenliche; von listen daz geschach,
 alle die dà wâren daz in dà niemen gesach.

Der rinc der was bezeiget, dà soldez spil geschehn 5
 vor manegem kûnem recken, die daz solden sehn,
 mêr danne sibenhundert - die sah man wâfen tragen -,
 swer daz spil gewünne, daz ez die helde solden sagen.

Dô was nu komen Prûnhilt: gewâfent man die vant 6
 sam ob si strîten solde umbe elliû kûneges lant.
 jâ truoc si ob den siden vil manegen stahelzeim:
 ir minnelichiu varwe dar under hêrlichen schein.

Dô kom ouch ir gesinde: die truogen dar zehant 7
 von vil rôtem golde einen liechten schildes rant
 mit stahelherten spangen, vil michel unde breit,
 darunder spilen wolde diu vil hêrliche meit.

Der frowen schiltvezzel ein edel porte was : 1
 dar ðfe lågen steine, grüener denne ein gras;
 die lühten maneger hande mit schüne wider daz golt.
 der si solde minnen, der hêt ez hôhe verscolt.

Der schilt was under buckelen, als uns daz ist geseit, 2
 wol drier hende dicke, den tragen solde diu meit:
 von stâle und ouch von golde rich er was genuoc,
 den ir kamerære selbe vierder kûme truoc.

Alsô der starke Hagene den schilt dar tragen sach, 3
 in vil grôzen unmuote der helt von Tronege sprach
 'wie nu, künec Gunther? wie vliessen wir den lip?
 der ir dâ gert ze minnen, diu ist des vâlandes wip.'

Vernemt noch von ir wæte; der hête si genuoc : 4
 von Azagouc der siden einen wâfenroc si truoc
 vil edel und vil rîche, ab des varwe schein
 von der küneginne vil manec hêrlicher stein.

Dô truoc man dar der frouwen swære und dar zuo grôz, *5
 einen gêr vil starken, den si alle zîte schôz,
 scarpf und ungefüege, michel unde breit,
 der ze sînen ecken harte vreislichen sneit.

Von des gêres swære hœret wunder sagen : 6
 wol vierdehalbiu messe was der zuo geslagen;
 in truogen kûme drie Prûnhilde man.
 Gunther der vil küene harte sorgen began.

Er dâht in sînem muote 'waz sol ditze wesen? 7
 der tûfel von der helle, wie kûnder dâ vor genesen?
 und wêr ich dâ ze Rîne mit dem libe mîn,
 si müeste hie vil lange vrî fon mîner minne sîn.'

Im was in sînen sorgen, daz wizzet, leit genuoc: 1
 allez sîn gewâfen man im einen truoc;
 dâ wart der künec riche wol gewâfent in.
 vor leide hêt Hagene vil nâch verwandelt den sîn.

Dô sprach von Burgonden der küene Dancwart 2
 'mich muoz immer riuwen disiu hovevart.
 nu hiezen wir ie recken: wie verliesen wir den lîp,
 sulen uns in disen landen nu verderben diu wîp!

Mich müet daz harte sêre, daz ich kom in daz lant; 3
 und hete mîn bruoder Hagene sîn wâfen an der hant,
 und ouch ich daz mîne, sô möhten sanfte gân
 durch ir übermüete alle Prûnhilde man.

Ich sage iu bi den triuwen, si soldenz wol bewarn: 4
 und hêt ich tûsent eide zeinem fride geswarn,
 ê daz ich sterben sêhe den lieben herren mîn,
 jâ müesen lîp verliesen daz vil schœne magedîn:

Wir solden ungevungen wol rûmen ditze lant. 5
 ich und mîn bruoder Hagene, heten wir daz gewant,
 des wir zenôt bedurfen, und unser swert vil guot,
 sô wûrde wol gesenftet der frowen starkiu übermuot.'

Wol hîrt diu küneginne waz der degen sprach; 6
 mit smielendem munde si über ahsel sach:
 'nu er dunke sich so biderbe, sô tragt in ir gewant,
 und ir vil scharpfen wâfen gebt den recken an die hant.

Mir ist als mâre, daz si gewâfent sîn, 7
 als ob si blôze stüenden.' - sô sprach diu künegin -
 'ihen fürhte niemens sterke, den ich noh habe bekant:
 ich getrowe wol gedingen in strite vor sîn eines hant.'

Dô si diu swert gewonnen, alsô diu magt gebôt, 1
 der vil küene Danewart wart von freuden rôt:
 'nu spilen swes si wellen.' - sprach der snelle man -
 'Gunther ist unbetwungen, sit daz wir unser wâfen hân.'

Diu Prünhilde sterke vil grœzlichen schein. 2
 man brâht ir zuo dem ringe einen swæren mermilstein,
 grôz und ungefüege, michel unde wel:
 in truogen kûme zwelfe helde kûen unde snel.

Den warf si zallen ziten, sô si den gêr verschôz. 3
 der Burgonden sorge wurden harte grôz.
 'wâfen!' - sprach dô Hagene - 'waz hât der kûnec ze trût?
 jâ soldes in der helle sin des übeln tiufels brût.'

An ir vil wîzen arme si die ermêl want, 4
 si begunde sêre vazzen den schilt an der hant,
 den gêr si hôhe zuchte: dô giengez an den strit.
 Gunther unde Sîvrit die vorhten Prünhilde nit.

Wær im der starke Sîvrit niht schier ze helfe komen, 5
 sô hête si dem kûnege sînen lîp benomen.
 er gie dar tougenliche und ruort im sine hant.
 Gunther sine liste vil harte soreeliche ervant.

'Waz hât mich gerüeret?' gedâht der küene man. 6
 dô sah er allenthalben: er vant dâ niemen stân.
 er sprach 'ich bin ez Sîvrit, der liebe friunt dîn:
 vor der kûneginne soltu gar âne angst sin.'

Den schilt gib mir von hende: den lâ du mich tragen, 7
 und merke mîne lère, die du mich hœrest sagn:
 nu habe du die geberde, diu werc wil ich begân.
 dô er vernam diu mære, der kûnec træsten sich began.

Nu hil du mine liste, daz ist uns beiden guot: 1
sone mac diu küneginne ir starke übermuot
an dir niht verenden, des si doch willen hât.
nu sich wie angestliche si gein dir amme ringe stât!

Dô schôz vil krefteclîche diu vil starke meit 2
den gêr gein eime schilde, michel unde breit:
den truog an sîner hende daz Sigelinden kint.
daz fiur spranc von stâle alsam ez wæte der wint.

Des starken gêres snide sô durch den schilt gebrach, 3
daz man daz fiur lougen ûz den ringen sach.
des schuzzes beide strûchten, die vil starken man:
si ertwelte si sô sêre, daz si den lip nâch hêten lân.

Sîvrîde dem vil kûenen vom munde brast daz bluot; 4
vil balde spranc er widere: dô nam der helet guot
den gêr, den si geschozzen im hête durch den rant;
den frumt ir dô hin widere sîn vil ellenthâftiu hant.

Er dâht 'ich wil niht schiezen daz schœne magedîn.' 5
er kêrt des gêres snide hindern rucke sîn:
mit der gêrstangen schôz si der kûene man
alsô krefteclîche, daz si strûchen began.

Daz fiur staub ûz stâle sam ez tribe der wint: 6
den schuz schôz mit ellen daz Sigelinde kint;
sine mohte mit ir kreften des schuzzes niht getân.
ez enhêt der kûnec Gunther entriwen nimmer getân.

Prûnhilt diu schœne, wie balde si ûf spranc! 7
'Gunther, ritter edele, des schuzzes habe danc.'
si wânde, daz erz hête mit sîner hant getân:
ir was dar nâch geslichen ein verre kreftiger man.

Dô gie si hin vil balde : zornec was ir muot : 1
 den stein den huop si hôhe, diu schœne maget guot.
 si swanc in krefteclîche sô verre von ir dan,
 daz sîn die küene degene sêre wundern began.

Der stein der was gevallen wol zwelf klâfter dan : 2
 den wurf brach dô mit sprunge diu maget wol getân.
 dar gie der herre Sîfrit, dà der stein gelac :
 Gunther in dô wegete, der helt in werfen pflac.

Sîfrit was vil küene, dar zuo starc unde lanc : 3
 den stein den warf er verrer, dar zuo er wîter spranc.
 daz was ein michel wunder und künsteclîch genuoc,
 daz er mit dem sprunge den küenec Gunther doch truoc.

Der sprunc der was ergangen, der stein der was gelegen : 4
 dô sah man ander niemen wan Gunther den degn.
 Prûnhilt diu schœne wart in zorne rôt.
 Sîfrit hêt geverret des küenec Guntheres tôt.

Zuo zir ingesinde diu kûeginne sprach, 5
 dô si z'ent des ringes den helt gesunden sach,
 'vil balde gêt her nâher, ir mâge und mîne man :
 ir sult dem küenec Gunther alle wesen undertân.'

Dô leiten die vil küenen diu wâfen von der hant : 6
 si buten sich ze fûezen ûz Burgonden lant
 Gunthere dem rîchen, vil manec küener man :
 si wânden daz er hête diu spil mit sîner kraft getân.

Er gruoçtes minneclîche, wander was tugentrich. 7
 dô nam in bî der hende diu magt lobelîch ;
 si erloubt im, daz er solde haben dà gewalt :
 des freute sich dô Hagene, der recke küen unde balt.

Si bat den ritter edele mit ir dannen gân 1
 in einen palas witen: dà was vil manec man.
 durch vorhte manz dem degene deste baz erbôt.
 von Sifrides ellen si wâren komen ûzer nôt.

Sifrit der snelle - wis er was genuoc - 2
 die sinen tarnkappen er aber behalten truoc.
 dô gie er hin widere dà vil der frowen saz:
 er sprach zuo dem kûnege, und tet vil kûndeclîche daz:

‘Wes bîtet ir mîn, herre? wan beginnet ir der spil, 3
 der iu diu kûneginne teilet alsô vil?
 und lâzet uns daz schouwen, wie diu sîn getân.’
 sam er ir niht ensæhe, gebârt der listige man.

Dô sprach diu kûneginne ‘wie ist daz geschehn, 4
 daz ir habt, her Sifrit, der spil niht gesehn,
 diu hie hât errungen diu Guntheres hant?’
 des antwort ir Hagene ûzer Burgonden lant:

‘Dô ir alsô sêre getrüebet uns den muot, 5
 dô was bî dem schiffe Sifrit der helet guot,
 dô der vogt von Rîne daz spil an iu gewan:
 des ist ez im unkûndec.’ sprach dô der Guntheres man.

‘Sô wol mich dirre mære,’ - sprach Sivrit der degn - 6
 ‘daz iwer hôchverten ist alsus gelegn,
 daz iemen lebt sô kûene, der iwer meister mûge gesîn.
 nu sult ir, maget edele, uns volgen hinnen an den Rîn.

Dô sprach diu kûneginne ‘des enkan noch niht ergân. 7
 ez mûezen ê bevinden mûge und mîne man.
 jane mag ich alsô lihte gerûmen mîniu lant:
 di mîne hôhsten friunde mûezen werden ê besant.’

Dô hiez si boten rîten allenthalben dan : 1
 si besande alle ir friunde, mâge unde man.
 die bat si komen balde ze hove in Islant,
 und hiez in gebn allen rich und hêrlich gewant.

Si riten tãgeliche, spãte unde fruo, 2
 der Prûnhilde bûrge scharhafte zuo.
 'jãrã jã!' - sprach Hagene - 'waz haben wir getãn?
 wir erbeiten hie vil ûbele der schœnen Prûnhilde man.

Sô si nu mit ir kreften koment in daz lant : 3
 der Prûnhilde wille ist uns unbekant :
 waz ob si alsô zûrnet, daz wir sîn verlorn ?
 so ist uns diu maget edele ze grôzen sorgen geborn.'

Dô sprach der herre Sivrit 'daz sol ich understên. 4
 des ir dã habet sorge, des enlãz ich niht ergên :
 ich sol iu helfe bringen her in ditze lant
 von ûz erwelten degenen, die iu noch wurden nie bekant.

Irn sult nãch mir niht vrãgen : ich wil hinnen varn ; 5
 got mûez iwer êre di zîte wol bewarn.
 ich kum vil schiere widere und bringe iu tûsent man
 der aller besten degene, der iemen kûnde gewan.'

'Sone sît et niht ze lange.' - sprach der kûnec dô - 6
 'wir sîn iwer helfe vil pilliche vrô.'
 er sprach 'ich kum iu widere in vil kurzen tagen.
 daz ir mich habt gesendet, daz sult ir Prûnhilde sagen.'

VIII AVENTIURE

WIE SIFRIT NAH DEN NIBELUNGEN SINEN RECKEN FUOR.

Sifrit der vil küene dannen gie zehant 1
 in sîner tarnkappen dâ er daz schiffel vant.
 dar an sô stuont vil tougen daz Sigemundes kint:
 er fuortez alsô balde, sam ob ez wæte der wint.

Den vergen sach doch niemen. wie sêrez schiffel vlôz 2
 von Sifrides kreften! die wâren alsô grôz,
 man wânde daz ez fuorte ein sunderstarker wint:
 nein, ez fuorte Sifrit, der schœnen Sigelinde kint.

Bi des tages zîte und in der einen naht 3
 kom er zeinem lande mit grezlicher maht:
 daz hiez zen Nibelungen und wâren sîne man;
 lant unde bürge, daz was im allez undertân.

Der herre fuor alleine uf einen wert vil breit. 4
 daz schif gebant vil balde der ritter vil gemeit.
 dô gie er zeinem berge, dâ eine bure stuont:
 er suohte herberge, sô noch die reisemüeden tuont.

Dô kom er für die porten: verslozzen im diu stuont. 5
 jâ huoten si ir êren, sô noch die liute tuont.
 anz tor begunde bôzen der unkunde man:
 daz was vil wol behüetet. dô vant er inrethalben dran

Einen ungefüegen, der der porten pflac, 1
 bi dem sîn gewäfen zallen zîten lac:
 der sprach 'wer ist der bôzet ûzen an daz tor?'
 dô wandelt sîne stimme der küene Sîvrit dâ vor.

Er sprach 'ich bin ein recke. entsliezet uf die tür: 2
 mir muoz eteslicher volgen noch hiute der für,
 der gerne sanfte læge und hête sîn gemach.'
 dô zurder portenære, dô daz Sîfrit gesprach.

Nu hêt der rise küene sîn wäfen an sich genomen, 3
 sîn helm uf sîn houbet was im vil schiere komen,
 den schilt er balde zuchte, daz tor er uf dô swanc:
 wie rehte gremliche er gegen Sîvride spranc,

Wie er getorste wecken sô manegen küenen man! 4
 dâ wurden slege swinde von siner hant getân:
 dô begunde im schirmen der hêrlîche gast:
 dô schuof der portenære, daz sîn schiltgespenge brast

Von einer îsenstangen; des gie dem helde nôt. 5
 ein teil begunde fürhten Sîvrit den tût,
 dô der portenære sô tobelîchen sluoc:
 dar umbe was im wæge sîn herre Sîfrit genuoc.

Si striten alsô sêre, daz al diu burc erdôz, 6
 wande ir beider sterke was unmâzen grôz,
 er twanc den portenære, daz er in sît gebant.
 do erschullen disiu mære über al der Nibelunge lant.

Dô hôrt daz grimme strîten verre durch den bere 7
 Albrîch der vil starke, ein küene getwerc.
 er wart gewâfent balde: dô lief er dâ er vant
 disen gast vil edelen; der was in beiden unbekant.

Albrich was vil grimme, dar zuo starc genuoc : 1
 helm unde ringe er an dem libe truoc,
 und eine geisel swære von golde an siner hant.
 dâ lief er harte sère dâ er Sivriden vant.

Siben knöpfe swære die hiengen vor dar an, 2
 dâ mit er vor der hende den schilt dem küenen man
 sluoc sô bitterlîchen, daz im des vil zebrast :
 des kom in grôze sorge dô der wætlîche gast.

Den scherm er von der hende gar zebrochen swanc : 3
 dô warfer von im balde sîn wâfen, daz was lanc.
 den sînen kamerere wolder niht slahen tôt ;
 er schônte sîner zûhte, als im sîn tugent gebôt.

Mit starken sînen handen lief er Albrîchen an. 4
 dô vieng er bî dem parte den altgrîsen man :
 er zogeten ungefuoge, daz er vil lût erscrê.
 zuht des jungen recken diu tet Albrîche wê.

Lûte rief der küene 'nu lâzet mich genesen ! 5
 und môht ich iemens eigen ân einen recken wesen
 - dem swuor ich des eide, ich wære im undertân -,
 ich diende iu ê ich stürbe.' sô sprach der listige man.

Dô bant er Albrîchen alsam den risen ê : 6
 die Sîfrides krefte tâten im vil wê.
 daz twerc begunde vrâgen 'wie sint ir genant ?'
 er sprach 'ich bin es Sîfrit : ich wânde ich wære iu wol bekant.'

'Sô wol mich dirre mære !' - sprach aber daz getwerc - 7
 'nu hân ich wol erfunden diu degenlîchen werc,
 daz ir von wâren schulden muget landes herre wesn.
 ich tuon swaz ir gebietet, daz ir lâzet mich genesn.

Dô sprach der herre Sifrit 'ir sult balde gân, 1
 und bringet mir der recken, der besten der wir hân,
 tûsent Nibelunge, daz mich die hie gesehn.'
 was er der aller wolde, des hört in niemen verjehn.

Dem risen und Albrîchen lóst er dô diu bant. 2
 dô lief er harte balde dà er die recken vant.
 er wacht in grôzen sorgen vil manegen küenen man:
 er sprach 'wol uf, ir helde! ir sult zuo Sifride gân.'

Si sprungen von dem bette und wâren vil bereit: 3
 tûsent sneller degene wurden wol gekleit.
 si kômen dà si funden Sifriden stân.
 dà wart ein schône grûezen ein teil mit vorhten getân.

Vil kerzen wart enzûndet: man schanet im lûtertranc. 4
 daz si sô balde kômen, des saget er in dô danc.
 er sprach 'ir mûezet hinne mit mir über fluot.'
 des vant er vil bereite die helde kûen unde guot.

Wol drîzec hundred recken die wâren schiere komen: 5
 ûz den wurden tûsent der besten dô genomen:
 den brâhte man ir helme und ander ir gewant,
 dô er si fûeren wolde in daz Prûnhilde lant.

'Hört, ir guoten ritter, waz ich iu welle sagn: 6
 ir sult vil richiu kleider dà ze hove tragen,
 dà wir sehen mûezen vil minneclîchiu wip.
 dar umbe sult ir zieren mit guoter wæte den lîp.'

Nu sprichet lîht ein tumber 'ez mac wol lûge wesen: 7
 wie môhte sô vil ritter bî ein ander sîn genesn?
 wâ nâmen si die spîse: wâ nâmen si gewant?
 sine kundenz niht verenden, und ob in dienten drîzec lant.

Sivrit was sô rîche, als ir wol habt gehôrt: 1
 im diente daz kûneerîche und Nibelunge hort.
 des gaber sinen degenen vil volleclich genuoc,
 wande sîn wart doch niht minre, swie vil man von dem
 schatze truoc.

Vil fruo an einem morgen huoben si sih dan. 2
 waz sneller geverten Sivrit dô gewan!
 si fuorten ros diu guoten und hêrlich gewant:
 si kômen ritterliche in daz Prûnhilde lant.

Dô stuonden in den venstern diu minneclîchen kint. 3
 dô sprach diu kûneginne 'weiz iemen, wer die sint,
 die dort her gein uns vliezent sô verre ûf jenem sê?
 si fuorent segel rîche; diu sint noch wîzer danne ein snê.'

Dô sprach der vogt von Rîne 'eʒ sint mîne man; 4
 die hêt ich an der verte hie nâhe bî verlân:
 die hân ich besendet. frowe, die sint komen.'
 der hêrlichen geste wart vil grôze war genomen.

Dô sach man Sifride vor in eime scheffe stân 5
 in vil hêrlicher wæte: im volget manec man.
 dô sprach diu kûneginne 'her kûnec, ir sult mir sagen:
 sol ich die geste enpfâhen, oder sol ich grûezen si verdagen?'

'Ir sult in begegene' - sprach er - 'mit zûhten gân: 6
 ob wir si sehen gerne, daz si wol daz verstân.'
 dô tet diu kûneginne daz ir der kûnec geriet:
 Sifride mit dem gruoze von den andern si dô schiet.

Man schuof in herberge mit willen al zehant. 7
 dô was sô vil der geste komen in daz lant,
 daz si sich allenthalben drungen mit den scharn.
 dô wolden die vil kûenen zuo den Burgonden varn.

Dô hiez diu küneginne teilen sâ zehant 1
 golt unde silber, ros und ouch gewant,
 den vrenden und den kunden, vil manegem werden man,
 des ir ir vater hête nach sîme tôde vil verlân.

Si hiez ouch sagen von Rîne den recken alsô hêr, 2
 daz si des schatzes nâmen minre oder mêr,
 daz si daz mit ir bræhten in Burgonden lant.
 des antwurt ir Hagene in hôhem muote sâ zehant:

‘Vil edeliu küneginne, iu sî für wâr geseit: 3
 ez hât der künec von Rîne golt unde kleit
 alsô vil ze gebene, daz wir des habn rât,
 daz wir iht hinnen fûeren iwer golt oder iwer wât.’

‘Nein durch mîne liebe’ - sprach daz magedîn - 4
 ‘ich wil mit mir hinnen fûeren zweinzec schrîn
 von golde und ouch siden, daz gebn sol mîn hant.
 sô wir komen übere in daz Guntheres lant.’

Dô sprach diu küneginne ‘wem lâz ich mîniu lant? 5
 di sol nu hie bestiften unser beider hant.’
 dô sprach der künec edele ‘nu heizet her gân.
 swer iu dar zuo gevalle, den suln wir vogt wesn lân.’

Ein ir hôhsten mâge diu frowe bi ir sach; 6
 er was ir muoter bruoder: zuo dem diu maget sprach
 ‘nu lât iu sîn bevolhen die bürge und ouch daz lant,
 unze daz hie rihte des künec Guntheres hant.’

Dô welt si ir gesindes tûsent küener man, 7
 die mit ir ze Rîne solden varn dan,
 zuo jenen tûsent recken von Nibelunge lant.
 si rihten sich zer verte: man sach si riten uf den sant.

Si fuorten mit ir dannen sehs und ahzec wip, 1
 dar zuo wol hundert mägede; vil schene was ir lip.
 sine soumten sich niht langer, si ilten vaste dan.
 die si dâ heime liezen, hey, was der weinen began!

In tugentlichen zühten si rûmt ir eigen lant. 2
 si kust ir friunt die nâchsten, swaz si der bi ir vant.
 mit guotem urloube si kômen uf den sê.
 zuo zir vater lande kom diu frowe nimmer mê.

Dô hört man uf der verte maneger hande spil: 3
 aller kurzewile der hêten sie vil.
 dô kom in zuo zir reise ein rehter wazzerwint:
 si fuoren von dem lande vil harte vrœlichen sint.

Jane wolde si den herren niht minnen uf der vart: 4
 ez wart ir kurzewile unz in sîn hûs gespart,
 ze Wormez zuo der bürge zeiner hôchgezît,
 dar si vil freuden rîche kômen mit ir recken sit.

IX AVENTIURE

WIE SIVRIT ZE WORMEZ IN BOTSCHEFTE FUOR.

Dô si gevarn wâren vollen niwen tage, 5
 dô sprach der küene Hagene 'nu merket waz ih sage:
 ir sûmt iuch mit den mæren ze Wormeze an den Rîn;
 die iwern boten solden nu zen Burgonden sîn.'

Dô sprach der künec Gunther 'ir habt mir reht geseit: 1
 nu bereitet iuch zer verte, ritter vil gemeit;
 wande wir in disen zîten ander niemen hân,
 der dar müge gerîten.' dô sprach der übermüete man

'Nu wizzet, lieber herre, ine bin niht bote guot: 2
 ich wil iuch eins bewîsen, der ez doch gerne tuot;
 Sîvrit den küenen sult ir ez niht verdagen:
 durch iwer swester liebe getarrerz nimmer iu versagen.'

Er sande nâch dem recken: der herre kom zehant. 3
 er sprach 'sît daz wir nâhen heim in mîniu lant,
 sô solde ich boten senden der lieben swester mîn
 und ouch mîner muoter, daz wir nu nâhen an den Rîn.

Des bite ich iuch, her Sîvrit, daz ir die reise tuot, 4
 daz ez mit mir verdiene diu edel maget guot
 mit allen mînen frîunden, ritter vil gemeit.'
 dô sprach der degen küene 'der reise bin ich iu bereit.

Nu enbietet swaz ir wellet, des wirdet niht verdaget: 5
 durch die vil minneclîchen sô wirt ez gar gesaget.
 zwîu solde ih der verzîhen, die ich in herzen hân?
 swaz ir durch si gebietet, daz ist allez getân.'

'Sô sagt mîner muoter und ouch der swester mîn, 6
 daz wir an dirre verte in hôhem muote sîn:
 lât wîzzen mîne brüeder, wie wir geworben hân;
 und ander unser frîunde sol man diu mære ouch hœren lân.

Kriemhilde und mîne muoter sult ir niht verdagen: 7
 mîn und Prûnhilde dienest sult ir in beiden sagen
 und allem ir gesinde und allen mînen man.
 dar nâch ie ranc mîn herze, wie wol ich daz erworben hân!

Und sagt ouch minen brüedern und andern friunden mîn, 1
 daz si mit grôzem vlîze dar zuo gewarnt sîn:
 man sol in unsern landen diu mære wizzen lân:
 ich wil mit Prünhilde vil grôze hôchgezite hân.

Und bitet mîne swester, sô si daz habe vernomen, 2
 daz ich mit mînen gesten si ze lande komen,
 daz si mit vlîze enpfâhe die triutinne mîn:
 daz wil ich immer mêre mit triwen dienende sîn.

Dô der vil küene recke urloup von im genam 3
 und ouch von Prünhilde, der ritter lobesam
 reit in grôzen freuden ze Wormeze an den Rîn.
 ez en künde in allen landen ein bote bezzer niht gesin.

Mit vier und zweinzec recken ze Wormeze er dô reit, 4
 des küneges kom er âne, dô daz wart geseit,
 allez daz gedigene vor jâmer hêten nôt:
 si vorhten daz ir herre dort beliben wære tôt.

Die helde erbeizet wâren, vil hôhe stuont ir muot: 5
 vil schier in kômen beide die junge kûnege guot
 und al daz hofegesinde. der herre Gêrnôt sprach,
 dô er sînen bruoder niht bî Sîvrîde ensach,

Willekomen, ritter edele: ir sult uns hœren lân, 6
 wâ ir mînen bruoder, den kûnec, habt verlân;
 diu Prünhilde sterke in wæn uns hât benomen:
 sô ist uns ir hôhiu minne harte schedelîche komen.

Iu edeln recken beiden und al den mâgen sîn 7
 enbiutet sînen dienest der hergeselle mîn:
 den liez ih wol gesunden; er hât mich her gesant
 ze boten mit den mæren, daz ich iu diu tæte bekant.

Ir sult daz ahten schiere, swie só daz geschehe,
 daz ich iwer muoter und iwer swester sehe.
 die sol ich lâzen hoeren, waz in enbôten hât
 Gunther der künec rîche, des dine in hôhen êren stât.

Dô sprach der junge Giselher 'dâ sult ir dar gân;
 dâ habt ir mîner muoter vil liebe an getân:
 diu hât doch michel sorge umbe den bruoder mîn.
 si sehent iuch beide gerne: des sult ir gar âne angest sîn.'

Dô sprach der herre Sîvrit 'swaz ich in dienen kan,
 daz sol vil willeclîchen mit triwen sîn getân.
 wer sagt nu den frouwen, daz ich wil dar gân?'
 'daz tuon ich.' sprach dô Giselher, der vil wætlîche man.

Der stolze kûene recke zuo sîner muoter sprach,
 und oûch zuo sîner swester, dâ er si beide sach,
 'uns ist komen Sîvrit, der helt ûz Niderlant,
 in hât mîn bruoder Gunther ze Rîne her von im gesant.

Er bringet uns diu mære, wiez umben künec stê.
 nu sult ir im erloben, daz er ze hove gê:
 er bringet diu rehten mære her von Islant.
 noch was den edelen frouwen vil michel sorgen bekant.

Si sprungen nâch ir wæte; dô leiten si sich an.
 si bâten Sîvride dô hin ze hove gân:
 daz tet er willeclîche, wand er si gerne sach.
 Kriemhilt diu vil schene zuo zim dô gütlichen sprach

'Sît willekomen, her Sîvrit, ritter lobelîch:
 wâr ist komen mîn bruoder, Gunther der künec rîch?
 von Prûnhilde sterke den wæn wir haben verlorn.
 owê mir armen meide, daz ih danne ie wart geborn!

Dô sprach der ritter küene 'nu gebt mir botenbrôt, 1
 ir edeln juncfrouwen; ir wænet âne nôt:
 ich liez in wol gesunden, daz tuon ich iu bekant.
 er und diu schône Prünhilt hânt mich iu beiden her gesant.

Si enbietet iu ir dienest mit triwen in daz lant, 2
 vil richiu küneginne: daz tuon ih iu bekant.
 nu lâzet iwer weinen: si wellent schière komen.
 sine hêt in langen ziten sô lieber mære niht vernomen.

Mit snêblanken gêren ir ougen wolgetân 3
 wischte si nâh trehenen: danken si began
 dem boten dirre mære, diu ir dâ wâren komen.
 dô was ir michel trûren und ouch weinen benomen.

Den boten bat man sitzen: des was er bereit. 4
 dô sprach diu juncfrouwe 'mir wære niht ze leit,
 ob ich ze botenmiete iu solde gebn mîn golt.
 dar zuo sît ir ze rîche: ich wil iu sus immer wesn holt.'

'Ob ich nu eine hête' - sprach er - 'drîzec lant, 5
 so enpfinge ich doch vil gerne gâbe ûz iwer hant.'
 dô sprach diu minneclîche 'nu sol ez sîn getân.'
 si hiez ir kamerære nâch der botenmiete gân.

Vier und zweinzec pouge mit gesteine guot 6
 die gap si im ze miete. dô stuont alsô sîn muot,
 ern woldes niht behalden: er gab ez sâ zehant
 ir nâchestem ingesinde, die er zer kemenâten vant.

Ir muoter bôt ir dienest in gütlichen an. 7
 'ich sol iu sagen mære,' - sprach dô der küene man -
 'wes iuch bitet Gunther swenn er nu kumet her:
 daz weller immer dienen, daz ir leistet sine ger.'

Die sine rîche geste bitet er iuch wol enpfân; 1
 des manter iuch vil sere. irn sult des ouch niht lân,
 irn ritet im zegegene für Wormez uf den sant:
 des sit ir von dem kûnege mit grôzen triuwen gemant.

Dô sprach diu minneclîche 'des bin ich vil bereit. 2
 swaz ich im kan gedienen, daz ist im unverseit:
 in vriuntlichen triuwen sô sol ez sîn getân.
 dô mêrte sich ir varwe, die si vor liebe dô gewan.

Ez enwart nie bote enpfangen deheines fürsten baz. 3
 getorste si in küssen, diu frowe tete daz.
 wie rehte minneclîche er von den frowen schiet!
 dô tâten die Burgonden als in Sîvrit dô geriet.

Sindolt unde Hûnolt und Râmolt der degen, 4
 die muosen vil unmuoze zuo den zîten pflegen,
 rihten daz gesidele, als in daz was bekant.
 des kûneges ambetliute man dô mit arebeiten vant.

Ortwin unde Gêre, des rîchen kûneges man, 5
 die sanden allenthalben nâch den friunden dan,
 und kunten in die hôchgezît, diu dâ solde sîn.
 dâ bereiten sich engegene diu vil schœnen magedin.

Der palas und die wende was allez ûberal 6
 gezieret gegen den gesten: der Gunthers sal
 wart vil wol bezimbert durch manegen vremden man.
 diu selbe grôze hôchgezît huop vil vrelîchen an.

Dô riten allenthalben die wege durch daz lant 7
 der drier kûnege mâge: die hête man besant,
 daz si den solden warten, die in dâ wolden komen.
 dô wart ûz den kisten rîcher wæte vil genomen.

Dô sagte man diu mære, daz man nu rîten sach 1
den kûnec mit sinen gesten. dô huop sich ungemach
von des volkes kreften in Burgonden lant.
hey, waz man sneller degene bi frowen Prûnhilde vant!

Dô sprach diu schœne Kriemhilt 'ir mîniu magedîn, 2
di an dem antpfange mit mir wellen sîn,
die suochen ûz den kisten diu aller besten kleit,
diu si mûgen vinden: daz si den frowen ouch geseit.'

Dô kômen ouch die recken. die hiezen tragen dar 3
die hêrlîchen sâtele nâch rôtem golde var:
die frowen solden rîten ze Wormeze an den Rîn.
bezzet pferetgerete kûnde ninder gesîn.

Hey, waz dâ liehtes goldes von den mœren schein! 4
ouch lâgen an den zôumen vil manec edel stein.
die gûldînen schemele ob liehten pfellen guot
brâht man dar den frouwen: si wâren hôhe gemuot.

Begürtet mit den sîden, vil schœn unde starc, 5
brâht man den frouwen vil wûnneclîchiu mære.
diu rîchen fûrbûege sach man diu mære tragen
von den besten sîden dâ von iu iemen kûnde sagen.

Sehs und ahzec frouwen hiez man kômen dan, 6
die gebende truogen: zuo Kriemhilde stân
kômen die vil schœnen und hêten liehtiu kleit.
dô wart ouch wol gezieret vil manec minneclîchiu meit,

Funfzec unde viere von Buregonden lant: 7
sô wâren ez die besten, die man ze hove vant:
di sah man valevahse under liechten porten gân.
des Gunther an si gerte, daz wart mit vlîze getân.

Von liechten rîchen pfellen, verre ûz heiden lant, 1
 si truogen vor den gesten sô manec guot gewant,
 daz ir genuoge schene ze rehte wol gezam.
 er wære in swachem muote, der ir deheiner wære gram.

Von zobel und ouch von harme vil kleider man dâ vant: 2
 dâ wart vil wol gezieret manec arm unde hant
 mit bougen ob den siden, die si dâ solden tragen.
 iu enkûnde ditze vlîzen z'ende niemen gesagen.

Vil manegen gûrtel spæhen, guot unde lanc, 3
 über vil rîchiu kleider manec wîziu hant dô swanc,
 über rôcke ferrans und pfelle ûz Arâbin,
 daz si in al der werlde bezzer nimmer kûnden sîn.

Ez wart in fûrgespene manec schoeniu meit 4
 genæet vil minnelîche: ez môht ir wesn leit,
 der ir vil liehtiu varwe niht lûhte gegen der wât.
 sô schœnes ingesindes nu niht kûneges kûnne hât.

Dô die vil minnelîchen nu truogen ir gewant, 5
 di si dâ fûeren solden, die kômen al zehant,
 der hôchgemuoten recken ein vil michel kraft:
 man truog ouch dar mit schilden vil manegen eschînen schaft.

X AVENTIURE

WIE DER KÜNEC GUNTHER ZE WORMZE MIT FROU
PRÜNHILT PRUTTE.

Anderthalp des Rînes sach man mit grôzen scharn 1
den küneec mit sinen gester zuo dem stade varn :
ouch sach man dâ bi zöumen leiten manege meit.
di si enpfâhen solden, die wâren alle bereit.

Dô die von Islande zen schiffen kômen dan, 2
und ouch von Nibelungen Sivrides man,
si gâhten zuo dem lande - unmüezec wart ir hant -,
dâ man des küneges friunde des stades anderthalben vant.

Nu heert ouch disiu mære von der künegîn, 3
Uoten der vil rîchen, wie si diu magedîn
gefrumte von der bürge dar si dô selbe reit.
dâ gewan ein ander künde vil manec ritter unde meit.

Der margrâve Gêre Kriemhilde zoumte dan 4
niwan ûz der bürge : Sivrit der küene man
dient ir dô minnelîche ; si was ein schône kint.
des wart im wol gelônêt von der juncfrouen sint.

Ortwin der küene bi frôn Uoten reit, 5
vil geselleclîchen manec ritter unde meit.
ze solhem antphange - des mac man wol verjehen -
wart nie sô vil der frouwen bi ein ander gesehn.

Vil manegen buhurt richen sach man dan getribn
 von helden loblichen - niht wol wær ez beliben -
 vor Kriemhilde der schœnen al zuo den schiffen dan.
 dô huop man von den mœren manege frowen wol getân.

Der künec was komen selbe, und manec werder gast.
 hey, waz starker scheffe vor den frowen brast!
 man hört dâ hurteclichen von schilden manegen stôz.
 hey, waz dâ rîcher buckelen von gedrange lût erdôz.

Die vil minneclichen die stuonden an der habe.
 Gunther mit sînen gesten gie von den schiffen abe:
 er fuorte Prûnhilde selbe an sîner hant.
 dâ lûhten wider ein ander die edeln stein und daz gewant.

In vil grôzen zûhten frow Kriemhilt dô gie
 dâ si Prûnhilde mit ir gesinde enpfie:
 dâ wart gerûcket hôher mit wûnneclicher hant
 vil manec schapel rîche, dô si sie enpfingen in daz lant.

Dô sprach gezogenliche Kriemhilt diu kûnegîn
 'ir sult zuo disen landen grôz willekomen sîn
 mir und mîner muoter unde allen, die wir hân.
 dar nâch wart von den frouwen mit triuten küssen niht verlân.

Dô Prûnhilde frouwen vol kômen uf den sant,
 dâ wart vil minneclichen genomen bî der hant
 von hêrlichen recken manec wip wol getân:
 man sah die schœnen mægede vor den kûneginnen stân.

Ê daz ir gruoz ergienge, daz was ein langiu stunt.
 jâ wart dâ gekûsset manec rôsenvarwer munt.
 noh stuonden bî ein ander die kûneges tœhter rîch
 daz liebet an ze sehene vil manegen recken lobelîch.

Dô speheten mit den ougen die ê hörten jehn, 1
 daz si sô minnecliches hêten niht gesehn,
 sô die frowen beide: des jach dâ manec man,
 daz si den pris an schœne in manegen landen müesen hân.

Die frowen spehen kunden und hêrlîchen lîp, 2
 die lobten durch ir schœne daz Guntheres wîp;
 doch sprâchen dâ di wîsen, die hêtenz baz ersehnen,
 man môhte Kriemhilde wol für Prûnhilde jehn.

Wider ein ander giengen beide magt unde wîp: 3
 man sach dâ wol gezieret vil manegen schœnen lîp.
 dâ wâren sîdîn hütten und manec rîch gezelt:
 der was dâ vil gespannen vor Wormez über al daz velt.

Von des kûneges mâgen wart dringen niht verlân. 4
 man hiez die kûneginne beide dannen gân,
 und mit in al die frouwen, dâ man den seaten vant:
 dar brâhten si die degene ûzer Burgonden lant.

Dô wâren ouch die geste zen rossen alle kômen. 5
 vil manec rîchiu tjoste durch schilde wart genômen:
 daz velt begunde stouben sam ob al daz lant
 mit louge enbrunnen wære. dâ wurden degene bekant.

Wes dâ die helde pfâgen, daz sach vil manec meit. 6
 man sagte daz her Sivrit mit sinen helden reit
 manege widerkêre für die hütten dan:
 er fuort der Nibelunge tûsent wætlicher man.

Dô kom von Tronege Hagene, als im der wirt geriet: 7
 den buhurt frîuntliche dô der helt geschiet,
 daz si ungestoubet liezen diu minneclichen kint:
 des wart dô von den gesten gevolget zûhtecliche sint.

Dô sprach der herre Gêrnôt diu ros nu lâzet stân, 1
 unz ez beginne kuolen: sô sulen wir ane vân
 dienen schœnen wîben für den palas wît;
 sô der kûnec welle rîten, daz ir bereite denne sit.

* Dô der buhurt was zergangen über al daz velt, 2
 dô giengen kurzewilen under manec hôch gezelt
 die ritter zuo den frouwen uf hôher freuden wân:
 dâ vertriben si di stunde unz man rîten wolde dan.

Vor der vesperzîte, dô diu sunne nider gie 3
 und ez begunde kuolen, niht langer man daz lie:
 in die stat sich huoben man magt und wîp.
 mit ougen wart getriuret vil maneger juncfrouwen lîp.

Dâ wart von guoten recken vil kleider ab geriten, 4
 von den hôchgemuoten, nâch ir lande siten,
 unz für den palas wîten. der kûnec dâ nider stuont:
 dâ wart gedienet frouwen, sô helde hôch gemuote tuont.

Dô wurden ouch gescheiden die rîchen kûnegîn. 5
 frou Uote und ouch ir tochter die giengen beide hin
 mit ir ingesinde in ein vil wîtez gadem.
 dô hîrt man allenthalben vil harte grêzlichen kradem.

Gerihet wart gesidele: der kûnec wolde gân 6
 ze tische mit den gesten. dô sach man bî im stân
 die schœnen Prûnhilden: krône si dô truoc
 in des kûneges lande; diu was spæhe und rîch genuoc.

Vil manec hêr gesidele mit guoten taveln breit 7
 vol spise wart gesetzt, als uns daz ist geseit.
 des si haben solden, wie wênec des gebrast!
 dô sach man bî dem kûnege vil manegen hêrlichen gast.

Des wirtes kamerære in pecken goldes rôt 1
 daz wazzer für truogen. des wære lützel nôt,
 ob iu daz iemen seite, daz man diente baz
 ze küneges höchgeziten : ich geloube müeliche daz.

E daz der vogt von Rîne wazzer dô genam, 2
 dô tet der herre Sîvrit, als im dô gezam :
 er mant in sîner triuwe, wes er im verjach,
 ê daz er Prünhilde dà heim in Islande sach.

Er sprach zuo dem künège 'jâ swuor mir iwer hant, 3
 swenne daz frou Prünhilt keme in ditze lant,
 ir gæbt mir iwer swester. war sint die eide komen ?
 ich hân an iwer reise vil michel arebeit genomen.'

Dô sprach der künec rîche 'ir habt mich reht ermant. 4
 jane sol niht meineide werden des mîn hant.
 ich wilz iu helfen füegen, sô ich beste kan.'
 dô hiez man Kriemhilde ze hove zuo dem künège gân.

Mit ir schœnen meiden si kom für den sal. 5
 dô spranc von einer stiegen Giselher zetal :
 dô hiez er wider wenden ir schœnen magedîn.
 'niwan mîn swester eine, diu sol mit uns ze hove sîn.'

Dô brâhter sine swester dà man den künec vant : 6
 dà stuonden ritter edele von maneger fürsten lant.
 in dem sal enmitten hiez man si stille stân.
 dô was diu frowe Prünhilt an ir sedel nu gegân.

Sine wesse niht der mære, waz man dà wolde tuon. 7
 dô sprach zuo sînen mægen der Danerâtes suon
 'helfet mir daz mîn swester Sîvriden neme ze man.'
 dô sprâchens al geliche 'si mag in wol mit êren hân.'

Dô sprach der künec Gunther 'lâ dirz niht wesn leit, 1
 mîn vil liebiu swester, und læse mînen eit.
 ich swuor dich eime recken, und wirdet er dîn man,
 sô hæstu mînen willen mit grôzen triuwen getân.'

Dô sprach diu magt edele 'vil lieber bruoder mîn, 2
 irn solt mich niht vlêhen: jâ wil ich immer sîn,
 swie ir mir gebietet, daz sol sîn getân.
 ich sol in loben gerne, den ir mir, hërre, gebt ze man.'

Von lieber ougenweide wart Sîvrîdes varwe rôt. 3
 ze dienest sich der meide dô der recke bôt.
 man hiez si zuo ein ander in dem ringe stân,
 und vrâgtes, ob si wolde den vil wætlichen man.

In magtlichen zûhten si schamte sich ein teil; 4
 iedoch sô was gelücke und Sîvrîdes heil,
 daz si in niht versprechen wolde dâ zehant:
 ouch lobte si ze wfibe der edel künec von Niderlant.

Dô si in gelobte und ouch er die meit, 5
 gütlich umbevâhen daz was dâ vil bereit
 von Sîvrîdes armen daz minneclîche kint.
 nâch siten wart gekûsset diu schene küneginne sint.

Sich teilte daz gesinde als schiere daz geschach, 6
 an daz gegenseide man Sîvrîde sach
 mit Kriemhilde sitzen: dar dient im manec man.
 man sach die Nibelunge nâch im an den sedel gân.

Ouch was der wirt gesezzen, und Prûnhilt diu meit. 7
 dô sach si Kriemhilde - dô wart ir nie sô leit -
 bî Sîvrîde sitzen. weinen si began:
 ir vielen heize trähene über liehtiu wange dan.

Dô sprach der wirt des landes 'waz ist iu, frowe min, 1
daz ir sô lâzet truoben liechter ougen schîn?
ir möhtet sanfter lachen, wan iu ist undertân
min lant und rîche bürge und manec wætlicher man.'

'Ich mac wol balde weinen.' - sprach diu schœne meit - 2
'umbe dine swester ist mir sô grimme leit.
di sich ich sitzen nâhen dem eigenholden dîn:
daz muoz mich immer riuwen, sol si alsô verstôzen sîn.'

Dô sprach der künec Gunther 'ir mugt wol stille dagn. 3
ich will iu zandern ziten disiu mære sagn,
warumbe ich mine swester dem recken hân gegeben:
jâ mac si mit dem degene immer vrœliche lebn.'

Si sprach 'mich jâmert immer ir schœne und ouch ir zuht, 4
und wesse ich war ich solde, ich hête gerne vluht,
daz ich iu nimmer wolde geligen nâhen bi,
irn saget mir wâ von Kriemhilt diu wine Sîvrides si.'

Dô sprach der künec rîche 'ich tuonz iu wol bekant: 5
er hât als wol bürge als ich und witiu lant.
daz wîzzet sicherlichen, er ist ein künec rîch:
des gan ich im ze minnen die schœnen magt lobelich.'

Swaz ir der künec sagete, si hête trûeben muot. 6
dô gâhete von den tischen vil manec ritter guot:
ir buhurt wart sô herte, daz al diu burc erdôz.
den wirt dô bi den gesten dâ ze wesene verdrôz.

Er dâht, er læge sanfter der schœnen frowen bi. 7
dô was er des gedingen niht in herzen vri,
im müese von ir minne ein hôhez liep geschehen:
er begunde vriuntliche an die magt dicke sehen.

Ir ritterschaft die geste hiez man dô abe lân: 1
 der künec mit sime wibe ze bette wolde gân.
 vor des sales stiegen die frowen schieden sich
 in zühten minneclîche, als ich wol verwæne mich.

Dô kom ir ingesinde: die soumten sich des niht, 2
 ir rîchen kamerære die brâhten in diu lieht.
 sich teilten dô die recken, der zweier kûnege man:
 dô sach man vil der degene dan mit Sîvrîde gân.

Die herren kômen beide aldâ si solden ligen. 3
 dô gedâht ir ieslicher mit minnen an gesigen
 den minneclîchen frouwen: daz trôst in wol den muot.
 Sîvrîdes kurzewfle diu wart vil grœzliche guot.

Dô der herre Sîvrît bî Kriemhilde lac, 4
 und er sô minneclîche der juncfrowen pflac
 mit sînen edeln minnen, si wart im sô der lîp:
 daz kunde ouch si verdienen als ein tugende rîche wîp.

Ine sage iu niht mêre, wie er der frowen pflac. 5
 nu hært ouch disiu mære, wie Gunther gelac
 bî der sînen briute: der vil mære degen
 was vil dicke sanfter bî andern frouwen gelegn.

Daz volc was im entwichen, frowen unde man: 6
 dô wart diu kemenâte balde zuo getân.
 er wânde, er solde triuten ir minneclîchen lîp.
 ez was noch vil unnâhen, ê daz si wûrde sîn wîp.

In sabenwîzem hemedê si an ein bette gie: 7
 dô dâht der ritter edele 'nu hân ihz allez hie,
 des ich ie dâ gerte in allen mînen tagn.'
 si muos im durch ir schône von grôzen schulden wol behagn.

Diu lieht begunde bergen diu Gunthers hant. 1
 dô gie der künec rîche dâ er die frowen vant:
 er leite sich ir nâhen: sîn freude diu wart grôz:
 die vil minneclîchen der helt mit armen umbeslôz.

Minneclîche triuten des kunder vil begân, 2
 ob im dês diu frouwe gegunnet wolde hân:
 dô zurnde si sô sêre, daz in gemuote daz,
 er wânde vinden freude: dô vand er vintlichen haz.

Si sprach 'ritter edele, ir sultez lâzen stân, 3
 des ir dâ habt gedingen: jane mages niht ergân.
 ich wil noch magt belîben - ir sult wol wîzzen daz -
 unz ich diu rehten mâre ervinde an allen dîngen baz.

Dô ranger nâch ir minne; daz was der frowen leit: 4
 dô greif nâch eime gûrtel diu hêrlîche meit,
 daz was ein starker porte, den si alle zîte truoc.
 wie lûtzel si dem kûnege sînes willen dô vertruoc!

Die fûeze und ouch die hende ze samne si im bant: 5
 si truog in zeinem nagele, und hieng in an die want.
 daz enkunder niht erwenden: vil kreftec wart sîn nôt.
 jâ hêt er von ir sterke vil nâch gewonnen den tôt.

Dô begunde vlêgen der meister wânde sîn. 6
 'nu leset mîn gebende, vil edeliu kûnegîn:
 ine trow iu, frowe, nimmer mit minnen an gesigen,
 und sol ouh harte selten iu sô nâhen mêr geligen.'

Sine ruochte wie im wære, wande si vil sanfte lac: 7
 dort muoser allez hangen die naht unz an den tac,
 unze daz der morgen durch diu venster schein.
 des kûneges kurzewile was die wile harte klein.

Nu sagt mir, her Gunther, wær iu daz iht leit, 1
 ob iuch gebunden fünden' - sô sprach diu schœne meit -
 'die iwern kamerære von einer frowen hant?'
 dô sprach der ritter edele 'daz wûrde iu ûbele bewant.

Ouch hête ichs lûtzel êre.' - sprach der kûene man - 2
 'durch iwer selber zûhte sô lât mich zuo ziu gân.
 sît daz iu mîn minne sint sô grimme leit,
 jane sol ich nimmer rûeren mit mîner hant an iwer kleit.'

Dô si daz gehôrte, zehant si in verlie; 3
 wider an daz bette er zuo der frowen gie:
 er leite sich sô verre, daz er ir schœne wât
 niht mohte gereichen. des wolde ouch si dô haben rât.

Dô kom ir ingesinde und brâhten in diu kleit: 4
 der was in an dem morgen harte vil bereit.
 swie man dâ gebârte, trûrec was genuoc
 der edel wirt des landes, swier des tages krône truoc.

Nâch siten, der si pflâgen und man durch reht begie, 5
 der kûene mit sîner frouwen niht langer daz enlie,
 si kômen zuo dem mûnster, dâ man die messe sanc:
 ouch kom der herre Sivrit. sich huop dâ grœzlich gedranc.

Nâch kûneclîchen êren was in dar bereit 6
 swaz si habn solden, ir krône und ouch ir kleit.
 dô wurden si gewihet. dô daz was getân,
 dô sah mans alle viere under krône lobelîche stân.

Vil knappen swert dâ nâmen, vier hundert oder baz, 7
 den kûnegen zen êren, ir sult gelouben daz.
 sich huop vil michel freude in des kûneges lant:
 man hôrte schefte bresten an der swertdegene hant.

Dô sâzen in den venstern diu schoenen magedîn : 1
 si sâhen vor in gleston vil maneges schildes schîn.
 dô hête sich gesundert der kûnec von sinen man ;
 swes anders iemen pflege, man sah in trûrende stân.

Im und Sîvrîde ungeliche stuont der muot. 2
 wol wesse sine swære der kûene degn guot.
 dô gienger zuo dem kûnege : vrâgen er began
 'wie ist iu hînt gelungen ? des wolt ich gerne kûnde hân.'

Dô sprach der wirt zem gaste 'ich klag iu mînen schaden : 3
 ich hân den ûbeln tiufel heim ze hûs geladen.
 dô ich si wânde minnen, vil sêre si mich bant ;
 si truoc mich zeime nagele, und hie mich hôhe an eine want.

Dâ hieng ich angestlichen die naht unz an den tac, 4
 è daz si mich enbunde : unsanfte si mîn pfac.
 daz sol iu friwentliche uf genâde sîn gekleit.
 dô sprach der herre Sîvrit 'daz ist mir grœzliche leit.

Des bringe ich iuch wol innen ; und lât irz âne nît, 5
 ich schaffe, daz si noch hînt sô nâhen bî iu lît,
 sô daz si iuch ir minne gesûmet nimmer mêt.
 der rede was dô Gunther nâch sinen arebeiten hêt.

'Nu schowe mîne hende, wie di geswollen sint : 6
 die twanc si mir sô sêre, als ob ich wære ein kint,
 daz mir bluot zen nagelen allenthalben dranc.
 ich hêt ze mîme lebene harte kleinen gedanc.'

Dô sprach der starke Sîvrit 'du maht noch wol genesn. 7
 uns zwein ist ungeliche hînte gewesen :
 mir ist dîn swester Kriemhilt als mîn selbes lîp.
 ez muoz diu frowe Prûnhilt noch hînte werden dîn wîp.

Ich kum ze naht vil tougen zer kemenâten dîn 1
 in mîner tarnkappen - des soltu sicher sîn -,
 sô daz sich mîner liste mac niemen wol verstân :
 sô heiz die kamerære zuo zir herbergen gân.

Sô lesche ouch ich den kinden diu lieht an der hant : 2
 bî disem wortzeichen sol dir sîn bekant,
 daz ich bî dir si nâhen. jâ twing ich dir dîn wîp,
 daz du si hînte minnest, oder ich verliuse den lîp.

‘Ane daz du iht triuetest’ - sprach der kûnec dô - 3
 ‘die mîne lieben frouwen : anders bin ich vrô :
 sô tuo ir swaz du wellest ; und nêmostu ir den lîp,
 daz solde ich wol verkiesen : si ist ein ungehiurez wîp.’

‘Daz nim ich’ - sô sprach Sîvrit - ‘ûf die triwe mîn, 4
 daz ich ir niht enminne : diu schœne swester dîn
 diu ist mir vor in allen, die ich noch ie gesach.’
 des frowete sich dô Gunther, dô daz Sîvrit sprach.

Dâ was von kurzewile in gedrange nôt. 5
 den buhurt unde schallen allez man verbôt,
 dâ die frowen solden in den palas gân ;
 dô hiezen die kamerære die liute von dem wege stân.

Von rossen und von liuten geroumet was der hof. 6
 der frowen iesliche fuort ein biscop,
 dô si vor den kûnegen ze tische solden gân.
 in volgte zuo dem sidele vil manec recke wolgetân.

Der kûnec in guotem wâne bî sîme wîbe saz : 7
 daz im gelobte Sîvrit, wol gedâhter an daz.
 der eine tac in dûhte wol drîzec tage lanc :
 an Prûnhilde minne stuond im aller sîn gedanc.

Wand er erbeite kûme, daz man von tische gie. 1
 die schönen Prünhilde man dô komen lie,
 und ouch Kriemhilde, si bêde an ir gemach:
 hey, waz man küener degene bi den schönen frouen sach!

Sivrit unde Kriemhilt sie baz unde baz 2
 durch liebe ein ander trûten, ir sult gelouben daz,
 swaz si im gedienen kunde, wie lützel si des liez!
 dô muos ouch leisten Sivrit, alser Gunther gehiez.

Er stal sich von der frouwen. vil tougen kom er dan, 3
 dô er vil kamerære vant mit lichten stân.
 diu begunder leschen den kinden an der hant:
 daz ez Sivrit wære, daz wart dô Gunther bekant.

Wol wesser waz er wolde: dô hiez er dannen gân 4
 mägede unde frouwen. dô daz wart getân,
 er beslôz mit vlîze selbe dô die tür:
 starker rigele zwêne die warfer snelle der für.

Diu licht verbarger schiere under die bettwât. 5
 eines spils begunde - des was dô niht rât -
 Sivrit der vil starke, und ouch diu schone meit:
 daz was dô dem kûnege beide lieb unde leit.

Der helt sich leite nâhen der junefrouen bi. 6
 si sprach 'nu lât ez, Gunther, als liep als iu daz si,
 daz ir niht arebeite lîdet alsam ê.'
 sît getet diu frouwe dem kûnege Sifride wê.

Dô hal er sine stimme, daz er niht ensprach. 7
 der kûneç ez allez hôrte, swie er sîn niht ensach,
 daz heimlicher dinge von im dô niht geschach:
 si hêten an dem bette harte kleinen gemach.

Er gebärte sam ez wære Gunther der künec rich : 1
 er umbeslöz mit armen die magt lobelich.
 si warfen üz dem bette dà bi uf einen banc,
 daz im sîn houbet lüte an eime scamel erklanc.

Wider uf mit kreften spranc der vil snelle man : 2
 er woldez baz versuochen. dô er des began,
 daz ers im wolde twingen, dem erz gelobet è,
 solch wer deheiner frouwen wæn ich immer mër ergé.

Dô er niht wolde erwinden, diu magt balde uf spranc : 3
 'irn sult mir niht zefüeren mîn hemed alsò blanc
 mit iwer unfuoge, wand ez ist mir leit :
 des bringe ich iuch wol innen.' sprach dô diu minnelichiu meit.

Mit ir vil starken armen beslöz si den degn : 4
 dô wolde si in gebunden alsam den künec legen,
 daz si an ir bette möhte habn gemach.
 daz er ir wât zerfuorte, diu frowe ez grœzliche rach.

Waz half sîn grôziu sterke, und ouch sîn michel kraft? 5
 si erzeigete wol dem degene ir libes meisterschaft :
 si truog in mit gewalte - dà wart ir ellen schîn -,
 und druchtin ungefuoge zwischen der wende und einen schrîn.

'Owê' - gedâht der recke - 'sol ich nu minen lip 6
 von einer magt verliesen, sò mugen elliu wip
 her nâch immer mære höße tragen den muot :
 sò versuocht ez vil mænegiu, diu ez sus nimmer getuot.

Dô schamte sich vil sère der vil küene man, 7
 ob ir gelingen solde. zürnen er began :
 mit ungefüeger krefte sazter sich ir wider ;
 er versuochtez angestlichen an der küneginne sider.

Swie vaste si uf im læge, sîn zorn in dô twanc, 1
 und ouch sîn starkez ellen, daz er ân ir danc
 sich wider uf gerihte: sîn angest diu was grôz.
 si tâten in dem gademe her und dar vil manegen stôz.

Ouch was der kûnec Gunther niht ân angest gar: 2
 er muose dicke wenken vor in her und dar.
 si rungen alsô starke, daz ez grôz wunder was,
 daz ir ieslichez vor dem andern ie genas.

Den kûnec müete sêre beidenthalp diu nôt: 3
 doch vorhter michels mêre den Sîvrides tôt;
 wande si hêt dem degene den lip nâch benomen.
 wan daz er niht getorste, er wâr zehelfe im gerne komen.

Jâ werte harte lange under in der strit: 4
 doch brâht er die frouwen wider an daz bette sit.
 swie vaste si sich werte, ir wer wart ze jungest kranc.
 der kûnec in sînen sorgen hête manegen gedanc.

Ez dûhte in harte lange, ê daz er si betwanc. 5
 si drucht im sîne hende, daz ûz den nageln spranc
 daz bluot im von ir kreften: daz was dem helede leit.
 sit brâhter an ein lougen die vil hêrlîchen meit

Ir ungefüeges willen, des si ê dâ jach. 6
 der kûnec ez allez hôrte, swier doch niht ensprach.
 er druchtes an daz bette, daz si vil lût erschrê.
 ir tâten sîne krefte dô vil grezlichen wê.

Dô greif si nâch dem porten, dâ si den ligen vant, 7
 und wold in dâ mit binden: dô wert ez sô sîn hant,
 daz ir diu lit erkrachten. dô verzagt ir lip:
 des wart der strit gescheiden: dô wart si Guntheres wip.

Si sprach 'kūnec edele, ir sult mich lebn lān. 1
 ez wirt vil wol versüenet, swaz ich iu hān getān.
 ich gewer mich nimmer mēre der edeln minne dīn,
 wand ich hān wol erfunden daz du kanst frowen meister sīn.

Sivrit der stuont dannen: ligen liez er die meit, 2
 sam er von sīnem lībe ziehen wolt diu kleit.
 er nam ir ê ein vingerlīn von golde wol getān:
 daz wolde got von himele daz er daz hēte verlān.

Dar zuo nam er ir gürtel: daz was ein porte guot. 3
 ine weiz ob er das tæte durch sīnen hōhen muot.
 er gab ez sīme wibe: daz wart im sider leit.
 dô lāgen bī ein ander Gunther und Prūnhilt diu meit.

Er pflag ir minneclīche, als in daz beiden zam: 4
 dô muoste si verkiesen ir zorn und ouch ir scham.
 von sīner heinlīche si wart ein lützel bleich:
 hey, waz ir von der minne ir vil grōzen krefte entweich!

Done was ouch si niht sterker dann ein ander wip. 5
 er trūte minneclīche den ir vil schōenen līp.
 ob sīz versuochte mēre, was kunde daz vervān?
 daz hêt ir der kūnec Gunther mit sīnen minnen getān.

Wie rehte minneclīche si im nāhen lac 6
 mit vriuntlicher liebe unze an den liehten tae!
 ouch was der herre Sivrit nu hin wider gegān:
 dā warder wol enpfangen von einer frowen wol getān.

Er understuont ir vrāge, der si doch hēte muot, 7
 und hal sīz harte lange, der kūene degn guot.
 diz kleinœt er dā heime ir doch ze jungest gap:
 daz frumte vil der degene mit samt im selben in daz gap.

Der wirt wart an dem morgen verre baz gemuot, 1
 denner dà vor wære: des wart diu fröwde guot
 in allen sinen landen von manegem hôhen man.
 die er ze hûse ladete, den wart dô dienste vil getân.

Diu hôchgezît dô werte unz an den zwelften tac, 2
 daz in al der wile der scal dà nie gelac
 von aller hande vreuden, der iemen solde pflegen:
 dô wart des kûneges koste vil harte hôhe gewegn.

Des edeln wirtes mâge, als ez der kûnec gebôt, 3
 si gâben richiu kleider, dar zuo daz golt vil rôt,
 ros und dar zuo silber, vil manegem varnden man:
 die gâbe nemen wolden, die schieden vrelîchen dan.

Sivrit der herre ûzer Niderlant 4
 mit tûsent sinen recken, allez daz gewant
 daz si ze Rîne brâhten, daz wart gar hin gegeben,
 und ouch diu ros mit sâtelen: si kunden milteclîche lebn.

Ê man die rîchen gâbe alle dà verswanc, 5
 die wider ze lande wolden, die dûhte des ze lanc.
 ezn wart nie geste mære baz gepfegn.
 sus endet sich diu hôchgezît: daz wolde Gunther der degen.

XI AVENTIURE

WIE SIFRIT SÏN WÏP HEIM ZE LANDE FUORTE, UND WIE
SI SÏT DA HEIME BROUTTEN.

Sun der Sigemundes mit gütlichem site
sprach zuo sinen heleden 'tuot des ich iuch bite,
nu bereit uns die mære: jâ wil ich in mîn lant.'
liep was ez sime wibe, dô si diu mære an im ervant.

Si sprach zuo dem herren 'sît wir von hinnen varn,
daz ich sô harte gâhe, daz heiz ich wol bewarn:
mir suln ê mîne brüeder teilen mit diu lant.'
leit was ez Sîvrîde, dô erz an Kriemhilt ervant.

Die fürsten zuo zim giengen und sprâchen alle dri
'nu wizzet daz, her Sîvrît, daz iu immer sî
mit triwen unser dienest bereit unz in den tôt.'
des neiger dô den degenen, dô manz im sô wol erbôt.

'Wir suln ouch mit iu teilen' - sprach Giselher daz kint -
'lant unde bürge, die unser eigen sint:
swaz der wîten erbe uns ist undertân,
der sult ir teil vil guoten mit samt Kriemhilde hân.'

Zuo sinen konemâgen dô der recke sprach,
dô er den guoten willen an den herren sach,
'got lâze iu iwer erbe immer sælec sîn,
und ouch der liute drinne: jâ tuot diu wine mîn

Des teiles wol ze râte, den ir ir woldet gebn. 1
 dà si dà sol tragen krône, und suln wir daz gelebn,
 si muoz werden rîcher, dann iemen lebender si.
 swaz ir sus gebietet stên ich iu dienstlichen bi.

Dô sprach diu frowe Kriemhilt 'habt ir der erbe rât, 2
 umbe Buregonden degene ez sô lihte niene stât,
 sine mûge ein kûnec gerne fûeren in sîn lant:
 jâ sol si mit mir teilen mîner lieben brüeder hant.'

Dô sprach der herre Gêrnôt 'nu nim dir swen du wil. 3
 die mit dir gerne rîten, der vindestu vil.
 von drîzec hundert recken sô habe dir tûsent man:
 die sîn dîn heimgesinde.' daz was ir liebe getân.

Si bereite sich zir verte, als ir vil wol gezam: 4
 ir edeln ingesindes frou Kriemhilt dô nam
 zwô und drîzec mâgede, dar zuo fûnfhundert man.
 Eckewart der grâve fuor mit sîner frowen dan.

Urloup si alle nâmen, beide ritter unde kneht, 5
 mâgede unde frouwen: daz was vil michel reht.
 mit kûssen gescheiden wurden si zehant.
 si roumten minneleche dô der Buregonden lant.

Dô beleiten si ir mâge vil verre ûf den wegen: 6
 man hiez in allenthalben ir nahtselde legn
 swâ si si gerne nâmen, durch der kûnege lant.
 dô wurden boten balde dem kûnege Sigemunt gesant,

Daz er daz wizzen solde, und ouch Sigelint, 7
 daz Sîvrit komen wolde, und ouch frown Uoten kint,
 Kriemhilt diu vil schene, von Wormez über Rîn.
 done kunden in diu mære nimmer lieber gesîn.

'Nu wol mich,' - sprach dô Sigemunt - 'daz ich gelebt hân 1
daz hie diu schœne Kriemhilt sol gekrœnet stân:
des müezen wol getiuret sîn diu erbe mîn.
Sivrit der vil küene sol hie nu selbe voget sîn.'

Dô gap diu frowe Sigelint vil manegen samit rôt, 2
silber und golt daz swære: daz was ir botenbrôt.
si vreute sich der mære, und mit ir manec man.
allez ir gesinde mit vlîze kleiden sich began.

Man seit ir wer dà kœme mit Sivride in daz lant. 3
dô hiezen si gesidele rihten alzehant,
dar zuo er under krône vor fürsten solde gân.
dô riten im engegene des küene Sigemundes man.

Ist iemen baz empfangen, daz ist uns unbekant, 4
denne die helede wurden ze Sigemundes lant:
Sigelint sîn muoter Kriemhilt engegen reit
mit maneger schœnen frouwen; ir volgeten ritter gemeit

In einer tageweide, dà man die geste sach. 5
die vremen und die kunden die dolten ungemach,
unz daz si kômen zer bürge wol bekant,
riche unde mære, diu was ze Santen genant.

Mit lachendem munde Sigelint und Sigemunt 6
kusten Kriemhilde mit vrôuden sâ zestunt,
darnâch ir vil liebez kint: ir leit in was benomen.
allez ir gesinde was in grôze willekomen.

Dô brâhte man die geste für Sigemundes sal. 7
die schœnen juncfrouwen huob man dà zetel,
nider von den mæren. dà was vil manec man,
dô man den edeln frouwen mit vlîze dienen began.

Swie grôz ir hôchgeziten bi Rîne was bekant, 1
 noch gap man hie den heleden richer gewant,
 danne si ie getrûegen noch bi al ir tagen.
 man môhte michel wunder von ir richeite sagn.

Dô si in ir wirde sâzen und hêten genuoc, 2
 waz goltvarwer gêren ir ingesinde truoc,
 und vil der edeln steine verwieret wol dar in!
 sus pflag ir vlîzeclîche Sigelint diu kûnegin.

Dô sprach vor sinen mâgen der herre Sigemunt 3
 'allen mînen friunden sol daz wesn kunt,
 daz Sîvrit mîne krône hinnen für sol tragn.'
 diu mære hórten gerne die von Niderlanden sagn.

Dô bevalh er im die krône, geriht und ouch diu lant: 4
 sît was er ir aller meister, die er inder vant.
 und dâ er rihten solde, daz wart sô getân,
 daz man von schulden vorhte der schönen Kriemhilde man.

In disen hôhen êren lebt er, daz ist wâr, 5
 und riht ouch under krône unz in daz zwelfte jâr,
 daz diu schône Kriemhilt einen sun gewan:
 daz was des kûneges mâgen nâch ir willen wol ergân.

Den ilte man dô taufen, und gab im den namen 6
 Gunther nâch sinem ôheim: des dorfter sich niht schamen.
 geriet er nâch den mâgen, er wûrde ein kûener man.
 man zôh in wol mit vlîze: daz wart von schulden getân.

In den selben zîten dô starp frau Sigelint: 7
 dô hêt den gewalt mit alle der edeln Uoten kint,
 der sô richer frouwen ob landen wol gezam.
 di mohten ir dô dienen mit grôzen êren âne scham.

Nu hêt ouch dort bi Rîne, sô wir hœren sagen, 1
 bi Gunther dem rîchen einen sun getragen
 Prûnhilt diu schœne in Burgonden lant:
 durch des recken liebe sô wart er Sîvrit genant.

Wie rehte vlîzelîche man sîn hûeten hiez! 2
 Gunther der vil rîche im magezogen liez,
 diez kûnden lœren tugende, gewûehs ez zeinem man.
 hey, waz im ungelûcke sit der mâge an gewan!

Mære zallen zîten wart wider und dar geseit, 3
 wie rehte wûnneclîche die helde vil gemeit
 lebten zallen stunden in Sigemundes lant.
 daz selbe tet ouch Gunther mit sînen mâgen ûz erkant.

Daz lant ze Nibelunge Sîvrîde nu diente hie 4
 - rîcher sîner mâge wart deheiner nie -
 dar zuo sîns vaters erbe: er was ein degn guot.
 des truoc der vil kûene deste hôher den muot.

Hort den aller meisten den ie kûenec gewan, 5
 âne die es ê pflâgen, hête nu der kûene man,
 den er vor einem berge mit sîner hant erstreit,
 dar umb er sluoc ze tôde vil manegen ritter gemeit.

Er hêt den wunsch der êren: und wær es niht geschehn, 6
 sô müese man von schulden Sîvrîde jehn,
 er were ein der beste, der ie uf ors gesaz.
 man vorhte sine sterke, und tet vil pillîche daz.

XII AVENTIURE

WIE GUNTHER SIVRIDEN UND KRIEMHILT ZE WORMZE MIT
BETE BRAHTE, DA MAN IN OUCH SIT ERSLUOC.

Nu dâht ouch alle zite daz Gunthers wip 1
'wie treit et alsô hôhe Kriemhilt den lîp?
nu ist doch unser eigen Sîvrit ir man:
daz er uns niht endienet, des wolde ich gerne ein ende hân.'

Diz truoc si in ir herzen, und wart doch wol verdeit. 2
daz si ir sô vrende wâren, daz was der frowen leit:
daz si niht zinses hête von des fürsten lant,
wâ von daz komen wære, daz hêt si gerne bekant.

Sie versuochtez manegen ende, ob kûnde daz geschehn, 3
daz si Kriemhilde môhte noch gesehn.
si reitez heinliche, des si dâ hête muot:
done dûht den kûnec rîche der frowen bete niht ze guot.

'Wie kunden wir si bringen' - sprach der lobes rich - 4
'her zuo disen landen? daz wære unmügelich.
si sint uns gar ze verre: ich getar sis niht gebiten.'
des antwurt im Prûnhilt in vil listegen siten:

'Swie hôhe rîche wære deheines kûneges man, 5
swaz im gebûte sîn herre, wie torster daz verlân?'
des ersmielte Gunther, dô si daz sprach:
ern jach sîn niht ze dienste, swie dick er Sîvriden sach.

Si sprach 'vil lieber herre, durch den willen mîn 1
 só hilf mir, daz noch Sîvrit mit der swester dîn
 kom zuo disem lande, daz wir si hie gesehn:
 sone künde mir zer werlde nimmer lieber gesehn.'

Diner swester güete, und ir vil zühtec muot, 2
 als ih daran gedenke, wie sanfte mir daz tuot,
 und ir vil wert enpfâhen, dô ich kom in daz lant!
 ez enwart nie antphanc rîcher zer werlde niemen bekant.'

Si gertes alsô lange, unz daz der kûnec sprach 3
 'ir muget mich sanfte vlêgen, wand ich gerner nie gesach
 deheiner slahte geste in den landen mîn:
 ich wil in boten senden daz si zuns komen an den Rîn.'

Dô sprach diu kûneginne 'nu sult ir mir sagn, 4
 wenne ir si welt besenden, oder in welhen tagn
 suln unser friunde komen in daz lant?
 die ir dar senden wellet, die lât werden mir bekant.'

'Daz tuon ich' - sprach dô Gunther - drîzec mîner man 5
 wil ich dar lâzen rîten.' die hiezer für sich gân.
 bi den enbôt er mære in Sîvrides lant:
 ze liebe gab in Prûnhilt vil harte zierlich gewant.

Dô sprach dô Gunther 'ir recken, ir sult sagen - 6
 swaz ich bi iu enbiete, des sult ir niht verdagen
 Sîvrit, mîne friunde, und ouch die swester mîn -
 daz in kan in der werlde niemen holder gesin.

Und bitet si von uns beiden, leisten âne strît 7
 daz si komen ruochen zunszer hôchgezît.
 gein disen sunewenden sol er mit sînen man
 sehen hie vil manegen, der im vil grôzer êren gan.

Sime vater Sigemunde sagt ouch den dienst mîn,
 daz ich mit minen mâgen im immer wæge sîn:
 und saget ouch miner swester, daz si niht lâze daz,
 sine kom zir friunden. irn gezam nie hôchgeziten baz?

Frou Uote und al die frouwen, die man ze hove vant,
 enbuten ouch ir dienst in Sivrides lant
 den minnelichen meiden und manegem kûenem man.
 Gêre der vil kûene sich huop mit den mæren dan.

Si fuoren reisliche. ir pferd und ir gewant
 daz was in komen allen. dô rûmten si daz lant:
 in zougte wol der reise dar si dâ solden varn.
 der kûnec mit geleite bat die boten wol bewarn.

Inre tagn zwelfen si kômen in daz lant
 ze Nibelunges bûrge: dar wâren si gesant.
 dâ vunden si mit freuden den vil kûenen degn.
 diu ros den boten wâren müede von den langen wegn.

Dem kûnege und sime wibe wart zehant geseit,
 in wâren komen geste, die trûegen solhiu kleit,
 als man zen Burgonden dô der site pflac:
 Kriemhilt spranc von dem bette, dar an si bi ir liebe lac.

Si bat an ein venster ir magede eine gên:
 diu sach den kûenen Gêren an dem hove stên
 mit sînen hergesellen, die wâren dar gesant.
 gein ir herzeleide wie liebiu mære si bevant!

Si sprach zuo dem kûnege ir sult ûf stên:
 ich sihe den starken Gêren her ze hove gên.
 in hât mîn bruoder Gunther wætlich her gesant.
 waz der recke werbe, daz hêt ich gerne bekant.

Allez daz gesinde dar lief unde gie: 1
 in vil grôzen vreuden man die geste enpfie,
 und tâten in daz beste daz si kunden dô,
 wande si ir künfte in ir herzen wâren vrô.

Gêre wol enpfangen wart mit sînen man: 2
 ir ros man hiez behalten, die helde brâht man dan
 dâ der herre Sîvrit bî Kriemhilde saz,
 si sâhen in vil gerne, daz sult ir wizzen, âne haz.

Gegen den lieben gester si stuonden ûf zehant: 3
 wol wart enpfangen Gêre von Buregonden lant
 und sîne hergesellen. bî der hende dan
 Kriemhilt fuorte Gêren: daz wart durch liebe getân.

Si bat in zuo zir sitzen. er sprach 'wir suln stên: 4
 erlobet uns die boteschaft ê daz wir sitzen gên,
 und hœret disiu mære, waz iu enboten hât
 Gunther unde Prûnhilt, der dinc an êren hôhe stât,

Und waz iu iwer muoter mîn frowe her enbôt, 5
 Gîselher der junge und ouch Gêrnôt
 und iwer besten mâge: die hânt uns her gesant,
 und enbietent iu ir dienst ûzer Burgonden lant.'

'Nu lôn in got.' - sprach Sîvrit - 'ich getrow in allen wol 6
 triwen unde guotes, alsô man friunden sol:
 daz selbe tuot ir swester. wie si gehabn sich,
 die unsern lieben friunde, daz sult ir lâzen hoeren mich.

Sît daz wir von in schieden, hât ieman iht getân 7
 den mînen konemâgen? daz lâzet mich verstân.
 daz wil ich in mit triuwen immer helfen tragen,
 unze daz ir vînde den mînen dienst mûezen klagen.'

Dô sprach der maregrâve Gère, ein recke guot, 1
 'si sint in allen tugenden mit freuden wol gemuot.
 si ladent iuch ze Rîne zeiner hôchgezit:
 wande si iuch gerne sâhen, daz ir des âne zwifel sit.

Und bitent mine frouwen, si sül mit iu komen: 2
 swenne sô der winder ein ende habe genomen,
 gein disen sunewenden, sô wolden si iuch sehen.
 dô sprach der herre Sivrit 'daz künde muelich geschehn.'

Dô sprach aber Gère üz Buregonden lant 3
 'iwer muoter Uote diu hât iuch gemant
 und iwer brüeder beide: ir sult in niht versagen.
 daz ir in sît sô verre, daz hêre ich si vil dicke klagen.

Prûnhilt min vrouwe und alle ir magedîn, 4
 die frôwent sich der gegene, ob daz künde sîn,
 daz si iuch noch gesâhen, sô si des habent muot.
 dô dûhten disiu mære die schœnen Kriemhilde guot.

Gère was ir sippe: der wirt in sitzen hiez. 5
 den gesten hiez man schenken, niht langer man daz liez.
 dô was ouch komen Sigemunt. dô er die boten sach,
 der herre minneliche zuo den Burgonden sprach:

'Sît willekomen, ir recken, ir Gunthers man. 6
 sît Kriemhilt ze manne minen sun gewan,
 sô solde man iuch degene dicker bî uns sehn,
 ob ir uns mit triuwen woldet friuntschefte jehn.'

Si sprâchen, swenner wolde si solden gerne komen. 7
 in wart ir michel müede mit freuden vil benomen:
 die boten bat man sitzen, spise man in truoc;
 der wart den lieben gesten gegeben volleclich genuoc.

Man gab in herberge und schuof in guot gemach. 1
 der herre zuo den gessen minneclîchen sprach
 'lât iuch niht betrâgen: darumbe ir sît gesant
 her von unsern friunden, wir sülenz iu schiere tuon bekant.

Ich muoz mihs noch berâten mit den friunden mîn. 2
 er gie zeiner sprâche mit den recken sîn:
 er sprach 'mîn friunt Gunther hât nâch uns gesant
 zeiner hôchgezîte; nu ist ze verre mir sîn lant:

Und bitent mîne frouwen, daz si mit mir var. 3
 nu râtent, liebe vriunde, wie sol si komen dar?
 und solde ich herverten durch si in driȝec lant,
 dâ müese in gerne dienen hin diu Sîvrides hant.'

Dô sprâchen sîne recken 'habt ir der reise muot, 4
 sô wellen wir iu râten daz iu wirdet guot:
 ir sult mit tûsent recken rîten an den Rîn,
 sô mugt ir wol mit êren dâ zer hôchgezîte sîn.'

Dô sprach von Niderlanden der herre Sigemunt 5
 'welt ir zir hôchgezîte, wan tuot ir mir daz kunt?
 ob ez iu niht versmâhet, sô rîte ich mit iu dar,
 und bringe iu hundert degene; dâ mit mêr ich iwer schar.'

'Sît ir welt mit uns rîten, vil lieber vater mîn, 6
 - sprach der herre Sîvrit - 'vrô sol ich des sîn.
 inre tage zwelfen sô rûm ich mîniu lant.'
 die si dô fûeren wolden den gap man ros und ouch gewant.

Dô der kûnec edele der reise hête muot, 7
 dô hiez man wider rîten die snellen boten guot.
 den sînen konemâgen enbôt er an den Rîn,
 daz er gerne wolde dâ zir hôchgezîte sîn.

Sivrit unde Kriemhilt, als wir hören sagen, 1
 só vil den boten gâben, daz ez niht mohten tragen
 ir mære heim ze lande: er was ein richer man.
 ir starken soumære si triben vroelichen dan.

Ir vole daz kleite Sivrit und ouch Sigemunt: 2
 Ecgewart der grâve der hiez dô an der stunt
 frowen kleider suochen, die besten die man vant
 oder iemen vinden kunde über allez Sivrides lant.

Sätel unde schilde bereiten man began 3
 rittern unde frouwen. die mit im wolden dan,
 den gab man swaz si wolden. wie wëneç in gebrast!
 dô brâhter sînen friunden manegen hêrlîchen gast.

Den boten zogete sêre wider uf den wegn. 4
 dô kom wol ze lande Gêre der degen;
 er wart vil wol enpfangen: dô stuonden si zetal
 nider von den mæren für den Gunthers sal.

Der kûneç durch grôze liebe von dem sedele spranc. 5
 daz si só snelle kôemen, des bat si haben danc
 Prûnhilt diu schœne. der kûneç zen boten sprach
 'wie vert mîn friunt Sivrit, von dem mir liebes vil geschach?'

Dô sprach der kûene Gêre 'dâ wart er freuden rôt, 6
 er und iwer swester. nie friunden baz enbôt
 só friuntlicher mære deheiner slahte man,
 als iu der herre Sivrit und ouch sîn vater hât getân.'

Dô sprach zem marcgrâven des edeln kûneges wîp 7
 'nu sagt mir, kumet Kriemhilt? hât noch ir schœner lip
 behalten iht der zûhte der si wol kunde pflegen?'
 er sprach 'si koment beide, und mit in manec kûener degn.'

Frou Uote bat dô drâte die boten zuo zir gën. 1
 daz mac man ân ir vräge harte wol verstên,
 daz si vil gerne hôrte, was Kriemhilt noch gesunt.
 er sagete wie er si fünde, und daz si kœme in kurzer stunt.

Ouch wart von in diu gâbe ze hove niht verdeit, 2
 die in dort gab Sîvrit: golt silber unde kleit
 daz brâhte man ze sehene der drier kûnege man.
 der ir vil grôzen milte wart in dô dankes vil getân.

‘Er mac wol gebn ringe;’ - sprach Hagene der degn - 3
 ‘ern kûnde; niht verschwenden, und solt er immer leb. n.
 hort der Nibelunge beslozzen hât sîn hant:
 hey, solden wir den teilen noch in Buregonden lant!’

Allez daz gedigene freute sich der zuo 4
 daz si komen solden. spâte unde fruo
 wâren vil unniûezec des fûrsten ambetman.
 waz rîcher hergesidele man dâ rihten began!

Ortwin unde Sindolt, die zwêne kûene degn, 5
 die wâren vil unniûezec. die zît si muosen pflegen,
 der truhsæze und der schenke, rihten manegen banc:
 des hulfen ir undertânen. des sagete in Gunther dô danc.

Rûmolt der kuchenmeister vil wol berihte sît 6
 die sînen undertânen. vil manegen kezzel wît,
 hæfene unde pfannen, hey, waz man der dâ vant!
 dâ bereite man den spise die dâ kômen in daz lant.

Der frowen arebeiten was ouch niht kleine, 7
 dô si bereiten ir kleider. die edeln steine
 mit glanze verre glesten, verwieret in daz golt,
 dô si sie ane leiten, daz in die liute wûrden holt.

XIII AVENTIURE

WIE KRIEMHILT MIT IR MAN ZER HOCHGEZITE FUOR.

Alle ir unmuoze die lāzen wir nu sīn, 1
 und sagen iu wie Kriemhilt und ouch ir magedīn
 zer hōchgezite fuoren von Nibelunge lant.
 nie getruogen mēre sō manec hērlich gewant.

Vil der leitschrīne man schicte zuo den wegen: 2
 dô reit mit sīnen friunden Sivrit der degen
 und ouch diu küneginne uf hōher freuden wān.
 ir freude muose leider mit grōzem jāmer sīt zergān.

Dāheime si dô liezen ir beider kindelīn 3
 beliben in ir landen: daz muos et alsō sīn.
 von ir hove reise erstuonden starkiu sēr:
 vater unde muoter gesach daz kindel nimmer mēr.

Dā mite reit ouch dannen der künec Sigemunt. 4
 solder des getrouwen, wie ez im nāch der stunt
 zer hōchgezite ergienge, ern hēt ir niht gesehen:
 jā kunde im in der werlde leider nimmer geschehen.

Boten man für sande die diu mære sagten dar. 5
 dô reit ouch in engegene mit maneger liechten schar
 vil der guten degene, der Gunthers man:
 der wirt sich gegen den gesten sēre vlīzen began.

Er gie zuo Prünhilde dâ er si sitzen vant. 1
 'wie enpfie et iuch min swester, do ir kômet in daz lant?
 sam sult ouch ir enpfâhen daz Sivrîdes wîp.'
 'daz tuon ih.' - sprach diu frouwe - 'daz hât verschuldet wol
 ir lîp.'

Dô sprach aber Gunther 'si koment uns morgen fruo. 2
 nu ir si welt enpfâhen, dâ grifet balde zuo,
 daz wir ir in der bürge niht erbîten hie:
 mir kom in manegen zîten sô rehte lieber geste nie.'

Ir meide und ouch ir frouwen die hiez si dô zehant 3
 suochen guotiu kleider, diu besten diu man vant,
 diu si wol mit êren vor gesten mohten tragen.
 wie gerne si daz tæten, daz mac man lihte gesagen.

Ouch îlten in dô dienen die Guntheres man. 4
 alle sîne degene der wirt zuo sich gewan:
 dâ reit diu kûneginne mit ir frowen mite
 gegen den lieben gesten al nâch friuntlichem site.

Mit wie getânen êren man die geste enpfie! 5
 si dâhte, daz frou Kriemhilt Prûnhilt nie
 sô rehte wol enpfiege in Burgonden lant.
 die si ê niene gesâhen den wart vil hôher muot erkant.

Nu was ouch komen Sivrît mit den sînen man. 6
 man sach die helde wenden wider unde dan
 des veldes allenthalben mit ungefüegen scharn:
 dringen unde stouben kunde niemen dâ bewarn.

Dô der wirt des landes Sivrîden sach 7
 und ouch Sigemunden, wie güetlich er sprach
 'nu sit mir grôze willekomen, und al den vriunden mîn:
 der iwer hôvereise suln wir hôchgemuote sîn.'

‘Nu lône iu got.’ - sprach Sigemunt, der ère gernder man - 1
 ‘sît daz iuch min sun Sîvrit ze friunde gewan,
 dô rieten mîne sinne daz ich iuch solde sehn.’
 dô sprach der wirt zem gaste ‘nu ist mir liebe dran geschehn.’

Sîvrit wart empfangen, als im daz wol gezam, 2
 mit vil grôzen èren: im was dà niemen gram.
 des half mit grôzen zûhten Giselher und Gêrnôt.
 ich wæne, man ez gësten nie sô minnelich erbôt.

Dô nâhten zuo zein ander der zweier kûnege wîp. 3
 dà wart vil sâtel lære: maneger schœnen frowen lîp
 wart von recken handen erhaben ûf daz gras.
 die frowen gerne dienten, waz der mit unmuozen was!

Dô giengen zuo zein ander diu minnelichen wîp: 4
 des was in grôzen freuden vil maneges recken lîp,
 daz ir beider grûezen sô schône wart getân.
 dô sah man vil der degene mit zûhten bî den frowen stân.

Daz herrenlich gesinde sich viengen bî der hant: 5
 in zûhten grôze nîgen des man vil dà vant,
 und küssen minneliche von frowen wolgetân.
 daz was liep ze sehene den kûnegen und ir beider man.

Sine biten dà niht langer, si riten zuo der stat. 6
 der wirt den sînen gësten daz wol erzeigen bat,
 daz man si gerne sæhe in Buregonden lant.
 vil manegen puneyz rîchen man vor den juncfrowen vant.

Uzer Tronege Hagene und ouch Ortewîn, 7
 daz si gewaltec wæren, daz wart dà vil wol schîn:
 swaz si gebieten wolden daz torste nieman lân.
 von in wart michel dienst den edeln gësten getân.

Vil schilde hört man schellen dâ zem bürgetor 1
 von stichen und von stôzen. vil lange habt der vor
 der wirt mit sinen gesteren ê daz si kômen drin:
 jâ gie in diu stunde mit vil grôzen vreuden hin.

Für den palas rîchen mit freuden si dô riten. 2
 vil manegen pfelle spæhen, rîch und wol gesniten,
 sach man über sâtele den frowen wolgetân
 allenthalben hangen. dô kômen Guntheres man.

Die hiezzen si dô fûeren balde an ir gemach. 3
 under wîlen blicken man Prûnhilde sach
 an frowen Kriemhilt, diu schœne was genuoc:
 ir varwe gegen dem glanze den schîn vil hêrlichen truoc.

Allenthalben schallen ze Wormez in der stat 4
 hôrte manz gesinde. der wirt den marschalch bat,
 Danewart Hagenen bruoder, er solde ir selbe pflegen:
 dô begunder daz gesinde harte gûetliche legen.

Dâ tûze und ouch dar inne spîsen man si lie. 5
 ez enwart deheiner geste baz gepflegen nie:
 allez daz si wolden, des was man in bereit.
 der kûene was sô rîche, daz dâ wart niemen niht verseit.

Man dient in frîuntliche und âne allen haz. 6
 der wirt dô ze tische mit sinen gesteren saz:
 dô muose sitzen Sîvrit als er ê hêt getân;
 mit im gie ze tische vil manec wætlicher man.

Einlife hundert recken an dem ringe sîn 7
 mit im zem ezzen sâzen. Prûnhilt diu kûegin
 gedâht daz eigen holde niht rîcher kûende wesen.
 si was im noch sô wæge, daz si in gerne lie genesn.

Aldâ der wirt mit freuden mit sinen gesten saz, 1
 vil der richen kleider wart von wine naz
 dâ die schenken solden zuo den tischen gân.
 dâ wart vil voller dienst mit grôzem willen getân,

Sô man ze hôchgezîten lange hât gepflegen. 2
 frowen unde meide hiez man schöne legen:
 von swannen si dar kômen, der wirt in willen truoc.
 mit vil grôzen zûhten man gab in allen genuoc.

Dô diu naht hêt ende und daz der tac erschein, 3
 ûz den leitschrinen vil manec edel stein
 erlûht in guoter wæte: die ruorte frowen hant.
 dô wart dar für gesuochet vil manec hêrlîch gewant.

Ê daz ez vol ertagete, dô kômen für den sal 4
 vil ritter unde knehte: dô huop sich aber schal
 vor einer fruomesse, die man dem kûnege sanc.
 dâ riten junge degene daz mans in muose sagen danc.

Lût und âne mâze manec pusûn erdôz: 5
 von trumben unde floyten wart der schal sô grôz,
 daz Wormez diu vil wîte darnâch vil lûte erschâl.
 die hôchgemuoten degene zen rossen kômen über al.

Dô huop sich in dem lande harte hôh ein spil 6
 von manegem guoten degene; der was dâ harte vil,
 den ir tumbiu herzen rieten hôhen muot:
 der sah man under schilde manegen zieren recken guot.

In diu venster sâzen diu hêrlîchen wip 7
 und vil der schôenen magede: gezieret was ir lip.
 si sâhen kurzewile von manegem kûenem man.
 der wirt mit sinen degenen selbe riten dâ began.

Alsô vergie ir wîle; diu dûhte si niht lanc. 1
 dô hôrte man zem tuome vil maneger glocken klanc.
 dô kômen in die mcere: die frowen riten dan.
 den edeln kûneginnen volget vil manec kûene man.

Si stuonden vor dem mûnster nider uf daz gras. 2
 Prûnhilt ir gesten dannoch vil wæge was.
 si giengen under krône in daz mûnster wît.
 sit wart diu liebe gescheiden: daz frumte grœzlicher nit.

Dô si gehôrten messe, si fuoren wider dan 3
 mit vil grôzen zûhten: man sach si sider gân
 ze tische minneclîche. ir freude nie gelac
 dô zer hôchgezîte unz an den einliften tac.

Dô gedâht diu kûeginne 'ine mac niht langer dagn. 4
 swie ich daz gefûege, Kriemhilt muoz mir sagen
 warumbe uns alsô lange den zins versezzen hât
 ir man, derst unser eigen. der vrâge hân ich keinen rât.

Sus warte si der wîle, als ez der tiufel riet: 5
 die fröude und ouch die hôhgezît mit jâmer si dô schiet.
 daz ir lac amme herzen ze lieht ez muose komen:
 des wart in mangan landen von ir jâmers vil vernomen.

XIV AVENTIURE

WIE DIE KÜNEGINNE SICH MIT EINANDER ZERWURFEN.

Vor einer vesperzite man ufem hove sach 1
ze rossen manegen recken. hiuser unde dach
was allez vol durch schouwen von liuten überal:
dô wâren ouch die frouwen zen venstern komen in den sal.

Ze samene dô gesâzen die kûneginne rich: 2
si reiten von zwein recken, die wâren lobelich.
dô sprach diu frowe Kriemhilt 'ih hân einen man,
daz elliu disiu rîche zuo sînen henden solden stân.'

Des antwort ir Prûnhilt 'daz môhte vil wol sîn, 3
ob niemen mêre enlebte wan sîn unde dîn,
sô môhten im diu rîche wol wesn undertân.
die wîle aber lebt Gunther, sô kûndeꝛ nimmer ergân.'

Dô sprach aber Kriemhilt 'nu sihstu, wier stât, 4
wie rehte herrenliche er vor den recken gât,
alsam der lichte mâne vor den sternen tuot:
des muoꝛ ich wol von schulden tragen vrœlichen muot.'

Dô sprach diu hûsfrouwe 'swie wætlîch sî dîn man, 5
swie schœne und swie biderbe, sô muostu vor im lân
Gunthern den recken, den edeln pruoder dîn:
der muoꝛ vor allen kûnegen mit lobe wærlîche sîn.'

Des antw
daz ich
an vil man
gehobest

'Jene soltu
wande ich
ich hert si
und dâ des

Und dâ er r
dâ jach des
des hân ich
dâ sprach d

Wie hêten s
daz ich eigen
es wil ich d
daz die r

Iene mag ir
'wîn sold ich
der uns mit
nich muet d

'Du moost ir
wîne deheîn
Gunther, mit
daz er dir z

'Du zûbest
'hu wil ich s
habe ze solh
die frouwen w

Des antwurt ir Kriemhilt 'sô tiwer ist wol mîn man, 1
 daz ich in âne schulde niht gelobet hân :
 an vil manegen tugenden ist sîn êre grôz.
 geloubestu des, Prûnhilt, er ist 'wol Gunthers genôz.'

'Jane soltu mir ez, Kriemhilt, z'arge niht vervân, 2
 wande ich doch âne schulde die rede niht hân getân.
 ich hôrt si jehn beide, dô ihs alrêrste sach
 und dâ des kûneges wille am mîne libe geschach,

Und dâ er mîne minne sô ritterlîch gewan : 3
 dô jach des selbe Sîvrit, er wære skûneges man.
 des hân ich in für eigen, sît ihs in hôrte jehn.'
 dô sprach diu frowe Kriemhilt 'sô wær mir ûbele geschehn.

Wie hêten sô geworben die edeln brüeder mîn, 4
 daz ich eigenmannes wine solde sîn ?
 des wil ich dich, Prûnhilt, vil vriuntlîchen biten,
 daz du die rede lâzest mit vil minneclîchen siten.'

'Ine mag ir niht gelâzen.' - sprach dô des kûneges wîp - 5
 'zuiu sold ich verkiesen sô maneges recken lîp,
 der uns mit dem kûnege ist dienstlîch undertân ?
 mich mûet daz ich sô lange niht zins von im gehabt hân.'

'Du muost in verkiesen, daz er dir immer bi 6
 wone deheiner dienste: er ist tiurer danne sî
 Gunther, mîn bruoder. du solt nimmer daz gelebn,
 daz er dir zins deheinen von sînen landen mûeẓe gebn.'

'Du ziuhest dich ze hôhe.' - sprach aber des kûneges wîp - 7
 'nu wil ich sehn gerne, ob man den dînen lîp
 habe ze solhen êren, als man den mînen tuot.'
 die frowen waren beide harte zornec gemuot.

Dô sprach diu frowe Kriemhilt 'daz muoz et nu geschehn. 1
sît du mines mannes für eigen hast verjehn,
nu müezen hiute kiesen der zweier künige man,
ob ich vor küneges wibe turre zuo der kirchen gân.

Ich lâze dich wol schouwen, daz ich bin adelvri : 2
mîn man ist verre tiwerer danne der dine sî;
dâ mite wil ich selbe niht bescholten sîn.
du muost daz hînte kiesen, wie diu eigene diu dîn

Ze hove gê vor recken in Buregonde lant. 3
ich wil selbe wesn edeler danne iemen habe bekant
deheine küneginne, diu krône ie her getruoc.
dô huop sich under den frouwen grôzes nides genuoc.

Dô sprach aber Prûnhilt 'wiltu niht eigen sîn, 4
sô muostu dich scheiden von den frouwen mîn
mit dînem ingesinde, dâ wir zem münster gân.
'entriwen,' - sprach dô Kriemhilt - 'daz sol werden getân.'

'Nu kleidet iuch, mîn mägede' - sprach Sîvrîdes wîp - 5
'ez muoz âne schande belîben hie mîn lîp.
ir sult daz lâzen schouwen, und habt ir rîche wât.
si mac sîn lougen gerne, des Prûnhilt verjehn hât.'

Man moht in lîhte râten : si suochten richiu kleit : 6
dâ wart vil wol gezieret manec frowe unde meit.
dô gie mit ir gesinde des edeln wirtes wîp.
ze wunsche wart gekleidet der schônen Kriemhilde lîp

Mit drin und vierzec meiden, di brâhtes an den Rîn : 7
die truogen lichte pfelle, geworht in Arâbîn.
sus kômen zuo dem münster die meide wolgetân:
in warten vor dem house alle Sîvrîdes man.

Die lînte
daz man d
daz si niht
dâ von wa

Hie stum
dâ hête ku
mit den sch
dâ kom dîu

Svaz kleide
vîder ir ges
si was sô rî
mit môhten

Ob iemen w
daz man sô
dâ in der w
von ze leide

Ze samne si
getet dîu h
die edeln Kr
jâ sol vor k

Dô sprach d
'kîndesta
die lîht gese
wie mac imm

Wen hâstu
daz traon ich
mînet erste
jâer was eqn

Die liute nam des wunder, wâ von daz geschach, 1
 daz man die küneginne nu gescheiden sach,
 daz si niht bi ein ander giengen alsam ê.
 dâ von wart manegem degene sit vil sorclichen wê.

Hie stuont vor dem münster daz Guntheres wip. 2
 dô hête kurzewile vil maneges recken lip
 mit den schônen vrouwen, der si dâ nâmen war.
 dô kom diu edel Kriemhilt mit maneger hêrlîchen schar.

Swaz kleider ie getruogen edeler ritter kint, 3
 wider ir gesinde was ez gar ein wint:
 si was sô rich des guotes, daz drîzec kûnege wip
 niht môhten wol erziugen daz tet der Kriemhilde lip.

Ob iemen wûnschen solde, der kûnde niht gesagn, 4
 daz man sô richer kleider gesæhe ie mêr getragn
 als in der wîle truogen ir meide wolgetân.
 wan ze leide Prûnhilde, ez hête Kriemhilt verlân.

Ze samne si dô kômen vor dem münster wit. 5
 ez tet diu hûsfrouwe durch einen grôzen nit,
 die edeln Kriemhilde hiez si stille stân:
 'jâ sol vor kûneges wibe nimmer eigen diu gegân.'

Dô sprach diu frowe Kriemhilt - zornec was ir muot - 6
 'kûndestu noch geswigen, daz wære dir guot.
 du hâst geschendet selbe den dînen, schônen lip:
 wie mac immer kebse mit rehte werden kûneges wip?'

'Wen hâstu hie verkebsset?' sprach des kûneges wip. 7
 'daz tuon ich dich.' - sprach Kriemhilt - 'den dînen schenen lip
 minnet êrste Sivrit, mîn vil lieber man:
 ja enwas ez niht mîn bruoder der dir den magetuom an gewan.

War kômen dine sinne? ez was ein arger list. 1
 zwiu lieze du in minnen, sit er din eigen ist?
 'ich hoere dich' - sprach Kriemhilt - 'âne alle schulde klagn.'
 'entriwen' - sprach dô Prûnhilt - 'daz wil ich Gunthere sagn.'

'Dich hât din übermüete' - sprach Kriemhilt - 'betrogen. 2
 du hâst mich ze dienste mit rede dich an gezogen.
 daz wizze in rechten triuwen, ez ist mir immer leit:
 getriwer heinliche wirde ich dir nimmer mêr bereit.'

Prûnhilt dô weinde: Kriemhilt niht langer lie, 3
 vor des küneges wibe inz münster si dô gie
 mit ir ingesinde. dô huop sich grôzer haz:
 des wurden liehtiu ougen vil starke trûebe unde naz.

Swaz man gote gediente oder iemen dâ gesanc, 4
 des dûhte Prûnhilde diu wile gar ze lanc:
 wand ir was vil trûebe der lîp und al der muot.
 des muosen sit engelten recken küene unde guot.

Prûnhilt mit ir frouwen gie für daz münster stân. 5
 si gedâhte 'mich muoz Kriemhilt mêre hêren lân
 des mich sô lûte zihet daz wortherte wîp:
 und hât er sichs gerüemet, ez gât Sivride an den lîp.'

Nu kom diu frowe Kriemhilt mit manegem küenen man: 6
 dô sprach diu hûsfrouwe 'ir sult mich ez lân verstan:
 ir jâhet mîn ze kebsen, daz sult ir lâzen sehn,
 und sult ez hie bewâeren, wâ mir daz laster sî geschehen.'

Dô sprach diu schoene Kriemhilt 'ir möht mich lâzen gân. 7
 ich erziugez mit dem golde, daz ich an der hende hân:
 daz brâhte mir mîn vriedel do er erste bi dir lac.'
 nie gelebte Prûnhilt deheinen leideren tac.

'Diz golt ich wol erkenne: ez wart mir verstoln,' 1
 - sprach diu küneginne - 'und ist lange mich verholn.
 ich kum es an ein ende, wer mirz habe genomen.'
 die frowen beide wären in grôz ungemüete komen.

Dô sprach aber Kriemhilt 'ine wils niht wesn diep. 2
 du möhtes wol gedaget hân, und wær dir êre liep.
 ich erziugez mit dem gürtel den ich hie umbe hân,
 daz ich ez niht enliuge: jâ wart mîn Sîvrit dîn man.'

Von Ninnivê der sîden si den porten truoc: 3
 von edelem gesteine guot was er genuoc.
 dô den gesach vrou Prûnhilt, weinen si began.
 daz muose vreisichen Gunther und alle Buregonde man.

Dô sprach diu küneginne 'heizet her gân 4
 den fürsten vom Rîne: ich wil in hœren lân
 wie mich hât gehœnet sîner swester lîp.
 si sagt hie offenliche, ich sî Sîvrides wîp.'

Der kûnec kom mit recken. weinen er dô sach 5
 die sînen triutinne: wie güetlich er sprach
 'saget mir, liebiu frouwe, waz ist iu getân?'
 si sprach 'vil lieber herre, von schulden muoz ich trûrec stân.

Von allen mînen êren mich diu swester dîn 6
 gerne wolde scheiden. dir sol geklaget sîn,
 si giht mich habe gekebset Sîvrit ir man.'
 dô sprach der kûnec Gunther 'sô hêtes übele getân.'

'Si treit hie mînen gürtel, den ich lange hân verlorn, 7
 und ouch mîn guldîn vingerlîn. daz ich ie wart geborn,
 daz muoz mich immer riwen, dune beredest mich,
 kûnec, der grôzen schanden: daz diene ich immer umbe dich.'

Dô sprach der künec Gunther 'nu lât in her gân. 1
hât er sichs gerüemet, daz sol er hoeren lân:
oder sîn muoz lougen der helt ûz Niderlant.'
den Kriemhilde vriedel hiez man bringen sâ zehant.

Dô der herre Sivrit die ungemuoten sach 2
- ern wiste niht der mære -, wie balde er dô sprach
'waz weinent dise frouwen? daz hêt ich gerne erkant,
oder von welhen schulden der künec habe nâch mir gesant.'

Dô sprach der künec Gunther 'daz ist mir durch dich leit. 3
mir hât mîn frowe Prünhilt ein mære hie geseit,
du habst dich des gerüemet, daz du ir schönen lip
êrste habest geminnet. daz seit frow Kriemhilt dîn wip.'

Dô sprach der herre Sivrit 'und hât si daz geseit, 4
ê daz ich erwinde ez sol ir werden leit:
und wil dir daz enpfüeren vor allen dînen man
mit mînen hôhen eiden, daz ichs ir niht gesaget hân.'

Dô sprach der künec von Rîne 'daz soltu lâzen sehen: 5
daz gerihte daz du biutest und mac daz hie geschehn,
aller valschen dinge wil ich dich ledec lân.'
man hiez zuo zeime ringe die stolzen Buregonde gân.

Sivrit gein dem eide hôhe bôt die hant. 6
dô sprach der künec rîche 'mir ist sô wol erkant
iwer grôz unschulde: ich wil iuch ledec lân,
des iuch mîn swester zihet, daz ir des nine habt getân.'

Dô sprach aber Sivrit 'geniuzet es mîn wip, 7
daz si sô hât betrüebet den Prünhilde lip,
daz ist mir sicherlichen âne mâze leit.'
dô sâhen zuo zein ander die guoten ritter gemeit.

'Man sol sô frowen ziehen,' - sprach Sivrit der degn - 1
 'daz si tûpeclîche sprûche lâzen under wegen.
 verbiut ez dîme wîbe, der mînen tuon ich sam:
 ir grôzen unfuoge ich mih wærlîchen scam.'

Mit rede was gescheiden manec schœne wîp. 2
 dô trûret alsô sêre der Prûnhilde lîp,
 daz ez erbarmen muose die Gunthers man.
 dô kom von Tronege Hagene zuo siner frouwen gegân.

Er vrâgte waz ir wære: weinende er si vant. 3
 dô sagtes im diu mære. er lobt ir sâ zehant
 daz ez erarnen müese der Kriemhilden man:
 oder ern wolde nimmer dar umbe vrœlîch gestân.

Zuo der rede kom Ortwin und ouch Gêrnôt, 4
 dà die helde rieten den Sivrides tût.
 dar zuo kom ouch Gîselher, der edeln Uoten kint:
 dô er ir rede gehôrte, er sprach vil gûetlîchen sint

'Owê, ir guoten knehte, warumbe tuot ir daz? 5
 jâne gediente Sivrit nie alsolhen haz,
 daz er darumbe solde verliesen sînen lîp.
 jâ ist es harte lîhte, darumbe zûrment diu wîp.'

'Suln wir gouche ziehen?' - sprach aber Hagene - 6
 'des habent lûtzel êre sô guote degene.
 daz er sich hât gerüemet der lieben frowen mîn,
 darumbe wil ich sterben, ez engê im an daz leben sîn.'

Dô sprach der kûnec Gunther 'ern hât uns niht getân 7
 wan getriwer dienste: man sol in lebn lân.
 waz toug ob wir dem degene wæren nu gehaz?
 er was uns ie getriuwe und tet vil willeclîche daz.'

Dô sprach izer Metzen der degene Ortwin 1
 'jane kan in niht gehelfen diu grôze sterke sîn :
 erlobet mirz mîn herre, ez muoz im werden leit.'
 dô hêten im die degene âne schulde widerseit.

Dô liezen siz beliben : spilen man dô sach. 2
 hey, waz man starker schefte vor dem münster brach
 vor Sivrides wibe al zuo dem sale dan!
 dô wâren in unmuote genuoge Gunthers man.

Sîn gevolgete niemen, niwan daz Hagene 3
 riet alle zite Gunther dem degene,
 ob Sivrit niht enlebte, sô wûrde in undertân
 vil der kûnege lande. der helt dô trûren began.

Er sprach 'nu lât beliben den mortlichen zorn. 4
 er ist uns ze sælden und zen êren geborn :
 ouch ist sô grimme küene der vil starke man :
 ob er sîn innen wûrde, sone torst in niemen bestân.'

'Nein ich.' - sprach dô Hagene - 'ir mugt wol stille dagn : 5
 ich kanz heinliche wol alsô an getragen,
 daz Prûnhilde weinen sol im werden leit.
 já muoz im von Hagene immer wesn widerseit.'

Dô sprach der kûnece Gunther 'wie möhte daz ergân?' 6
 des antwurt im Hagene 'ich wilz iuch hêren lân.
 wir heizen boten rîten zuo zuns in daz lant
 widersagen offenliche, die hie niemen sîn bekant.

Sô jehet vor den gesten daz ir und iwer man 7
 wellet herverten. alsô daz ist getân,
 sô lobt er iu die reise : des vliuset er den lîp.
 dâ man in mac verhouwen, diu mære saget mir sîn wîp.'

Der künec gevolget übele Hagene sinem man. 1
 vil michel untriuwe begunden tragen an,
 ê iemen daz erfunde, die recken ûz erkorn.
 von zweier frowen bâgen wart vil der degene verlorn.

XV AVENTIURE

WIE MAN ZE WORMZE WIDERSAGET.

An dem vierden morgen zwên und drîzec man 2
 sach man ze hove rîten. dô wart ez kunt getân
 Gunther dem vil rîchen, im wære widerseit.
 von lûge erstuonden frouwen diu aller grœzisten leit.

Urloup si gewonnen si solden für gân, 3
 und jâhen daz si wæren die Liudegêres man,
 den ê dâ hêt betwungen diu Sivrides hant
 und in ze gîsel brâhte in daz Gunthers lant.

Die boten er dô gruozte und hiez si sitzen gân. 4
 ir einer sprach dar under herre, lât uns stân
 unz wir sagn diu mære, diu iu enboten sint.
 jâ habt ir ze vînde, daz wîzzet, manec muoter kint.

Iu widersagt Liudegast unde Liudegêr: 5
 den ir dâ wîlen tâtent diu gremlichen sêr,
 die wellent zuo ziu rîten mit her in ditze lant.
 dô begunde zûrnen Gunther, als ob ez wære im unbekant.

Man hiez die trügenære zen herbergen varn. 1
 wie kunde sich Sivrit dô dâ vor bewarn,
 er oder ander iemen, daz si truogen an?
 daz wart sider in selben ze grôzem leide getân.

Der künec mit sinen friunden rûnende gie: 2
 Hagene von Tronege in nie geruowen lie.
 noch hêten ez gescheiden genuoge skûneges man;
 dône wolde Hagene nie des râtes abe gân.

Eines tages Sivrit si rûnende vant: 3
 dô begunde vrâgen der helt von Niderlant
 'wie gêt sô trûrecliche der künec und sine man?
 daz sol ich immer rechen, hât im iemen iht getân.'

Dô sprach der künec Gunther 'mir ist von schulden leit: 4
 Liudegast und Liudegêr di hânt mir widerseit.
 si wellent offenliche nu rîten in mîn lant.'
 dô sprach der degen küene 'daz sol diu Sivrides hant

Wol nâch iwern êren mit vlîze understân. 5
 jâ getuon ich den degenen als ich hân ê getân:
 ich gelege in wüeste ir bürge und ouch ir lant,
 ê daz ich erwinde: des sî mîn houbet iwer pfant.

Ir und iwer recken, ir sult hie bestân, 6
 und lât mich zuo zin rîten mit den und ich hie hân:
 daz ich iu gerne diene, daz lâz ich iuch gesehn.'
 dô begunde im Gunther darumbe grôz genâde jehn.

Dô schichten sie die reise mit den knechten dan: 7
 Sivride und sinen degenen ze sehn ez was getân.
 dô hiez er sich bereiten die von Niderlant.
 die ûzerwelten degene die suochten stritlich gewant.

Dô sprach der herre Sifrit 'mîn vater Sigemunt, 1
 ir sult hie beliben : ich kum in kurzer stunt,
 gît uns got gelücke, her wider an den Rîn :
 ir sult bi dem kûnege hie vil vrœliche sîn.'

Diu zeichen si an bunden, alsô si wolden dan. 2
 dô wâren dà genuoge Gunthers man,
 dine wessen niht der mære, wâ von ez was gescheln :
 man mohte grôz gesinde dô bi Sivride sehn.

Ir helm und ouch ir prünne si bunden uf diu marc. 3
 dô wolde von dem lande vil manec recke starc.
 dô gie von Tronege Hagene da er Kriemhilde vant,
 und bat im gebn urloup, si wolden rûmen daz lant.

'Sô wol mich,' - sprach dô Kriemhilt - 'daz ich ie gewan 4
 den man,
 der mînen lieben friunden sô tar vor gestân,
 alsô mîn herre Sivrit tuot den friunden mîn :
 des muoz ich hôhes muotes' - sprach diu kûneginne - 'sîn.

Vil lieber friunt Hagene, nu gedenket an daz, 5
 daz ich iu gerne diene und nie noch wart gehaz.
 des lâzet mich geniezen an mînem lieben man :
 ern sol des niht engelten, hab ich Prûnhilde iht getân.

Daz hât mih sît gerouwen.' - sprach daz edel wip - 6
 'ouch hât er sô zerblouwen dar umbe mînen lip :
 daz ich ie beswârte ir mit rede den muot,
 daz hât vil wol errochen der helt kûene unde got.

Ir werdet wol gefriunde her nâch disen tagen.' 7
 'Kriemhilt, liebiu frouwe, jâ sult ir mir sagen,
 wie ioh iu mûge gediennen an Sivride iwerf man :
 daz tuon ich, frowe, gerne. baz ihs niemen engan.'

Ich wær ân alle sorge, - sprach daz edel wip - 1
 'daz im iemen næme in sturme sinen lip,
 ob er niht volgen wolde siner übermuot:
 sô wær ouch immer sicher der helt küene unde guot.'

Dô sprach aber Hagene 'frowe, habt ir wân, 2
 ob man in müge versniden, ir sult mich wizzen lân,
 mit wie getânen listen ich daz sül understân:
 ich wil im ze huote immer rîten unde gân.'

Si sprach 'du bist mîn mâg, sam bin ich der dîn: 3
 ich bevilhe dir mit triuwen den holden wine mîn,
 daz du mir behütetest den mînen lieben man.'
 si seit im kundiu mære, daz bezzer wære verlân.

Si sprach 'mîn man ist küene, dar zuo starc genuoc. 4
 dô er den lintrachen an dem berge sluoc,
 dâ badet sich in dem bluote der recke vil gemeit:
 dâ von in sît in stürmen nie dehein wâfen versneit.

Idoch sô hân ich sorge, swenner in sturme stât 5
 und vil der gêreschüzze von recken handen gât,
 daz ich dâ verliese den mînen lieben man.
 hey, waz ich grôzêr leide dicke umbe mînen friunt hân!

Ich meldez ûf genåde, vil lieber friunt, dir, 6
 daz du dîne triuwe behaldest ane mir.
 dâ man dâ mac verhouwen den mînen lieben man,
 daz lâz ich dich wol hoeren: dëst ûf genåde getân.

Dô von des trachen wunden vlôz daz heize bluo, 7
 und sich dar inne badete der küene recke guot,
 dô gehafte im zwischen herten ein linden blat vil breit:
 dâ mac man in verhouwen. des ist mir sorgen vil bereit.'

Dô sprach der ungetriuwe 'uf daz sîn gewant
næt ir ein kleinez zeichen mit iwer selbes hant,
wâ ich in süle behüeten daz ich daz müge verstân.'
si wânde'n helt dô vristen — ez was uf sînen tût getân.

Si sprach 'mit kleinen sîden næ ich uf sîn gewant
ein tougenlichez kriuze, dâ sol, helt, dîn hant
den mînen man behüeten, soz an die herte gât,
und er in starken stürmen vor sînen vîanden stât.'

'Daz tuon ich,' - sprach dô Hagene - 'vil liebiu frowe mîn.'
dô wânde ouch des diu frouwe, ez solde ir frum sîn:
dâ mite was verrâten der vil küene man.
urloup nam dô Hagene: dô gie er vrelîche dan.

Daz er revarn hête bat im sîn herre sagen.
'muget ir die reise wenden, sô suln wir rîten jagen:
ich hân nu gar diu mære, wie ich in gewinnen sol.
muget ir nu daz gefüegen?' 'daz tuon ich' - sprach der
kûnec - 'wol.'

Des kûneges ingesinde was allez wol genuot.
ich wæn immer recken deheiner mër getuot
sô grôzzer meinrâte, sô von im ergie,
dô sich an sîne triuwe Kriemhilt diu kûneginne verlie.

An dem dritten morgen mit tûsent sîner man
reit der herre Sîvrit vrelîche dan:
er wânde er solde rechen sîner friunde leit.
Hagene im reit sô nâhen, daz er geschowet diu kleit.

Als er gesach das pîlde, dô schieter tougen dan,
die sagten ander mære, zwêne sîner man,
daz vride habn solde Gunthers lant,
si hêt der herre Liudegêr zuo dem kûnege gesant.

Wie ungerne Sîvrit dô hin wider reit, 1
 ern getâtes kûneges vînden eteslichiu leit!
 wande in vil kûme erwanden die Gunthers man.
 dô reit er zuo dem kûnege: der wirt im danken began.

‘Nu lôn iu got des willen, frîunt Sîvrit, 2
 daz ir sô willeclîchen tuot des ich iuch bîte:
 daz sol ich immer dienen, als ich von rehte sol.
 vor allen mînen frîunden sô getrowe ich iu wol.

Nu wir der hereverte ledec worden sîn, 3
 sô wil ich jagen rîten von Wormez über den Rîn,
 und wil kurzewile zem Otenwalde hân,
 jagen mit den hunden, als ich vil dicke hân getân.

Allen mînen gesten den sol man daz sagen, 4
 daz ich vil fruo rîte: die mit mir wellen jagen,
 daz si sich bereiten; die hie wellen bestân
 hofschen mit den frouwen, daz sî mir liebe getân.’

Dô sprach der herre Sîvrit in hêrlîchem site 5
 ‘swenne ir jagen rîtet, dà wil ich gerne mite.
 sô sult ir mir lîhen einen suochman
 und eteslichen bracken: sô rîte ich mit iu in den tan.’

‘Bedurfet ir niht wan eines?’ - sprach der kûnec zehant - 6
 ‘ich lîhiu, welt ir, viere, den wol ist bekant
 der walt und ouch die stîge, swâ diu tier hine gânt,
 die iuch urwise nâch uns rîten niht enlânt.’

Dô die vil ungetriuwen âf geleiten sînen tôt, 7
 si wistenz al gemeine, Giselher und Gêrnôt
 wolden niht jagen rîten. ine weiz, durch welhen nît
 daz si in niht en warnden: idoch erarneten siz sît.

XVI AVENTIURE

WIE SIVRIT ERMORT WART.

Gunther unde Hagene, die recken vil balt,
lobten mit untriuwen ein pirsen in den walt:
mit ir scharpfen gëren si wolden jagn swin,
pern und wisende. waz mohte küeners gesin?

Dâ mite reit ouch Sivrit in vroellichem site:
herrenliche spise die fuorte man in mite.
zeinem kalten brunnen nâmens im den lîp:
daz hêt gerâten Prûnhilt, des küene Guntheres wip.

Dô gie der degen küene da er Kriemhilde vant.
ez was nu ûf gesoumet sîn edel pirsgewânt
und ander der gesellen: si wolden über Rin.
done dorfte Kriemhilde leider nimmer gesin.

Die sinen triutinne die kuster an den munt:
'got lâze mich dich, frouwe, gesehn noch gesunt,
und mich diu dînen ougen. mit holden mâgen dîn
soltu kurzewilen: ine mac hie heime niht gesin.'

Dô gedâhtes an diu mâre - sine torst ir niht gesagen -,
dâ von si Hagen ê vrâgte: dô begunde klagen
diu edele kûeginne daz si ie gewan den lîp.
dô weinte âne mâze des küenen Sivrides wip.

Si sprach zuo dem recken 'lât iwer jagen sîn. 1
 mir troumte hînte leide, wie iuch zwei wildiu swîn
 jagten über heide: dâ wurden bluomen rôt.
 daz ich sô sêre weine, daz tuot mir armem wibe nôt.

Jâ fürhte ich, herre Sîvrit, eteslichen rât, 2
 ob man der deheinen missedienet hât,
 die uns gefüegen können eteslichen haz.
 belîbet, herre Sîvrit: mit triwen râte ich iu daz.'

Er sprach 'liebiu frouwe, ieh kum in kurzen tagn. 3
 ine weiz hie niht der vînde, die uns iht hazzes tragen.
 alle dîne mâge sint mir gemeine holt:
 ouch enhân ich an den degenen hie niht anders verscholt.'

'Neinâ, herre Sîvrit, jâ vûrht ich dînen val. 4
 mir troumte hînte leide, wie ob dir ze tal
 vielen zwêne berge: ich ensach dich nimmer mê.
 wiltu nu von mir scheiden, daz tuot mir inneclîche wê.'

Er umbe vie mit armen daz tugende rîche wîp: 5
 mit minneclîchen küssen trût er ir schœnen lip;
 mit urloube er dannen schiet in kurzer stunt.
 sine gesach in leider dar nâch nimmer mêr gesunt.

Dô riten si von dannen in einen tiefen walt 6
 durch kurzewile willen: vil manec degen balt
 riten mit dem wîrte, man fuort ouch mit in dan
 vil der edeln spîse, die di helede solden hân.

Geladen vil der rosse kom vor in über Rîn, 7
 die den jegeren truogen brôt unde wîn,
 vleise unde vische und anders manegen rât,
 den ein kûnec sô rîche harte billichen hât.

Sie hiez en herbergen für den grüenen walt, 1
 gëns wildes abeloufe, die stolzen jägere balt,
 dà si dà jagn solden, ùf einen wert vil breit.
 dô kom der herre Sîvrit: daz wart dem küenege geseit.

Von den jagtgesellen wurden gar bestân 2
 die warte an allen enden. dô sprach der küene man,
 Sîvrit der starke, 'wer sol uns durch den walt
 wisen vor den bergen, ir recken küen unde balt?'

'Jâ müezen wir uns scheiden,' - sprach dô Hagene - 3
 'ê daz wir beginnen hie ze jagene;
 dà bi wir bekennen, ich und der herre mîn,
 wer die besten jägere an dirre waltreise sîn.

Liut und ouch gehünde wir suln teilen gar: 4
 sô kêr ieslicher swar er gerne var.
 der danne jage daz beste, des sage man im danc.
 dô wart ir bîten niht zen herbergen lanc.

Dô sprach der herre Sîvrit 'ich hân der hunde rât, 5
 niwan einen bracken, der sô genozzen hât
 daz er die verte erkenne der tiere durch den tan.'
 dô schuof der küene Gunther zuo zim den er wolde hân.

Dô nam ein jägermeister einen guoten spûrhunt: 6
 er brâhte den herren in einer kurzen stunt
 dà si vil tiere funden. swaz der von legere stuont,
 die erjageten die gesellen, sô noh guote jägere tuont.

Swaz ir der bracke ersprancte, die sluoc mit siner hant 7
 Sîvrit der vil küene, der helt ùz Niderlant.
 sîn ros daz lief sô sêre daz ir im niht entran.
 daz lop an dem gejâgede er vor in allen dà gewan.

Er was an allen dingen biderbe genuoc : 1
 sîn tier was daz êrste, daz er ze tôde sluoc,
 ein vil starkez halpfwol, mit der sînen hant.
 dar nâch er harte schiere einen grimmen lewen vant.

Dô der wart ersprenget, den schôz er mit dem bogen : 2
 eine scharpfe strâlen hêt er dar in gezogen :
 der lewe lief nâch dem schuzze wan drier sprünge lanc.
 die sînen jagtgesellen die sagten Sîvrîde danc.

Dar nâch sluoger schiere einen wisent unde elch, 3
 starker ûre viere und einen grimmen schelch.
 sîn ros truog in sô balde, daz ir im niht entran :
 hirz oder hinden kund im wê nec iht engân.

Einen eber grôzen den sach der spûrehunt : 4
 als er begunde vlieden, dô kom an der stunt
 des selben gejâgedes meister, der bestuont in uf der slâ.
 daz swîn vil zorneclîche lief an den kûenen recken sâ.

Dô sluog in mit dem swerte der Kriemhilde man : 5
 ez hête ein ander jâgere sô sanfte niht getân.
 dô er in hêt ervellet, man vie den spûrehunt.
 dô wart sîn jagt daz rîche wol den Buregonden kunt.

Dô sprâchen sîne jâgere 'magez mit hulden wesn, 6
 sô lât uns, herre Sîvrit, der tier ein teil genesn :
 ir tuot uns hiute lâere den bere und ouch den walt.
 des begunde smielen der degn kûene unde balt.

Dô hôtens allenthalben ludem unde dôz : 7
 von liute und ouch von hunden der schal was sô grôz,
 daz in dâ von antwurte berge und ouch der tan.
 vier und drîzec ruore die jâgere hêten verlân.

Dô muose vil der tiere verliesen dâ daz lebñ : 1
 dô wänden si daz füegen, daz man in müeste geben
 den pris an dem gejâgede. des enkunde niht geschehn,
 dô der starke Sîvrit wart zer viwerstete gesehn.

Daz pîrsen was ergangen, und idoch niht gar. 2
 die zem viwer wolden, di brâhten mit in dar
 vil maneger hande tiere und wildes genuoc.
 hey, waz man des zer kuchen des kûneges ingesinde truoc!

Dô hiez der kûnec kûnden den jâgern dîz erkorn, 3
 daz er enbîzen wolde: dô wart vil lût ein horn
 zeiner stunt geblâsen, dâ mit in wart erkant,
 daz man den fürsten edele dâ zen herbergen vant.

Ein Sîvrides jâgere sprach 'ich hân vernomen 4
 von eines hornes duzze, daz wir nu suln komen
 zuo den herbergen: antwurten ich des wil.'
 dô wart nâch den jâgeren gevragt blâsende vil.

Dô sprach der herre Sîvrit 'nu rûme ouch wir den tan!' 5
 sîn ros daz truogin ebene: si îlten mit im dan.
 si ersprancten mit ir scalle ein tier vil gremelich,
 daz was ein ber wilde. dô sprach der degn hinder sich

'Welt ir uns hergesellen kurzewile wern, 6
 den bracken sult ir lâzen: jâ sih ich einen bern,
 der sol zen herbergen mit uns hinnen varn.
 swie ûbel er gebâre, ern kan sihs nimmer bewarn.'

Der bracke wart verlâzen: der ber spranc von dan. 7
 dô wolde in erriten der Kriemhilde man:
 er kom in ein gevelle, done kundes niht wesn.
 daz starke tier dô wânde vor dem jâgere genesn.

Dô spranc von sinem rosse der stolze ritter guot, 1
 er begunde laufen sêre: daz tier was unbehuot,
 ez enkunde im niht entrinnen. dô vienger ez zehant:
 âne allerslahte wunden der helt ez schiere gebant.

Kratzen noch gebîzen kundez niht den man: 2
 er bandez zuo dem satele. gewalteclichen dan
 brâht erz an die fiurstat durch sinen hôhen muot
 zainer kurzewîle, der recke küene unde guot.

Wie rehte weigerliche er zen herbergen reit! 3
 sîn gêr was vil michel, starc unde breit:
 im hieng ein starkez wâfen nider an den sporn:
 von vil rôtem goldê fuorter ein hêrlîchez horn.

Von bezzerm birsgewæte gehôrt ir nie gesagen. 4
 einen roc von swarzem pfelle den sah man in tragen,
 und einen huot von zobele der rîche was genuoc.
 hey, waz er guoter porten an sinem kochære truoc!

Ein hût von einem pantel dar über was gezogn 5
 durch rîcheite und durch sûeze: och fuorter einen bogn
 den man ziehen muose mit antwerke dan,
 der in spannen solde, ern hête ez selbe getân.

Von einer ludemes hiute was allez sîn gewant: 6
 von houpte unz an daz ende gestreut man drûfe vant.
 ûz der liechten riuhe vil manec goldes zein
 ze beiden sinen sîten dem küenen jâgermeister schein.

Ouch fuorter Palmungen, ein ziere wâfen breit, 7
 sô starc und och sô scherpfe, wie vreislich ez sneit,
 swâ man ez sluoc uf helme! sîn ecke wâren guot,
 der hêrlîche jâgere der was vil hôhgemuot.

Sit daz ich iuch der mære gar bescheiden sol, 1
 im was sîn guot kocher vil guoter strâlen vol,
 mit güldînen tûllen, diu sahs wol spannen breit:
 ez muose bald ersterben, swaz er mit schiezen versneit.

Dô reit der ritter edele vil weidenlîchen dan. 2
 in sâhen zuo zîn kumende die Gunthers man:
 si liefen im engegene und enpfîngen im daz marc.
 dô fuorter bî dem satele einen bern grôz und starc.

Als er gestuont von rosse, dô lôster im diu bant 3
 von fûezen und von munde: do erlûtte dâ zehant
 vil grôze daz gehûnde, swaz des den bern sach.
 daz tier ze walde wolde: die liute hêten ungemach.

Der ber von dem schalle durch die kuchen geriet: 4
 hey, waz er kuchenknehte von dem fiure schiet!
 vil kezzel wart gerûeret, zerfûeret manec brant.
 hey, waz man guoter spîse in der aschen ligen vant!

Dô sprungen von dem sedele die herren und ir man: 5
 der ber begunde zûrnen. der kûnec hiez dô lân
 allez daz gehûnde daz an seilen lac.
 wær ez wol verendet, si hêten vrœlichen tac.

Mit bogen und mit spiezen - niht langer man daz lie - 6
 dô liefen dar die snellen, dâ der ber gie:
 sô vil was der hunde, daz dâ niemen schôz.
 von dem grôzen schalle beidiu berc und walt erdôz.

Der ber begunde vlihen vor den hunden dan: 7
 im enkunde niht gevolgen wan Kriemhilde man.
 der erliefen mit dem swerte, ze tôde er in dô sluoc.
 hîn wider zuo der kuchen man den bern sider truoc.

Der Nibelunge Liet.

Dô sprächen die daz sähen, er wær ein kreffec man. 1
 die stolzen jagtgesellen hiez man zen tischen gân:
 uf einen schœnen anger saz ir dâ genuoc.
 waz man dô richer spise den jagtgesellen dar truoc!

Die schenken kômen seine, die tragen solden win. 2
 ez enkûnde baz gedienet nimmer heleden sîn,
 hêten si dar under niht sô valschen muot,
 sô wæren wol die degene vor allen schanden behuot.

Done hête niht der sinne der küene veige man, 3
 daz er sich ir untriuwe kûnde hân verstan:
 er was in ganzen tugenden alles valsches blôz,
 sîns sterbes muose engelten sît der sîn nie niht genôz.

Dô sprach der herre Sivrit 'wunder mich des hât, 4
 sît man uns von der kuchen gît sô manegen râ, 4
 durch waz uns die schenken bringen niht den win:
 man enpflege baz der jâgere, ine wil niht jagtgeselle sîn.

Ich hête wol gedienet, daz man mîn næme war. 5
 der kûnec ob dem tische sprach in valsche dar
 'man solz iu gerne bûezen, swes wir gebresten hân:
 wir sîn von Hagene schulde hiut âne trinken bestân.'

Dô sprach der von Tronege 'vil lieber herre mîn, 6
 ich wânde daz diz pîrsen hiute solde sîn
 dâ zem Spehtsharte: den win den sande ich dar.
 sîn wir hie ungetrunken, wie wol ihz immer mêr bewar!'

Dô sprach der herre Sivrit 'ir lîp der habe undanc. 7
 man sold mir siben saume win und lûtertranc
 habn her gefûeret: dô des niht mohte sîn,
 dô solde man uns nâher hân gesidelt an den Rin.'

Dô sprach aber Hagene 'ir edeln ritter balt,
 ich weiß hie vil nâhen einen brunnen, der ist kalt:
 daz ir niht enzürnet, dà suln wir hine gân.'
 der rât wart manegem degene ze grôzen sorgen getân. 1

Den helt von Niderlanden dwanc des durstes nôt:
 den tisch er deste zîter rücken dan gebôt:
 er wolde für die berge zuo dem brunnen gân.
 dô was der rât mit meine von den degenen getân. 2

Diu tier man hiez uf wâgenen fûeren in daz lant,
 diu dà verhoven hête diu Sîvrîdes hant:
 man jah im grôzer êren, swer ez ie gesach.
 Gunther sîne triuwe vaste an Sîvrîde brach. 3

Dô si dannen wolden zuo der linden breit,
 dô sprach aber Hagene 'mir ist dicke daz geseit,
 daz niht gevolgen künne dem Kriemhilde man,
 swenner wolde gâhen: hey, wolder uns daz sehn lân!' 4

Dô sprach von Niderlanden der herre Sîvrit
 'ir mugt ez wol versuochen, welt ir mir loufen mite
 ze wette zuo dem brunnen. sô daz si getân,
 der sol hân gewinnen, den man siht ze vorderst stân.' 5

'Nu welle ouch wirz versuochen.' sprach Hagene der degn. 6
 dô sprach der starke Sîvrit 'sô wil ich mich legn
 für die iuern fûeze nider an daz gras.'
 dô Gunther daz gehôrte, hey, wie lieb im daz was!

Dô sprach der degn küene 'ich wil iu mære sagn: 7
 allez mîn gewæte wil ich an mir tragn,
 den gêr zuo dem schilte und al mîn pîrsgewant.'
 den kocher zuo dem swerte vil schier er umbe gebant.

Dò zugen si diu kleider von dem lîbe dan :
 in zwein wîzen hemedē sach man si beide stân.
 sam zwei wildiu pantel sie liefen durch den klê ;
 doch sah man bi dem brunnen den snellen Sîvriden ê.

Den pris an allen dingen truoger vor manegem man.
 daz swert er löste balde, den kocher leit er dan,
 sinen gêr den starken leinter an der linden ast :
 bi des prunnen vluzze stuont der hêrlîche gast.

Di Sîvrides tugende wâren harte grôz :
 den schilt leit er nidere al dâ der brunne vlôz ;
 swie harte sô in durste, der helt doch niene tranc
 ê daz der kûnec kœme. daz dûhte Sîvriden lanc.

Der brunne was vil kûele lûter unde guot.
 Gunther sich dô legete nider zuo der fluot :
 daz wazzer mit dem munde er von der fluote nam.
 si gedâhten daz ouch Sîvrit nach im mûese tuon alsam.

Dò engalt er sîner zûhte. den bogen und daz swert
 daz truog allez Hagene von im danewert :
 dô spranger hin widere dâ er den gêr dâ vant :
 er sach nâch eime kriuze an des kûneges gewant.

Dò der herre Sîvrit ob dem brunnen tranc,
 er schôz in durch daz kriuze, daz ûz der wunden spranc
 daz bluot im von dem herzen an die Hagenen wât.
 sô grôze missewende ein helt nu nimmer mêr begât.

Den gêr gegen dem herzen stecken er im lie :
 alsô angestlichen ze flûhten Hagene nie
 gelief noch in der werlde vor decheinem man.
 dô sich der herre Sîvrit der starken wunden versan,

Der recke toblîche von dem brunnen spranc: 1
 im ragete von dem herzen ein gêrstange lanc.
 der fürste wände vinden bogen oder swert:
 sô müese werden Hagene nâch sime dienste gewert.

Dô der sêre wunde des swertes niht envant, 2
 done hêt et er niht mêre wan des schildes rant:
 den zuhter von dem brunnen: dô lief er Hagenen an,
 done kunde im niht entrinnen der vil ungetriwe man.

Swie wunt er was zem tôde, sô krefteclîch er sluoc, 3
 daz ûzer dem schilde dræte genuoc
 des edelen gesteines: der schilt vil gar zebrast.
 sich hête gerne errochen der vil hêrlîche gast.

Hagene muose vallen von siner hant zetal. 4
 von des slages krefte der wert vil lûte erhal.
 hêt er daz swert enhende, sô wær ez Hagenen tôt:
 der helt entran vil kûme ûz der angestlîchen nôt.

Sin kraft was im gewichen, ern kunde niht gestân: 5
 sines libes sterke diu muose gar zergân,
 wand er des tôdes zeichen bi liechter varwe truoc.
 sit wart er beweinet von schenen vrouwen genuoc.

Dô viel in die bluomen der Kriemhilde man: 6
 daz bluot von sinen wunden sach man vaste gân.
 dô begunder schelten - des twanc in michel nôt -
 die uf in gerâten hêten den ungetriwen tôt.

Dô sprach der sêre wunde 'jâ, ir vil bæse zagn, 7
 waz hilfet mich mîn dienest, daz ir mich habt erslagen?
 ich was iu ie getriuwe: des ich engolten hân.
 ir habt an iwern mâgen leider übele getân.

Die sint dâ von bescholten, swaz ir wirt geborn, 1
 her nâch disen zîten. jâ habt ir iwern zorn
 vil übele gerochen an dem lîbe mîn:
 mit laster ir gescheiden sult von guoten recken sîn.'

Die liute liefen alle dâ er reslagen lac. 2
 ez was ir genuogen ein freudelôser tac:
 die iht triwe hêten, von den wart er bekleit.
 daz hêt wol gedienet der ritter kûen und gemeit.

Der kûene von Burgonden klagete sînen tôt. 3
 dô sprach der verchwunde 'daz ist âne nôt,
 daz der nâch schaden weinet, der in dâ hât getân.
 der dienet michel schelten: ez wære bezzer verlân.'

Dô sprach der grimme Hagene 'jane weiz ich waz ir kleit. 4
 ez hât nu allez ende, unser sorge und unser leit:
 wir vinden ir vil kleine, die türren uns bestân.
 wol mich deich siner hêrschaft hân ze râte getân.'

'Ir muget iuch lîhte rüemen.' - sprach dô Sivrit - 5
 'hêt ich an iu erkennet den mortlichen sit,
 ich hête wol behalten vor iu mînen lîp.
 mich enriwet niht sô sêre sô frou Kriemhilt mîn wîp.

Nu müeze got erbarmen, deich ie gewan den suon, 6
 dem man solch itewîzen sol nâch den zîten tuon,
 daz sîne mâge iemen mit morde habn erslagn.
 möht ich,' - sô sprach Sivrit - 'daz solt ich billîche klagn.

Zer werlde wart nie mêre grœzer mort begân, 7
 - sprach er zuo dem kûenege - 'denne an mir ist getân.
 ich behielt iu lîb und êre in angestlicher nôt:
 ich hâns engolten sêre, daz ihz iu ie sô wol erbôt.'

Dô sprach vil seneliche der verchwunde man 1
 'welt ir, künece rîche, triwen iht begân
 in der werlt an iemen, lât iu bevolhen sîn
 uf triwe und uf genâde die lieben triutinne mîn,

Und lât si des geniezen, daz si iu swester sî: 2
 durch aller fürsten tugende wont ir mit triwen bî.
 mir müezen warten lange mîn vater und mîne man:
 ez enwart nie frowen mêre an friunde leider getân.'

Er rampf sich bitterliche, als im diu nôt gebôt, 3
 und sprach dô jâmerliche 'der mortliche tôt
 mag iuch wol geriuwen her nâch disen tagen:
 geloubt an rehten triuwen, daz ir iuch selben habt erslagn.'

Die bluomen allenthalben von bluote wâren naz. 4
 dô ranger mit dem tôde: unlange tet er daz,
 wande in des tôdes wâfen al ze sêre sneit:
 dô mohte reden niht mêre der recke kûen und gemeit.

Dô die herren sâhen, daz der helt was tôt, 5
 si leiten in uf einen schilt, der was von golde rôt,
 und wurden des ze râte, wie daz solde ergân,
 daz man ez verhæle, daz ez hêt Hagene getân.

Dô sprâchen ir genuoge 'uns ist übele gesעהn. 6
 ir sult ez heln alle, und sult geliche jehn,
 da er rite jagn eine, der Kriemhilde man,
 in slüegen schâchære, dâ er füere durch den tan.

Dô sprach der ungetriuwe 'ich füeren in daz lant. 7
 mir ist vil unmare, und wirt ez ir bekant,
 diu sô hât getrüebet mîner frowen muot:
 ez ahtet mih vil ringe, swaz si weinens getuot.'

Von dem selben brunnen, dà Sivrit wart erslāgen, 1
 sult ir diu rehten mære von mir hōeren sagn :
 vor dem Otenwalde ein dorf lit Otenhein ;
 dà vliuzet noch der brunne. des ist zwifel dehein.

XVII AVENTIURE

WIE KRIEMHILT IR MAN KLAGTE, UND WIE MAN IN
 BEGRUOP.

Do erbiten si der nahte, und fuoren über Rīn. 2
 von heleden kunde nimmer wirs gejaget sīn :
 ein tier daz si dà sluogen, daz weinten edeliu kint.
 jā muosen sīn engelten vil guote wigande sint.

Von grōzer übermüete mugt ir nu hōeren sagn, 3
 und von starker rāche. dô hiez Hagen tragn
 Sivride den herren von Nibelunge lant
 für eine kemenāten, dà man Kriemhilde vant.

Er hiez in alsô tôten legn an die tür, 4
 daz si in dà solde vinden, sô si der gienge für
 hin zer mettīne ê daz ez wûrde tac,
 der diu frowe Kriemhilt deheine selten verlac.

Man lûte dà zem münster nāch gewonheit. 5
 dô wachte diu frowe vor ir manege meit :
 si bat ir balde bringen lieht und ir gewant.
 dô kom ein kamerære dà er Sivriden vant.

Er so
 daz
 hin zer
 von den

Dô si mi
 dô sprac
 ez lit vor
 dà begut

E daz si
 an die H
 wier in w
 ir was al

Dô seie si
 die schoen
 der edeln
 dô erschre

Dô sprac
 daz bluot
 si sprach
 ez hit ger

Diu frowe
 si huop sīn
 swie rôt er
 dô was mis

Dô rief vil
 'owê mir n
 mit swerte
 und wesse

Er sach in bluotes rôten : sîn wât was elliu naz. 1
 daz ez sîn herre wære, niht enwesser daz.
 hin zer kemenâten daz licht truog an der hant
 von dem vil leider mære sît vrou Kriemhilt ervant.

Dô si mit ir vrouwen zem münster wolde gân, 2
 dô sprach der kamerære jâ sult ir stille stân :
 ez lît vor dem gademe ein ritter tût erslagn.
 dô begunde Kriemhilt harte unmaezliche klag.

E daz si reht erfunde daz ez wære ir man, 3
 an die Hagenen vrâge denken si began,
 wier in wolde vristen. dô wart ir êrste leit :
 ir was al ir freuden mit sime tôde widerseit.

Dô seic si zuo der erden, daz si niht ensprach : 4
 die schœnen freudelösen ligen man dô sach.
 der edeln frowen jâmer wart unmaezen grôz.
 dô erschrê si nâch unkreffe, daz al diu kemenâte erdôz.

Dô sprach ir gesinde 'waz, ob ez ist ein gast?' 5
 daz bluot ir ûzem munde von herzen jâmer brast :
 si sprach 'ez ist Sîvrit, der mîn vil lieber man :
 ez hât gerâten Prûnhilt, daz ez hât Hagene getân.'

Diu frowe bat sich wîsen dô si den recken vant. 6
 si huop sîn schœne houbet mit ir wîzen hant.
 swie rôr er was von bluote, si hêt in schier bekant.
 dô was missevarwe des kûenen degenes gewant.

Dô rief vil jâmerliche diu kûeginne milt 7
 'owê mir mîner leide : nune ist dir dîn schilt
 mit swerten niht verhouwen — du list ermorderôt!
 und wesse ich wer daz tæte, ich riet im immer sînen tût.'

Allez ir gesinde klagt unde schrê 1
mit ir vil lieben frouwen, wande in was starke wê
umbe ir vil edeln herren, den si dà hêten vlorn.
dô hêt gerochen Hagene harte Prünhilde zorn.

Dô sprach diu jâmerhafte 'man sol hin gân; 2
und wecken harte balde die Sivrides man,
und sol ouch Sigemunde disiu mære sagen,
ob er mir helfen welle den herren Sivriden klagen.'

Dô lief ein bote balde dà er ligen vant 3
die Sivrides helede von Nibelunge lant.
mit disen leiden mæren wachter manegen man:
die sprungen âne sinne vil balde von ir betten dan.

Ouch kom der bote schiere dà der künec lac. 4
Sigemunt der herre des slâfes niht enpfac:
ich wæn sîn herze im sagete daz im dà was geschehn,
ern môhte sînen lieben suon lebenden nimmer mê geschn.

'Wachet, herre Sigemunt, wande ir sult balde gân 5
ze Kriemhilt mîner frouwen. der ist ein leit getân,
daz ir vor allen leiden an ir herze gât:
daz sult ir klagen helfen, wandeꝛ iuch sêre bestât.'

Uf rihte sich dô Sigemunt: er sprach 'waz sint diu leit 6
der schœnen Kriemhilde, di du mir hâst geseit?'
der bote sprach mit jâmer 'si muoꝛ von schulden klagen:
jâ ist von Niderlanden der kûene Sivrit erslagn.'

Dô sprach der herre Sigemunt 'lât daz schimpfen sîn 7
und alsô bæsiu mære von dem sune mîn,
daz ir daz saget iemen daz er sî erslagn;
wande ich enkunde in nimmer unz an mîn ende verklagn.'

'Und welt ir niht gelouben daz ir mich hœret sagn, 1
 ir mûgt wol selbe hœren Kriemhilde klagn
 und allez ir gesinde den Sîvrîdes tût.'
 vil sêre erschrac dô Sigemunt: des gie im grœzliche nôt.

Mit hundert sînen mannen er von den betten spranc. 2
 si zuchten zuo den handen diu scharpfen wâfen lanc:
 si liefen zuo dem wuofe vil senelîche dan.
 dô kômen tûsent recken, des kûenen Sîvrîdes man,

Dâ si sô jâmerlîche die frowen hôrten klagen. 3
 dô wânde sumelîche, si solden kleider tragn:
 jane mohten si der sinne vor leide niht gehabn.
 in was vil starkiu swære in ir herzen begrabn.

Dô kom der kûnec Sigemunt da er Kriemhilt vant: 4
 er sprach 'owê der reise her in ditze lant.
 wer hât mich mînes kindes und iuch iwers man
 bî sô guoten friunden vergebne âne getân?'

'Hey, solde ich den bekennen,' - sprach daz edel wîp - 5
 'holt enwürde im nimmer mîn herze und ouch der lîp:
 ich getæt im als leide, daz die mâge sîn
 mit jâmer müesen weinen, daz wîzzet, von den schulden mîn.'

Sigemunt mit armen den fürsten umbeslôz. 6
 dô wart von sînen friunden der jâmer alsô grôz,
 daz von dem starken wuofe palas unde sal
 und ouch diu stat ze Wormze von ir weinen erschal.

Done kunde niemen trœsten daz Sîvrîdes wîp. 7
 man zôch ûz den kleidern den sînen schœnen lîp:
 den edeln kûnec rîche si leiten uf den rê.
 dô was von grôzem jâmer sînen liuten allen wê.

Dô sprächen sine recken von Nibelunge lant 1
 'in sol immer rechen mit willen unser hant.
 er ist in dirre bürege, der ez dâ hât getân.'
 dô flten nâch gewâfen alle Sivrîdes man.

Die ûz erwelten recken mit schilden kómen dar. 2
 einlif hundert recken die hêt an siner schar
 Sigemunt der herre. den Sivrîdes tót
 den wolde er gerne rechen: des gie im wârlîche nôt.

Sine wessen wen si solden mit strîte bestân, 3
 sine tætenz Gunther unde sine man,
 mit den der herre Sivrît an daz gejâgede reit.
 Kriemhilt si sach gewâfent: dô was ir græzliche leit.

Swie starc ir jâmer wære und swie grôz ir nôt, 4
 dô vorhte si sô sêre der Nibelunge tót
 von Gunthers mannen, daz si ez understuont:
 si warnt si gütliche, sô friunt noch liebe friunde tuont.

Dô rief diu jâmers rîche 'mîn her Sigemunt, 5
 wes welt ir beginnen? iu enist niht rehte kunt:
 ez hât der kûnec Gunther sô manegen kûenen man,
 ir sît verlorn alle, welt ir mit strîte si bestân.'

Mit ûf erburten schilden ze strîte was in nôt. 6
 Kriemhilt diu frouwe bat und ouch gebôt,
 daz siz mîden solden, die recken vil gemêit:
 ob siz niht wenden kûnde, daz wære ir bêdenthalben leit.

Si sprach 'herre Sigemunt, ir sult ez lâzen stân 7
 unz ez sich baz gefüge: sô wil ich mînen man
 immer mit iu rechen. der mir in hât benomen,
 wirde ich des bewîset, ich sol im schâdelîche kómen.

Ez izt der übermüeten hie bi Rîne vil : 1
 dâ von ich iu des strîtes râten niene wil :
 si habent wider einen ie wol drîzce man.
 nu lâz in got gelingen als si an uns gedienet hân.

Ir sult hie belîben, und dolt mit mir diu leit. 2
 sô ez tagen beginne, ir helde vil gemeit,
 sô helfet mir besarken den mînen lieben man.
 dô sprâchen die degene 'daz sol werden getân.'

Nune kûndiu niemen daz wunder vol gesagn 3
 von rittern unde frouwen, wie man die hôrte klagn.
 dô wart man des wuofes in der stete gewar :
 vil der burgære die kômen gâhende dar.

Si klagten mit den gesten, wande in was starke leit : 4
 die Sivrides schulde in niemen hêt geseit,
 wâ von der edele recke verlûr den sînen lîp.
 dô weinten mit den frouwen der guoten kauflîute wîp.

Smide hiez man gâhen bewurken einen sarc 5
 von edelm mârnelsteine, vil michel unde starc :
 man hiez in vaste binden mit gespenge guot.
 dô was al den liuten harte trûerec der muot.

Diu naht diu was zergangen : man sagt, ez wolde tagen. 6
 dô bat diu edele frouwe zuo dem mûnster tragen
 den vil edeln tôten, ir vil lieben man :
 swaz er dâ friunde hête, die sah man weinende gân.

Dô man in zem mûnster brâhte, vil der glocken klanc, 7
 man hôrte von den pfaffen vil michel gesanc :
 dô kom der kûnee Gunther mit den sînen man,
 mit im der grimme Hagene, zuo dem wuofe gegân.

Er sprach 'vil liebiu swester, owê der laide dîn, 1
 daz wir der starken leide niht mohten über sîn:
 wir müezen klagn immer den sînen schönen lip.'
 'daz tuot ir âne schulde.' sprach dô daz jâmerhafte wîp.

'Wær iu dar umbe leide, sone wær es niht geschehn. 2
 ir hêtet mîn vergezzen, des mag ich wol nu jehn,
 dâ ich dâ wart gescheiden von mîme lieben man.
 daz wolde got von himele, wær ez mir selber getân.'

'Dir ist von mînen liuten leides niht geschehen:' 3
 - sprach der kûnec Gunther - 'des wil ich dir verjehn.'
 'die wellen sîn unschuldec, die heizet nâher gên.'
 - sprach si - 'zuo der bâre, daz wir die wârheit verstên.'

Daz ist ein michel wunder, vil dicke ez noch geschîht: 4
 swâ man den mortmeilen bî dem tôten siht,
 sô bluotent im die wunden, als ouch dâ geschach;
 dâ von man die schulde dâ ze Hagene gesach.

Die wunden vluzzen sêre, alsô si tâten è: 5
 die è dâ sêre klageten, des wart nu michel mê.
 dô sprach der kûnec Gunther 'ich wilz iuch wizzen lân:
 in sluogen schâchære, Hagene hât es niht getân.'

Si sprach 'die selben schâchman sint mir wol bekant. 6
 got lâz ez noch errechen sîner friunde hant.
 Gunther unde Hagene, jâ habt ir ez getân.'
 die Sîvrîdes recken hêten dô ze strîte wân.

Dô sprach aber Kriemhilt 'nu dolt mit mir die nôt.' 7
 dô kômen dise beide dâ si in funden tôt,
 Gêrnôt ir bruoeder und Gîselher daz kint:
 in triwen si in klageten mit den anderen sint.

Si weinten inneeliche den Kriemhilde man. 1
 man solde messe singen. zuo dem münster dan
 giengen allenthalben man wip und kint:
 die sîn doch lihte enbären, die weinten Sivriden sint.

Gêrnôt und Gîselher sprâchen 'swester mîn, 2
 nu trœste dich nâch tôde, als ez doch muoz nu sîn:
 wir wellens dich ergetzen die wil und wir gelebn.'
 done kunde ir trôst decheinen zer werlde niemen gebebn.

Sîn sarc der was bereitet umben mitten tac: 3
 man huob in von der bâre, dâ er âf lac.
 noch enwolde si den recken lâzen niht begraben:
 des muosen al die liute vil michel arebeite habn.

In einen rîchen pfelle man den tôten want. 4
 ich wæne man dâ iemen âne weinen vant.
 dô klagete herzenliche Uote ein edel wip
 und allez ir gesinde den sînen wætlîchen lîp.

Dô man daz gehôrte, daz man zem münster sanc 5
 und in gesarket hête, vil grôz wart der gedranc:
 durch willen sîner sêle waz opfers man dô truoc!
 er hête bî den vinden guoter friunde doch genuoc.

Dô man dâ gote gediente, daz volc huop sich von dan. 6
 dô sprach diu kûneginne 'irn sult niht eine lân
 mich hînte bewachen den ûz erwelten degn:
 ez ist an sîme lîbe al mîn freude gelegn.

Drî tage und drî nahte wil ich in lâzen stân 7
 unz ich mich wol geniete mîns vil lieben man.
 waz, ob daz got gebiutet, daz mich ouch nimt der tôt?
 sô wære wol verendet mîn armer Kriemhilde nôt.'

Zen herbergen giengen die liute von der stat. 1
 pfaffen unde müneche si beliben bat,
 und allez sîn gesinde, daz sîn von rehte pfac:
 si hêten naht vil arge und ouch vil müelichen tac.

Ane ezzen und ân trinken beleip dâ manec man: 2
 die ez nemen wolden, den wart daz kunt getân,
 man gæbes in den vollen; daz schuof Sigemunt.
 dô was den Nibelungen michel arebeiten kunt.

Die drie tagezite, sô wir hœrn sagn, 3
 di dâ singen kunden daz si muosen tragen
 vil michel arebeite durch ir herzen sêr.
 si bâten umbe die sêle des recken kûen unde hêr.

Urbor uf der erden diu teiltes in diu lant, 4
 swâ sô man diu klôster und guote liute vant:
 ouch hiez si gebn den armen der sînen habe genuoc.
 si tet dem wol geliche daz si im holden willen truoc.

An dem dritten morgen ze rehter messezt 5
 sô was bî dem münster der kirchof alsô wit
 von den landliuten weinens harte vol:
 si dienten im nâch tôde als man lieben friunden sol.

In den tagen vieren ist uns gesagt daz, 6
 ze drizec tûsent marken oder dannoch baz
 wart durch sîne sêle den armen dâ gegeben.
 dô was gelegn ringe sîn grôziu schœne und ouch sîn lebn.

Dô gote wart dâ gedienet und daz man dâ gesanc, 7
 mit ungefüegem leide vil des volkes ranc.
 man hiez in ûz dem münster zuo dem grabe tragn.
 die sîn doch lîht enbâren, die sah man weinen unde klagn.

Vil lûte schriende daz volc gie mit im dan : 1
 vrô enwas da niemen, weder wîp noch man.
 ê er begrabn wûrde, man sanc unde las :
 hey, waz der wîsen pfaffen bî sîner bevilde was !

E daz zem grabe kœme daz Sîvrîdes wîp, 2
 dô ranc mit solhem jâmer der ir getriwer lîp,
 daz man si mit wazzer vil dicke dâ begôz :
 ez was ir ungemûete harte unmæzliche grôz.

Ez was ein michel wunder, daz si ie genas. 3
 mit klage ir helfende vil manec frowe was.
 dô sprach diu kûneginne 'ir Sîvrîdes man,
 ir sult durch iwer triuwe dise genâde an mir begân.

Lât mir nâch mîme leide daz kleine liep geschehn, 4
 daz ich sîn schœne houbet noch eines mûeze sehn.
 dô bat sis alsô lange mit jâmers siten starc,
 daz man wider ûf brechen muose den hêrlîchen 'sarc.

Dô brâhte man die frouwen dâ si in ligen vant. 5
 si huop sîn schœne houbet mit ir wîzen hant :
 dô kustes alsô tôten den edeln ritter guot.
 ir vil lichten ougen vor leide weinten dô bluot.

Ein jâmerlichez scheiden wart dô dâ getân. 6
 man truoc die frowen dannen : sine mohte niht gegân.
 dô lac in unsinne daz hêrlîche wîp :
 vor leide môht ersterben der ir vil wûnneclîche lîp.

Dô man den edeln herren hête nu begrabn, 7
 leit âne mâze sah man die alle habn,
 die mit im komen waren von Nîbelunge lant :
 vil selten wol genuoten man dô Sigemunden vant.

Dô was der etelicher, der drier tage lanc 1
 vor dem starken leide niht az noch entranc :
 doch enmohten si dem lîbe sô gar geschwichen niht ;
 si nerten sich nâch jâmer sô noch genuogen geschiht.

Kriemhilt unversunnen in unkreften lac 2
 den tac und den âbent unz an den andern tac :
 swaz iemen sprechen kunde, daz was ir gar unkunt.
 in den selben nœten lag ouch der kûnec Sigemunt.

Vil kûme wart der herre wider ze sinnen brâht ; 3
 von dem starken leide kranc was gar sin maht :
 daz enwas niht wunder. dô sprâchen sine man
 'herre ir sult ze lande : wir mugen niht langer hie bestân.'

XVIII AVENTIURE

WIE KRIEMHILT DA BESTUONT, UND IR SWEHER
 DANNEN REIT.

Dô brâhte man den herren dâ er Kriemhilt vant : 4
 er sprach zer kûneginne 'wir suln in unser lant.
 wir wæn unmare geste hie ze Rîne sîn.
 mîn vil liebiu frouwe, nu vart ir zuo den landen mîn.

Sît daz uns untriuwe âne hât getân 5
 hie in disen landen des iuren edeln man,
 des ensult ir niht engelten : ich wil iu wæge sîn
 durch mînes suns liebe. des sult ir gar âne angest sîn.

Ir sult ouch haben, frouwe, allen den gewalt, 1
den iu ê tet kunde der kûene degn balt.
daz lant und ouch diu krône, daz si iu undertân:
iu suln gerne dienen alle Sivrides man.

Dô sagte man den knechten, si solden rîten dan: 2
dô wart ein michel gâhen nâh rossen getân.
bî ir starken vînden was in ze wesen leit.
der frowen und ir mageden hiez man suochen diu kleit.

Dô der kûene Sigemunt wolde sîn geriten, 3
dô begunden Kriemhilt ir besten friunde biten,
daz si bî ir friunden solde dâ bestân.
dô sprach diu kûeginne 'daz kûnde müelîch ergân.

Wie môht ich den mit ougen immer an gesehn, 4
von dem mir armem wibe sô leide ist gescehn?
dô sprach ir bruoder Gîselher 'vil liebiu swester mîn,
du solt durch dîne triuwe hie bî dîner muoter sîn.

Die dir dâ hânt betrüebet den lîp und ouch den muot, 5
der bedarfstu vil kleine: zer mîn eines guot.
si sprach zuo dem degene 'wie kûnde daz gescehn?
vor leide mües ich sterben, swenne ich Hagenen solde sehn.'

'Des tuon ich dir ze râte, vil liebiu swester mîn: 6
du solt bî dînen bruoder Gîselhere sîn.
ich wil dich ergetzen dînes mannes tût.'
dô sprach diu kûeginne 'des wâr mir armen wibe nôt.'

Dô ez ir der junge sô gütlich erbôt, 7
si begunden ylêgen Uote und Gêrnôt,
und ir getriwen mâge si bâten dâ bestân,
si hête lützel friunde bî den Sivrides man:

‘Si sint iu alle fremede.’ - sô sprach Gêrnôt -
 ‘niemen lebt sô starker, ern müeze ligen tôt :
 daz bedenket, swester, und getrœstet iuren muot.
 belîbet bî den friunden : ez wirt iu wêrlichen guot.’

Dô lobte si ir mâgen, si wolde dâ bestân.
 diu ros bereitet wâren den Sigemundes man,
 alsô si wolden rîten heim in Niderlant :
 sie hêten ûf gesoumet al der recken gewant.

Dô gie der herre Sigemunt zuo Kriemhilde stân :
 er sprach zuo der frouwen ‘die Sîvrîdes man
 iu wartent bî den rossen, wir suln rîten hin ;
 wande ich vil ungerne bî den Buregonden bin.’

Dô sprach diu frowe Kriemhilt ‘mir râtent friunde mîn, 4
 swaz ich hân der getriuwen, ich sûle hie bî in sîn,
 ich habe lûtzel mâge in Nibelunge lant.’
 leit was ez Sigemunde, dô er diu mære an ir ervant.

Dô sprach der kûnec Sigemunt ‘daz enlât iu niemen sagen : 5
 vor allen mînen mâgen sult ir krône tragen
 alsam gewalteclîche, als ir ê habt getân :
 irn sult des niht engelten, daz wir den helt verlorn hân.

Und vart ouch mit uns widere durch iwer kindelîn : 6
 daz ensult ir sô niht, frouwe, verweistet lâzen sîn.
 swenne iwer suon gewâhset, der trœstet iu den muot :
 die wîle sol iu dienen von recken manec helt guot.’

Si sprach ‘herre Sigemunt, ine mac gerîten niht : 7
 ich muoz hie belîben, swaz halt mir geschîht,
 bî den mînen mâgen, daz si mir helfen klagn.’
 dô begunden disiu mære den guoten recken missehagn.

1
Sie sprächen al geliche 'sô möhten wir wol jehn,
daz uns aller êrste were leit geschehn :
ob ir beliben woldet bî unsern vînden hie,
sô geriten hovereise noch helde sorclîcher nie.'

2
'Ir sult âne alle sorge gote bevolhen varn :
ich schaffe iu guot geleite - und heiz iuch wol bewarn -
zuo Sigemundes lande. mîn liebez kindelîn
daz sol uf genåde iu recken wol bevolhen sin.'

3
Dô si daz vernâmen, daz si niht wolde dan,
dô weinten al gemeine die Sivrides man.
wie rehte jâmerlîche sich schiet Sigemunt
von der kûneginne! dô was im ungemüete kunt.

4
'Wê geschehe der hôchgezite: - sprach der kûneec hêr -
'ez geschilt von kurzewile leider nimmer mêr
deheinen kûneges mâgen, danne uns ist geschehn.
man sol uns nimmer mêre hie zen Buregonden sehn.'

5
Dô sprächen offenliche die Sivrides man
'ez möhte noch ein reise in ditze lant ergân,
sô wir den reht erfunden der uns den herren sluoc:
si hânt von sinen mâgen der starken vînde genuoc.'

6
Er kuste Kriemhilde: wie jâmerlîch er sprach,
dô si niht rîten wolde und er daz reht ersach,
'nu rîten vreuden âne heim in unser lant:
alle mîne sorge sint mir êrste nu bekant.'

7
Si rîten ungeleitet von Wormz ze tal den Rîn:
si mohten sicherlîchen wol des muotes sin,
ob si in vîntschefte wûrden an gerant,
daz sich wern wolde der kûenen Nibelunge hant.

Sine gerten urloubes dā ze keinem man. 1
 dô sah man Gêrnôten und Gîselhern gân
 zuo zim minneclichen; in was sîn schade leit:
 des brāhten in wol innen die helde küen unde gemeit.

Dô sprach gezogenliche der künec Gêrnôt 2
 'got weiz daz wol von himele, an Sivrîdes tût
 gewan ich nie die schulde, daz ich daz hôte sagn,
 wer im hie vînt wære. ich sol in pilliche klagen.'

Dô gab in sîn geleite Gîselher daz kint. 3
 er brāhte sorgende ûz dem lande sint
 den künec mit sînen recken heim ze Niderlant.
 wie lützel man der mäge dar inne vroeliche vant!

Wie si nu gefüeren, des enkan ich niht gesagn. 4
 man hôte zallen ziten hie Kriemhilde klagn,
 daz ir niemen trôste daz herze und ouch den muot,
 ez entat ir bruoder Gîselher: der was getriwe unde guot.

Prünhilt diu schoene mit übermüete saz. 5
 swaz Kriemhilt geweinte, unnmære was ir daz:
 sine wart ir rehter triuwen nimmer mê bereit.
 sit geriet ouch ir vrou Kriemhilt ich wæn als ungefüegiu leit.

XIX AVENTIURE

WIE DER NIBELUNGE HORT ZE WORMZE BRAHT WART.

Dô diu minneclîche alsô verwitewet wart, 1
 bî ir inne lande der grâve Eckewart
 beleip mit sînen mannen: sîn triwe im daz gebôt.
 er diente sîner frouwen mit willen unz an sînen tôt.

Ze Wormze bî dem münster ein gezimber man ir slôz, 2
 von holze harte michel, wît unde grôz,
 dâ si mit ir gesinde sît âne freude saz.
 si was zer kirchen gerne, und tet vil willeclîche daz.

Dâ man begruop ir vriedel, - wie selten si daz lie! - 3
 mit trûrigem muote si allezt dar gie:
 si bat got den rîchen der sînen sêle pflegn.
 vil dicke wart beweinet mit grôzen triuwen der degn.

Uote und ir gesinde si trôsten zaller stunt: 4
 dô was ir daz herze sô græzliche wunt,
 ez kunde niht vervâhen swaz man ir trôstes bôt.
 si hête nâch ir friunde die aller græzesten nôt,

Die nâch liebem manne ie mêre wîp gewan: 5
 man moht ir starke tugende kiesen wol dar an;
 si klaget unz an ir ende, die wîle wert ir lîp.
 sît rach sich harte swinde in grôzen triwen daz wîp.

Sus saz si in ir leiden, daz ist al wâr, 1
 nâch ir mannes tôde unz in daz vierde jâr,
 daz si zir bruoder Gunther dehein wort nie sprach,
 und ouch ir vînt Hagenen in der zîte niene gesach.

Hagene sprach zem kûnege 'môhten wir daz tragen an, 2
 daz ir iwer swester hulde môhtet hân,
 sô kæm zûo disen landen daz Nibelunges golt:
 des wûrde uns vil ze teile, wær uns diu kûneginne holt.'

'Daz schuln wir versuochen:' - sprach der kûnec sân - 3
 'ich wil ez mine brüeder hinze ir werben lân,
 daz si mir daz füegen, daz si uns gerne sehe.'
 'ine trowes niht,' - sprach Hagene - 'daz ez immer geschehe.'

Dô hiez er Ortwinen hin ze hove gân, 4
 und den marcgrâven Gêren. dô daz was getân,
 man brâht ouch Gêrnôten und Giselher daz kint:
 si versuochentz vriuntliche an frowen Kriemhilde sint.

Dô sprach von Buregonden der kûene Gêrnôt 5
 'frowe, ir klaget ze lange den Sivrides tôt.
 nu wil der kûnec iu rihten, daz ers niht hât erslagen.
 man hœrt iuch zallen zîten sô rehte grœzliche klagn.'

Si sprach 'des zîht in niemen: in sluoc diu Hagenen hant. 6
 wâ man in verhoven môhte, do er daz an mir ervant,
 solt ich des getrouwen, daz er im trûege haz,
 ich hête wol behüetet' - sprach diu kûneginne - 'daz,

Daz ich niht vermeldet hête sinen lîp: 7
 sô liez ich nu mîn weinen, ich vil armez wîp.
 holt wirde ich in nimmer die ez dâ habent getân.'
 dô begunde vlêgen Giselher, der vil wætliche man.

Si sprach 'ich muoz in grüezen, irn welts mich niht erlan: 1
des habt ir grôze sünde. der küneec hât mir getân
sô vil der herzenswære gar unverscholt:
mîn munt im giht der suone, im wirt daz herze nimmer holt.'

'Dar nâch wirt ez bezzer:' - sprâchen ir mâge dô - 2
'waz, ob er ir an verdienet, daz si noch wirdet vrô?'
'er mac si wol ergetzen.' sprach Gêrnôt der helt.
dô sprach diu jâmersrîche 'seht, nu tuon ich swaz ir welt.'

Si wolde'n küneec grüezen, dô si in des verjach, 3
mit sînen besten friunden ers in ir hûse sach.
dône torste Hagene für si niht gegân:
wol wesser sîne schulde; er hêt ir leide getân.

Dô si verkiesen wolde ûf in den grôzen haz, 4
Gunther gezogenliche gie gegen ir nâher baz,
durch des hordes liebe was der rât getân:
dar umbe riet die suone der vil ungetriwe man.

Ez enwart nie suone mit sô vil trâhenen mê 5
mit valsche gefüezet. ir tet ir schade wê:
si verkôs ûf si alle wan ûf den einen man.
in hêt erslagen niemen, hêt ez niht Hagene getân.

Dar nâch vil unlange, dô truogen si daz an, 6
daz diu küneginne den grôzen hort gewan
von Nibelunge lande, und fuort in an den Rîn:
ez was ir morgengâbe, er solt ir wol von rehte sîn.

Dar nâch si beide fuoren, Gîselher und Gêrnôt: 7
zweif hundert mannen Kriemhilt dô gebôt,
die in dâ holn solden, dâ er verborgen lac,
dâ sîn der degn Albrîch mit sînen besten friunden pflac.

Dô die von Rîne kômen in Nibelunge lant, 1
 dô sprach zuo sinen mâgen Albrich al zehant
 'wir mugn ir des hordes vor gehabn niht,
 sit sîn ze morgengâbe diu edele kûneginne giht.'

'Doch enwürde ez nimmer' - sprach Albrich - 'getân, 2
 niwan daz wir übele dâ verlorn hân
 mit dem vil edeln recken die guoten tarnhût:
 die truoc von allem rehte der schönen Kriemhilde trût.

Nu ist ez leider übele Sîvrîde kômen, 3
 daz uns die tarnkappen hêt der helt benomen,
 und daz im muose dienen mit vorhten ditze lant.
 dô gie der kamerære dâ er des hordes slûzzel vant.

Ez stuonden vor dem berge die Kriemhilde man, 4
 und ouch ein teil ir mâge. den schaz man truoc dan
 nider zuo den ûnden an diu schiffelîn:
 den fuort man ûf dem sêwe ûf ze berge unz in den Rîn.

Nu mugt ir von dem horde wunder hœren sagn: 5
 swaz zwelf kanzwâgene meiste mohten tragen
 viere tage lange von dem berge dan
 - ouch muos ir ieslicher des tages niunstunden gân -,

Ez en was niht anders wan gesteine und golt; 6
 und ob man die werlt alle hêt dâ von gesolt,
 sîn wûrde nimmer minre einer marke wert:
 jâne hête es Hagene âne schulde niht gegert.

Der wunsch der lac dar under, von golde ein rûetelîn: 7
 der daz hêt erkunnen, der möhte meister sîn
 wol in aller werlde über ieslichen man.
 der Albriches mâge kom vil mit Gêrnôte dan.

Dô sich der herre Gêrnôt und Giselher daz kint 1
 des hordes underwunden, do underwunden si sich sint
 des landes und der bürge und maneges recken balt:
 daz muos in sider dienen bêdiu durch vorhte und gewalt.

Dô si den hort behielten in Guntheres lant, 2
 und sihs diu küneginne alles underwant,
 kamern unde türne sîn wurden vol getragn:
 man gehôrt daz wunder von guote mære nie gesagn.

Und wær sîn tûsent stunden noch alsô vil gewesen, 3
 und solt der herre Sivrit gesunder sîn genesen,
 bî im wære Kriemhilt hendelbîz bestân.
 getriwer wîbes künne ein helt nie mære noch gewan.

Dô si den hort nu hête, dô brâhtes in daz lant 4
 vil der vrenden recken: jâ gab der frowen hant,
 daz man sô grôzger milte mære nie gesach.
 si pflic vil grôzger tugende; des man der küneginne jach.

Den armen und den rîchen begunde si dô geben, 5
 daz daz reite Hagene, ob si solde leben
 noch deheine wile, daz si sô manegen man
 ze dienste ir gewünne, daz si des angst müesen hân.

Dô sprach der künec Gunther 'ir ist lip unde guot: 6
 zwiu solde ich daz wenden, swaz si dà mit getuot?
 ich erwarbez vil kûme, daz si mir wart sider holt:
 nune ruochen war si teile bêdiu ir silber und ir golt.'

Hagene sprach zem künège 'ez ensolde ein frumer man 7
 deheinem einem wibe niht des hordes lân:
 si bringet ez mit gâbe noch unz uf den tac,
 daz vil wol geriuwen die kûenen Buregonden mac.'

Des antwurt im Gunther 'ich swuor ir einen eit, 1
 daz ich ir getaete nimmer mëre leit,
 und wil es fürbaz hüeten: si ist diu swester mîn.
 dô sprach aber Hagene 'lât mich der schuldige sîn.'

Ir sumelicher eide wâren unbehuot: 2
 dô nâmen si der witewen daz vil grôze guot;
 Hagen sich der slûzzel aller underwant.
 vil sêre ez zurnde Gêrnôt, dô er daz rehte ervant.

Dô sprach der herre Giselher 'mîner swester hât getân 3
 Hagen sô vil der leide, ich soldez understân:
 und wær er mir niht sippe, ez gienge im an den lip.'
 iteniwez weinen tet dô Sîvrîdes wîp.

Dô sprach der herre Gêrnôt 'ê daz wir immer sîn 4
 gemüet mit disem golde, wir soldenz in den Rîn
 allez heizen senken, daz'z immer wûrde man.'
 si gie vil klageliche für Giselher ir bruoder stân.

Si sprach 'vil lieber bruoder, du solt gedenken mîn: 5
 des lîbes und des guotes soltu mîn vogt sîn.'
 er sprach 'vil liebiu swester, daz sol sîn getân,
 als yir kômen widere: wir hân ze rîtenne wân.'

Der kûnec und sine mâge rûmten dô daz lant, 6
 mit in die besten drunder, die man inder vant,
 niwan aleine Hagene: der beleip dâ durch den haz,
 den er truoc der frouwen, und tet vil willecliche daz.

Die herren swuoren eide, unz si möhten leben, 7
 daz si den schatz niht zeigen noch niemen solden geben,
 wan mit gemeinem râte, sô si des dûhte guot.
 des muosen si in vliesen durch ir gîteclichen muot.

Ê daz die kûnege widere ze Rîne wæren komen, 1
 die wîle hête Hagene den grôzen hort genomen:
 er sancten dâ ze Lôche allen in den Rîn.
 er wânde in niezen eine; des enkunde sider niht gesîn.

Erne mohte des hordes sît gewinnen niht, 2
 daz den ungetriuwen vil dicke noch geschiht.
 er wânde in niezen eine, die wil er möhte leb'n:
 sît moht ers im selben noch ander nieman gegeben.

Die fürsten kômen widere, mit in vil manec man. 3
 Kriemhilt ir schaden grôzen klagen dô began
 mit meiden und mit vrouwen: in was harte leit.
 dô gebârtên die degene sam si im hêten widerseit.

Dô sprâchen si gemeine 'er hât übele getân.' 4
 er entweich der fürsten zorne alsô lange dan,
 unz er gewan ir hulde. si liezen in genesn:
 doch enkunde im Kriemhilt nimmer vînder gewesen.

Mit iteniwem leide beswæret was ir muot, 5
 umbe ir mannes ende, und dô si ir daz guot
 alsô gar genâmen: dô gestuont ir jâmers klage
 des lîbes immer mære unz an ir jungeste tage.

Nâch Sîvrîdes tôde, daz ist al wâr, 6
 was si in manegen leiden unz in daz zwelfte jâr,
 daz si des recken tôdes mit klage nie vergaz:
 si was in triwen stæte, und tet vil willeclîche daz.

Eine rîche fürsten aptey stifte vrou Uote 7
 nâch Dancrâtes tôde von ir guote,
 mit starken rîchen urborn, als ez noch hiute hât,
 daz klôster dâ ze Lôrse, des dinc vil hôhe an êren stât.

Dar zuo gab ouch Kriemhilt sit ein michel teil, 1
 durch Sivrides sële und umb aller sêlen heil,
 golt und edel steine, mit williger hant:
 getriwer wîp decheine ist uns selten è bekant.

Sit daz diu frowe Kriemhilt ouf Gunther verkôs, 2
 und doch von sînen schulden den grôzen hort verlôs,
 dô wart ir herzenleide tûsent stunde mêr:
 dô wære gerne dannen diu frowe edel unde hêr.

Dô was der frowen Uoten ein sedelhof bereit 3
 ze Lôrse bî ir klôster mit grôzer rîcheit:
 dar zôch sich diu witewe von ir kinden sit,
 dà noch diu frowe hêre begrabn in eime sarke lit.

Dô sprach diu kûeginne 'vil liebiu tohter mîn, 4
 sit du hie niht maht belîben, sô soltu bî mir sîn:
 ze Lôrse in mîme house, und solt dîn weinen lân.'
 des antwurt ir Kriemhilt 'wem liez ich danne mînen man?'

'Den lâz et hie belîben.' sprach frou Uote. 5
 'nune welle got von himele,' - sprach aber diu guote -
 'mîn vil liebiu muoter: daz sol ich wol bewarn;
 wand er muoz fon hinnen mit mir wærlîche varn.'

Dô schuof diu jâmers rîche, daz er wart ouf erhabn: 6
 sîn edelez gebeine wart an der stunt begrabn
 ze Lôrse bî dem mûnster vil werdeclichen sit,
 dà der helt vil kûene in eime langen sarke lit.

In den selben zîten, dô Kriemhilt solde 7
 varn mit ir muoter dar si doch wolde,
 dô muoste si belîben. als ez solde sîn:
 daz understuonden mære, vil verre komen über Rîn.

XX AVENTIURE

WIE DER KÜNEC EZELE NAH FROUN KRIEMHILT ZE WORMZE
SINEN BOTEN SANDE.

Daz geschah in den geziten, dô frou Helche erstarp 1
und daz der künece Ezele ein ander wip warp:
dô rieten sine friunde in Buregonden lant
zeiner werden witewen, diu was frou Kriemhilt genant.

Sit daz erstorben wære der schœnen Helchen lip, 2
si sprâchen 'welt ir immer gewinnen edel wip,
die hœhsten und die besten die ie künece gewan,
sô nemt die selben witewen: der starke Sîvrit was ir man.

Dô sprach der künece rîche 'wie künde daz ergân, 3
sit ich bin ein heiden und toufes nine hân?
sô ist diu frowe kristen, und tuot es lihte niht:
ez muoz sin ein wunder, ob ez immer geschiht.'

Dô sprâchen aber die snellen 'waz ob siz lihte tuot 4
durch iweren namen den hœhen und iwer michel guot?
sô sol manz doch versuochen an daz vil edel wip:
sô mugt ir gerne minnen den ir vil wûnneclîchen lip.'

Dô sprach der künec Ezele 'wem ist under iu bekant 1
 bi Rîne aller beste liute und ouch daz lant?'
 dô sprach von Bechelâren der guote Ruedegêr
 'ich hân erkant von kinde die edeln küneginne hêr,

Gunthern und Gêrnôten, die kûenen ritter guot: 2
 Gîselher der junge, ir ieslicher tuot
 swaz er der hôhen êren mit tugenden mac begân:
 ouch hânt ir alten mâge al daz selbe her getân.'

Dô sprach der künec rîche 'friunt, du solt mir sagn, 3
 ob si ob mînen landen krône solde tragn.
 ist ir lîp sô schône, sô man mir hât geseit?'
 des antwurt im Ruedegêr, der recke kûene und gemeit:

'Si gelîchet sich mit schône wol der frowen mîn, 4
 Helchen der vil rîchen, und kûnde niht gesin
 in dirre werlde schôner deheines kûneges wîp.
 den si lobt ze friunde der mac wol trœsten den lîp.'

Er sprach 'sô wirbez, Ruedegêr, sô lieb als ich dir si; 5
 und sol ich Kriemhilde immer geligen bi,
 des wil ich dir lônên sô ich beste kan:
 sô hâstu mînen willen mit grôzen triuwen getân.'

Uzer mîner kameren sô heiz ich dir gebn, 6
 daz du und dîne geverten vrêliche mûgt leb'n:
 von kleidern und von rossen des nim swaz du wil;
 des gib ich dir zewâre zuo der boteschefte vil.'

Des antwurte Ruedegêr, der marcgrâve rîch, 7
 'gert ich dînes guotes, daz wære unobelîch.
 ich wil dîn bote gerne wesen an den Rîn
 mit mîn selbes guote: des soltu gar âne angest sîn.'

Dô sprach der künec Ezele 'nu, wenne welt ir varn 1
 näch der vil minneclîchen? got sol iuch bewarn
 der reise an allen êren, und ouch die frowen mîn.
 des helfe mir gelücke, daz si uns genædec müeze sîn.'

Dô sprach aber Ruedegêr 'ê ich rûme ditze lant, 2
 wir müezen ê bereiten wâfen und gewant,
 schilde unde sâtele, des wir êre hân:
 ich wil ze Rîne fûeren fûnfhundert mîner kûenen man;

Swâ man in vremden landen mih und die mîne sehe, 3
 daz ir ieslicher denne dir des jehe,
 daz nie künec deheiner alsô manegen man
 sô verre baz gesande danne du ze Rîne habst getân.

Ob duz, künec rîche, dar umb niht wellest lân: 4
 si was ir edeln minne Sivride undertân,
 dem Sigemundes kinde. den hâstu hie gesehn:
 man muose im grôzer êren mit rehter wârheite jehn.'

'Dar umbe ich si niht vremde, was si des recken wîp: 5
 jâ was wol alsô tiure sîn vil edel lîp,
 daz ich niht versmâhen die kûeginne sol.
 durch ir grôzen schône sô gevellet si mir wol.'

'So wil ich iu die wârheit' - sprach Ruedegêr dô - 'sagn, 6
 daz wir hinnen rîten in vier und zweinzec tagen.
 ich enbiut ez Göteline, der vil lieben frowen mîn,
 daz ich näch Kriemhilde selbe bote welle sîn.'

Hin ze Bechelâren sande Ruedegêr 7
 boten sîme wîbe, der marcgrâvinne hêr,
 und enbôt ir daz er solde dem kûenege werbn wîp.
 si gedâhte friuntliche an der guoten Helchen lîp.

Dô diu marcgrâvinne die boteschaft vernam, 1
 der mære si sich freute; doch weinens si gezam,
 ob si gewinnen solde noch frowen alsam ê.
 sô si gedâht an Helchen, daz tet Göteline wê.

Uzer Hiunen lande der marcgrâve reit: 2
 des was der künec Ezele vrô und ouch gemeit.
 dâ zer stat ze Wiene bereite man in wât,
 die er fûeren solde, als man uns gesagt hât.

Dâ ze Bechelâren im warte Götelint: 3
 diu junge marcgrâvinne, daz Ruedegêres kint,
 sah ir vater gerne und ouch sine man.
 dô wart ein liebez biten von schœnen kinden getân.

Dô der marcgrâve ze Bechelâren reit, 4
 dô was in mit vlîze ir gewæfen und ir kleit
 bereitet gar ze wunsche, im und sinen man.
 ir soumer ûf der strâze sah man mit in zogen dan.

Dô si ze Bechelâren kômen in die stat, 5
 di sinen reisgesellen herebergen bat
 der wirt vil minnelîchen und schuof in guot gemach.
 Götelint diu rîche, den wirt si niht zungerne sach.

Sam tet sin liebiu tohter, diu junge marcgrâvin: 6
 diu enkunde ir vater künfte niht hôhers muotes sin.
 die von Hiunen landen, wie gerne si die sach!
 mit lachendem munde diu sûeze juncfrowe sprach:

‘Nu si uns grôze willekomen min vater und sine man.’ 7
 dô wart vil grôze danken mit vlîze getân
 des marcgrâven kinde von manegem recken guot.
 vil wol erkande Götelint des guoten Ruedegêres muot.

Dô si des nahtes nâhen bi Ruedegère lac, 1
vil minneliche vrâgen in diu frowe pflac,
war in gesendet hête der künec von Hiunen lant.
er sprach 'mîn liebiu frouwe, daz sol werden dir bekant.

Ich sol mîne herren werben umbe ein wîp, 2
sît daz ist erstorben mîner frowen lîp.
ich wil nâch Kriemhilde rîten an den Rîn:
diu sol hie zen Hiunen gewaltec küneginne sîn.'

'Daz wolde got,' - sprach Götelint - 'môht uns daz heil 3
geschehn,
sît daz wir ir hoeren sô grôzer êren jehen.
si ergazt uns mîner frouwen lîht in alten tagen.
mit ir hôhen tugenden, daz wir müesen si verklagen.'

Dô sprach der marcgrâve 'triutinne mîn, 4
di mit mir suln rîten hinnen an den Rîn,
den sult ir friuntliche bieten iwer guot:
sô helde varent rîche, sô sint si vroelîch gemuot.'

Si sprach 'ez ist deheiner, derz von mir gerne nîmt, 5
ine geb ir ieselîchem swaz im wol gezîmt,
ê daz ir hinnen scheidet mit den iwern man.'
daz si dem wirte lobte, daz wart mit vlîze getân.

Hey, waz man dô von kamere der rîchen pfellel truoc! 6
der wart mit den recken geteilet dô genuoc,
erfület vlîzelîche von halse unz uf den sporn.
die im dâ zuo behageten, die hêt im Ruedegêr erkorn.

An dem sibnden morgen von Bechelâren reit 7
der wirt mit sînen degenen. wâfen unde kleit
fuorten si den vollen durch der Baier lant.
si wurden uf der strâzen durch rouben selten an gerant.

Dâ die helede fuoren, niemen niht in nam: 1
 man moht in dannen dienen als in wol gezam.
 ritter unde knechte die wâren wol gekleit;
 der guote marcgrâve alsus von Bechelâren reit.

Inre tagen zwelfen si kômen an den Rîn. 2
 done kunden disiu mære niht verholn sîn:
 man sagte dem kûnege und ouch sînen man,
 dâ kâmen hôhe geste. der wirt dô vrâgen began,

Ob iemen si bekande, daz manz im solde sagn. 3
 man sah ir soumære sô rehte swære tragn:
 daz si vil rîche wâren, daz wart dâ wol bekant.
 man hiez si herbergen dâ ze Wormez al zehant.

Dô die geste wâren zen herebergen komen, 4
 dô wart ir gevertes vaste war genomen.
 si wundert, wannen fûeren die recken an den Rîn.
 der wirt nâch Hagene sande, ob ez im kûndec môhte sîn.

Dô sprach der von Tronege 'nu lât mich si sehn. 5
 als ich si nu geschouwe, ich kan iu wol verjehn,
 von swannen si gesendet sîn in ditze lant:
 si suln sîn vil vremde, ine habe si schiere bekant.'

Inlende hêten die geste nu genomen. 6
 in vil rîchiu kleider was der bote komen
 mit sînen hergesellen: ze hove si dô riten;
 si fuorten gutiu kleider, wol und spæhe gesniten.

Dô sprach der snelle Hagene 'als ich mich kan verstan 7
 - wande ich die helde lange niht gesehn hân -,
 si varnt dem gelîche, als ez si Ruedegêr
 von hiunischen rîchen, der degn kûene unde hêr.'

‘Wie solde ich des getrouwen,’ - sprach der künec zehant - 1
 ‘daz der von Bechelâren kœme in ditze lant?’
 ê daz der künec riche die rede vol sprach,
 Hagene der küene den guoten Ruedegêren sach.

Mit sînen besten friunden lief er zuo zim dan, 2
 man sach fûnfhundert degene von den rossen stân,
 dô wurden wol empfangen die von Hiunen lant,
 boten nie getruogen alsô hêrlîch gewant.

Dô sprach in hôher stimme der herre Hagene 3
 ‘nu sin grôze willekomen dise degene,
 der vogt von Bechelâren und alle sîne man.’
 daz grûezen wart mit êren den snellen Hiunen getân.

Des küneges nêhsten mâge kômen dà man si sach, 4
 Ortwin von Metzen zuo Ruedegêre sprach
 ‘wir habn in aller wile mære nie gesehn
 geste hie sô gerne: des wil ich wêrlîche jehn.’

Des gruozes si dô dancten den helden ûberal, 5
 mit dem hergesinde si giengen in den sal,
 dà si den künec funden bî manegem küenen man.
 der wirt dô von dem sedele gie gegen Ruedegêre dan.

Wie rehte friuntliche er den gast enpfie, 6
 und alle sîne degene! Gêrnôt dô niht enlie,
 ern enpfinge in ouch mit êren und alle sîne man.
 der künec Ruedegêre fuorte bî der hende dan.

Er brâht in zuo dem sedele, dà er selbe saz, 7
 den gesten hiez man schenken - mit willen tet man daz -
 mete den vil guoten und den besten wîn,
 den iemen vinden kunde in dem lande al umben Rîn.

Giselher und Gêre die bêde wâren komen; 1
 Danewart unde Volkêr die hêten wol vernomen
 von den werden gesten: si wâren hôchgemuot,
 si enpfingen vor dem kûnege die ritter edel unde guot.

Dô sprach zuo sîme herren der degen Hagene 2
 'ez solden immer dienen alle iwer degene
 daz uns der marcgrâve ze liebe hât getân:
 des solde man enpfâhen wol den Göteline man.'

Dô sprach der kûnec Gunther 'ine kan niht langer dagn: 3
 wie si sich gehaben beide, daz sult ir mir sagn,
 Ezele unde Helche ûzer Hiunen lant.'
 dô sprach der marcgrâve 'ich solz iu sagn hie zehant.'

Dô stuont er von dem sedele mit allen sînen man: 4
 er sprach zuo dem kûnege 'lât mih urloup hân,
 ze sagene solhiu mære, dar umbe ich bin gesant
 von deme kûnec Ezele her zuo der Buregonden lant.'

Er sprach 'swaz man uns mære bi iu enboten hât, 5
 diu erlob ich iu ze sagene: âne friunde rât.
 ir sult si lâzen hœren mich und mîne man:
 wande ich iu aller êren hie ze werbenne gan.'

Dô sprach der bote hêre 'iu enbiutet an den Rîn 6
 getriwelîchen dienest der grôze voget mîn,
 und allen iweren friunden, die ir muget hân:
 unde wizzet, disiu boteschaft ist in triwen gar getân.

Iu bat der kûnec edele klagen sîne nôt. 7
 sîniu lant sint verweiset: mîn frowe diu ist tût,
 Helche diu vil rîche ein kûneginne hêr,
 nâch der mîn herre lîdet, daz wizzet, ungefüegiu sêr.

Kint der edeln fürsten diu si gezogen hât, 1
 dar an ez inme lande vil jâmerlichen stât:
 diu enhânt nu leider niemen, der ir mit triwen pflege.
 des wân ouch sich vil kleine des küneges sorge gelege.

‘Nu lôn im got,’ - sprach Gunther - ‘daz er den dienst sîn 2
 sô willeclich enbiutet mir und den friunden mîn.
 sînen gruoꝝ ich gerne hie vernomen hân,
 den mir enbiutet Ezele: des sol er grôz genâde hân.’

Dô sprach von Burgonden der herre Gêrnôt 3
 ‘die werlt mac wol riuwen der schœnen Helchen tôt
 durch ir manege tugende, der si wol kunde pfegn.’
 der rede gestuont im Hagene, der vil zierliche degn.

Dô sprach aber Ruedegêr, der edel bote hêr, 4
 ‘sit ir mir, künec, erlobet, ich sol iu sagen mêr,
 waz iu mîn lieber herre her enboten hât,
 sit im nâch mîner frouwen sîn dine sô kumberlichen stât.

Man sagt mîme herren, iwer swester sî âne man, 5
 Sîvrit sî erstorben: ist daz alsô getân,
 sô sol mîn frou Kriemhilt die rîchen krône tragn
 vor den Ezelen recken. diz bat iu der künec sagn.’

Dô sprach der künec rîche - wol gezogen was sîn muot - 6
 ‘sô hêret mînen willen; ob siz gerne tuot,
 den wil ich iu künden in disen siben tagen.
 ê ihz an ir erfüere, zwiu solde ich Ezelen versagn?’

Die wîle man den gesten hiez schaffen guot gemach. 7
 in wart dâ sô gedienet, daz Ruedegêr des jach,
 daz er dâ friunde hæte bî Gunthers man.
 Hagene im diente gerne: erz hête im alsam getân.

Alsus beleip dô Rüedegêr unz an den vierden tac. 1
 der künec nâch râte sande. wie wislich er pflac
 vrâgen sine mâge, ob si dûhte guot getân,
 daz Kriemhilt nemen solde den künec Ezelen ze man!

Si rietenz al gemeine, wan eine Hagene 2.
 der sprach ze Gunther dem degene
 'habt ir rehte sinne, sô wirt ez wol behuot,
 ob sis joch volgen wolde, daz irz nimmer getuot.'

'Warumbe' - sprach dô Gunther - 'solde ihs volgen niht? 3
 swaz der küneginne liebes geschiht,
 des sol ich ir wol gunnen: si ist diu swester mîn.
 wir soldenz selbe werben, ob ez ir êre möhte sîn.'

Dô sprach aber Hagene 'nu lât die rede stân. 4
 und hêt ir Ezelen künde als ich sîn künde hân,
 solte si in danne minnen, als ich iuch hêre jehn,
 sô wære iu aller êrste von schulden sorgen geschehn.'

'Warumbe?' - sprach dô Gunther - 'ich behüet wol immer daz, 5
 daz ich im kome sô nâhen, daz ich deheinen haz
 von im müese dulden, und wûrde si sîn wip.'
 dô sprach aber Hagene 'ez gerâtet nimmer mîn lip.'

Man hiez nâh Gêrnôte und Giselhere gân, 6
 ob der frowen brüeder dûhte guot getân,
 daz Kriemhilt nemen solde den rîchen künec hêr.
 noch widerreit ez Hagene, unde ander niemen mêr.

Dô sprach von Burgonden Giselher der degn 7
 'nu mugt ir, friunt Hagene, noch der triwen pflegen:
 ergetzet si der leide, und ir ir habt getân.
 swar an ir wol gelünge, daz solt ir ungevêhet lân.'

‘Jâ habt ir mîner swester getân sô starkiu leit,
 --sô sprach aber Gîselher, der degn vil gemeit -
 ‘daz si des hête schulde, ob si iu wære gram:
 nie man deheiner frouwen mêre freuden noch genam.’

‘Daz ich dâ wol bekenne, daz tuon ich iu kunt:
 sol si nemen Ezele, gelebt si an die stunt,
 si getuot uns leide, swie si getraget an.
 jâ gewinnet si ze dienste, daz wîzzet, manegen küenen man.’

Des antwurte Hagene der herre Gêrnôt
 ‘ez mag alsô beliben unz an ir beider tôt,
 daz wir geriten immer in Ezelen lant.
 wir suln ir leisten triuwe: daz ist zen êren uns gewant.’

Dô sprach aber Hagene ‘mir kan niemen widersagn:
 und sol diu frowe Kriemhilt Helchen krône tragn,
 si getuot uns leide, swie si gefüeged daz.
 ir sult ez lân beliben: daz kumt iu recken michel baz.’

Mit zorne sprach dô Gîselher, der edeln Uoten suon,
 ‘wir ensulen niht alle meinliche tuon:
 swaz liebes ir geschæhe, vrô solten wir des sîn.
 swaz ir geredet Hagene, ich dien ir durch die triwe mîn.’

Dô daz Hagene hôrte, dô wart er ungemuot.
 Gêrnôt unde Gîselher, die stolzen ritter guot,
 und Gunther der rîche gerieten sider daz,
 ob si loben wolde, daz si loben âne haz.

Dô sprach der küene Gêre ‘sô wil ich hine gân,
 und wil mîne frouwen die rede wîzzen lân,
 waz ir der küene Ezele her enboten hât:
 ob si in nemen welle, daz si mit triwen unser rât.’

Dô gie der snelle recke da er Kriemhilde sach. 1
 si enpfie in minneliche: wie balde er dô sprach
 'ir muget mich gerne grüezen, und gebn botenprôt:
 iuch wil gelücke scheiden úzer aller iwer nôt.

Ez hât durch iwer minne, frowe, her gesant 2
 ein der aller beste, der ie küneges lant
 besaz mit vollen êren, oder krône solde tragn.
 ez werbent boten edele: daz hiezien iu die küneger sagn.'

Dô sprach diu jâmers rîche 'iu sol verbieten got, 3
 und andern mînen friunden, daz si deheinen spot
 an mir armen úeben. waz soldich einem man,
 der ie herzenliebe von guotem wibe gewan?'

Si widerreit ez sere. dô kômen aber sint 4
 Gêrnôt ir bruoder und Gîselher daz kint.
 di bâten minneliche treستن si den muot:
 ob si den künec nâme, ez wær ir wærlîchen guot.

Überwinden niemen kunde dô daz wip, 5
 daz si minnen wolde deheines mannes lip.
 dô bâten si die recken 'nu lâzet doch gescheln,
 ob ir niht anders wellet tuon, sô sult ir Ruedegêren sehn.'

'Daz enwil ich niht versprechen, ine welle in gerne sehn, 6
 den guoten Ruedegêren: daz lâz ich wol gescheln
 durch sîne manege tugende. wær er niht her gesant,
 swerz ander boten wæren, den wær ich immer unbekant.'

Si sprach 'ir sult in morgen heizen her gân 7
 zuo mîner kemenâten: ich wil in hêren lân,
 wes ich mich habe berâten, wil ich im denne sagn.'
 ir wart eriteniuwet daz ir vil grœzliche klagn.

Do engert ouch nihtes mære der edel Ruedegêr, 1
niwan daz er gesæhe die küneginne hêr :
er wiste sich sô wîsen, daz er wol an getragen
môhte swaz er wolde. ir rede im muose wol behagen.

Des anderen morgens, dô man früemesse sanc, 2
die edeln boten kômen : dô wart dâ grôz gedranc.
die mit Ruedegêre ze hofe solden gân,
der sach man wol gekleidet manegen wætlîchen man.

Kriemhilt diu vil arme, diu trûec gemuot, 3
si warte Ruedegêre, dem edeln boten guot.
der vant si in der wæte, die si alle zîte truoc :
dâ bi hêt ir gesinde rîcher kleider genuoc.

Si gie im hin begegene zuo der türe stân, 4
und enpfie vil liepfliche den Ezelen man.
niwan mit zwelf gesellen man in dar in verlie.
man bôt im michel êre : ir kom ein hôher bote nie.

Man bat den herren sitzen unde sine man. 5
die zwêne marcgrâven sach man vor in stân,
Gêrn und Ecgewarten : daz schuof diu künegin.
die selben boten kunden nimmer baz gewirdet sîn.

Dô si dâ wol gesâzen und sâhen manec wîp, 6
dô pflac niwan weinens der Kriemhilde lîp :
ir wât was vor den brüsten der heizen trâhene naz.
daz sach der marcgrâve, der helt niht langer dô dâ saz.

Er sprach in grôzen zühten 'vil edel küneges kint, 7
mir und mînen geverten, di mit mir komen sint,
sult ir, frow, erlauben, daz wir für iuch stân
und sagen iu diu mære, durch waz wir her geriten hân.'

‘Nu si iu erlobet’ - sprach diu künegin - 1
 ‘ze sagen iwer mære: alsò stât mîn sin.
 sprechet swaz ir wellet, des iuch dunke guot.
 di boten an ir wol sâhen ir vil trâregen muot.

Dô sprach von Bechelâren der fürste Ruedegêr 2
 ‘dienest unde triuwe Ezel, ein küneec hêr,
 hât iu enboten, frouwe, her in ditze lant:
 er hât nâch iwer minne vil guote degene gesant.

Und enbiut iu inneclîche freude âne leit: 3
 der stâten friuntschêfte si er iu bereit
 als Helchen mîner frouwen, diu im ze herzen lac.
 ir sult nu tragen krône, der mîn frowe wilên pflac.’

Dô sprach diu küneginne ‘vil edel Ruedegêr, 4
 wær ieman der bekande diu mînen scharpfen sêr,
 der riete mir niht triuten noch deheinen man:
 wan ich vlôs ein den besten, den ie frowe mêr gewan.’

‘Waz mag ergetzen leides,’ - sprach dô der küene man - 5
 ‘wan vriuntliche liebe, swer die kan begân
 und dann der einen küuset, der im ze rehte kumet:
 für herzenliche swære niht sô græzliche frumet.

Und ruochet ir ze minnen den hôhen voget mîn, 6
 zwelf rîcher krône sult ir frowe sîn:
 dar zuo gît iu mîn herre wol drîzec fürsten lant.
 diu hât er betwungen mit sîner ellenthaften hant.

Ir sult ouch werden frouwe über manegen küenen man, 7
 die ouch mîner frouwen wâren undertân,
 und vil der schœnen mâgede, der si hête gewalt,
 und hôher recken mâge edel küene unde balt.

Dar zuo gît iu mîn herre - daz heizet er iu sagen -,
 ob ir geruochet krône bî dem kûnege tragen,
 gewalt den aller hôhsten, den Helche ie gewan,
 den sult ir gewaldeclîche hân ob allen sinen man.¹

Dô sprach diu kûneginne 'wie môhte mînen lîp
 immer des gelûsten, deich wûrde heledes wîp?
 mir hât der tût an einem sô rehte leit getân,
 des ich unz an mîn ende muoz in riwen immer stân.²

Dô sprâchen aber die Hiunen 'kûneginne rich,
 iwer leben wirt bî Ezele sô rehte lobelîch,
 daz ir des wol vergezzet, ist daz ez ergât;
 wan der kûnec rîche vil manegen zieren degen hât.³

Die mîner frowen mâgede und iwer mâgedîn,
 suln die bî ein ander ein gesinde sîn,
 dâ bî sô môhten recken werden wol gemuot.
 lât ez iu, frowe, râten: ez wirt iu wêrlîchen guot.⁴

Si sprach in ir zûhten 'nu lât die rede stân
 unze morgen frûeje: sô sult ir her gân,
 sô wil ich iu antwûrten des ir dâ habet muot.⁵
 des muosen dô gevolgen die recken kûene unde guot.

Dô si zen herbergen alle kômen dan,
 dô hiez diu frowe Kriemhilt nâch Gîselhere gân,
 und ouch nâch ir muoter: si saget in beiden daz,
 daz si gezæme weinen, unde niht anders baz.⁶

Dô sprach ir bruoder Gîselher 'swester, mir ist geseit
 und wilz ouch wol gelouben, daz elliu dîniu leit
 Ezel der kûnec swende, und nimstu in ze man.
 swaz ander iemen râte, sô dunket ez mich guot getân.⁷

‘Er mac dich wol ergetzen.’ - sprach aber Giselher - 1
 ‘vonne Roten zuo dem Rîne uf bi Elbe unz an daz mer
 sô ist ir deheiner alsô gewaltec niht:
 du maht dich freun balde, so'r dîn ze küneginne giht.’

Si sprach zuo zir bruoder ‘zwiu rætestu mir daz? 2
 klagen unde weinen mir immer zæme baz,
 wie solde ich vor recken dâ ze hove gân?
 wart mîn lîp ie schône, des bin ich âne getân.’

Uote ir beider muoter sprach ir tochter zuo 3
 ‘swaz dîne brüeder râten, vil liebez kint, daz tuo:
 nu volge dînen friunden, sô mac dir wol geschehen,
 ich hân dich doch sô lange in grôzem leide gesehn.’

Dô bat si got den rîchen füegen ir den rât, 4
 daz si ze gebene hête golt silber unde wât,
 sam bi ir êrsten manne, dô der noch was gesunt:
 si gelebt doch nimmer mêre sit sô vrêliche stunt.

Dô gedâhtes in ir sinne ‘sol ich mînen lîp 5
 gebn einem heiden - ich bin ein kristen wîp - ,
 des müese ich von der werlde grôz itewîze hân:
 geb er mir elliu rîche, sô ist ez immer ungetân.’

Dâ mite siz lie belîben die naht unz an den tac. 6
 diu frowe in vil gedanken an ir bette lac:
 diu ir vil liechten ougen wurden trucken nie,
 unze si aber den morgen hin zer mettine gie.

Ze rehter messeziute die herren wâren komen. 7
 si hêten aber ir swester under hende genomen:
 jâ rieten si ir minnen den künec ûz Hiunen lant.
 die frowen ir deheiner vil lützel vrêliche vant.

Si bâten dar gewinnen die Ezelen man. 1
 Ruedegêr der rîche biten dô began
 die frowen minneclîche, waz si nu wolde tuon:
 ob si ze manne wolde des kûnec Botelunges suon.

Si jach daz si geminnen nimmer mêre wolde man. 2
 dô sprach der marcgrâve 'daz wære missetân.
 zwiu woldet ir verderben alsô scenen lîp?
 ir muget noch mit êren werden hôhes recken wîp.'

Niht half daz si gebâten, unze Ruedegêr 3
 sprach in heinlîche die kûneginne hêr,
 er wolde si ergetzen swaz ir ie geschach.
 ein teil begundir senften ir vil unsenftez ungemach.

Er sprach 'frowe hêre, lât iwer weinen sîn: 4
 ob ir zen Hiunen hêtent niemens danne mîn,
 getriwer mîner friunde, und ouch der mînen man,
 er müeses sêre engelten, und hêt iu iemen iht getân.'

Dâ von ein teil geringet wart dô der frowen muot. 5
 si sprach 'sô swert mir, Ruedegêr, swaz mir iemen tuot,
 daz ir mir sît der nêhste, der reche mîniu leit.'
 dô sprach der marcgrâve 'des bin ich, frouwe, bereit.'

Mit allen sînen mannen swuor ir dô Ruedegêr 6
 mit triwen immer dienen, und daz die recken hêr
 ir nimmer niht versageten, ûz Ezelen lant,
 des si êre habn solde: des sichert ir Ruedgêres hant.

Dô gedâhte diu getriuwe 'sît daz ich friunde hân 7
 alsô vil gewonnen, nu sol ich reden lân
 die liute swaz si wellen, ich jâmerhaftez wîp:
 waz, ob noch wirt errochen mîns vil lieben mannes lîp?'

Si gedächte 'sit daz Ezele der recken hât sô vil, 1
sol ich den gebieten, sô tuon ich swaz ich wil.
er ist ouch wol sô rîche, daz ich ze gebene hân:
mich hât der mordær Hagene des mînen âne gar getân.' dō

Si sprach ze Ruedegere 'hêt ich daz vernomen, 2
daz er niht wære ein heiden, sô wolde ich gerne komen
daz swar er hête willen, und næme in zinem man.'
dō sprach der marcgrâve 'die rede sult ir, frowe, lân.

Ern ist niht gar ein heiden, des sult ir sicher sîn: 3
jâ was vil wol bekêret der liebe herre mîn,
wan daz er sich widere vernogieret hât.
wolt ir in, frowe, minnen, sô möhte sîn noch werden rât.

Ouch hât er sô vil recken in kristenlicher ê, 4
daz iu bî dem kûnege nimmer wîrdet wê.
ir mügt ouch lihte erwerben, daz der fürste guot
wider ze gote wendet beide sêle unde muot.'

Dō sprâchen aber ir brüeder 'lobt in, schwester mîn; 5
iwer ungemüete sult ir nu lâzen sîn.'
si gertens alsô lange, daz ir vil trûrec lîp
lobte vor den degenen, si wûrde Ezelen wîp.

Sie sprach 'ich muoz iu volgen, ih armiu kûnegîn, 6
daz ih var zen Hiunen, sô daz nu mac gesîn,
swenne ich die friunt gewinne, die mich fûeren in sîn lant.'
des bôt diu kûneginne vor den degn ir hant.

Dō sprach der marcgrâve 'habt ir zwêne man, 7
dar zuo hân ich ir mære: ez wîrdet wol getân,
daz wir iuch mit den êren bringen über Rîn.
ine lâze iuch nu niht langer hie zen Buregonden sîn.

Fünfhundert mîner manne und ouch der mâge mîn 1
 die suln iu hie dienen, und ouch dâ heime sîn
 swie ir in gebietet: ich selbe tuon alsam,
 so ir mich ermant der mære, daz ihs nimmer mich gescham.

Nu heizet iu bereiten iwer pferitkleit 2
 - die Ruedegêres ræte iu nimmer werdent leit -
 und sagetez iwern mægeden, die ir dâ fûeren welt:
 jâ kumet uns begegene vil manec ûz erwelter helt.'

Si hêten noch gesmîde, daz man dâ vor eit 3
 bî Sivrides ziten, daz si vil manege meit
 mit êren mohten fûeren, sô si wolden dan.
 hey, waz man guoter sâtele den schonen frouwen gewan.

Ob si dâ vor getrûegen deheiniu richen kleit, 4
 der wart in zuo der verte vil manegez nu bereit;
 wande in von dem kûnege sô vil gesaget wart:
 si sluzzen ûf die kisten, die ê stuonden wol bespart.

Si hêten grôz unmuoze unz an den zwelften tac: 5
 si suochten ûz den valden des vil dar inne lac.
 Kriemhilt hiez entsliezen balde ir kameren dan:
 si wolde machen rîche alle Ruedegêres man.

Si hête noch des goldes von Nibelunge lant 6
 - si wânde, ez dâ zen Hiunen teilen solde ir hant -,
 daz ez sehs hundert mære ninder kunden tragen:
 diu mære hôrte Hagene dâ von Kriemhilde sagen.

Er sprach 'sît mir Kriemhilt doch nimmer wirdet holt, 7
 sô muoz ouch hie beliben daz Sivrides golt.
 zwîu solde ich minen vinden lân sô michel guot?
 ich wâiz wol daz diu frouwe wunder mit dem schatze getuot.

Und bræhte si in zen Hiunen, ich wil gelouben daz, 1
 er wërde doch zerteilet niwan uf minen haz:
 sine habent ouch niht der rosse, die in solden tragen.
 in wil behalten Hagene, daz sol man Kriemhilde sagen.'

Dô si vernam diu mære, dô wart ir grimme leit. 2
 ez wart ouch den künegen allen drin geseit.
 si woldenz gerne wenden: dô des niht geschach,
 Rüedegêr der edele dar zuo hêrlîche sprach:

'Vil rîchiu küneginne, zwiu klaget ir daz golt? 3
 iu ist der künec Ezele in der mâze holt,
 gesehent iuch sîniu ougen, er gît iu alsô vil,
 daz irz zerteilet nimmer: des ich iu eide swern wil.'

Dô sprach diu küneginne 'vil edel Rüedegêr, 4
 ez gewan nie küneges tohter die rîcheite mêr,
 denne der mich Hagene âne hât getân.'
 dô kom der starke Gêrnôt hin zer kameren gegân.

Mit gewalt des küneges slûzzel stiez er an die tür: 5
 golt daz Kriemhilde reichte man der für.
 ze drîzec tûsent marken, oder dannoch baz,
 hiez er nemen die geste: liep was Gunthere daz.

Dô sprach von Bechelâren der Göteline man 6
 'ob ez mîn frowe Kriemhilt allez möhte hân,
 swaz sîn ie wart gefüeret von Nibelunge lant,
 sîn gerüeret nimmer marke mîn noch der küneginne hant.

Lât ez nemen, frouwe, swerz gerne haben wil. 7
 ich bræhte ûz mîme lande des mînen alsô vil,
 daz wir es uf der strâze habn guoten rât,
 und unser koste hinnen mit vollen hêrlîchen stât.'

Dâ vor in aller wile erfüllet zwelf schrîn 1
des aller besten goldes, daz inder möhte sîn,
hêten noch ir meide: daz fuorte man von dan
mit der küneginne. daz ander muosen si dâ lân.

Gewalt des übelen Hagenen der dûhte si ze starc, 2
si hêt ir opfergoldes noch wol tûsent marc:
daz teilte si der sêle irs vil lieben man.
daz dûhte Ruedegêre in grôzen triuwen getân.

Dô sprach diu frowe Kriemhilt 'wâ nu friunde mîn, 3
die durch mich ellende zen Hiunen wellen sîn,
und mit mir suln rîten in Ezelen lant?
die nemen golt daz mîne, und kaufen ros und ouch gewant.'

Des antwurte ir schiere der marcgrâve Ekkewart 4
'sît ich iwer gesinde ie von êrste wart,
'so entweich ich iu nie triuwen,' - sprach der küene degn -
'und wil iu immer dienen, die wîl wir beide lebn megn.

Ich wil ouch mit mir fûeren hundert mîner man, 5
der ich iu ze dienste wol mit triwen gan.
wir sîn ungescheiden, ez entuo der tût.
der rede neig im Kriemhilt, daz irz der helt sô wol erbôt.

Dô zôh man dar die mære: si wolden varn dan. 6
dâ wart vil michel weinen von friunden getân:
frou Uote diu guote und manec schône meit
die zeigten daz in wære nâch der küneginne leit.

Hundert schœner megede diu frowe mit ir nam: 7
die wurden sô gekleidet, als in daz wol gezam.
âf ir vil liechten bouge die trâhene vielen nider.
si gelebten vil der freude dort bî Ezelen sider.

Ir brüeder kómen beide, Giselher und Gernót, 1
mit ir ingesinde, als in ir zuht gebót:
dó wolden si beleiten ir liebe swester dan.
ouch fuorten si ir degene mit in wol tûsent küene man.

Dó kom der snelle Gère, und ouch Ortewîn, 2
Rûmolt der kuchenmeister dà mite muose sîn.
si schuofen die nahtselde der frowen ûf den wegn:
Volkêr was ir marschale; der solde ir herberge pflegen.

Nâch küssen michel weinen wart dà vil vernomen, 3
ê daz si von der bürge ze velde wâren komen.
ûz riten unde giengen die sis niene gebat:
dó reit der kûnec Gunther mit ir ein wênec für die stat.

E si von hûse fûeren, si hêten für gesant, 4
ir boten harte snelle in der Hiunen lant,
die dem kûnege sageten, daz im Rûedegêr
ze wîbe hête gewunnen die edeln kûneginne hêr.

Die boten strichen sêre: in was der reise nôt, 5
durch die grôzen ère und durch rîchiu potenbrôt.
dó si ze lande wâren mit den mæren komen,
dó hêt der kûnec Ezele nie sô liebes niht vernomen.

Durch disiu lieben mære hiez der kûnec gebn, 6
den boten solhe gâbe, daz si wol mohten leb'n
mit freuden immer mære dar nâch unze an ir tót:
mit liebe was verschwunden des kûneges kumber unde nôt.

XXI AVENTIURE

WIE KRIEMHILT VON WORMZE SCHIET, DO SI GEIN DEN
HIUNEN FUOR.

Die boten lāzen rīten und tuon iu daz erkant, 1
wie diu küneginne fuor durch daz lant,
oder wā von ir kērtē ir brüeder beide wider:
si heten ir sô gedienet, daz sis in muose danken sider.

Urloubes von ir gerte dô vil manec degen: 2
si muosen sich ze Vergen der reise hine bewegn.
dô si wider wolden rīten an den Rīn,
done mohtez āne weinen von lieben friunden niht gesīn.

Giselher der snelle sprach zer swester sīn 3
swenne daz du, frouwe, bedurfen wellest mīn,
ob dir iht gewerre, daz tuo mir bekant:
sô rīte ich dir ze dienste in daz Ezelen lant.

Die ir sippe wāren, die kustes an den munt: 4
vil minnelichen scheiden kōs man an der stunt
die snellen Burgonden von Ruedegēres man.
dô fuort diu küneginne manege magt wolgetān,

Hundert unde viere: die truogen pfāwen kleit 5
von genagelten rīchen pfellen. vil der schilde breit
man fuorte bī den frouwen nāhen ūf den wegn.
dô nam ouch urloup Volkē, der vil zierliche degn.

Dô si über Tuonouwe kômen in Beyerlant, 1
 dô wurden disiu mære witen bekant,
 daz zen Hiunen füere Kriemhilt diu künegin:
 des freute sich ir œheim, ein bischof, der hiez Pilgerin.

In der stat ze Pazzouwe was er bischof. 2
 die herberge wurden lære und ouch des fürsten hof:
 si ilten gegen den gesten ûf in Bayerlant,
 dà der bischof Pilgerin die schœnen Kriemhilde vant.

Sinem ingesinde was daz niht ze leit, 3
 daz si ir volgen sähen sô manege schœne meit:
 dà trûte man mit ougen der edeln ritter kint.
 vil rîche herberge gap man den edeln gesten sint.

Dâ ze Pledeelingen schuof man in gemach. 4
 daz volc man allenthalben zuo zin rîten sach.
 man gap in willeclîche des si bedorften dà:
 si nâmenz wol mit êren. als tet man sider anderswâ.

Diu frowe mit ir œheim ze Pazzowe reit. 5
 ez was den burgæren darinne niht ze leit,
 daz dar komen solde des fürsten swester kint:
 si wart vil wol enpfangen von den koufliuten sint.

Daz si beliben solden, der bischof hêtes wân. 6
 dô sprach der maregrâve es enmac niht ergân.
 wir müezen nider rîten in der Hiunen lant:
 uns wartet vil der degene, wande ez in allen ist bekant.

Disiu mære ouch wiste diu schœne Götelint. 7
 si bereite sich mit vlîge gein ir frowen sint.
 ir hêt enboten Ruedegêr, daz in daz dûhte guot,
 daz si der küneginne dà mite trôste den muot,

Daz si ir rite engegene mit den sinen man 1
 uf zuo der Ense. dô daz wart getân,
 dô sah man allenthalben vil unmuoze pflegn:
 durch der geste liebe si muosen ruowe sich bewegn.

Si was der nêhsten nahte ze Everdingen komen. 2
 genuoge ûz Bayerlande, solden si hân genomen
 den roup uf der strâze nâch ir gewonheit,
 sô hêten si den gesten erboten eteslichiu leit;

Daz hête wol behüetet der edel Ruedegêr: 3
 er füerte tûsent ritter unde dannoch mêr.
 dô was ouch komen Götêlint, des marcgrâven wip:
 mit ir fuor herrenliche vil maneges küenen recken lip.

Dô si über die Trûne kômen bi Ense uf daz velt, 4
 dô sah man uf gespannen hütten und gezelt,
 dà die geste solden die nahtselde hân.
 von Ruedegêres friunden wart in dienste vil getân.

Götêlint diu schœne die herberge lie 5
 hinder ir beliben: uf den wegn gie
 mit klingenden zôumen die mœre wolgetân.
 der antfanc wart vil schœne: liep was ez Ruedegêre ir man.

Di in ze bêden sîten kômen uf den wegen, 6
 die riten vroeliche: der was vil manec degen.
 si pfâgen ritterschefte: daz sach vil manec meit.
 ouch was der helededienst den schœnen frouwen niht ze leit-

Dô zuo den gesten kômen die Ruedegêres man, 7
 vil der trunzûne sach man ze berge gân
 von der recken handen mit ritterlichen sîten:
 dà wart wol ze prise vor den frouwen geriten.

Daz liezen si beliben. dô gruozte manec man vil güetlich ein ander: dô fuorten si von dan die schöenen Göteline dâ si Kriemhilde sach. die frowen dienen kunden, die muosen liden ungemach.

Der voget von Bechelâren zuo sîme wibe reit. der edeln margrâvinne was daz niht ze leit, daz er sô wol gesunder was von Rîne komen: jâ was ir vil ir sorgen mit grôzen vreuden benomen.

Dô si in hêt empfangen, er si hiez ûf daz gras erbeizen mit den frouwen, swaz ir dâ mit ir was. mit dienste was unmüezec dâ vil manec man: der wart den schöenen frouwen mit grôzem vlîze getân.

Dô sach diu küneginne hie Göteline stên mit ir ingesinde. si lie niht näher gên: daz pfârit mit dem zoume zucken si began, si bat sich heben balde nider von dem satel dan.

Den biscop sach man wîsen sîner swester kint, in und Ekkewarten, zuo Göteline sint. dâ wart vil michel wîchen an der selben stunt. dô kuste diu ellende an der margrâvinne munt.

Dô sprach vil minneclîche daz Ruedegêres wîp 'nu wol mich, liebiu frouwe, deich iuern schöenen lîp hân in disen landen mit freuden hie gesehn. mir enkunde in disen zîten nimmer lieber geschehen.'

'Nu lôn iu got,' - sprach Kriemhilt - 'vil edel Götelint. sol ich gesunt beliben und Botelunges kint, ez mag iu komen ze liebe, daz ir mich habt gesehn. in beiden was unkunde daz sîder muose geschehn.'

Mit zühten zuo zein ander si sâzen uf den klê. 1
 die gerne frowen sâhen, den was dâ niht ze wê:
 ir stiezü ougenweide brâht in hôhen muot,
 den wîben sam den mannen, als ez noch vil dicke tuot.

Man hiez den gesten schenken: ez was wol mitter tac. 2
 daz edel ingesinde dâ niht langer lac;
 si riten dâ si funden vil manege hütten breit.
 dâ was den werden gesten vil grôziu wirtschaft bereit.

Die naht si hêten ruowe unz an den morgon fruo. 3
 die von Bechelâren bereiten sich dar zuo,
 wie si behalden solden vil manegen werden gast:
 wol hêt geschaffen Ruedegêr, daz in vil wêneç iht gebrast.

Diu venster an den müren sah man offen stân: 4
 diu burc ze Bechelâren diu was uf getân.
 dar in riten geste, die man vil gerne sach:
 den hiez der wirt vil edele schaffen richen gemach.

Diu Ruedegêres tohter mit ir gesinde gie 5
 dâ si die küneginne vil minnelich enpfie:
 dâ bi was ouch ir muoter, des marcgrâven wip.
 mit liebe wart gegrüezet vil maneger juncfrowen lip.

Sie viengen sich bi henden unde giengen dan 6
 in einen palas wîten, der was vil wolgetân,
 dâ die Tuonouwe unden hine vlôz.
 si sâzen gegen dem lufte und hêten kurzewile grôz.

Wes si nu mêre pflâgen, des enkan ich niht gesagn. 7
 daz in sô übele zogete, daz hôrte man dô klagen
 die Kriemhilde recken, wandez was in leit.
 hey, waz guoter degene mit ir von Bechelâren reit!

Vil minneclichen dienest der maregräve in bôt. 1
 dô gab diu küneginne zwelf pouge rôt
 der Götlinde tochter, und alsô guot gewant,
 daz si niht bezzers brâhte in daz Etzelen lant.

Swie ir genomen wære der Nibelunge golt, 2
 alle die si gesâhen, die machte si ir holt
 noch mit dem kleinem guote, daz si dô mohte hân:
 des wirtes ingesinde wart michel gâbe getân.

Dâ widere bôt dô ère diu frowe Götelint 3
 den gesten von dem Rîne sô minnecliche sint,
 daz man dô der fremden harte wêneç vant,
 sine trûegen ir gesteine oder ir vil hêrlich gewant.

Dô si enbizzen wâren und daz si solden dan, 4
 von der hûsfrouwen wart geboten an
 getriwelficher dienest daz Etzelen wîp:
 dô wart ouch vil getriutet der schœnen juncfrowen lîp.

Si sprach zer küneginne 'swenne iuch nu dunket guot, 5
 ich weiz wol daz ez gerne mîn lieber vater tuot,
 daz er mich zuo ziu sendet in der Hiunen lant.
 daz si ir getriwe wære, vil wol daz Kriemhilt ervant.

Diu ros bereitet wâren für Bechelâren komen: 6
 ouch hêt diu küneginne urloup nu genomen
 von Ruedegêres wibe und von der tochter sîn:
 dô schiet ouch sich mit gruoze vil manec schœne magedin.

Ein ander si vil selten gesâhen nâch den tagen. 7
 ûzer Medeliche ûf handen wart getragen
 manec goltvaz rîche, dar inne brâht man wîn
 den gesten uf die strâze, und bat si willekomen sîn.

Ein wirt was dà gesezzen, Astolt was der genant : 1
 der wiste si die stráze nider in Osterlant
 gegen Mútären die Tuonowe nider.
 dà wart vil wol gedienet der ríchen küneginne sider.

Der bischof minnedliche von sîner nifteln schiet : 2
 daz si den künec bekêrte, wie vast er ir daz riet,
 und daz si ir ère koufte sam Helche hêt getân!
 hey, waz si grôzzer èren sît dà zen Hiunen gewan.

Zuo der Treysen brâhte man die geste dan. 3
 ir pflâgen vlîezeliche die Ruedegêres man,
 unze daz die Hiunen riten über lant.
 dô wart der küneginne vil michel ère bekant.

Bi der Treysen hête der künec von Hiunen lant 4
 eine burc vil ríche, diu was wol bekant,
 geheizen Treysenmûre. frou Helche saz dà ê,
 und pflac sô grôzzer tugende, deiz wætlich nimmer mêr ergê,

Ezen tæte danne Kriemhilt, diu alsô kunde gebn, 5
 si mohte nâch ir leide daz liep vil wol gelebn,
 daz ir jâhen ère die Etzelen man,
 der si sît grôzzen vollen bî den helden gewan.

Diu Etzelen hêrschaft was sô wit erkant, 6
 daz man zallen zîten in sime hofe vant
 die aller besten recken, von den ie wart vernomen
 under kristen unde heiden : die wâren gein der briute komen.

Bi im was zallen zîten, daz wætlich mêr ergê, 7
 kristenlicher orden und ouch der heiden ê.
 in swie getânem lebene sich ieslicher truoc,
 daz schuof des küneges milte daz man allen gap genuoc.

XXII AVENTIURE

WIE KRIEMHILT UND EZELE BRUTEN IN DER STAT ZE
WIENNE.

Si was ze Treysenmüre unz an den vierden tac. 1
diu molte ouf der strāze die wile nie gelac,
sine stūbe, sam ez brünne, allenthalben dan,
dā riten durch Osterriche des künec Ezelen man.

Dō wāren ouch dem küneger diu mære nu geseit, 2
des im von gedanken swunden sīniu leit,
wie herrenlichen Kriemhilt dā kœme durch diu lant:
er begunde vaste gāhen dā er die minneclichen vant.

Von vil maneger sprāche sah man uf den wegn 3
vor Ezelen riten vil manegen künenen degen:
kristen unde heiden, vil manec wītiu schar,
dā si ir frowen funden, si fuoren vroelichen dar.

Von Riuzen und von Kriechen reit dā vil manec man: 4
Pōlānen unde Vlāchen den sah man ebene gān
ir pfert und ros diu guoten dā si mit kreften riten.
swaz si site habeten, der wart vil wēnec iht vermiten.

Von dem lande ūz Kyewen reit ouch dā manec man, 5
und die wilden Pescenære. dā wart des vil getān,
mit den bogen schiezen zen vogelen die dā flugen:
ir pfīle si vil sere mit kraft unz an die wende zugen.

Ein stat bi Tuonouwe lit in Osterlant, 1
 diu ist geheizen Tulme: dâ wart ir sit bekant
 vil manec sitê vremde, den si nie dâ vor geschach.
 si enpfingen dâ genuoge, den leide sit von ir geschach.

Vor Ezele dem rîchen ein gesinde reit, 2
 vrô in hôhem muote, hobesch und ouch gemeit,
 wol vier und zweinzec fürsten, rich unde hêr:
 daz si ir frowen sâhen, dâ von negerten si niht mêr.

Der herzoge Râmunc ûzer Vlâchen lant, 3
 mit sibenhundert mannen kom er für si gerant:
 sam die wilden vogele sô sah man si varn.
 dô kom der fürste Gibeche mit vil hêrlîchen scharn.

Hornboge der snelle wol mit tûsent man 4
 kêrte vonne kûnege gein sîner frowen dan.
 vil lûte wart geschallet nâch des landes siten:
 von der Hiunen mâgen wart ouch dâ sêre geriten,

Dô kom von Tenemarke der kûene Hâwart 5
 und Irinc der starke, vor valsche wol bewart,
 und Irnfrit von Dûrengen, ein fürste lobesam:
 die enpfingen Kriemhilt, als ez ir êren wol gezam,

Mit zwelf hundert mannen, die hêtens in ir schar. 6
 ouch kom der herre Blœdelîn mit tûsent helden dar,
 der Etzelen bruoder, ûz der Hiunen lant:
 der îlte mit den sinen dâ er die kûeginne vant.

Dô kom der kûnec Ezele und ouch her Dietrich 7
 mit allen sinen degenen. dâ was vil lobelîch
 manec ritter edele, biderb unde guot:
 des wart der kûeginne ein teil gesenftet der muot.

Dô sprach von Bechelâren der herre Ruedegêr 1
 'frowe, iuch wil enpfâhen hie der künec hêr.
 swen ich iu râte küssen, daz sol sîn getân :
 jane mugt ir niht geliche grüezen alle's küneges man.'

Dô huop man von dem mære die küneginne hêr. 2
 Ezele der rîche enbeite ouch dô niht mêr ;
 er stuont von sînem rosse mit manegem küenen man :
 man sah in vrœliche gein Kriemhilde gân.

Zwêne fürsten rîche, als uns daz ist geseit, 3
 bi der frowen giengen und habten ir diu kleit,
 dô ir der künec Ezele hin begegene gie,
 dâ si den fürsten edele mit kusse gütlich enpfie.

Uf rihte si ir gebende : ir varwe wolgetân 4
 diu lâhte ir ûzem golde. dâ stuont vil manec man ;
 die jâhen daz frou Helche niht schœner künde sîn.
 dâ bi stuont vil nâhen des wirtes bruoder Blædelîn.

Den hiez si küssen Ruedegêr, der marcgrâve rîch, 5
 und den künec Gibechen : dâ stuont ouch her Dietrîch.
 der recken kuste zwelfe daz Ezelen wip.
 do enpfie si sus mit gruoze vil maneges küenen recken lip.

In der selben wile und Ezele bi ir stuont, 6
 dô gebârtan dâ die tumben, sô noch die liute tuont :
 vil manegen puneyz langen sah man dâ geriten.
 daz tâten kristen degene und ouch die heiden nâch ir siten.

Wie rehte hurteclîchen die Dietrîches man 7
 die schefte liezen vliegen mit trunzûnen dan
 vil hôhe über schilde von guoter ritter hant !
 die si dâ gerne sâhen, die wurden schiere bekant.

Dâ wart von schefte brechen vil michel krach vernomen. 1
 dô wâren von dem lande die recken alle komen
 und ouch des küneges geste, vil manec edel man:
 dô gie der künec rîche mit der küneginne dan.

Si sâhen bî in stênde ein vil hêrlîch gezelt: 2
 von hütten was erfüllet al umbe gar daz velt,
 dô si under solden ruowen nâch ir arebeit.
 von helden wart gewîset vil manec wêtlîchiu meit

Mit Kriemhilde dannen, dô si sît gesaz 3
 ûf rîche gesidele: der marcgrâve daz
 hête sô geschaffen, daz man ez vant vil guot.
 dô stuont dem kûnege Ezelen harte hôhe der muot.

Waz si ze samne redeten, daz ist mir unbekant; 4
 wan zwischen sînen handen was ir wîziu hant:
 si gesâzen minneclîche, dô Rûedegêr der degen
 den künec niht lâzen wolde der frowen heinlîche pflegen.

Dô hiez man lân belîben den buhurt ûberal: 5
 mit êren wart verendet dô der grôze schal.
 dô giengen zuo den hütten die Ezelen man:
 man gab in herberge vil wîten allenthalben dan.

Den âbent zuo der nahte si hêten guot gemach, 6
 unz man den lichten morgen aber schînen sach.
 dô was gesatelet Ezelen und allen sînen man:
 vil maneger kurzewîle man im zen êren dô began.

Der künec ez lobelîche die Hiunen schaffen bat. 7
 dô riten si von Tulme ze Wiene zuo der stat.
 dô was vil wol gezieret vil maneger frowen lîp:
 si enpfîngen wol mit êren des künec Ezelen wîp.

Mit vil grözem vollen sô was in bereit
 swaz si haben solden. vil manec helt gemeit
 entrusten riche sätele, die Ezelen man.
 sich huop mit grözen êren des küneges hōchgeziten an.

Sine mohten niht beliben ze Wiene in der stat:
 die niht geste wāren, Rūdegêr die bat
 von der bürege dannen herbergen in daz lant.
 ich wæn man alle zīte bī frowen Kriemhilde vant

Den herren Dietrichen und anders manegen degn:
 si hēten sich der ruowe mit arebeite bewegn,
 durch daz si den gesten getrōsten wol den muot.
 der künec mit sinen friunden hēte kurzewile gut.

Diu hōchzit was gevallen an einen pfinxtag,
 dô der künec Ezele bī Kriemhilde lac
 in der stat ze Wiene. si wæn sô manegen man
 bī ir êrsten vriedel nie ze dienste gewan.

Si kunte sich mit gābe dem der sie nie gesach:
 vil maneger darunder zuo den gesten sprach
 'wir wānden, daz frou Kriemhilt niht guotes mōhte hān:
 nu ist hie michel wunder von ir gābe getān.'

Diu hōchgezit dô werte wol sibenzehn tage,
 ob künec ie deheiner, mit wārheit oder nāch sage,
 deheine grōezer gewünne, daz ist uns gar verdeit.
 alle di dā wāren, die truogen iteniwe kleit.

Si wæn in Niderlanden dā vor nie gesaz
 mit sô manegem recken: dā von geloube ich daz,
 was Sivrit rich des guotes, daz er doch nie gewan:
 sô manegen recken edelen, als si zen Hiunen mohte hān.

Ouch gab ir nie deheiner zuo sîn selbes hôchgezît 1
 sô manegen rîchen mantel, lanc tief und wît,
 noch sô rîcher kleider, der si vil mohten hân,
 sô si durch Kriemhilde alle hêten hie getân.

Die kunden und die geste die hêten einen muot, 2
 daz si dà niht sparten deheiner slahte guot.
 swes ieman an si gerte, daz gâben si bereit:
 des stuont dà vil der degene von milte blôz âne kleit.

Wie si ze Rîne sæge, si gedâht an daz, 3
 bî ir vil edelem manne; ir ougen wurden naz,
 si hêtes vaste hæle, deiz iemen kûnde sehn;
 ir was nâch manegem leide sô vil der êren hie geschehen.

Swaz iemen tet mit milte, daz was gar ein wint 4
 unz an Dietrîchen: swaz Botelunges kint
 im gegeben hête, daz was gar verswant.
 ouch tet dà michel wunder des milten Ruedegêres hant.

Uzer Ungerlande der fürste Blædelîn 5
 der hiez dà machen lære vil manegiu leitschrîn
 von silber und von golde; daz wart gar hin gegeben:
 man gesach nie kûneges degene sô rehte vrœliche lebn.

Swemmel unde Werbel, die Ezelen spileman, 6
 ich wæn ir ieslicher zer hôchzît dà gewan
 wol ze tûsent marken oder dannoch baz,
 dà diu frowe Kriemhilt bî Ezelen under krône saz.

An dem ahtzehenden morgen von Wiene si dô riten. 7
 dà wart in ritterschefte schilde vil versniten
 von spern diu dà fuorten die recken an der hant.
 sus kom der kûnee Ezele mit freuden in der Hiunen lant.

Ze Heimbure der alten si wären über naht. 1
 done kunde niemen wizzen wol des volkes aht,
 mit wie getäner krefte si riten durch daz lant:
 hey, waz man schœner frouwen in ir heimüete vant!

Ze Miesenburg der rîchen dâ schiften si sich an: 2
 daz wazzer wart verdecket von ros und ouch von man,
 sam ez erde wære, swaz man sin übersach.
 die wegemüede frouwen hêten senfte und ouch gemach.

Ze samne was gebunden manec schif vil guot, 3
 daz in niht schaden kunde die ûnden noch diu fluot:
 dar über was gespannen vil manec guot gezelt,
 sam ob si noch hêten bêdiu lant unde velt.

Ze Ezelen bürge diu mære kômen dan: 4
 dô freuten sich dar inne wîb unde man.
 daz Helchen ingesinde, des ê diu frowe pfac,
 gelebte bi Kriemhilde sît manegen frœlichen tac.

Dô stuont in lieber warte vil manec edel meit, 5
 die von Helchen tôde hêten manegiu leit:
 siben kûnege tôchter Kriemhilt noch dâ vant;
 von den was wol gezieret allez Ezelen lant.

Diu juncfrowe Herrât noch des gesindes pfac, 6
 diu Helchen swester tochter, an der vil tugende lac,
 diu gemahle Dietriches, eins rîchen kûneges kint,
 diu tochter Nântwînes: diu hête vil der êren sint.

Von der geste künfte sô trôste sich ir muot, 7
 ouch was dar zuo bereitet vil krefteclîchez guot.
 wer künde iu daz bescheiden, wie sît der kûnec saz?
 sine gelebten dâ zen Hiunen mit deheiner kûneginne baz.

Dô der wirt mit sime wibe von dem stade reit, 1
 wer ieslichiu ware daz wart zehant geseit
 der edeln küneginne: si gruoꝗtes deste baz.
 hey, wie gewaltecliche si sit an Helchen stat gesaz!

Mit triwen hôher dienste wart ir vil bekant. 2
 dô teilte diu frouwe Kriemhilt golt und ouch gewant,
 silber und gesteine: swaz si des über Rîn
 mit ir zen Hiunen brâhte, daz muose gar zerteilet sîn.

Ouch wurden ir mit dienste sider undertân 3
 al des küneges mâge und alle sine man,
 daz nie diu frowe Helche sô waldeclich gebôt,
 sô si nu muosen dienen unz an den Kriemhilde tôt.

Dô stuont mit solhen êren der hof und ouch daz lant, 4
 daz man dâ zallen ziten die kurzewile vant,
 swar nâch ieslichem daz herze truoc den muot,
 durch des küneges liebe und ouch die küneginne guot.

XXIII AVENTIURE

WIE DER KÛNEC EZELE UND DIU FROWE KRIEMHILT
 NACH IR FRIUNDEN ZE WORMEZ SANDEN.

In alsô hôhen êren, daz ist alwâr, 5
 si wonte bi dem künege unz in daz sibende jâr:
 di zit diu küneginne eines sunes was genesen;
 des kûnde der kûnec Ezele nimmer vrœlicher gewesen.

Sine wolde niht erwinden, sine wërbe sint 1
 daz getoufet wërde daz Ezelen kint
 nâch kristenlichem rehte : Ortliep wart ez genant.
 si woldenz hân ze herren über elliu Ezelen lant.

Swaz ie guoter tugende an froun Helchen lac, 2
 des vleiz sich frou Kriemhilt dar nâch vil manegen tac :
 die site si lêrte Herrât, diu ellende meit,
 diu hête tougenlîche nâch ir frowen grôziu leit.

Die fremden und die kunden die jâhen dâ zehant, 3
 daz nie milter frouwe besæze ein küneges lant,
 noch deheiniu tiurer lebte ; des jach man ir für wâr :
 si erwarp ir lop vil grôzen zen Hiunen in daz zwelfte jâr.

Si hete nu wol erkunnen, daz ir niemen widerstuont, 4
 als ez noch fürsten wibe küneges recken tuont,
 und daz si alle zite zwelf künege vor ir sach.
 dô gedâhtes maneger leide, der ir dâ heime geschach.

Sie gedâht ouch maneger êren von Nibelunge lant, 5
 der si dâ was gewaltec und die ir Hagenen hant
 mit Sivrides tôde hête gar benomen :
 si gedâht, ob im daz immer noch ze leide môhte komen.

Si wunschte daz ir muoter wære in Hiunen lant : 6
 ir troumte daz ir Gîselher gienge an der hant
 bî Ezele dem künege ; si kusten zaller stunt
 vil dicke in senftem slâfe. sit wart in arebeiten kunt.

Sine kunde ouch nie vergezzen, swie wol ir anders was, 7
 ir starken herzen leide : in ir herzen si ez las
 mit jâmer zallen stunden, daz man sit wol bevant.
 dô begunde ir aber salwen von heizen trahen ir gewant.

Ez lac ir an dem herzen spät unde fruo, 1
 wie man si âne schulde brâhte der zuo,
 daz si muose minnen einen heiden man:
 daz hêt ir friunt Hagene und ouch Gunther getân.

Daz si daz rechen môhte, des wunschtes alle tage. 2
 'ich bin nu wol sô rîche, swem ez ouch missehage,
 daz ich wol minen vînden mac gefüegen leit:
 des wâr et ich von Tronege Hagene gerne bereit.

Nâch den getriwen jâmert dickez herze mîn: 3
 die mir dâ leide tâten, môht ich bi den gesîn,
 sô wûrde noch errochen mînes mannes lîp;
 des ich vil kûme erbîte.' sprach daz jâmerhafte wîp.

Ze liebe si dô hêten alle skûneges man, 4
 die Kriemhilde recken: daz was wol getân.
 der kamern der pflac Ekkewart, dâ von er friunt gewan.
 den Kriemhilde willen mohte niemen verstan.

Si gedâhte zallen zîten, si wolden kûnec biten, 5
 daz er ir des gûnde mit gûetlichen siten,
 daz man ir friunde brâhte in der Hiunen lant:
 den argen willen niemen an frown Kriemhilt ervant.

Dô si eines nahtes bi dem kûnege lac, 6
 mit armen umbevangen, als er vil dicke pflac
 die edelen frowen triuten - si was im sô der lîp -,
 dô gedâhte an ir vînde daz vil hêrlîche wîp.

Si sprach zuo dem kûnege 'vil lieber herre mîn, 7
 ich wolde iuch biten gerne, môht ez mit fuoge sîn,
 daz ir mich sehn liezet, wie ich hête daz versolt,
 ob ir minen friunden wâret inneclîchen holt.'

Dô sprach der künec rîche - getriwe was sîn muot - 1
 'ich bringe iuch des wol innen, swâ lieb unde guot
 den helden widerfüere des mûes ich freude hân;
 wande ich von wîbes minne bezzer friunde nie gewan.'

Dô sprach diu küneginne 'iu ist daz wol geseit, 2
 ich hân vil hôher mâge; darumbe ist mir sô leit,
 daz mich die sô selten ruochent hie gesehn:
 ich here mîn die liute niwan für ellende jehn.'

Dô sprach der künec Ezele 'vil liebiu frowe mîn, 3
 diuhtez si niht ze verre, sô ladet ich über Rîn
 swelh ir dâ gerne sæhet her in mîniu lant.'
 diu rede ir wol behagete, dô si den willen sîn ervant.

Si sprach 'welt ir mir triuwe leisten, herre mîn, 4
 sô sult ir boten senden von uns über Rîn:
 so enbiute ich mînen mâgen des ich dâ habe muot:
 sô kumt uns her ze lande vil manec edel ritter guot.'

Er sprach 'swenne ir gebietet sô lâzet ez gescehn. 5
 irn dorftet iwer friunde nie sô gerne sehn,
 als ich hie gesæhe der edeln Uoten kint:
 mich mûet daz harte sere, daz si uns sô lange fremde sint.

Er sprach 'ob du ez râtest, vil liebiu frowe mîn, 6
 di mîne videlære nâch den friunden dîn
 wil ich ze boten senden in Burgonden lant.'
 die Ezelen videlære hiez man bringen sâ zehant.

Die knappen kômen beide dâ ir herre saz 7
 bî der küneginne: der künec in sagte daz,
 si solden boten werden in sîner friunde lant.
 dô hiez man in bereiten harte schiere guot gewant,

Und ir vartgesellen, vier und zweinze man, 1
 di mit in varn solden zen Burgonden dan.
 in tet der künec Ezele kunt den willen sîn,
 wie si laden solden Gunthern mit den friunden sîn.

Dô sprach der künec rîche 'ich kündiu mînen muot. 2
 ich enbiute mînen friunden lieb und allez guot,
 daz si geruochoen rîten her in mîniu lant;
 ich hân sô lieber geste harte selten noch bekant.

Und ob si mînes willen wellen iht begân, 3
 die mîne konemâge, daz si des niht lân,
 sine komen mir ze liebe zuo mîner hôchgezit;
 wande vil der mînen wünne an mîner frowen mâgen lît.'

Dô sprach der knappen einer, der hiez Swämmelin, 4
 'benennet uns diu hôchgezit: wenne sol diu sîn,
 daz mîner frowen friunde dar zuo mûgen komen?'
 des wart der küneginne ir leides harte vil benomen.

Dô sprach der künec hère 'die mînen hôchgezit 5
 sult ir ze Rîne künden - daz ir gewis des sit -:
 ze nêhsten sunêwenden sô wil ich si hân.
 die uns mit triwen minnen, daz si die reise niht enlân.'

'Wir tuon swaz ir gebietet.' sprach dô Wârbelin. 6
 in ir kemenâten bat si diu künegin
 bringen tougenlîchen, dâ si die boten sprach.
 dâ von sit manegem degene harte leide geschach.

Si sprach zen boten beiden 'ir dienet michel guot, 7
 ob ir mînen willen tougenlîchen tuot;
 sô sagt, swaz ich enbiete, heim in unser lant:
 ich mache iuch guotes rîche und gibe iu hêrlîch gewant.

Swaz ir der mînen frunde immer müget gesehn 1
ze Wormze bi dem Rîne, den sult ir niht verjehn,
daz ir nôch ie gesehet betrüebet mînen muot,
und saget mînen dienest den heleden kûen unde guot.

Bitet daz si leisten daz in der kûnee enbôt, 2
und mich dâ mite scheiden von aller mîner nôt:
die Hiunen mugen wânen, deich âne frunde si:
ob ich ein ritter hieze, ich wær in eteswenne bi.

Ir saget ouch Gêrnôte, dem lieben bruoder mîn, 3
daz im zer werlde niemen holder müge sîn:
und bitte in daz er füere mit im in ditze lant
die unser besten frunde, deiz uns zen êren si gewant.

Und sagt ouch Giselhere, er denke wol daran, 4
daz ich von sînen schulden nie leides niht gewan:
des sâhen in vil gerne hie diu ougen mîn;
daz woldê ich immer mêre hînz im dienende sîn.

Nu sagt ouch mîner muoter die êre diê ich hân — 5
und ob von Tronege Hagene welle dort bestân,
wer si danne solde wîsen durch diu lant?
dem sint die wêge von kinde hêr zen Hiunen wol bekant.

Die boten niene wessen, wâ von daz was getân, 6
daz Hagene der kûene solde niht bestân
hinder in bi Rîne, daz wart in sider leit:
mit im was manegem degene zem grimmen tôde widerseit.

Boteschaft und briewe, daz was nu gegeben, 7
si fuoren guotes rîche, und mochten schône lebên.
urloup gab in Ezele, und ouch des kûneges wip.
in was mit rîcher wæte vil wol gezieret der lip.

Dô der künec Ezele von im gesande 1
 sine boten zuo dem Rîne, von manegem lande
 brâht er vil der recken zuo sîner hôchgezît,
 der deheiner nimmer mære kom zuo sîne lande sit.

XXIV AVENTIURE

WIE DIE BOTEN ZE RINE QUAMEN UND WIE SI DANNE
 SCHIEDEN.

Die boten dannen fuoren über Hiunen lant 2
 zuo den Burgonden: dar wâren si gesant
 nâch drin edeln künegen und ouch nâch ir man;
 die solden komen Ezelen: des man gâhen dô began.

Hinze Bechelâren kômen si geriten: 3
 dâ diene man in gerne, daz wart niht vermiten.
 sîn dienst enbôt dô Ruedegêr und ouch Götelint
 bî in hin ze Rîne, und ouch des maregrâven kint.

Sine liezens âne gâbe von in niht scheiden dan, 4
 daz deste baz gefüeren die Ezelen man:
 Uoten und ir kinden enbôt dô Ruedegêr,
 sine hêten in sô wæge deheinen marcgrâven mër.

Si enbuten ouch Prûnhilde dienest unde guot, 5
 triwe unde minne, und willigen muot.
 dô si die rede gehôrten, die boten muosen varn:
 si bat diu marcgrâvinne got von himele bewarn.

E daz die boten kômen vol durch Bayerlant, 1
 Wârbel der vil snelle den guoten bischof vant.
 waz der dô sînen friunden hinze Rîne enbôt,
 daz ist mir ungewîzzen; niwan sîn golt alsô rôt

Daz gab er in ze minne: rîten er si lie. 2
 dô sprach der bischof Pilgerîm 'solde ich si sehen hie,
 mir wære wol ze muote, die swester süne min:
 ich mac leider selten zuo zin komen an den Rîn.'

Welhe wege si fûeren ze Rîne durch diu lant, 3
 des enkan ich niht bescheiden: ir golt und ir gewant
 daz ennam in niemen: man vorht ir herren haz.
 Ezel was vil gewaltec: man erkande in allen landen daz.

Inre tagen zehenen si kômen an den Rîn, 4
 ze Wormze zuo der veste, Wârbel und Swâmmelin.
 dô sagte man diu mære den kûnegen und ir man,
 dà kômen boten vremde. Gunther vrâgen dô began.

Dô sprach der vogt von Rîne 'wer tuot uns bekant 5
 von disen vremden recken, die komet in daz lant?'
 daz enwesse nieman, unze si gesach
 Hagene der küene: der helt zuo Gunthere sprach:

'Uns komet niwe mære, des wil ich iu verjehn: 6
 die Ezeln videlære die hân ich hie gesehn.
 si hât iwer swester gesendet an den Rîn:
 durch die Ezelen liebe si suln uns willekomen sîn.'

Si rîten vil bereite für den palas dan: 7
 ez gefuoren herrenlicher nie fürsten spileman.
 des kûneges ingesinde enpfie si sâ zehant:
 ir ros man herbergen und hiez behalten ir gewant.

1
Ir reisekleider wâren rich und sô getân,
 daz si mit êren mohten für den künec gân:
 der enwolden si niht mêre dà ze hove tragn;
 obs iemen nemen wolde, die boten hiezen daz sagn.

2
 In der selben mâze man ouch liute vant,
 die ez vil gerne nâmen: den wart ez gesant.
 dô leiten an die geste verre rîcher wât,
 als ez boten küneges ze tragen hêrlîchen stât.

3
 Dô gie mit urloube dà der künec saz
 daz Ezelen gesinde: vil gerne sah man daz.
 Hagene von den sedele gein den boten spranc
 und lief in engene: des sagten im die knappen danc.

4
 Durch diu kunden mâere vrâgen er began,
 wie sich gehabte Ezele und ouch sîne man.
 dô sprach der videlære 'daz lant gestuont nie baz,
 noch sô vrô die liute: ich sag iu endecliche daz.'

5
Er brâhtes zuo dem wirte. der palas der was vol.
 do enpfie man die geste, sô man von rehte sol
 minneclîche grûezen in ander kûnege lant.
 Swâmmel vil der degene dà bi Gunthere vant.

6
 Der künec gezogenlîche grûezen si began:
 'sît willekomen beide, ir Ezelen spileman
 und iwer hergesellen. wes hât iuch her gesant
 der künec von den Hiunen zuo der Burgonden lant?'

7
 Mit zuht si nigen beide: dô sprach Wârbelîn
 'iu enbiutet sînen dienest der liebe herre mîn,
 und Kriemhilt iwer swester, her in ditze lant.
 si habent uns iu heleden in grôzen triwen her gesant.'

Dô sprach der fürste rîche 'der mâere bin ich vrô. 1
wie gehabt sich Ezele?' - sô sprach der kûneec dô -
'und Kriemhilt mîn swester ûzer Hiunen lant?'
dô sprach der videlære 'diu mâere tuon ich iu bekant.

Sich gebabten kûnege - ir sult wol wizzen daz - 2
in deheinem lande vrœlicher noch baz:
und allez ir gedigene, die mâge und ouch ir man,
si freuten sich der reise, dô wir schieden von in dan.'

'Gnade sîner dienste, die er mir enboten hât, 3
und ouch mîner swester: mir ist liep deiz alsô stât,
daz si sô lebnt mit vreuden, der kûneec und sîne man;
wande ich doch der mâere gevârget sorgende hân.'

Die zwêne jungen kûnege wâren ouch nu komen, 4
wande si diu mâere hêten êrst vernomen.
durch ir swester liebe die boten gerne sach
Giselher der junge, der zuo zin gûetlichen sprach

'Ir boten soldet grôze uns willekomen sîn, 5
ob ir dicker woldet zuns rîten an den Rîn:
ich wæn ir friunde fûndet, die ir gerne môhtet sehen.
iu solde von uns degenen lûtzeln leides gescehn.'

'Wir getrowen iu aller êren:' - sprach dô Swâmmelîn - 6
'ine kûnd iu niht bewâren mit den sinnen mîn,
wie minnelich iu Ezele her enboten hât
und iwer edeliu swester, der dinc in hôher werde stât.

Gnade unde triuwe mant iuch des kûneges wîp, 7
und daz ir ie was wæge iwer herze und iwer lip:
und ze vorderst dem kûnege sîn wir her gesant,
daz ir geruochet rîten zuo zin in der Hiunen lant.

Ez sol ouch mit iu rîten der herre Gêrnôt. 1
 Ezele der rîche iu allen daz enbôt,
 ob ir iuch iwer swester niht sehn woldet lân,
 sô wolde er gerne wîzzen, waz er iu recken hête getân,

Daz ir alsô vremdet in und sîniu lant: 2
 ob iu diu kûneginne wære nie bekant,
 sô môht er doch verdienen, daz ir in ruochet sehn.
 swenne daz geschæhe, sô wær im liebe geschæhn.

Dô sprach der kûnec Gunther 'nu lât die rede stân, 3*
 und vart ze herbergen: ich wil iuch heren lân
 in disen siben nahten, wil ich in sîn lant,
 swes ich mich berâte, diu mære tuon ich iu bekant.

Dô sprach der bote Wârbel 'kûnde daz geschehen, 4*
 daz wir mîne vrouwen môhten ê gesehen,
 Uoten di vil rîchen, ê wir schüefen uns gemach?'
 Gîselher der edele dô vil zûhteclîchen sprach

'Daz ensol iu niemen wenden: welt ir für si gân, 5*
 dô habt ir mîner muoter willen an getân;
 wand sie sihet iuch gerne durch di swêster mîn
 und durch den kûnec Ezele: des sult ir âne zwîfel sîn.'

Gîselher si brâhte dô sîn muoter saz. 6*
 si sach di boten gerne, mit triwen tet si daz.
 si gruozte si mit tugenden, wan si was wolgemuot:
 jâ dûhten si diu mære von der kûneginne guot.

'Mîn vrowe iu here enbiutet' - sô sprach Swâmmelîn - 7*
 'ir dienst in grôzen triuwen, des sult ir sicher sîn.
 daz ir ir sît sô vremde, daz heizet si iu [klagen:
 des muoz si herzenswære dicke in ir] muote tragen:

Dô sprach diu küneginne 'des enmac niht gesin :
 swie gerne ich dicke sæhe di lieben tohter min,
 so ist leider mir ze verre des edeln küneges wip.
 nu sin immer sælec beide si und Ezeln lip.

Ir sult mich lâzen wizzen ê daz ir rûmet hie,
 wenne ir rîten wellet : ine gesach sô gerne nie
 boten in langen zîten denne ich iuch hân gesehen.
 di knappen ir dô lobten, daz si daz liezen geschehen.

Zen herbergen fuoren di von Hiunen lant :
 dô hêt der künec rîche nâch friunden sin gesant.
 Gunther der vil edele vrâgte sine man,
 wi in diu rede behagete : vil maneger râten dô began,

Er rite wol mit êren in künec Ezelen lant :
 daz rieten im di besten, di er dar under vant,
 niwan Hagen al eine : dem was ez grimme leit.
 er sprach zem künège tougen 'ir habt iu selben widerseit.

Nu ist iu doch gewizzen, waz wir hân getân ;
 des muge wir immer sorge ûf Kriemhilden hân :
 ouch sluoc ich ze tôde ir man mit mîner hant.
 wie getôrste wir gerîten in des künec Ezeln lant?'

Dô sprach der künec rîche 'mîn swester lie den zorn
 mit kusse minnelîche : si hât ûf uns verkorn
 daz wir ir ie getâten, ê daz si hinnen reit ;
 ezen si et, Hagene, danne iu einem von ir wider seit.'

'Nu lât iuch niht betriegen' - sprach Hagene - 'swes sijehen,
 di boten von den Hiunen. welt ir Kriemhilde sehen,
 ir mugt dà wol verliesen iwer êre und iwers lip :
 ez ist vil lanræche des rîchen künec Ezelen wip.'

Dô sprach zuo dem râte der fürste Gêrnôt 1*
 'ob ir nu von schulden forhtet den tôt
 in hiunischen rîchen, solden wir ez dar durch lân
 wir ensæhen unser swester, daz wære zagelîch getân.'

Dô sprach der herre Gîselher zuo dem degene 2*
 'sit ir iuch schuldec wîzzet, friunt her Hagene,
 sô sult ir hie belîben und iuch vil wol bewarn,
 und lâzet, die geturren, mit uns zuo den Hiunen varn.'

Dô begunde zürnen von Tronege der degene 3*
 'ine wil daz ir iemen fûeret uf den wegen,
 der mit iu türre rîten hin ze hove baz:
 sit ir niht welt erwinden, ich lâze iuch wol versuochen daz.

Dô sprach der kuchenmeister, Rûmolt der degene, 4*
 'der geste und iur selber mugt ir heizen pflegen
 nâch iwer selber willen; ir habt vil guoten rât:
 und wîzzet daz iu Hagene daz wægest noch gerâten hât.

Und welt ir im niht volgen, iu rætet Rûmolt 5*
 - ich bin iu mit triuwen vil dienstlichen holt -
 daz ir hie belîbet durch den willen mîn,
 und lât den kûnec Ezele dort bî Kriemhilden sîn.

Wie kûnde iu in der werlde immer baz gewesen? 6*
 ir mugt vor iwern vînden hie heime wol genesen:
 ir sult mit rîcher wæte zieren wol den lîp,
 trinket win den besten und minnet wætlîchiu wîp.

Dar zuo gît man iu spîse, di besten di man hât 7*
 iender in der werlde: iwer lant vil schône stât.
 ir mugt iuch Ezelen hochgezit mit èren wol bewegn,
 und mugt mit iwern friunden vil guoter kurzewile pflegen.

Ob ir niht anders hêtet, daz ir möht geleben, 1 *
 ich wolde iu eine spise den vollen immer geben,
 sniten in öl gebrouwen: deist Rûmoldes rât,
 sit ez sus angestlichen, ir herren, dâ zen Hiunen stât.

Ich weiz daz mîn frou Kriemhilt iu nimmer wirdet holt; 2 *
 ouch habt ir unde Hagene zir anders niht verscholt:
 des sult ir beliben, ez mag iu werden leit:
 ir kumet es an ein ende, daz ich iu niht hân misseseit.

Des rât ich iu beliben: rich sint iwer lant. 3 *
 man mag iu michel sanfter lesen hie diu pfant
 danne dâ zen Hiunen: ine weiz wi ez dâ gestât.
 ir sult beliben, herren. daz ist in triwen mîn rât.

'Wir enwollen niht beliben:' - sprach dô Gêrnôt - 4 *
 'sit daz uns mîn swester sô friuntlich enbôt
 und Ezele der riche, zwiu solde wir daz lân?
 der dar niht gerne welle, der mac hie heime bestân.'

'Entriwen,' - sprach dô Rûmolt - 'ich sols der eine sin, 5 *
 der durch die Etzelen hêchgezît kumt nimmer über Rîn.
 zwiu solde ich daz wâgen, daz ich wæger hân?
 die wile ich mag immer, ich wil mich selbe leben lân.'

'Des selben wil ich volgen:' - sprach Ortwin der degen - 6 *
 'ich wil des geschâftes hie heime mit iu pflegen.'
 dô sprâchen ir genuoge, si woldenz ouch bewarn:
 'got lâz iuch, liebe herren, dâ zen Hiunen wol gevarn.'

Der kûnece begunde zûrnen dô er daz gesach, 7 *
 daz si hie heime wolten schaffen ir gemach:
 'darumbe wirz niht lâzen, wir müezen an die vart:
 ez waldet guoter sinne der sich alle zîte bewart.'

'Nu lát iuch unbilden' - sprach dô Hagene - 'niht 1
 mine rede darumbe: swie halt iu geschicht,
 ich rât iu an den triuwen, welt ir iuch wol bewarn,
 sô sult ir zuo den Hiunen vil gewerliche varn.

Sît ir niht welt erwinden, sô besendet iwer man, 2
 die besten die ir vinden oder inder müget hân:
 sô wel ich ûz in allen tûsent ritter guot,
 sone kan uns niht gewerren der argen Kriemhilde muot.'

'Des wil ich gerne volgen.' sprach der kûnec zehant. 3
 dô hiez er boten riten wîten in sîn lant:
 dô brâhte man der helde driu tûsent unde mêr.
 si wânden niht erwerben alsô gremelîchiu sêr.

Si riten willeclîche in Gunthers lant; 4
 man hiez in gebn allen ros und ouch gewant,
 die mit in varn wolden zuo den Hiunen dan:
 der kûnec in guotem willen der vil manegen gewan.

Dô hiez von Tronege Hagene Danewart den bruoder sîn 5
 ir beider recken sehzec bringen an den Rîn.
 die kômen ritterlîche: harnasch und gewant,
 des brâhten vil die degene in daz Gunthers lant.

Dô kom der herre Volkêr, ein kûene spileman, 6
 hinze hove nâch êren mit drîzec sîner man:
 die hêten sôlch gewarte, ez môht ein kûnec tragen.
 daz er zen Hiunen wolde, daz hiez er dem kûnege sagen.

Wer der Volkêr wære, daz wil ich wizzen lân. 7
 er was ein edel herre; im was ouch undertân
 vil der guoten recken in Burgonden lant:
 durch daz er videln kunde was er der spileman genant.

Tüsent welte Hagene: die hête er wol bekant, 1
 und waz in starken stürmen hete gefrüm̄t ir hant;
 und swaz si ie begiengen, des hêt er vil gesehn:
 in kunde ouch anders niemen niwan frûmekeite jehn.

Die boten von den Hiunen vil sêre dâ verdröz, 2
 wande ir vorht zir herren diu was harte gröz:
 si gerten tægeliſche urloubes von dan.
 des engunde niht Hagene: daz was durch liste getân.

Er sprach zuo sime herren 'wir suln daz wol bewarn, 3
 daz wir si iht lâzen rîten, ê daz wir selbe varn
 dar nâch in tagen sibenen, wider in ir lant:
 treit uns iemen argen muot, daz wirt uns deste baz bekant.

Sone kan ouch sich vrou Kriemhilt bereiten niht dar zuo, 4
 daz uns durch ir ræte iemen schaden tuo:
 hât aber si den willen, ez mag ir leide ergân,
 wande wir fûeren hinnen manegen ûz erwelten man.'

Sätel unde schilde und ander ir gewant, 5
 daz si fûeren solden in Ezelen lant,
 daz was nu gar bereitet vil manegem kûenem man:
 die Ezelen videlære hiez man dô ze hove gân.

Dô si die fürsten sâhen, dô sprach Gêrnôt 6
 'der kûnec wil nu leisten daz Ezel uns enbôt:
 wir wellen komen gerne zuo siner hôchgezit
 und sehn unser swester; daz ir des âne zwivel sît.'

Dô sprach der kûnec Gunther 'ir sult uns wizzen lân, 7
 wenne si die hôchgezit zen Hiunen wellen hân.'
 des antwurtem kûnege der bote Swâmmelin
 'ze nâhesten sunewenden sô sol si sicherlîchen sîn.'

Der künec in erlouhte - des was noch niht geschehn - 1
 ob si gerne wolden Prünhilde sehn,
 daz si für si solden mit sime willen gån.
 daz understuont dô Volkêr: daz was ir liebe getån.

'Jan ist' - sô sprach Volkêr, ein edel ritter guot - 2
 Prünhilt mîn frouwe nu niht wol gemuot:
 bitet unze morgen, sô læt mans iuch sehn.
 dô si sie wänden schouwen, dône kundes niht geschehen.

Dô hiez der künec rîche - der was den boten holt - 3
 durch sines herzen tugende tragen dar sîn golt
 uf den breiten schilden, des er vil mohte hân:
 ouch wart in rîchiu gâbe von sînen friunden getån.

Gêrnôt unde Gîselher, Gêre und Ortwin, 4
 daz ouch si milte wæren, daz wart dâ vil wol schîn:
 alsô rîche gâbe. si sie buten an,
 daz si ir vor ir herren deheine torsten enpfån.

Dô sprach zuo dem künegelîche der bote Wârbelîn 5
 'her künec, læt iwer gâbe in iurem lande sîn:
 mir mugen ir niht gefüeren; mîn herre ez uns verbôt,
 daz wir iht gâbe enpfîngen: ouch ist es decheinerslahte nôt.'

Des wart der künec hêre sêre ungemuot, 6
 daz si versprechen wolden sô rîches küneges guot:
 doch muosten si enpfâhen sîn golt und sîn gewant,
 daz si mit in brâhten sit in Ezelen lant.

Si wolden sehen Uoten ê daz si schieden dan. 7
 Gîselher der snelle brâht die spîleman
 ze hove für sîne muoter: diu frowe enbôt dô dan,
 swaz si êren hête daz wære ir liebe getån.

Dô hiez diu küneginne ir porten und ir golt
gebn durch Kriemhilde - wan der was si holt-
und durch den künec Ezelen den selben spileman :
si mohtenz wol enpfâhen ; ez was mit triuwen getân.

Urloup genomen hêten von wibe und von man
die boten Kriemhilde : mit freuden si dô dan
fuoren unz in Swâben ; dar hiez si Gêrnôt
sine liute leiten, daz ez in niemen missebôt.

Dô sich die von in schieden, die ir solden pflegn,
diu Ezelen hêrschaft si vridet ouf allen wegn :
des ennam in niemen ir ros noch ir gewant.
si begunden vaste gâhen wider in der Hiunen lant.

Swâ si ir friunde iht wisten, daz tâten si den kunt,
daz die Burgonden in vil kurzer stunt
ze tal von Rîne fûeren in der Hiunen lant :
dem bischofe Pilgerîne diu mære wurden ouch bekant.

Dô si mit solher ile für Bechelâren riten,
si sagtenz Ruedegêre - des wart niht vermiten -
und ouch Göteline, des marcgrâven wîp :
daz si si sehen solde, des wart vil vrœlich ir lip.

Gâhen mit den mæren sah man di boten dan :
Ezelen si funden in der stat ze Gran.
dienest über dienst, des man im vil enbôt,
sageten si dem küneger : vor liebe wart er freuden rôt.

Dô diu küneginne diu mære reht ervant,
daz ir brüeder solden komen in daz lant,
dô was ir wol ze muote : si gab den spileman
alsô rîche gâbe, si mohtens immer frumen hân.

Si sprach 'nu sagt mir beide, vil lieben boten mîn, 1*
 welher mîner friunde hie bî uns welle sîn,
 der hœhsten di wir ladeten her in dize lant?'
 si sprach 'waz redete Hagene, dô er diu mære bevant?'

Er sprach 'er kom zer sprâche an einem morgen fruo: 2*
 niht gûetlicher sprûche redet er dar zuo,
 dô si di reise lobten von Wormez über Rîn;
 daz wizzet, kûneginne, ez kunde im leider niht gesîn.

Ez kument iwer brüeder, di kûnege alle dri, 3*
 in hêrlîchem muote. wer recken mit in si,
 der mære ich endelîche wizzen nine kan:
 ez lobte mit in riten Volkêr der kûene spileman.'

'Des enbær ich lîhte,' - sprach des kûneges wîp - 4*
 'deich immer hie gesæhe den Volkêres lîp.
 Hagenen bin ich wæge, der ist ein recke gûot:
 daz er kumt zen Hiunen des stât mir hœhe der muot.'

Dô gie diu kûneginne dà si den kûnec sach: 5*
 wie rehte minnelîchen frou Kriemhilt dô sprach
 'wie zement iu diu mære, lieber herre mîn?
 des ie mîn herze gerte, daz sol nu wol verendet sîn.'

'Dîn wille deist mîn vreude:' - sprach der kûnec dô - 6*
 'ine wart mîn selbes mæge nie sô rehte vrô,
 sô ich si weste kumende her in ditze lant:
 durh liebe dîner friunde so ist mîne sorge gar verswant.'

Des kûneges ambetliute di hiezzen über al 7*
 mit gesidele rihten palas unde sal
 gên den lieben gesten, di in dà solden komen.
 sit wart von in dem kûnege vil michel wûnne benomen.

XXV AVENTIURE

WIE SICH DIE KÜNIGE ZE DEN HIUNEN HUOBEN.

Nu lâzen daz beliben, wie si gebären hie: 1*
 hôchgemuote recken di gefuoren nie
 sô rehte hêrlichen in deheines küneges lant.
 si hêten swaz si wolden, beidiu wâfen und gewant.

Der voget von dem Rîne kleidete sine man, 2*
 sehze unde tûsent, als ich vernomen hân,
 und niwen tûsent knechte gên der hôhgezît.
 di si dâ heime liezen, di beweinetenz sit.

Dô truoc man diu gereite ze Wormez über den hof: 3*
 dô sprach dâ von Spîre ein alter bischof
 ze der alten küneginne 'unser friund die wellent varn
 hin zer hôhgezîte: got mûez ir êre wol bewarn.'

Dô sprach zuo zir kinden diu edel Uote 4*
 'ir môhtet noch beliben, helde guote:
 ich sach hînt in troume vil angstliche nôt,
 wi allez daz gefügele in disem lande wære tôt.'

'Swer geloubet treumen,' - sprach dô Hagene - 5*
 'der enweiz der rechten mâre niht ze sagene,
 wenn ez im nâch den êren volleclichen stê.
 jâ wil ich daz mîn herre ze hove nâch urloube gê.

Wir suln gerne rîten in Ezelen lant: 1*
 dâ mac wol kûnege dienen guoter helde hant,
 dâ wir dâ müezen schouwen Kriemhilden hôhgezît.
 Hagene riet di reise, idoch gerow ez in sit.

Er hêtez widerrâten niwan daz Gêrnôt 2*
 mit ungefuegen Worten im sere missebôt.
 er mant in Sifrides, vroun Kriemhilden man:
 er sprach 'dâ von wil Hagene di grôzen hovereise lân.'

Dô sprach der von Tronege 'durh vorhte ich nine tuo. 3*
 swenne ir, helde, wellet sô sult ir grifen zuo:
 jâ rît ich mit iu gerne in Ezelen lant.'
 sît wart von im verhouwen vil manec helm unde rant.

Diu scif bereitet wâren ze varen über Rîn: 4*
 swaz si kleider hêten, diu truoc man dar in:
 si wâren vil unmüezec vor âbendes zît.
 doch kômen si von hûse vil harte vrœliche sît.

Gezelt unde hütten si spienen an daz gras 5*
 anderthalp des Rînes. dô daz geschehen was,
 den kûnec bat noch belîben sîn vil schenez wîp;
 si trûte noch des nahtes den sînen wâtlichen lîp.

Floiten unde videln huop sich des morgens fruo. 6*
 dô si dâ hin muosten, dô griffen si dô zuo:
 swer hête liep an arme, der trûte friundes lîp.
 des schiet sît vil mit leide des kûnec Ezelen wîp.

Rûmolt der kuchenmeister, ein vil kûene man, 7*
 der nam sîne herren heimliche dan:
 dô sagt er dem kûnege tougen sînen muot;
 er sprach 'des muoz ich trûren, daz ir di hovereise tuot.'

Ich hân iuch vil gewarnet und ouch genuoc gemant. 1*
 er sprach 'wem welt ir lâzen liute unde lant,
 sît niemen kan erwenden iu recken iwern muot?
 diu Kriemhilden mære, nie gedûhten si mich guot.'

'Daz lant sî dir enpfolhen und andern mînen man, 2*
 die ich heime lâze, und allez daz ich hân,
 mîn kint und mîn gesinde und mîner frowen lîp:
 jâ getuot uns nimmer leide des kûnec Ezelen wîp.'

E daz si schieden dannen, der kûnec ze râte gie 3*
 mit sînen hœhsten mannen: unberihet er niht lie
 lant unde bûrge: di der solden pflegen,
 den liez er ze huote vil manegen ûzerwelten degen.

Diu ros bereitet wâren den kûnegen und ir man: 4*
 mit minneclîchen kûssen schiet vil maneger dan,
 dem in hôhem muote lebte dô der lîp.
 daz muose sît beweinen vil manec wâtlichez wîp.

Wuofen unde weinen des hôrte man genuoc. 5*
 Ir kint diu kûneginne zem kûnec ûf armen truoc:
 'wie welt ir nu verweisen unser beider lîp?
 ir sult durch uns belîben,' sô seit daz jâmerhafte wîp.

'Ir sult niht, frowe, weinen durch den willen mîn, 6*
 ir sult in hôhem muote hie heime ân angest sîn:
 wir kumen schiere widere mit vreuden wol gesunt.
 si schieden minneclîchen vôn ir friunden sâ ze stunt.

Dô man di snellen recken sach zuo den rossen gân, 7*
 dô kôs man weinende vil manege frowe stân.
 daz ir vil langez scheiden sagt in wol ir muot
 ûf grôzen schaden ze kumene, daz herzen niene sanfte tuot.

Di snellen Burgonden sich ûz huoben. 1*
 dô wart in dem lande ein michel uoben:
 beidenthalp des Rînes weinten wîp und man.
 swi dort ir volc getæte, si fuoren vræliche dan.

In den selben zîten was noch der gloube kranc, 2*
 doch frumtens einen kapelân der in messe sanc:
 der kom gesunder widere, swi er vil kûme entran;
 die andern muosen alle dâ zen Hiunen bestân.

Dô schihten si ir reise gegen dem Mõune dan, 3*
 ûf durch Ostervranken, der drier kûnege man.
 dar leite si dô Hagene; dem was ez wol bekant:
 Danewart was ir marschale, der helt von Burgonden lant.

Dô si von Ostervranken durch Swalvelde rîten, 4*
 dô mohte man si kiesen an hêrlîchen siten,
 di fûrsten und ir mâge, di helde lobesam.
 an dem zwelften morgen der kûnec ze Tuonowe kam.

Dô reit von Tronege Hagene ze aller vorderôst: 5*
 er was den Nibelungen ein helfelîcher trôst.
 dô stuont der degen kûene nider ûf den sant:
 sîn ros er harte balde zuo zeinem boume gebant.

Daz wazzer was engozzen, diu scif verborgen: 6*
 ez kom den Nibelungen ze grôzen sorgen,
 wî si kôemen ûbere; der wâc was in ze breit.
 do erbeizte zuo der erden vil manec ritter gemeit.

'Leide' - sprach dô Hagene - 'mac dir wol hie geschehen, 7*
 voget von dem Rîne. nu maht du selbe sehen:
 daz wazzer ist engozzen, vil starc ist im sîn fluoet.
 ich wæn wir hie verliesen noch hiut vil manegen ritter guot.'

‘Waz wîzet ir mir, Hagene?’ - sprach dô der kûnec hêr - 1*
 ‘durh iwer selbes tugende untrestet uns niht mêr:
 den furt sult ir uns suochen hin über an daz lant,
 daz wir hinnen bringen beidiu ros und ouch gewant.’

‘Jan ist mir’ - sprach dô Hagene - ‘mîn leben niht sô leit, 2*
 daz ich mich welle ertrenken in disem wâge breit:
 ê sol von mînen handen ersterben manec man
 in Ezelen lande; des ich vil guoten willen hân.

Belbet bî dem wazzer, ir stolzen ritter guot: 3*
 ich wil di vergen suochen selbe bî der fluot,
 di uns über bringen in daz Ezelen lant.’
 Hagene der kûene nam sinen schilt an die hant.

Der helt vil guot gewâfen an sînem lîbe truoc, 4*
 den helm ûf gebunden, lieht was er genuoc:
 dô truog er ob der brünne ein wâfen alsô breit,
 daz ze sînen ecken harte vreislîchen sneit.

Er suchte nâh den vergen wider unde dan. 5*
 er hôrte wazzer giezen - losen er began -
 in einem schœnem brunnen: daz tâten wisiu wîp;
 di kuolten sich darinne unde badeten ir lîp.

Hagene wart ir inne, er sleich in sanfte nâch. 6*
 dô si den helt ersâhen, dô wart in von im gâch:
 daz si im entrunnen, des wâren si vil hêr.
 dô nam er ir gewæte, der helt enschadete in niht mêr.

Dô sprach daz eine merewîp, Hadebure was si genant, 7*
 ‘her Hagene, gebt uns widere unser gewant.
 sô ir uns, edel recke, gebet wider unser wât,
 ich sag iu wie iwer reise hin zen Hiunen ergât.’

Si swebten sam di vogele vor im uf der fluot; 1*
des dâhten in ir liste starc unde guot:
swaz si im sageten, er geloubt ins deste baz,
des er dô an si gerte, ir einiu sagete im daz.

Si sprach 'ir mügt wol rîten in Ezelen lant, 2*
des si mîn triwe bürge; mîn houbt si iwer pfant,
daz helde nie gefuoren in deheiniu rîche baz
nâch alsô grôzen êren: ir sult vil wol gelouben daz.

Der rede was dô Hagene in sînem herzen hêr: 3*
er gap in wider ir kleider, der helt sûmt sich niht mêr.
dô si dô angeleiten ir wunderlich gewant,
dô sagten si im rehte di reise in daz Ezelen lant.

Dô sprach daz ander merewîp, diu hiez Winelint, 4*
'ich wil dich warnen, Hagene, daz Adriânes kint:
durh der wæte liebe hât mîn muome dir gelogen:
und kumestu zuo den Hiunen, sô bistu sêre betrogen.

Jâ soltu kêren widere, daz ist an der zît, 5*
wand ir helde kûene alsô geladet sît,
daz ir sterben müezet in Ezelen lant.
swelhe dar geritent, di hânt den tût an der hant.

Des antwurt aber Hagene 'ir triaget âne nôt. 6*
wie kûndeꝛ sich gefüegen, daz wir alle tût
zer hôchgezît gelægen durh iemannes haz?'
dô begunde si im diu mære sagen kuntlicher baz.

Si sprach 'nu merket, Hagene, jâ muoz ez alsô wesen, 7*
daz iuwer deheiner dâ niht kan genesen,
wan eine des kûneges kappelân: dâ bi si iu bekant,
der kumt gesunder widere in daz Guntheres lant.

Dô sprach in grimmem muote der küene Hagene 1*
 'daz wære minen herren müelich ze sagene,
 daz wir zen Hiunen solden vliessen alle den lip.
 nu zeige uns überz wazzer, daz aller wiseste wip.'

Si sprach 'sît ir der verte niht wellet haben rât, 2*
 swâ jenhalf bi dem wazzer ein herberge stât,
 darinne ist ein verge und ninder anderswâ.
 der mære der er vrâgte der geloubet er sich sâ.

Dem ungemuoten recken sprach ir einiu nâch 3*
 'nu bîtet noch, her Hagene, lât iu niht sîn ze gâch.
 vernemet baz diu mære wi ir kumt über sant:
 dirre marc herre' der ist Else genant.

Sîn bruoder ist geheizen der degen Gelpfrât, 4*
 ein voget in Beyerlande; dar ez iu müeliche stât.
 welt ir durh sine marke, ir sult iuch wol bewarn,
 und sult ouch mit dem vergen vil bescheidenliche varn.

Der ist sô grimmes muotes, er lât iuch niht genesen, 5*
 iren welt mit guoten sinnen bi dem helde wesen.
 welt ir daz er iuch füere, sô gebet im den solt:
 er hûetet dises landes und ist Gelpfrâde holt.

Unde kum er niht vil schiere, sô ruofet über fluot 6*
 und jeht ir heizet Amelrich; daz was ein recke guot,
 der durch fientschefte rûmte ditze lant:
 sô kumt iu der verge, als im der name wirt genant.'

Der übermüete Hagene den vrowen dô neic 7*
 des râtes und der lère: der helt vil stille sweic.
 dô gie er bi der fluote hœher an den sant,
 dâ er anderthalben eine herberge vant.

Er begunde ruofen vaste über fluot 1*
 'nu hol mich hie, verge:' - sprach der degen guot -
 'sô gip ich dir ze miete von golde ein bouc vil rôt:
 â ist mir dirre verte, daz wizze, wærlîchen nôt.'

Der verge was sô rîche, daz im niht dienen zam: 2*
 dâ von er lôn vil selten von iemén dâ genam;
 ouch wâren sîne knehte vil hôhe gemuot.
 noh stuont allez Hagene hie disehalp der fluot.

Dô ruofte er mit der krefte, daz al der wâg erdôz, 3*
 wan des heldes sterke was michel unde grôz,
 'nu hol mich Amelrîchen, des herren Elsen man,
 der von disen landen durch grôze fintschefte entran.'

Vil hôch an sinem swerte er im den bouc dô bôt 4*
 - vil lieht und vil schône was er, von golde rôt -
 daz er in über fuorte in daz Elsen lant:
 der übermüete verge nam selb daz ruoder an di hant.

Ouch was der selbe verge vil müelîch gesit. 5*
 diu gir nâch grôzem guote vil besez ende git:
 dô wânde er verdienen daz Hagenen gold sô rôt:
 des leid er von dem degene sint den grimmegeu tôt.

Der verge zôch genôte hin über an daz lant. 6*
 den er dâ nennen hôrte, dô er des niht envant,
 ez müet in harte sêre: als er Hagenen sach,
 der helt wider den recken in vil grôzem zorne sprach:

'Ir muget wol sîn geheizen bî namen Amelrîch: 7*
 des ich mich hie verwæne, dem sit ir ungelîch.
 von vater und von muoter was er der bruoder min.
 nu ir mich sus betrogen habt, ir müezet disehalben sîn.'

'Nein, durch got den rîchen:' - sprach dô Hagene - 1*
 'ich bin ein vremder recke und sorge ûf degene:
 nu nemet hin minneclîche mîn ellendes solt,
 daz ir mich fûeret übere: ich wil iu immer wesen holt.'

Des antwurt der verge 'jâ kan ez niht gesîn. 2*
 ez habent fiande di lieben herren mîn:
 darumbe ich niemen vremden fûere in dize lant.
 als liep dir sî ze lebene sô trit vil balde ûz an den sant.'

'Des entuot ir niht:' - sprach Hagene - 'mir ist der reise nôt: 3*
 und nemt von mir ze lône disen bouc von golde rôt,
 und fûert mir über tûsent ros und alsô manegen man.'
 'in triwen,' - sprach der verge - 'daz wirdet nimmer getân.'

ER huob ein starkez ruoder, michel unde breit, 4*
 und sluog ez ûf Hagenen - des was er ungemeit -,
 daz er in dem schiffe strûchte ûf siniu knie:
 sô rehte grimmer verge kom dem helt von Tronege nie.

Er wolde baz erzürnen den ungemuoten gast: 5*
 dô sluog er eine schalten, daz diu gar zerbrast,
 Hagenen über daz houbet; er was ein starker man:
 dâ von der Elsen verge grôzen schaden gewan.

Mit grimmigem muote des kûenen Hagenen hant 6*
 greif zuo einer scheiden, dâ er sîn wâfen fant:
 er sluoc im ab daz houbet und warf ez an den grunt.
 diu mære wurden schiere den Burgonden kunt.

An den selben stunden dô er den schifman sluoc, 7*
 daz schif vlôz enouwe; daz was im leit genuoc.
 ê erz gerihte widere, müeden er began:
 dô zôh vil krefteclîche des kûnec Guntheres man.

Hagenen wac vil ringe des starken vergen val. 1*
 dô kërter harte balde daz wazzer hin ze tal:
 dô vant er sînen herren an dem stade stân:
 dô gie im engegene vil manec wætlîcher man.

Mit gruoze in wol enpfiengen di snellen ritter guot: 2*
 dô sâhens in dem schiffe noch riechen daz bluoet
 von einer starken wunden, die er dem vergen sluoc.
 dà von só muose Hagene hœren vrâgen genuoc.

Dô der kûnec Gunther daz heize bluoet ersach 3*
 swebende in dem schiffe, wi balde er dô sprach
 wan saget ir mir, Hagene, war ist der verge komen?
 iwer starkez ellen wæn im daz leben hât benomen.

Dô sprach er lougenlîchen 'dâ ich daz schif dà vant 4*
 bî einer wilden wîden, dà lóst ez mîn hant:
 ich hân deheinen vergen nindert hie gesehen,
 ez ist ouch niemen leide von mînen schulden hie geschehen.'

Dô sprach von Burgonden der starke Gêrnôt 5*
 'hiute muoz ich sorgen uf lieber friunde tôt,
 sît wir der schifliute zem schiffe mine hân,
 wi wir nu kumen übere: darumbe muoz ich fröude lân.'

Vil lûte rief dô Hagene 'leit nider uf daz gras, 6*
 ir knehte, diu gereite. jâ gedenke ich daz ich was
 der aller beste verge den man bî dem Rîne vant:
 jâ getrouwe ich iuch wol fûeren über in daz Gelpfrâdes lant.'

Daz si dester balder kœmen über fluot, 7*
 diu ros si ansluogen: der swimmen daz wart guot,
 wând in diu starke ûnde deheinez dà benam.
 etelîchez owete verre als ez ir müede gezam.

Dô truogen si zem scheffe ir golt und ouh ir wât, 1*
 sît daz si der verte niht mohten haben rât.
 Hagene was dâ meister: des fuort er über sant
 vil manegen küenen recken in daz unkunde lant.

Zem êrsten brâht er übere tûsent ritter hêr, 2*
 und sehzec sîner degene; dannoeh was ir mêr:
 niun tûsent knehte fuort er an den sant.
 des tages was unmûezec des vil küenen Hagenen hant.

Daz schif ze sîner lenge was starc wît und grôz, 3*
 des in dem gedrengē manec helt genôz:
 ez truoc wol mit einander vier hundert über fluot.
 an riemen muose ziehen des tages manec recke guot.

Dô er si wol gesunde brâhte über die fluot, 4*
 dô gedâhte vremder mære der snelle degen guot,
 diu im ê dâ sageten diu wilden merwip:
 des hêt des kûneges kapelân vil nâch verlorn den lip.

Bî dem kappelsoume er den priester vant: 5*
 ob dem heilectuome er leinte an sîner hant.
 des moht er niht geniezen, dô in Hagen ersach:
 der gotes arme kappelân muose liden ungemach.

Er swang in ûz dem schiffe: dar zuo was im gâch, 6*
 dô riefen ir genuoge 'vâhâ, herre, vâch.'
 Gîselher der junge zûrnen dô began:
 ern wolt ez doh niht lâzen ir deheinen understân.

Dô sprach von Burgonden der starke Gêrnôt 7*
 'waz hilfet iuh nu, Hagene, des kappelânes tôt?
 tat ez ander iemen, daz sold iu wesen leit.
 umbe welhe schulde habt ir dem priester widerseit?'

Der pfaffe swam genôte: er wolde sîn genesen, 1 *
 ob im iemen hülfe. des moht dâ niht gewesen,
 wan der grimme Hagene zornec was genuoc:
 er stiez in zuo dem grunde. daz dûhtes michel ungefuoc.

Dô der arme pfaffe der helfe niht ensach, 2 *
 dô kêrt er wider übere: des leid er ungemach.
 swi er niht swimmen kunde, im half diu gotes hant,
 daz er kom wol gesunder hin wider ûz an daz lant.

Dâ stuont der arme priester und schutte sîn gewant: 3 *
 dâ bi sach wol Hagene, daz ez wære ungewant
 daz im ê dâ sageten diu wîsen merewip.
 er gedâhte 'dise degene müezen vliessen den lip.'

Dô si daz schif entluoden, und gar getruogen dan 4 *
 swaz dar ûf hêten der drier kûnege man,
 Hagen ez schriet ze stucken und stiez ez an die fluot:
 des hête michel wunder di recken küene unde guot.

'Zwiu tuot ir daz, bruder?' - sprach dô Danewart - 5 *
 'wie sul wir kômen übere, sô wir di widervart
 riten von den Hiunen wider an den Rîn?'
 sit dô sagete in Hagene daz des kûnde niht gesin.

Dô sprach der helt von Tronege 'ich tuon ez ûf den wân, 6 *
 ob wir an dirre reise deheinen zagen hân,
 der uns entrinnen welle durch zageliche nôt:
 der muoz an disem wâge doch ligen schameliche tôt.'

Si fuorten mit in einen von Burgonden lant, 7 *
 der was ein helt zen handen, Volkêr was er genant:
 der redete spêheliche allen sînen muot.
 swaz ie begunde Hagene daz dûht den videlêre guot.

Dô des küneges kappelân daz schif zerhowen sach, 1*
hin wider überz wazzer er ze Hagene sprach
'ir morder ungetriuwer, waz hêt ich iu getân,
daz ir mich âne schulde hie ertrenket woldet hân?

Des antwurt im Hagene 'nu lât die rede wesen. 2*
mir ist leit uf mîne triuwe daz ir sît genesen
hie vor minen handen, daz wizzet âne spot.
dô sprach der arme kappelân 'des wil ich immer loben got.

Ich fürht iuch nu vil kleine, des sult ir sicher sîn. 3*
nu vart ir zuo den Hiunen: sô wil ich an den Rîne.
got enlâz iuch nimmer ze dem Rîne wider komen:
des wünsch ich iu vil sere. ir hêt mir nâch den lîp benomen.

Dô sprach der künec Gunther zuo sînem kappelân 4*
'ez wirt iu wol gebüezet swaz iu hât getân
Hagen in sînem zorne, und kum ich an den Rîne
wider mit minem lebene, des sult ir âne angest sîn.

Vart wider heim ze lande, wan ez muoz nu sîn. 5*
ich enbiute minen dienest der lieben frowen mîn
und andern minen mâgen, als ich von rehte sol:
ir saget in liebiu mære, daz wir noch alle varen wol.

* Ir ros bereitet wâren, di soumer wol geladen. 6
si hêten an der verte noch deheinen schaden
genomen, der si müete, wan des küneges kappelân:
der muose uf sînen fûezen hin wider zuo dem Rîne gân.

XXVI AVENTIURE

WIE SI MIT ELSEN UND GELFRATEN STRITEN UND WIE
IN DO GELANC.

Dô si nu wol gesunde kômen uf den sant, 1*
der kûnece begunde vrâgen 'wer sol uns durch daz lant
di rehten wege wîsen, daz wir niht vervarn?'
dô sprach der kûene Volkêr 'daz sol ich eine wol bewarn.'

'Nu enthaltet iuch,' - sprach Hagene - 'ritter unde knecht, 2*
und engâhet niht ze sêre: daz dunket mich reht.
vil ungefüegiu mære diu tuon ich iu bekant:
wir enkumen nimmer mære wider heim in unser lant.'

Daz sageten mir zwei merewîp hiute morgen fruo, 3*
wir enkemen nimmer widere: nu rât ich, waz man tuo;
daz ir iuch wâfent, helde, und ze strit iuch wol bewart
- wir hân hie starke fînde -, daz ir gewerliche vart.

Ich wânde an lûgene fûnde diu wîsen wazzerwîp. 4*
si jâhen daz besunder, daz unser deheines lip
wider ze lande kôeme niwan der kappelân:
dar umb ich in sô gerne hiut ertrenket wolde hân.'

Dô flugen disiu mære von schare baz ze schar: 5*
des wurden snelle helde vor leide missevar,
dô si begunden sorgen uf den grimmen tôt
an dirre hovereise: des gie si wêrlîchen nôt.

Dâ ze Mœringen si wâren über kômen, 1 *
 dâ dem Elsen vergen der lîp was benomen.
 dô sprach aber Hagene 'sît daz ich vînde hân
 an dirre vart erworben, wir werden sicherlich bestân.

Ich sluoc der herren vergen hiute morgen fruo : 2
 si wîzzen wol diu mære. nu grîfet balde zuo,
 ob Else unde Gelpfrât noch hiute hie bestê
 unser ingesinde, daz ez in schedelîch ergê.

Ich erkenne si sô küene, ez wirdet niht verlân. 3
 diu ros diu sult ir lâzen deste sanfter gân,
 daz des iemen wâne, wir vliehen âf den wegen.
 'des râtes suln wir volgen.' sprach dâ vil maneger küener degen.

'Wer sol nu daz gesinde wîsen über lant?' 4
 si sprâchen 'daz tuo Volkêr - dem sint hie wol bekant
 stige unde strâze - der küene spileman.'
 ê daz manz gesprâche, dô sah man wol gewâfent stân.

Den snellen videlære. den helm er âf gebant, 5
 in hêrlîcher varwe was al sîn wîcgewant ;
 er bant ouch zeime scafte ein zeichen, daz was rôt.
 sît kom er mit den kûnegen in eine grêzliche nôt.

Dô was tût des vergen nu Gelpfrâte kômen 6
 mit eime wâren mære : dô hêt ez ouch vernomen
 sîn bruoder Else. ez was in beiden leit :
 si sanden nâch ir degenen ; die wâren schiere bereit.

In vil kurzen ziten, als wir vernomen hân, 7
 sah man zuo zîn rîten die hêten scaden getân
 in starkem urlîuge, vil ungefuegiu sêr :
 der kômen Gelpfrâte wol siben hundert oder mêr.

Dô si ir grimmen vînden begunden rîten nâch, 1
 jâ leiten si ir herren. den was ein teil ze gâch
 nâch den küenen gesten: si wolden anden zorn.
 des wart der herren friunde sider mêre verlorn.

Dô hêt der wise Hagene wol gefüegez daz: 2
 wie môhte sîner friunde ein helt gehüeten baz?
 er pflic der nâchhuote mit sehzez sîner man,
 und Danewart sîner bruoder: daz was vil wislich getân.

In was des tages zerunnen: des hêten si niht mër. 3
 er vorht an sînen friunden leit unde sêr:
 si rîten under schilden durch der Beyerlant.
 dar nâch in kurzen stunden die helde wurden angerant.

Beidenthalp der strâzen und hînden vaste nâch 4
 huofslege si hôrten: dem volke was ze gâch.
 dô sprach der küene Danewart 'man wil hie uns bestân.
 nu binden ûf die helme: daz ist rætlich getân.'

Si hielten ab ir verte, als ez dô muose sîn. 5
 si sâhen in der vîenster der liechten helme schîn.
 dône wolde Hagene niht langer si verdagen:
 'wer jagt uns ûf der strâze?' daz muos im Gelpfrât dô sagen.

Dô sprach der marcgrâve ûzer Beyerlant 6
 'wir haben unsern vînden dâ her nâch gerant.
 die wêiz niht wer mir hiute mînen vergen sluoc.
 der was ein helt zen handen: daz ist mir leide genuoc.'

Dô sprach von Tronege Hagene 'was der verge dîn? 7
 der enwolde uns niht fûeren. des ist diu schulde mîn:
 dô sluog ich dînen vergen. deiswâr, des gie mir nôt:
 ich hête von dem degene vil nâch gewonnen den tôt.'

Ich bôt im mine miete, golt silber und gewant, 1
 daz er uns über fuorte her in iwer lant.
 daz muote in harte sêre; in zorne er mich dô sluoc
 mit einer starken schalten: vil wê nec ich im dô vertruoc.

Dô kom ich zuo dem swerte und wert im sînen zorn 2
 mit einer starken wunden: des wart der helt verlorn.
 daz bringe ich iu ze suone, swie iuch nu dunket guot.
 dô giengez an ein striten: si wurden zornec gemuot.

'Ich wistez wol,' - sprach Gelpfrât - 'dô hie für gereit 3
 Gunther mit den sînen, daz uns geschehe leit
 von Hagen übermüete. nu ensol er niht genesen:
 für des vergen ende sol er pfant hie wesen.'

Si neigten über schilde ze stiche diu starken sper, 4
 Gelpfrât unde Hagene: in was zeinander ger.
 Else unde Dancwart ouch ze samne riten
 in vil hôhem muote. dà wart grimme dô gestriten.

Wie kunden sich versuochen immer helde baz? 5
 von eime starken schafte hinder ors gesaz
 Hagene der küene vor Gelpfrâtes hant.
 im brast daz fûrbüege: dô wart im vallen bekant.

Von ir ingesinde der krach der schefte schal. 6
 do erholt ouch sich dort Hagene, der è dà was zetal
 komen von der tjoste nider an daz gras:
 er wæn unsanftes muotes wider Gelpfrâte was.

Wer in diu ros behielte, daz ist mir unbekant. 7
 si wâren von den sätelen komen ûf den sant:
 Gelpfrât unde Hagene ein ander liefen an.
 des hulfen ir gesellen: dà wart striten getân.

Swie krefteclichen Hagene zuo Gelpfräte spranc, 1
 der edel maregräve des schildes hin im swanc
 wol gegen einer ellen: daz fiur dræte dan.
 des was vil nâch erstorben des küene Gunthers man.

Dô begunder rüefen Danewarten an 2
 'hilfâ, lieber bruoder! jâ hât mich bestân
 ein rehter helt zen handen: ern læt mich niht genesn.
 dô sprach der küene Danewart 'des schol ich scheidære wesn.'

Dô spranger dar vil balde und sluog im einen slac, 3
 dà von der herre Gelpfrät vor im tût gelac.
 Else wolde gerne rechen dô den man:
 sit muoser schedeliche mit den sinen kèren dan.

Im was erslagen der bruoder, selbe wart er wunt: 4
 wol ahzec siner degene beliben an der stunt
 mit dem vil grimmen tôte. Else muose dan
 flühteliche wenden. daz hêten geste getân.

Dô die von Bayerlanden wichen ûf dem wege, 5
 dô hôrte man noch hellen die vreislichen slege:
 dô jageten die von Tronege ir vîanden nâch.
 die ez niht engelten wânden, den was allen ze gâch.

Dô sprach an ir vlühte Danewart der degen 6*
 'wir suln wider kèren balde ûf disen wegen,
 und lâze wir si rîten: si sind von bluote naz.
 gâhe wir zen friunden: in triwen rât ich iu daz.'

Dô si hin wider kômen dà der strît was geschehen, 7*
 dô sprach der küene Hagene 'helde, ir sult besehen,
 wes uns hie gebreste oder wen wir hân verlorn
 in disem herten strîte durh den Gelpfrâdes zorn.'

Si hêten vloren viere: daz liezens alsô sîn.
 ez was wol vergolten mit wunden under in
 den von Beyerlanden: si liezen hundert tôt.
 des wâren den von Tronege ir schilde trûebe unde rôt.

Ein teil schein ûz den wolken des lichten mânen brehen: 2*
 dô sprach aber Hagene 'niemen sol verjehen
 den mînen lieben herren, waz wir hie hân getân:
 man sol si âne sorgen unze morgen rîten lân.'

Dô si dâ nâch in kômen di dort strîten ê,
 dô tet dem ingesinde diu mûede starke wê:
 'wi lange sul wir rîten?' des vrâget manec man.
 dô sprach der kûene Danewart 'wir mugen niht herberge hân:

Ir mûezet alle rîten unz daz ez werde tac.
 Volkêr der kûene, der des vanen pflac,
 bat den marschalc vrâgen 'wâ sul wir hînte sîn,
 dâ gerasten unser mære und ouch di lieben herren mîn?'

Dô sprach der kûene Danewart 'ine kans iu niht gesagen.
 wir enmugen niht geruowen, ê ez beginne tagen:
 swâ wirz danne vinden sô ligen in ein gras.'
 dô si daz vernâmen wi leit in etelichen was!

Si beliben unvermeldet des heizen bluotes rôt,
 unz daz diu sunne ir liehtez schînen bôt
 dem morgen über berge. dô daz der kûene gesach,
 daz si gestrîten hêten, der helt vil zorneclîchen sprach:

'Wi nu, friunt Hagene? iu wæn versmâhet daz,
 daz ich bî iu wære, dâ iu di ringe naz
 sus wurden von dem bluote. wer hât iu daz getân?
 er sprach 'daz tet Gelpfrât: der hêt uns nehten bestân.'

Durch den sînen vergen wir wurden an gerant. 1*
 dâ sluoc Gelpfrâten mines bruoder hant: sit
 entran uns Else: des twang in michel nôt.
 in hundert und uns viere beliben in dem strite tôt.

Wir enkunnen niht bescheiden, war si sich leiten nider. 2*
 al die lantliute erfunden ez wol sider,
 daz ze hove fûeren der edeln Uoten kint:
 si wurden wol empfangen dâ ze Pazzowe sint.

Der edeln fûrsten oheim, der bischof Pilgrîn,
 dem wart vil wol ze muote, dô er di neven sîn
 sach mit sô vil der recken kumen in daz lant.
 daz er si gerne sêhe, daz wart in schiere bekant.

Si wurden wol empfangen von vriunden ûf den wegen. 4*
 dâ ze Pazzouwe kunde er si niht gelegen:
 si muosen überz wazzer, dâ si funden velt:
 dâ sluogen ûf die knechte manege hütten und gezelt.

Si muosen dâ beliben allen einen tac
 und ouch di naht mit vollen, wi schône man ir pflac!
 dar nâch si muosen rîten in Ruedegêres lant.
 dem kâmen ouch diu mære: daz was im liebe bekant.

Dô di wegemüeden ruowe genâmen,
 unde si dem lande nâher bequâmen,
 si funden ûf der marke slâfende einen man,
 dem von Tronege Hagene sîn starkez wâfen an gewan.

Eckewart was geheizen der selbe ritter guot:
 er gewan dar umbe vil trûregen muot,
 daz er verlôs sîn wâfen von der heldê vart.
 di marke Ruedegêres fundens übele bewart.

'O wê mir dirre schande!' - sprach dô Eckewart - 1 *
 'jâ riwet mich vil sêre der Burgonden vart.
 sît ich verlôs Sifride, sît was mîn freud zergân.
 owê, herre Ruedegêr, wi ich wider dich erworben hân!'

Hagene vil wol hôrte: sorge im klagen gebôt. 2 *
 er gab im wider sîn wâfen und sehs pouge rôt:
 'di habe dir, helt, ze minnen, daz du mîn friunt sîst:
 du bist ein degen küene, swie eine du uf der marke list.'

'Got lôn iu iwer gâbe' - sprach dô Eckewart - 3 *
 'doch riwet mich vil sêre zen Hiunen iwer vart.
 ir sluoget Sifriden: man ist iu hie gehaz.
 daz ir iuch wol behüetet, in triwen rât ich iu daz.'

'Nu müeze uns got behüeten!' - sprach dô Hagene - 4 *
 'wir hân an disen zîten niht mê ze tragene
 niwan wâ mine herren noch hînte mügen hân
 nahtselde in disem lande, dâ si geruowen und ir man.'

Diu ros sint uns vermüedet uf den verren wegen, 5 *
 und der spîse zerunnen: - sprach Hagene der degen -
 'wir findens ninder veile, uns wære wirtes nôt,
 der uns noch hînte gæbe durch sîne milte sîn brôt.'

Des antwurt im dô Eckewart 'ich zeig iu einen wirt, 6 *
 daz ir ze hûse selten sô wol bekommen birt
 in deheimem vrenden lande, als iu hie mac geschehen,
 ob ir vil snelle degene wellet Ruedegêren sehen.'

Der sizet bi der strâze und ist der beste wirt, 7 *
 der ie kom ze hûse: sîn herze tugende birt,
 alsô der liehte meie daz gras mit bluomen tuot.
 sô er sol helden dienen, sô ist er vroelich gemuot.'

Dô sprach der künec Gunther 'welt ir mîn bote sîn,
ob uns welle enthalten durch den willen mîn
der marcgrâve Rüedegêr, unser mâge und unser man?
daz wil ich immer dienen mit triwen sô ich beste kan.'

'Der bote bin ich gerne.' sprach dô Eckewart.
in vil guotem willen huob er sich an di vart,
und sagete Rüedegêre, wen er hête gesehen,
und ouch Götlinde: dô was in liebe geschehen.

Man sah ze Bechelâren gâhen einen degen:
selbe erkande in Rüedegêr. er sprach 'ûf disen wegen
dort her gâhet Eckewart, ein Kriemhilde man.
er wânde daz die vinde im hêten etewaz getân.'

Dô gie er für die porte, dà er den boten vant:
daz swert er von im gurte und leit ez von der hant.
er sprach zuo dem degene 'wâz habt ir vernomen,
daz ir alsô sêre gâhet? hât uns iemen iht genomen?'

'Uns hât geschadet niemen.' - sprach Eckewart zehant -
'mich habent dri küneger her zuo ziu gesant,
Gunther von Burgonden, Giselher und Gêrnôt:
der recken ieslicher iu sînen dienst her enbôt.'

Daz selbe tuot her Hagene, und ouch Volkêr,
ir dienst willeclîche. noch sage ich iu mêr,
daz iu des küneges marschalch Dancwart daz enbôt,
daz den guoten degenen wær iwer herberge nôt.'

Mit lachendem munde sprach dô Rüedegêr
'nu wol mich dirre mære, daz die küneger hêr
mîner herberge ruochent: diu wirt in niht verseit.
koment si mir ze hûse, mit dienste bin ich in bereit.'

'Iuch hât des küneges marschalc heizen wizzen lân,
 wen ir ze herbergen noch hînte müezet hân:
 sehzec küener recken und tûsent ritter guot,
 und niun tûsent knechte.' dô wart er vrœlich genuot.

'Sô wol mich dirre geste,' - sprach dô Rüedegêr -
 'daz mir komet ze hûse die recken alsô hêr,
 den ieh noch vil selten iht gedienet hân.
 nu rîten in begegene mîne mâge unde man.'

Von gâhen zuo den rossen huop sich dâ michel nôts
 von rîtern und von knechten. der wirt dô gebôt
 den sînen ambtliuten: si schuofenz deste baz,
 noch enwistes niht frou Götelint, diu in ir kemenâten saz.

Dô gie der marcgrâve dâ er die frowen vant,
 sîn wîp und sîne tohter. dô sagter in zehant
 diu vil lieben mære, diu er hête vernomen,
 daz ir frowen brüeder ir ze hûse solden komen.

'Vil liebiu triutinne,' - sprach dô Rüedegêr -
 'ir sult vil wol empfâhen die edeln kûnege hêr,
 sô si mit ir gesinde für iuch ze hove gân:
 ir sult ouch schône grûezen Hagenen Gunthers man.'

Mit in kumt ouch einer, der heizet Danewart:
 der ander heizet Volkêr, an zûhten wol bewart.
 die sehse sult ir küssen, ir und diu tohter mîn,
 und sult ouch bî den degenen in zûhten grœzliche sîn.'

Daz lobten dô die frouwen und wârens vil bereit.
 si suochten ûz den kîsten diu maneger hande kleit,
 dar inne si begegene den recken wolden gân.
 dâ wart vil michel vlîzen von schœnen frouwen getân.

XXVII AVENTIURE

WIE DER MARCGRAVE DIE KÜNEGE MIT IR RECKEN IN SIN
HUS ENPFIE, UND WIER IR SIT PFLAC.

In solhen unmuozen sun wir die frowen län. 1
hie wart vil michel gâhen über velt getân
von Rüedegêres friunden dâ man die geste vant:
si wurden wol enpfangen in des marcgrâven lant.

Dô si der marcgrâve zuo zim komen sach, 2
Rüedegêr der snelle, wie vrœlich er sprach
'sit willekomen, ir herren, und ouch iwer man
hie in disem lande. wie gern ih iuch gesehn hân!'

Dô dancten im die recken mit triwen âne haz, 3
daz er in willec wære, vil wol erzeicter daz,
sunder gruofter Hagenen; den hêt er ê bekant:
sam tet er Volkêren, den helt von Burgonden lant.

Dô sprach zem marcgrâven Danewart der degen 4
'sit ir uns welt beruochen, wer sol uns danne pflegen
des unsern ingesindes von Wormez über Rîn?'
dô sprach der marcgrâve 'die angest sult ir lâzen sîn.

Ez wirdet wol behalden, swaz ir in daz lant 5
habt mit iu gefüeret, ros silber und gewant:
dem schaffe ich solhe huote, daz sîn wirt niht verlorn,
daz iu ze schaden bringe gegen einem halben sporn.

Spannet úf ir knechte die hütten an daz velt: 1
 swaz ir hie verlieset, des wil ich wesen gelt;
 und ziehet abe die zöume, diu ros diu lāzet gān.
 daz hēt in wirt deheiner dā vor vil selten getān.

Des freuten sich die geste. dô daz geschaffen was, 2
 die herren riten dannen. sich leiten in daz gras
 über al die knechte: si hēten guot gemach.
 ich wān in an der verte nie sô sanfte geschach.

Nu was diu marcgrāvinne für daz tor gegān 3
 mit ir vil schōenen tochter. dô sah man bi ir stān
 die minnelichen frouwen und manege schōene meit:
 die truogen vil der bouge und ouch die hērlichen kleit.

Daz edele gesteine verre lūhte dan 4
 úz ir vil rīchen wāte: si wāren wol getān.
 dô kōmen ouch die recken und erbeizten sā ze hant.
 hey, waz man grōzer zūhte an den Burgonden vant!

Sehs und drīzec meide und ander manec wip, 5
 den was ze wunsche schōene und minnelich der lip:
 die giengen in engegene und wolden si enfān.
 dā wart ein schōene grūezen von den frouwen getān.

Diu junge marcgrāvinne kuste die kūnege drī: 6
 alsam tet ir muoter. dā stuont ouch Hagen bī.
 den bat ir vater küssen: dô blicte si in an:
 er dūhte si sô gremlich, daz siz gerne hēte lān.

Doch muoste si dā leisten daz ir der wirt gebôt: 7
 gemischet wart ir varwe, bleich unde rôt.
 si kuste ouch Danewarten, dar nāch den spileman:
 durch sines libes ellen wart im daz grūezen getān.

1
 Diu junge maregrävinne nam dô bi der hant
 Giselhern den recken von Burgonden lant:
 alsam tet ir muoter Gunthern den küenen man.
 Gernôten fuorte Ruedegêr mit in minnelichen dan.

2
 In der schoenen bürge stuont ein witer sal:
 ritter unde frouwen gesâzen dâ zetal.
 dô hiez man balde schenken den gesten guoten win.
 ez endorften nimmer helede gehandelt güetlicher sîn.

3
 Mit lieben ougenblicken wart vil gesehn an
 diu Ruedegêres tochter: diu was só wolgetân,
 jâ trütes in dem herzen vil manec ritter gut.
 daz kunde ouch si verdienen: si was vil hôhe gemuot.

4
 Si gedâhten swes si wolden; es enmoht ab niht geschehn.
 an magede und ouch an frouwen wart dâ vil gesehn,
 für unde widere, wande ir saz dâ genuoc.
 der edel videlære dem wirt holden willen truoc.

5
 Nâch gewonheite dô schieden si sich dâ.
 ritter unde frouwen die giengen anderswâ.
 dô rihte man die tische in dem sale wît:
 den vil lieben gesten man diente willecliche sit.

6
 Durch der geste liebe hin ze tische gie
 niwan diu maregrävinne: ir tochter si dô lie
 beliben bi den kinden, dâ si von rehte saz.
 daz si ir niht ensâhen, die geste müete sêre daz.

7
 Dô si mit freuden hêten gegezzen umberal,
 dô wiste man die schoenen wider in den sal.
 gâmelicher sprüche der wart dâ niht verdeit:
 der reit vil dâ Volkêr, ein degen küen und gemeit.

Dô sprach offenliche der tiure spileman 1
 'vil rîcher marcgrâve, got hât an iu getân
 vil genædeclîche, daz er iu hât gegeben
 ein wîp sô rehte schœne, dar zuo ein wûnneclîchez lebne.

Ob ich ein fürste ware, - sprach aber der spileman - 2
 'und solde ich tragen krône, ze wibe wolde ich hân
 die iwern schenen tohter, des wænet mir der muot:
 diu ist minneclîch ze sehene, dar zuo edel unde guot.'

Dô sprach der marcgrâve 'wie môhte daz gesin, 3
 daz immer kûneec gegerte der lieben tohter mîn?
 wir sîn beide ellende, ich und ouch mîn wîp,
 und haben niht ze gebene: waz hilfet danne ir schœner lip?'

Dô sprach der herre Gêrnôt 'ir sult die rede lân: 4
 und solde ich triutinne nâch mîme willen hân,
 âne guot ze wibe wær ich ir immer vrô.'
 des antwurte Hagene vil harte minneclîchen dô:

'Nu sol doch her Gîselher mîn herre nemen wîp: 5
 ez ist sô hôher mâge der marcgrâvinne lip,
 daz wir ir dienten gerne, ich und ander iwer man,
 und soldes under krône dô zen Burgonden gân.'

Diu rede Ruedegêren von in dûhte guot, 6
 und ouch die marcgrâvinne: jâ freutez in den muot.
 sît truogen an die helde, daz si ze wibe nam
 Gîselher der edele, wandez in beiden wol gezam.

Swaz sich sol gefüegen, wer mac daz understên? 7
 man bat die junefrouwen hin ze hove gên:
 dô swuor man im ze gebene daz wûnneclîche kint,
 ouch lobt er ze nemene die vil minneclîche sint.

Man beschiet der juncfrouwen bürge unde lant : 1
 des sichert dâ mit eiden des rîchen kûneges hant,
 und Gêrnôt der herre, daz wûrde daz getân.
 dô sprach der marcgrâve 'sit ich der lande niht enhân,

Sone lât iu niht versmâhen mîn ellendes solt : 2
 ich gibe zuo mîner tohter silber unde golt,
 swaz zwei hundert mere meiste mûgen getragen.
 diu rede muoste den degenen beidenthalben wol behagen.

Nâch gewonheite man hiez an einen rînc 3
 stên die minnelîchen. manec sneller jûngelînc
 in gezewietem muote ir ze gegene stuont :
 si gedâhten in ir sinne, sô noch die tumben dicke tuont.

Dô man begunde vrâgen die minnelîchen meit, 4
 ob si den recken wolde, ein teil was ez ir leit,
 und dâhte doch ze nemene den wætlichen man :
 si schamte sich der vrâge, sô manec maget hât getân.

Ir rûnte ir vater Rûedegêr, daz si sprâche jâ 5
 und in vil gerne nâme : vil schiere was dô dâ
 mit sînen wîzen handen der si dô umbeslôz,
 Gîselher der junge. wie lûtzel si des sit genôz!

Dô sprach der marcgrâve 'ir edeln kûnege rîch, 6
 als ir nu wider wendet - daz ist gewonlîch -
 heim zuo ziuren landen, sô gib ich iu mîn kint,
 daz ir si mit iu fûeret.' daz gelobten sie sint.

Swaz man dâ schalles hôrte, den muosen si doch lân : 7
 man hiez die juncfrouwen zir kemenâten gân,
 und ouch die geste slâfen : si erbîten an den tac.
 dô bereite man die spise : der wirt ir minnelîchen pflac.

Dô si nu gezzen hêten und wolden dannen varn 1
 gein der Hiunen landen, 'daz heiz ich wol bewarn:'
 - sprach der wirt vil edele - 'ir sult noch hie bestân;
 wande ich sô lieber geste selten her gewonnen hân.'

Des antwurte Danewart 'jane mages niht gesîn : 2
 wâ nâmet ir die spîse, daz brôt und ouch den wîn,
 daz sô manegem manne wære hie bereit?'
 dô daz der wirt gehôrte, ez was im âne mâze leit.

Dô sprach der marcgrâve 'diu rede ist âne nôt: 3
 ze vierzehen nehten wîn unde brôt
 gæbe ich iu völleclîchen mit den, die ir noch hie hât.
 ir mûezet hie belîben: des ist deheinerslahte rât.'

Swie vil si dannen gerten, si muosen dâ bestân 4
 unz an den vierden morgen. dô wart ouch dâ getân
 von des wirtes milte, daz verre wart geseit:
 er gap den sînen gesten beidiu wâfen unde kleit.

Ez mohte wern niht langer, si muosen dannen varn. 5
 Ruedegêr der kunde vil wê nec iht gesparn
 von der sînen milte. swes iemen gerte nemen,
 daz versagt er niemen: ez muose in allen gezemen.

Daz edel ingesinde brâhte für daz tor 6
 gesatelt vil der rosse. dô warte ouch in dâ vor
 vil der guoten recken: die truogen schilde enhant,
 wande si rîten wolden nider in der Hiunen lant.

Der wirt dô sine gâbe bôt über al, 7
 ê daz die edeln geste kœmen für den sal.
 er kunde milteclîche mit grôzen êren lebn:
 die sine schœnen tochter die hêt er Gîselher gegeben.

Dô gab er Gunthere, dem helde lobelich, 1
 daz wol truoc mit èren der edel künec rich,
 swier nie gâbe enpfinge, ein wâfenlîch gewant:
 dô neic der fürste hère des milten Ruedegères hant.

Dô gab er Gêrnôte ein wâfen guot genuoc, 2
 daz er sît in stürmen vil hêrlîchen truoc:
 der gâbe im vil wol gunde des maregrâven wîp.
 dâ von der guote Ruedegêr muose vliesen sît den lip.

Dô bôt diu maregrâvinne Hagen ir gâbe alsam 3
 mit bete minneclîche, sît si der künec nam,
 daz er âne ir stiure zuo der hôchgezit
 varn niene solde: der helt gelobt ez âne strît.

‘Alles des ich ie gesach,’ - sprach dô Hagene - 4
 ‘sone gerte ich niht mêre nu ze habene,
 niwan jenes schildes, der dort hanget an der want:
 den wolde ich gerne fûeren mit mir in der Hiunen lant.’

Dô diu maregrâvinne Hagen bete vernam, 5
 ez mante si ir leide: weinen si gezam.
 dô gedâhte si vil tiure an Nuodunges tôt:
 den hêt erslagen Witege. des twanc si jâmerlîchiu nôt.

Si sprach zuo dem degene ‘den schilt wil ich iu geben. 6
 daz wolde got von himele, daz er noh solde leben,
 der in dâ truog enhende: der lag in sturme tôt.
 den muoz ich immer weinen: des gât mir armen wîbe nôt.’

Diu edel maregrâvinne von ir sedele gie; 7
 bi dem schiltvezzel si den schilt gevie:
 dô brâhte si in Hagene, si selbe mit ir hant.
 diu gâbe was mit èren an den recken gewant.

Ein hult von liehtem pfelle ob siner varwe, lac. 1
 bezzer schilt deheinen belühte nie der tac:
 von edelem gesteine, swers ze koufen hête gegert
 oder in veile hête, er was wol tûsent marke wert.

Den schilt hiez dô Hagene von im tragen dan. 2
 dô kom sîn bruoder Dancwart hin ze hove gegân:
 dem gap vil richiu kleider des marcgrâven kint,
 diu er dâ zen Hiunen truoc vil hêrlîchen sint.

Allez daz der gâbe von in dâ wart genomen, 3
 in ir deheines hende wær ir niht bekomen,
 wan durch des wirtes liebe, derz in sô schône erbôt.
 sit wurdens im sô vîent, daz si in muosen slahen tôt.

Volkêr der snelle mit siner videlen dan 4
 kom gezogenliche für Göteline stân.
 er videlt sêze done und sang ir sîniu liet:
 dâ mite nam er urloup, dô er von Bechelâren sciet.

Ir hiez diu marcgrâvinne eine lade tragen. 5
 von friuntlicher gâbe muget ir nu hêren sagen.
 dar ûz si nam sehs pouge, und spiens im an die hant:
 'die sult ir fûeren, Volkêr, von mir in der Hiunen lant.

Und sult durch mînen willen si dâ ze hove tragen, 6
 swenne ir wider wendet, daz man mir mûge sagen
 wie ir mir habt gedienet dâ zer hôchgezît.
 des si zem recken gerte, vil wol gewert er sies sit.

Dô sprach der wirt zen gesten 'ir sult dest sanfter varn: 7
 ich wil iuch selbe leiten und heizen wol bewarn,
 daz man iu uf der strâzen nem deheiniu pfant.
 ich sol iuch selbe leiten in daz Ezelen lant.'

Der wirt wart wol bereitet mit fünf hundert man 1
 ze rossen und ze kleidern: die fuort er mit im dan
 in vrölichem muote zuo der höchgezît,
 der deheiner nimmer mëre kom ze Bechelären sît.

Mit kusse minnecliche der wirt dô dannen schiet; 2
 alsô tet ouch Gîselher, als im diu liebe riet:
 mit umbeslozzen armen si trûten schœniu wip.
 daz muose sît bewâinen vil maneger juncfrowen lip.

Vil venster wart entslozzen und wît ûf getân: 3
 der wirt mit sînen mannen zen rossen wolde gân.
 in wæn ir herzen sageten diu krefteclichen sêr,
 daz si der lieben friunde dar nâch gesâhen nimmer mêr.

Nâch ir lieben friunden genuoge hêten leit: 4
 dô weinten âne mâze vil frowen und manec meit.
 doch riten si mit freuden nider über sant
 ze tal bi Tuonouwe unz in daz hiunische lant.

Dô sprach zen Burgonden der ritter unverzaget, 5
 Ruedegêr der edele: 'jâ suln niht sîn verdaget
 Ezeln disiu mære, daz wir zen Hiunen kômen,
 und ouch mîne frouwen: sine hânt sô liebes niht vernomen.'

Ze tal durch Oesteriche vil manec bote reit: 6
 den liuten allenthalben wart daz wol geseit,
 daz die herren kômen von Wormez über Rîn.
 dem Ezelen ingesinde kunde lieber niht gesîn.

Die boten für strichen mit disen mæren: 7
 daz die Nibelunge zen Hiunen wæren:
 'du solt si wol enpfâhen, Kriemhilt, frowe mîn:
 dir koment nâch grôzen êren her die stolzen brüeder dîn.'

Dô diu küneginne vernam diu mære, 1
 ir begunde entwichen ein teil ir swære:
 von ir vater lande kom ir vil manec man,
 dâ von der künec Ezele vil manegen jâmer sit gewan.

Si gedâhte tougenliche 'noch möhte es werden rât. 2
 der mich an minen freuden alsô gepfendet hât,
 mag ich daz gefüegen, ez sol im leide ergân
 ze dirre hôchgezîte: des ich vil guoten willen hân.

Ich solz alsô schaffen, daz min räche ergê 3
 in dirre hôchgezîte, swiez dar nâch gestê,
 an sinem argen lîbe, der mir hât benomen
 vil der minen wünne: des sol ich nu ze gelte komen.'

XXVIII AVENTIURE

WIE DIE NIBELUNGE ZE EZELN BÜRGE KOMEN, UND WIE
 SI DA ENPFANGEN WURDEN.

Dô die Nibelunge kômen in daz lant; 4
 dô vrieschez von Berne meister Hildebrant:
 er sagtez sime herren: ez wâs im grimme leit:
 er bat in wol enpfâhen die kûenen ritter gemeit.

Dô hiez der starke Wolfhart bringen in diu marc: 5
 dô reit mit Dietriche vil manec recke starc,
 dâ si se enpfâhen wolden, zuo zin an daz velt:
 dâ hêtens ûf gebunden vil manec hêrlîch gezelt.

Dô si von Tronege Hagene yerrest komen sach, 1
 zuo den sînen herren der helt vil balde sprach
 'nu sult ir snellen degene von dem sedele stân,
 und gêt in hin begegene, die iuch hie wellent empfân.

Dort kumt her ein gesinde, daz ist mir wol bekant: 2
 ez sint vil snelle degene von Amelunge lant:
 die fueret der von Berne. si sint vil hôchgemuot.
 ir sultz in wol erbieten: daz rât ich.' sprach der degen guot.

Dô stuonden von den rossen - daz was vil michel reht - 3
 nider mit Dietrîche manec ritter unde kneht.
 si giengen zuo den gesten dâ man die helede vant:
 si gruoçten minneclîche die von Buregonden lant.

Dô si der herre Dietrîch zuo zin komen sach, 4
 beide liebe unde leide im dar an geschach.
 er weste wol diu mære: ir reise was im leit.
 er wânde, ez weste Ruedegêr, daz erz hête in geseit.

'Sît willekomen, her Gunther, Gêrnôt und Giselher, 5
 Hagen unde Dancwart: sam sî ouch Volkêr,
 und alleç iwr gedigene. den Sîvrîdes tôt
 weinet mîn frou Kriemhilt noch dicke in angestlîcher nôt.'

'Si mac vil geweinen?' - sprach dô Hagene - 6
 'er lît vor manegem jâre ze tôde erslagene.
 den kûneç von den Hiunen, den si genomen hât,
 den sol si nu minnen: Sîvrit sô gâhes niht erstât.'

'Tôt des kûenen recken lâçen wir nu stên. 7
 sol lebn mîn frou Kriemhilt, noch mac schade ergên:
 - sô redete von Berne der herre Dieterîch -
 'trôst der Nibelunge, dâ vor behüete du dich.'

‘Wie sol ich mich behüeten?’ - sprach der künec hêr - 1
 ‘Ezel uns boten sande - wes sol ich vrâgen mêr? -
 daz wir zuo zim kœmen her in siniu lant:
 ouch hât uns unser swester aller triuwen gemant.’

‘Sô wil ich iu wol râten:’ - sprach dô Hagene - 2
 ‘nu bitet iu diu mære baz se sagene
 den herren Dietrichen und sine helde guot,
 daz si iuch lâzen wizzen der frowen Kriemhilde muot.’

Dô giengen sunder sprâchen die dri küneger rich, 3
 Gunther unde Gêrnôt und ouch her Dietrich.
 ‘nu sage uns, von Berne vil edel ritter guot,
 wie dir si gewizzen der frowen Kriemhilde muot?’

Dô sprach der vogt von Berne ‘waz sol ich iu mære sagen? 4
 wan alle morgen frûeje weinen unde klagen
 hœre ich vil jâmerliche daz Ezeln wip
 dem richen got von himele des starken Sîvrides lip.’

‘Ez ist et unerwendet,’ - sprach dô der spileman, 5
 Volkêr der vil kûene - ‘daz wir vernomen hân.
 wir suln ze hove rîten, und suln daz besehn,
 waz uns snellen degenen müge zen Hiunen geschehn.’

Die kûenen Burgonden hin ze hove rîten: 6
 si kômen herrenliche nâch ir landes siten.
 dô wundert dâ zen Hiunen vil manegen kûenen man
 umbe Hagenen von Tronege, wie der wære getân.

Durch daz man saget mære - des was im genuoc - 7
 daz er von Niderlanden Sîvriden sluoc,
 sterkest aller recken den Kriemhilde man:
 des wart michel vrâgen ze hove nâch Hagenen getân.

Der helt was wol gewahsen, daz ist al wâr: 1
grôz was er zen brüsten, gemischet was sîn hâr
mit einer grisen varwe; diu bein im wâren lanc,
und eyslich sîn gesihene: er hête hêrlîchen ganc.

Dô hiez man herbergen vil manegen küenen man. 2
daz gesinde von dem Rîne wart gesundert dan:
daz riet diu küneginne, diu in argen willen truoc.
dâ von man sît die knehte an der herberge sluoc.

Dancwart, Hagenen bruoder, der was marschalch: 3
der künec im sîn gesinde vil vilzêlich bevalch,
daz er ir vollecliche mit spise solde pfegen.
daz tet dô willeclîche mit triwen der vil küene degene.

Kriemhilt diu küneginne mit ir gesinde gie 4
dâ si die Nibelunge in valschem muote enpfie:
si kuste Giselheren und nam in bî der hant.
dô daz gesach Hagene, den helm er vaster gebant.

'Nâch sus getânem gruoze' - sprach dô Hagene - 5
'mugen sich bedenken wol snelle degene:
man grüezet sunderlingen die fürsten und ir man.
wir hân niht guoter reise zuo dirre hôchgezite getân.'

'Nu sît' - sprach si - 'willekomen, swer iuch gerne siht: 6
durch iwer selbes friuntschaft engrüeze ich iuch niht.
nu sagt, waz ir mir bringet von Wormez über Rîn,
dar umbe ir mir sô grôze soldet willekomen sîn.'

'Hêt ich gewist diu mære' - sprach dô Hagene - 7
'daz iu gâbe bringen solden degene,
ich wære wol sô rîche, hêt ich mihs baz verdâht,
daz ich iu mîne gâbe her zen Hiunen hête brâht.'

‘Nu sult ir mich der mære mære wizzen län : 1
 hort der Nibelunge war habt ir den getân ?
 der was idoch min eigen, daz ist iu wol bekant :
 den solt ir mir gefüeret hân her in Ezelen lant.’

‘Entriwen, min frou Kriemhilt, des ist vil manec tac, 2
 deich hort der Nibelunge niene gepflac :
 den hiezen mine herren senken in den Rin.
 dâ muoz er wætlîche unz an daz jungeste sin.’

Dô sprach diu küneginne ‘ich hâns ouch ê gedâht. 3
 mir ist sîn harte kleine noch her ze lande brâht,
 swi er min eigen wære und ich sîn wilen pflac.
 nâch im und sîme herren hân ich vil manegen leiden tac.’

‘Daz ist verlorn arebeit.’ - sprach aber Hagene - 4
 ‘wie möhte ich iu iht bringen? ich hân vil ze tragene
 an halsperge und an schilte, an mîme helme lieht,
 diz swert an mîner hende : des enbringe ich iu niht.’

‘Jane rede ihz niht darumbe, deich mære goldes ger; 5
 ich hâns sô vil ze gebene, deich iwer gâbe enber :
 ein mort und zwêne roube, die mir sint genomen,
 des möhte ich vil arme noch ze liebem gelte komen.’

Diu frowe hiez dô künden den recken überal, 6
 daz niemen tragen solde dehein wâfen in den sal :
 ‘ir helde, ir sult mirs ûf geben, ich sol si behalten län.’
 ‘entriwen,’ - sprach dô Hagene - ‘daz wirdet nimmer getân.

Jane ger ich niht der êren, fürsten wine milt, 7
 daz ir zen herbergen trûeget minen schilt
 und ander min gewâfen : ir sît ein künegin.
 daz enlêrte mich min vater niht; ich wil selbe kamerære sîn.’

'Owê mir der leide!' - sprach dô Kriemhilt - 1
 'war umbe wil mîn bruoder und Hagen sinen schilt
 von in niht tragen lâzen? si sint gewarnôt:
 und wesse ich wer ez tete, ich riet im immer sinen tôt.'

Des antwort in zorne der herre Dietrich. 2
 'ich binz der hât gewarnet die edeln fürsten rîch
 und Hagenen den starken, den Buregonden man.
 nu zuo, vâlendinne: du solt mihs niht geniezen lân.'

Des schamte sich vil sere daz Ezelen wip: 3
 si vorhte bitterliche den Dietriches lip.
 dô gie si von in dannen, daz si niht mêre ensprach,
 wan daz si swinde blicke an ir viande sach.

Bi henden sich dô viengen zwêne degene: 4
 daz eine was her Dietrich, daz ander Hagene.
 dô sprach gezogenliche der recke vil gemeit
 'daz iwer komen zen Hiunen daz ist mir grœzlichen leit.'

Dô stuonden bî ein ander die recken lobelich, 5
 Hagene von Tronege und ouch her Dietrich
 in grôzen zûhten manegen, die ritter wolgetân.
 daz sach der kûnec Ezele: dar umbe er vrâgen dô began.

'Diu mære ich wiste gerne,' - sprach der kûnec rîch - 6
 'wer jener recke wære, den dort her Dietrich
 sô friuntlich enpfæhet? er treit vil hôhen muot:
 swer sîn vater wære, er mac wol sîn ein helt guot.'

Des antwurtem kûnege ein Kriemhilde man 7
 'er ist geborn von Tronege: sîn vater hiez Adriân.
 swie blider hie gebârte, er ist ein grimmer man:
 ich lâze iuch daz wol schouwen, daz ich gelogen niene hân.'

'Wie sol ich daz erkennen, daz er sô grimmee ist?' 1
 noch dann er niht enwiste vil manegen argen list,
 den diu küneginne an ir fründen begie,
 daz si ir mit dem lebene niht einen dannen komen lie.

'Wol erkande ich Adriänen: der was min man. 2
 lob und michel êre er hie bi mir gewan.
 ich machet in ze ritter und gab im min golt:
 Helche diu getriuwe was im inneelichen holt.

Dâ von ich wol erkenne allez Hagenen sint. 3
 ez wurden mine gîsel zwei wâtlichiu kint,
 er und von Spâne Walther: die wuohsen hie ze man.
 Hagenen sande ich widere: Walther mit Hiltegunde entran.'

Er gedâhte langer mære, diu wâren ê geschehn: 4
 sinen friunt von Tronege den hêt er reht ersehn,
 der im in siner jugende vil starken dienest bôt.
 sît frumter im in alter vil manegen lieben friunt tôt.

XXIX AVENTIURE

WIE HAGENE UND VOLKER VOR KRIEMHILDE SAL SAZEN.

Dô schieden sich die zwêne recken lobelich, 5
 Hagen von Tronege und ouch her Dietrich:
 dô blickt über ahsel der Gunthers man
 nâch einem hergesellen, den er vil schiere dô gewan.

Er sach den videlære bi Giselhere stên, 1
 Volkêrn den vil küenen: den bat er mit im gên;
 wander vil wol erkande den sînen grimmen muot.
 er was an allen tugenden ein ritter küen unde guot.

Noch liezen si die herren ufem hove stên. 2
 niwan si einen zwêne di sach man dannen gên
 über den hof vil verre für ein palas wit:
 die izerwelten beide vorhten niemannes nit.

Si gesäzen vor dem huse gegen eime sal, 3
 der was Kriemhilde, uf eine banc zetal:
 dô lûhte in vor ir lîbe ir hêrlich gewant.
 genuoge die si sähen si hêten gerne bekant.

Alsam tyer diu wilden wurden gekapfet an 4
 die übermüeten helde von manegem Hiunen man.
 do ersach si durch ein venster daz Ezeln wip:
 des wart dô vil trüebe der frowen Kriemhilde lip.

Ez mante si ir leide: weinen si began. 5
 des hête michel wunder die Ezeln man,
 waz ir sô snelle ertrüebet hêt ir hôhen muot.
 si sprach 'daz hât Hagene, ir helde küene unde guot.'

Si sprâchen 'frowe hêre, wie ist daz geschehn? 6
 wir habn iuch niwlîche sô frô gemuot gesehn:
 niemen ist sô küene, swerz iu hât getân,
 heizet irz uns rechen, ez sol im an sin lebn gân.'

'Daz wolde ich immer dienen, swer reche miniu leit: 7
 allez daz er wolde, des war ich im bereit.
 ich biut mich iu ze fûezen:' - sprach des kûneges wip -
 'rechet mich an Hagene, daz er verliese den lip.'

Dô garten sich zehanden wol sehzec küener man 1
 durch der frowen liebe: si wolden hin gân
 und wolden slahen Hagenen, den vil küenen man,
 und ouch den videlære: daz wart mit râte getân.

Dô diu küneginne ir schar só kleine sach, 2
 in eime grimmen muote si zen helden sprach
 'des ir dâ habt gedingen, des sult ir abe gân:
 jane durfet ir sô ringe nimmer Hagenen bestân.

Swie starc und swie küene der von Tronege si, 3
 noch ist verre küener der im dâ sitzet bi,
 Volkêr der videlære: der ist ein übel man.
 jane sult ir die degene niht sô lîhte bestân.'

Dô si daz gehörten, dô garte sich ir mër, 4
 driu hundert sneller recken. diu küneginne hêr
 was des vil genæte, daz si geræche ir leit:
 dâ von wart sit den degenen vil michel arebeit bereit.

Dô si nu wol gewâfent ir gesinde sach, 5
 zuo den snellen degenen diu küneginne sprach
 'nu bîtet eine wîle, ir sult noch stille stân:
 jâ wil ich under krône mit iu zuo mînen vinden gân.

Und hœret itewîze, waz mir hât getân 6
 Hagen von Tronege, der Gunthers man:
 ich weiz in wol sô küenen, daz er mir lougent niht.
 sô ist ouch mir unniære, swaz im darumbe geschicht.'

Dô sach der videlære, ein vil küene man, 7
 die edeln küneginne ab einer stiegen gân
 nider ûz eime hûse. als er daz gesach,
 der vil wîse recke zuo sîme hergesellen sprach

'Nu schowet, friunt Hagene, wâ si her gât, 1
 diu uns in untriuwen inz lant geladet hât:
 ich gesach mit küneginne nie sô manegen man,
 die swert enhende trüegen, alsô striteclichen gân.

Wizzet ir, friunt Hagene, daz si iu sîn gehaz, 2
 sô rât ich iu mit triuwen, ir hüetet deste baz
 des libes und der êren: jâ dunket ez mich guot.
 als ich mich versinne, si sint vil übele gemuot.

Und sint ouch sumeliche zen brüsten alsô wit: 3
 swer sîn selbes hüete, der tuo daz enzit:
 ich wæn si under siden die vesten prünne tragen.
 waz si dâ mite meinen, daz kan ich niemen gesagen.'

Dô sprach in zornes muote der vil küene man 4
 'ich weiz wol daz ez allez ist uf mich getân,
 daz si diu liechten wâfen tragent an der hant.
 vor den möhte ich geriten noch in der Burgonden lant.

Nu saget mir, friunt Volkêr, welt ir mir gestân, 5
 ob mit mir striten wellent die Kriemhilde man,
 daz lâzet ir mich hœren, als liebe als ich iu sî:
 ich won iu immer mære mit triwen dienstlichen bi.'

'Ich hilf iu sicherlîchen,' - sprach dô der spileman - 6
 'ob ich uns hie begegene sâhe enküene gân
 mit allen sînen recken, die wile ich leben muoz
 sô entwîche ich iu durch vorhte ûz helfe nimmer einen fuoz.'

'Nu lône iu got von himlele, vil edel Volkêr: 7
 ob si mit mir striten, wes bedorft ich danne mêr?
 sît ir mir helfen wellet, als ich vernomen hân,
 sô suln dise degene vil gewerlîchen gân.'

‘Nu stên wir von dem sedele:’ - sprach dô der spileman - 1
 ‘si ist ein küneginne, und lân si für gân:
 bieten ir die êre, si ist ein edel wip;
 dà mit ist ouch getiuret an zûhten unser beider lip.’

‘Nein, durch mine liebe:’ - sprach aber Hagene - 2
 ‘sô wolden lihte wânen dise degene,
 daz ihz durch vorhte tæte, und solde ich hin gân.
 ine wil durch ir deheinen nimmer von dem sedel stân.

Jâ zimt ez uns beiden zwære lâzen baz: 3
 zwiu solde ich den êren, der mir ist gehaz?
 daz entuon ich nimmer die wil ich hân den lip.
 jane ruoche ich waz mich hazzet des künec Ezeln wip.’

Hagene der starke der leit über bein 4
 ein vil liehtez wâfen, ûz des knopfe erschein
 ein vil liehter jaspes, grüener danne ein gras:
 wol erkandez Kriemhilt, daz ez è Sivrides was.

Dô si daz swert erkande, des gie si michel nôt. 5
 sîn gehilze daz was guldîn, diu scheidte porten rôt.
 ez mante si ir leide: weinen si began.
 ich wân ez hête Hagene ir ze reizen getân.

Volkêr der vil küene zôch nâher uf der bane 6
 einen videlbogen starken, michel unde lanc,
 gelich eime scarpfen swerte, vil lieht unde breit:
 dô sâzen unervorhten die zwêne degene gemeit.

Nu dûhten sich sô hêre die zwêne küene man, 7
 daz si niht enwolden von dem sedele stân
 durch deheine vorhte: des gie in an den fuoz
 diu edel küneginne und bôt in vintlichen gruoç.

Si sprach 'nu sagt mir, Hagene, wer hât nâch iu gesant, 1
 daz ir getorstet rîten her in ditzê lant
 zuo alsô starken leiden, und ich von iu hân?
 hêt ir rehte sinnê, sô hêt irz pillîche lân.'

'Nâch mir ensande niemen?' - sprach dô Hagene - 2
 'man ladete her ze lande drie degene:
 die heizent mîne herren, sô bin ich ir man.
 deheiner hovereise bin ich vil selten ie bestân.'

Si sprach 'nu saget mir mêre, warumbe tât ir daz, 3
 daz ir daz habt verdienet, daz ich iu bin gehaz?
 ir sluoget Sivride, den mînen lieben man:
 des ich unz an mîn ende immer guoc ze weinen hân.'

'Waz sol der rede mêre?' - sprach er - 'ir ist genuoc : 4
 ich binz et aber Hagene, der Sivriden sluoc,
 einen helt ze sînen handen. wie sêre er des engalt,
 daz diu frowe Kriemhilt die schœnen Prûnhilde schalt!

Ez ist et âne lougen, kûneginne rîch : 5
 ich hân es alles schulde, des schaden schedelîch.
 nu rechez swer der welle, ez si wîp oder man:
 ih'n wolde danne liegen, ich hân iu leides vil getân.'

Si sprach 'nu hœrt, ir recken, wâ er mir lougent niht 6
 aller mîner leide: swaz im dâ von geschîht,
 daz sol mir sîn unmare, ir Ezeln man.'
 die übermüeten degene sâhen vaste ein ander an.

Swer den strît dâ hûebe, sô wære dâ geschœhn, 7
 daz man den zwein gesellen der êren müese jehn,
 wan siz in stürmen hêten vil dicke wol getân.
 des sich jene vermâzen, durch vorhte muosen si daz lân.

Dô sprach ein der recken 'wes seht ir mich an? 1
 daz ich ê dô lobte, des wil ich abe gân,
 durch niemannes gâbe verliesen minen lip:
 jâ wil uns verleiten des künec Ezeln wip.'

Dô sprach aber ein ander 'des selben hân ich muot. 2
 der mir gæbe türne von rôtem golde guot,
 disen videlære wolde ich niht bestân,
 durch sine swinde blicke, die ich an im gesehn hân.

Ouch erkenne ich Hagenen von sinen jungen tagen: 3
 des mac man von dem reeken lihte mir gesagen.
 in zwein und zweinzec stürmen hân ich in gesehn,
 dô vil maneger frouwen ist herzenleide geschehn.

Er und der vôn-Spâne die trâten manegen stic, 4
 dô si hie bi Ezelen vâhten manegen wic
 zen êren dem küneger. des ist von im vil geschehn:
 dar umbemoz man Hagene der êren wol von schulden jehen.

Dannoch was der recke sîner jâr ein kint: 5
 daz dô die tumben wâren, wie grise die nu sint!
 nu ist er komen ze witzzen und ist ein grimme man:
 ouch treit er Palmungen. dô vor enkûnde niht gestân.'

Dâ mite was gescheiden, daz dô niemen streit: 6
 dô wart der küneginne vil herzenliche leit.
 die helde kêrten dannen: jâ vorhten si den tût
 von dem videlære. des gie in wêrliche nôt.

Dô sprach der kûene Volkêr 'wir hân daz wol ersehn, 7
 daz wir hie vînde vinden, als wir ê hörten jehn.
 wir suln zuo den künegen hin ze hove gân:
 sone tar unser herren mit strîte niemen bestân.

Wie dicke man durch vorhte manegiu dinc verlât, 1
 swâ sô friunt friunde friuntlich gestât,
 und hât er guote sinne, daz erz wisliche tuot!
 schade vil maneges mannes wirt von sinnen wol behuot.

‘Nu wil ich iu volgen.’ sprach dô Hagene. 2
 si giengen dâ si funden vil der degene
 in grôzern antpfange noch an dem hove stân:
 Volkêr der vil küene lûte rüefen began.

Er sprach zuo sînen herren ‘wie lange welt ir stên, 3
 daz ir iuch lâzet dringen? ir sult ze hove gân:
 und heret an dem küenege, wi der si gemuot.’
 dô sach man sich gesellen die helde küen unde guot.

Der fürste von Berne der nam an die hant 4
 Gunthern den rîchen von Burgonden lant,
 Irenvrit Gêrnôten, einen küenen man:
 dô sah man Gîselheren ze hove mit sînem sweher gân.

Swie iemen sich gesellete und ouch ze hove gie, 5
 Volkêr unde Hagene geschieden sich nie,
 niwan in eime sturme an ir endes zît:
 daz muosen beweinen vil schône juncfrowen sît.

Dô sach man mit den küenegen hin ze hove gân 6
 ir edeln ingesindes tûsent küener man:
 dar über sehzee recken mit in wâren komen;
 die hêt in sîme lande der küene Hagene genomen.

Hâwart und ouch Irinc, zwêne ûz erwelte man, 7
 die sah man friuntliche bî den küenegen gân:
 Dancwart unde Wolfhart die hêten sich bewegen,
 man sach si grôzger tugende in ir übermuote pflegen.

Dô der vogt von Rîne in den palas gie, 1
 Ezele der rîche daz niht langer lie,
 er spranc von sîme sedele, als er si komen sach:
 ein gruoꝝ sô rehte schœne von kûnege nie mêr geschach.

‘Sit willekomen, her Gunther, und ouch her Gêrnôt, 2
 und iwer bruoder Gîselher, dem ich mîn dienst ebôt
 mit triwen vlîzeclîche ze Wormez über Rîn,
 und allez daz gedigene sol mir willekomen sîn.

Nu sît uns grôze willekomen, ir zwêne degene, 3
 Volkêr der kûene und ouch her Hagene,
 mir und mîner frouwen her in ditze lant:
 si hât in grôzen triuwen vil dicke mich umbe iuch gemant.’

Dô sprach der starke Hagene ‘daz haben wir wol vernomen. 4
 wêr ich durch mîne herren zen Hiunen niht bekommen,
 sô wêr ich iu zen êren geriten in daz lant.’
 dô nam der wirt vil edele die lieben geste zehant,

Und brâhte si zem sedele, dà er selbe saz. 5
 dô schancte man den gesten - mit vlîze tet man daz -
 in wîten goldes schâlen môraz unde win,
 und bat die ellenden grôze willekomen sîn.

Dô sprach der kûneꝝ der Hiunen ‘des wil ich iu verjehn, 6
 mirn kunde in disen zîten lieber niht geschehn,
 denne ouch an iu, recken, daz ir uns her sît-komen:
 des ist mîner frouwen michel trûren benomen.

Mich nimt des michel wunder, waz ich iu habe getân, 7
 sô manegen gast vil edelen den ich gewonnen hân,
 daz ir nie komen ruochet her in mîniu lant.
 daz ich iuch nu gesehn hân, daz ist zen vreuden mir gewant.’

Des antwurt Ruedegêr, ein ritter hôch gemuot, 1
 'ir müget si sehn gerne: ir triwe diu ist guot,
 der mîner frowen mâge sô schœne kûnnen pflegen.
 si bringent iu ze hûse vil manegen wætlichen degen.'

An sunewenden âbent, als wir hân vernomen, 2
 wâren si ze Ezelen bûrge dem kûnec ze hûse komen.
 ein wirt nie sîne geste sô minnelîch empfie:
 dar nâch er zuo den tischen mit in vil vrœliche gie.

Ein kûnec bi sînen gesten schœner nie gesaz, 3
 man gab in volleclîche trinken unde maz:
 und allez daz si wolden, des was man in bereit.
 man hête von den degenen vil michel wunder geseit.

Ezele der rîche hêt an bow geleit 4
 sînen vlîz kostenliche mit grôzer arebeit:
 palas unde tûrne, kemenâten âne zal,
 in einer wîten bûrge, und einen hêrlichen sal.

Den hêt er heizen bouwen lanc hôch und wît, 5
 durch daz sô vil der recken in suohte zaller zît:
 ân ander sîn gesinde zwelf rîche kûnege hêr,
 und vil der werden degene hêt er zallen zîten mêr,

Denne ir kûnec ie gewünne, als ich vernomen hân. 6
 er lebt in hôher wünne von mâgen unde man.
 schallen unde dringen hêt der fûrste guot
 von manegem snellen degene: des stuont im hôhe der muot.

XXX AVENTIURE

WIE DIE KÜNEGE MIT IR RECKEN SLAFEN GIENGEN, UND WIE
IN DO GESCHACH.

Der tac der hêt nu ende und nâhet in diu naht, 1
den wegemüeden degenen: ir sorge si ane vaht.
die herren solden ruowen und an ir bette gân:
daz bereite Hagene. ez wart in schiere kunt getân.

Gunther sprach zem wirte 'got lâze iuch mit freuden lebn: 2
wir wellen varn slâfen, ir sult uns urloup gebn.
als ir uns gebietet, wir komen morgen fruo.'
er schiet von sinen gesten vil harte minneclichen duo.'

Dringen allenthalben die geste man dô sach. 3
Volkêr der küene zuo den Hiunen sprach
'wie geturret ir den recken uf die fûeze gân?
und welt irs niht iuch mâzen, sô wirt iu leide getân.

Sô slah ich eteslichem sô swâren gîgenslac, 4
hât er getriwen iemen, daz erz beweinen mac.
wan wîchet ir uns recken? jâ dunket ez mich guot.
ez heizent alle degene, und sint geliche niht genuot.'

Dô der videlære sô zorneclîche sprach, 5
Hagene der küene über ahsel sach:
er saget 'iu rætet rehte der küene spileman.
ir Kriemhilde degene, ir sult zen herbergen gân.

Des ir dâ habet willen, ich wæn ez iemen tuo.
 welt ir sîn beginnen, sô komt uns morgen fruo,
 und lât uns wegemüeden hînte haben gemach:
 jâ wæn ez von heleden mit solchem willen ie geschah.

Dô brâhte man die geste in einen witen sal,
 dar inne si sît nâmen den tœtlichen val:
 dâ funden si gerihet vil manegiu bette breit.
 in riet diu kûneginne diu aller grœzisten leit.

Vil manegen kulter spæhe von Arraz man dâ sach
 von vil liechten pfellen, und manec bedtedach
 von Arâbischen siden, sô si beste kunden sîn:
 ouch lag in uf den enden von golde hêrlîcher schîn.

Diu deckelachen hârmin vil menegiu man dâ sach,
 und ouch von swarzem zobeles, dar under si ir gemach
 des nahtes solden schaffen unz an den liechten tac.
 ein kûnec mit sînen friunden nie sô hêrlîch gelac.

‘O wê der nahtselde’ - sprach Giselher daz kint -
 ‘und owê mîner friunde, die mit mir komen sint.
 swie et ez mîn swester mir gütlich erbôt,
 ih fürhte, daz wir müezen von ir schulden ligen tôt.’

‘Nu lâzet iwer sorgen!’ - sprach Hagene der degen -
 ‘ich wil der schiltwache noch hînte selbe pflegen:
 ich behüete iuch wol mit triuwen unz uns kumt der tac,
 daz wizzet, snelle degene. sô genese swer der mac.’

Dô nigen si im alle, und sagten im des danc.
 si giengen zuo den betten: diu wîle was niht lanc,
 daz sich engestet hêten die ellenden man.
 Hagene der starke sich dô wâfen began.

Dô sprach der videlære, Volkêr der degene, 1
 'versmähtez iu niht, Hagene, sô wolde ich mit iu pflegen
 der schiltwache hînte unze morgen fruo.'
 der helt vil minneclîche danete Volkêre duo.

'Nu lône iu got von himele, vil edel Volkêr. 2
 zallen mînen sorgen sone gert ich niemens mêr
 niwan iuch aleine, swâ ich hête nôt:
 ich sol ez wol verdienen, mich enwendes der tôt.'

Dô garten si sich beide in lîchtez ir gewant: 3
 dô nam ir ietewedere den schilt an sine hant,
 und giengen ûz dem hûse für die tür dô stân.
 dô huoten si der degene: daz was mit triuwen getân.

Volkêr der vil snelle zuo des sales want 4
 sînen schilt den guoten leinte von der hant.
 dô gie er hin widere, die videln er genam;
 dô dîenter sînen friunden als ez dem degene gezam.

Under die tür des hûses saz er uf den stein: 5
 küener videlære diu sunne nie beschein.
 dô im der seiten dœnen sô suozlîch erklanc,
 die stolzen ellenden sagten im des grôzen danc.

Dô klungen sîne seiten, daz al daz hûs erdôz: 6
 sîn ellen zuo der fuoge, diu beide wâren grôz.
 senfter unde sîezer videln er began:
 dô enswebter an dem bette vil manegen sorgenden man.

Dô si wol entslâfen wâren unde er daz ervant, 7
 dô nam der degene widere den schilt an sine hant:
 dô gie er ûz dem hûse für die türe stân
 und huote sîner friunde vor den Kriemhilde man.

Nâch dem êrsten slâfe - i'n wæn ez ê geschach - 1
 Volkêr der vil küene einen helm schinen sach
 verre ûz einer vinster: die Kriemhilde man
 wolden an den gesten schaden gerne hân getân.

Ê Kriemhilt dise recken hête dan gesant, 2
 si sprach 'ob irs alsô vindet, durch got sô sit gemant,
 daz ir dâ slahet niemen wan den einen man,
 den ungetriwen Hagenen: die andern sult ir lebn lân.'

Dô sprach der videlære 'nu seht, her Hagene. 3
 jane zimt mir diz mære niht ze dagene:
 jâ sih ich mit gewæfen dort her liute gân.
 als ich mich versinne, ich wæn si wellent uns bestân.'

'Nu swiget:' - sprach dô Hagene - 'lâts uns her nâher baz. 4
 ê si uns werden innen, sô wirt hie helmevaz
 mit swerten verrûcket von der mînen hant:
 si werdent hînt ir frouwen hin wider ûbele gesant.'

Êin der Hiunen recken vil schiere daz gesach, 5
 daz diu tûre was behüetet. wie balde er dô sprach
 'des wir dâ hêten willen, jane mag es niht ergân:
 ich sihe den videlære an der schiltwache stân.'

Der treit ûf sime houbte einen helm glanz, 6
 lûter unde herte, veste unde ganz:
 ouch lohent sine ringe sam daz fiur tuot.
 bî im stêt ouch Hagene: des sint die geste wol behuot.'

Zehant si widerkêrten. dô Volkêr daz ersach, 7
 zuo sime hergesellen er zorneclîchen sprach
 'lât mich zuo den recken von dem hûse gân:
 ich wil vrâgen der mære der froun Kriemhilde man.'

‘Nein, durch mine liebe.’ - sprach Hagene der degen - 1
 ‘welt ir deheines strites mit den helden pflegen,
 sô bestênt si iuch mit swerten und bringent iuch in nôt:
 sô müese ich iu helfen, wærz aller miner mâge tôt.’

Sô wir danne beide kœmen in den strît, 2
 zwêne oder viere in einer kurzen zit
 die sprûngen zuo dem hûse und tæten uns diu leit
 an den slâfenden, diu nimmer wûrden verkleit.’

Dô sprach aber Volkêr ‘sô lât doch daz geschehn, 3
 daz wir si innen bringen, daz ich si habe gesehn.
 daz des niht haben lougen die Kriemhilde man,
 daz si vil mortliche gerne hêten getân.’

Dô sprach der videlære den Hiunen vaste nâch 4
 ‘wie gêt ir sus gewâfent? war ist iu sô gâch?
 welt ir schâchen rîten, ir Kriemhilde man?
 dar sult ir mih ze helfe und minen hergesellen hân.’

Des antwurte im niemen; zornec was sîn muot: 5
 ‘pff, ir zagen bæse,’ - sprach der degen guot -
 ‘wolt ir slâfende uns ermordet hân?
 daz ist sô guoten degenen her vil selten noch getân.’

Dô wart der kûneginne rehte daz geseit, 6
 daz ir boten niht enwûrben: von schulden was ir leit.
 dô fuogte siz sit anders: vil grimme was ir muot.
 des muosen sit engelten degene kûene unde guot.

XXXI AVENTIURE

WIE DIE HERREN ZE KIRCHEN GIENGEN.

‘Mir kuolent sô die ringe:’ - sô sprach Volkêr - 1
 jâ wæn diu naht uns welle nu niht wern mër.
 ich kiusez von dem luften, ez ist vil schiere tac.
 dô wachten si der manegen, der noch slâfende lac.

Do erschein der liechte morgen den gesten in den sal. 2
 Hagen begunde vrâgen die recken überal,
 ob si zem münster wolden zuo der messe gân:
 nâch siten kristenlîchen man vil liuten began.

Si sungen ungelîche; daz dâ vil wol schein: 3
 kristen unde heiden die zugen niht einein.
 dô wolden zuo der kirchen die Gunthers man;
 si wâren von den betten al gelîche nu gestân.

Dô nâten sich die recken in alsô guot gewant, 4
 daz nie helde mære in deheines küneges lant
 bezzer kleider brâhten. daz was Hagene leit:
 er sprach ‘jâ sult ir degene hie tragen anderiu kleit.

Nu sint iu doch genuogen diu mære wol bekant. 5
 nu traget für die rôsen diu wâfen an der hant,
 für schapel wol gesteinet die liechten helme guot,
 sit wir sô wol erkennen der argen Kriemhilde muot.

Wir müezen hiute striten, daz wil ich iu sagen : 1
 ir sult für siden hemde die liechten prünne tragen,
 und für die tiefen mäntel die vesten schilde wit,
 ob iemen mit iu zürne, daz ir vil werliche sit.

Mine vil lieben herren, dar zuo måge unde man, 2
 ir sult vil willecliche zuo der kirchen gån,
 und klaget got dem rîchen sorge und iwer nôt,
 und wizzet sicherlichen daz uns nâhet der tût.

Ir sult ouch niht vergezzen swaz ir habt getân, 3
 und sult vil vlêgeliche dâ gegen gote stân.
 ir sult sîn gewarnet, recken alsô hêr :
 ez enwelle got von himele, ir vernemt messe nimmer mêr.

Sus giengen zuo dem münster die fürsten und ir man 4
 uf den vrönen kirchhof : dô hiez si stille stân
 Hagene der küene, daz si sich schieden niht.
 er sprach ja enweiz noch niemen, waz von den Hiunen uns
 geschiht.

Leget, mîne friunde, die schilde für den fuoz, 5
 und geltet, ob iu iemen biete swachen gruoz,
 mit tiefen verchwunden : daz ist Hagenen rât ;
 daz ir sô werdet funden, daz ez iu lobelichen stât.

Volkêr unde Hagene die zwêne giengen dan 6
 für daz wite münster. daz wart durch daz getân,
 daz si daz wolden wizzen, daz des küneges wip
 mit in dâ müese dringen : ja was vil grimmee ir lip.

Dô kom der wirt des landes und ouch sîn schoene wip : 7
 mit vil rîchem gewande gezieret was ir lip.
 der recken genuoge die sach man mit ir varn :
 dô kôs man hôhe stouben von der küneginne scharn.

Dô der künec Ezele alsus gewâfent sach 1
 die recken von dem Rîne, wie balde er dô sprach
 'wie sihe ich friunde mîne under helmen gân?
 mirst leit uf mîne triuwe und hât in iemen iht getân.

Ich sol in gerne bûezen, swie si dunket guot, 2
 hât iemen in beswâret daz herze und ouch den muot:
 des bringe ich si wol innen, daz ez mir ist vil leit.
 swie si mir gebietet, des bin ich alles in bereit.'

Dô sprach von Tronege Hagene 'uns hât niemen niht getân. 3
 ez ist site mîner herren, daz si gewâfent gân
 zallen hôchgezîten ze vollen drîen tagen.
 hêt uns iemen iht getân, wir soldenz iu billiche sagen.'

Wol hôt diu küneginne, waz Hagene sprach. 4
 wie rehte vintlîche si im under dougen sach!
 sine wolde doch niht melden die site von ir lant,
 swie lange si sie dâ heime mit freuden hête bekant.

Swie grimme und ouch swie starke si in vîent wære, 5
 hêt iemen gesaget Ezelen diu rehten mære,
 er hêt ez understanden, daz niht dâ wære geschehn:
 si liezenz durch ir übermuot, daz sis im wolden niht verjehîn.

Dô gie diu küneginne mit grôzer menege dan. 6
 done wolden dise zwêne idoch niht hôher stân
 drier trite breiter: daz was den Hiunen leit.
 jâ muose si sich dringen mit den degenen gemeit.

Die Ezeln kamerære dûhte daz niht guot: 7
 jâ hêten si den recken erzûrnet dô den muot,
 wan daz sine torsten vor dem künenge hêr.
 dâ was vil michel dringen, unde doch niht anders mêr.

Dô man dâ gote gediente und daz si wolden dan, 1
 dô kômen dâ zen rossen vil manec Hiunen man.
 ouch was bi Kriemhilde vil manec schœniu meit:
 wol sibem tûsent degene bi der kûneginne reit.

In des sales venster Kriemhilt gesaz 2
 mit maneger schœnen frouwen: mit freuden âne haz
 Ezele der rîche gesaz ouch zuo zir nider,
 und sâhen kurzewile von den guoten recken sider.

Nu was ouch in der marschale mit den rossen komen, 3
 Dancwart der snelle: er hêt zuo zim genomen
 sins herren ingesinde von Buregonden lant.
 diu ros man wol gesatelet den ellenden recken vant.

Dô si zen rossen kômen, die kûnege und ir man, 4
 Volkêr der kûene râten dô began,
 si solden buhurdieren nâch ir landes siten:
 des wart von degenen sît vil hêrlich geriten.

Uf den hof vil wîten kom dô manec man: 5
 Ezele unde Kriemhilt ez sâhen allez an.
 der buhurt unde schallen, diu beidiu wurden grôz
 von kristen und von heiden. wie lûtzel iemen dâ verdrôz!

Uf den buhurt kômen al zehant geriten 6
 die Dietriches recken in hôchverteclîchen siten:
 si wolden kurzewile mit den gesten hân.
 do enwolde ers in niht gunnen; ir herre hiez siz balde lân.

Mit Gunthers mannen daz spil er in verbôt. 7
 er vorhte siner degene: des gie im grôziu nôt.
 dô kômen von Bechelâren die Ruedegêres man;
 dar umbe dô der edele starke zûrnen began.

Er kom zuo zin vil balde gedrunge durch die schar 1
 und sagete sinen degenen, si wæren des gewar,
 daz in unmuote wæren die Gunthers man:
 ob si den buhurt liezen, daz wære im liebe getân.

Dô sich die von in schieden, als uns ist geseit, 2
 dô kômen dâ von Dûrengen helde vil gemeit,
 und die von Tenemarken, wol tûsent kûener man:
 von stichen sah man vliegen vil der trunzûne dan.

Hâwart und ouch Irnfrit geselleliche riten. 3
 des wæren die von Rîne in hôchverteclichen siten:
 si buten manege tjoste den von Dûrengen lant.
 des wart von stichen dûrchel vil manec hêrlîcher rant.

Dô kom ouch zuo dem schalle der herre Blædelîn 4
 mit tûsent sîner recken: die tâtten dâ wol schîn,
 wie si riten kûnden. sich huop grôz ungemach:
 Kriemhilt ez vil gerne durch leit der Buregonde sach.

Si gedâht in ir muote, als ez was nâch geschehn, 5
 'geschæhe iemen von in leide, sô mœhte ich mich versehn,
 daz ez erhaben wûrde: an den vînden mîn
 wûrde ich wol errochen: des wolde ich gar ân angst sîn.'

Schrûtân unde Gibeche âf den buhurt riten, 6
 Hornboge und Râmunc, nâch hiunischen siten.
 si hielten gein den helden ûz Buregonden lant:
 die schefte dræten hôhe mit kreften fûr des sales want.

Swes dâ iemen pflæge, sô was ez niwan schal: 7
 man hôrt von schilde stœzen palas unde sal
 harte lût erdiezen von Gunthers man.
 den lop daz sîn gesinde mit grôzen êren dâ gewan.

Dô was ir kurzewile sô lanc und ouch sô grôz, 1
 daz durch die kovertiure der blanke sweiz dô vlôz
 von den vil guoten marken, diu di helde riten.
 si suohtenz an den Hiunen in vil hôchvertlichen siten.

Dô sprach der videlære, Volkêr der kûene man, 2
 'ich wæn uns dise recken türren niht bestân.
 ich hôrt ie sagen mære, daz si uns trüegen haz:
 nune kûndeꝛ sich zer werlde zwære nimmer fûegen baz.'

'Zen herbergen fûeren' - sprach der kûneec hêr - 3
 'sol man nu di mære, unde riten danne mêr
 gegen âbende, sô des wirdet zît.
 waz, ob diu kûneginne lop den unkunden git?'

Dô sâhens einen riten sô waigerlichen hie, 4
 daz ez al der Hiunen tet deheiner nie.
 jâ mohter in den venstern wol haben herzen trût:
 er was sô wol gekleidet, sam eins vil werden ritters brût.

Dô sprach aber Volkêr 'wie möhte ich daz verlân? 5
 jener trût der frouwen muoꝛ ein gebiuze hân.
 daz kûnde niemen wenden: ez gêt im an den lip.
 jane ruoche ich ob ez zürne des kûneec Ezeln wip.'

'Nein, durch mine liebe.' - sprach der kûneec sân - 6
 'ez wîzent uns die liute, ob wir si bestân:
 ir lât ez heben die Hiunen, daz fûeget sich noch baz.'
 danoch der kûneec Ezele bî der kûneginne saz.

'Ine mag es niht gelâzen.' sprach dô Volkêr. 7
 den buhurt reit er widere: mit volleclicher ger
 stach er dem richen heiden daz sper durch sinen lip.
 daz sah man sît beweinen beide maget unde wip.

Dô ruchte hurtecliche Hagene nâch im dan: 1
 mit sehzec sîner degene rîten er began
 nâch dem videlære dâ diu tjust geschach.
 Ezel unde Kriemhilt ez bescheidenlîche sach.

Done wolden ouch die kûnege den ir spileman 2
 bî den vîanden niht âne helfe lân:
 dâ wart von tûsent heleden vil kûnsteclich geriten.
 si tâten daz si wolden in vil hôchvertlichen siten.

Dô der rîche Hiune ze tôde was erslagen, 3
 man hôrte sine mâge weinen unde klagen:
 dô vrâgt al daz gesinde 'wer hât ez getân?'
 dô sprâchen die daz sâhen 'daz hât der starke spileman.'

Nâch swerten und nâch schilden riefen dâ zehant 4
 des maregrâven mâge von der Hiunen lant:
 dô wolden si den spileman ze tôde erslagen hân.
 der wirt ûz eime venster sere gâhen dô began.

Dô huop sich von den liuten allenthalben schal. 5
 die Guntheres recken erbeizten überal:
 diu ros zerucke stiezen die kûnege und al ir man.
 dô kom der kûnec Ezele: der helt ez schaiden began.

Ein des Hiunen mâge, den er dâ bî im vant, 6
 ein vil starkez wâfen bracher im ûz der hant;
 dô sluogers alle widere, wan im was vil zorn:
 'wie hêt ich minen dienst an disen heleden verlorn,

Ob ir nu disen spileman hêt darumbe erslagen! 7
 ich hiez iuch alle hâhen, daz wil ich iu sagen:
 ich sah vil wol sîn rîten, dô er den Hiunen stach,
 deiz âne sînen willen von eime strûche geschach.

Ir müezet mine geste vride lāzen hān.¹
 dô wart er ir geleite. diu ros diu zôch man dan
 zorn er herbergen: si hēten manegen kneht,
 die in ze dienste wāren mit allem vlīze gereht.

Der wirt mit sinen friunden in den palas gie:²
 zorn er mēr deheinen dā niht werden lie.
 dô rihte man die tische, daz wazzer man in truoc:
 dô hēten die von Rīne der starken vīnde dā genuoc.

Swie leit ez Ezeln wære, gewāfent manege schar³
 sach man nāch fürsten dringen, und wol ze vlīze gar,
 dā si zen tischen giengen, durch der geste haz:
 ir māt si rechen wolden, ob sich gefüegen künde daz.

'Sit ir gewāfent gerner ezzet danne blōz,⁴
 - sprach der wirt des landes - 'diu unzuht ist ze grōz;
 swer aber mīnen gesten hie tuot deheiniu leit,
 ez gēt im an sīn houbet: daz si iu Hiunen geseit.'

E die herren gesæzen, daz was harte lanc.⁵
 diu Kriemhilde sorge si al ze sere twanc:
 si sprach 'herre Dietrich, ich suoches dīnen rāt,
 helfe und genāde: mīn dinc mir angestlichen stāt.'

Dô sprach für sīnen herren Hildebrant, der ellens rich,⁶
 'swer sleht die Nibelunge, der tuot ez āne mich,
 durch deheines schatzes liebe, ez mag im werden leit:
 si sint noch unbetwungen, die snellen degene gemeit.'

Si sprach 'jā hāt mir Hagene alsô vil getān:⁷
 er morte Sivriden, den mīnen lieben man.
 der in ūz den andern schiede, dem wær mīn golt bereit:
 engultes ander iemen, daz wær mir inneclichen leit.'

Dô sprach meister Hildebrant 'wie künde daz geschehn, 1
daz man in bî in slüege? ich lieze iuch daz gesehn :
ob man den helt bestüende, sich hüebe lîht ein nôt,
daz arme unde rîche dar umbe müesen ligen tôt.'

Dô sprach in sînen zühten dar zuo her Dietrich 2
'die bete lâ belîben, kûneginne rîch.
mir habent dîne mâge der leide niht getân,
daz ich die edeln degene mit strîte welle bestân.

Diu bet dich lützel êret, vil edelez fürsten wîp, 3
daz du dînen mâgen rætest an den lîp :
si kômen ûf genâde her in ditze lant.
Sîvrit ist unerrochen von der Dietriches hant.'

Dô si an dem Bernære den willen niht envant, 4
dô lobtes alsô balde an Blædelînes hant
eine wîte marke, die Nuodunc ê besaz :
sît dô sluogen in Danewart, daz er der gâbe gar vergaz.'

Si sprach 'du solt mir helfen, herre Blædelîn : 5
ez sint in disem hûse die viande mîn,
die Sîvriden sluogen, den mînen lieben man.
der mir daz hilfet rechen, dem bin ih immer undertân.'

Des antwurt ir Blædel dâ er bî ir saz 6
'jane getarr ich dînen mâgen gerâten keinen haz,
wande si mîn bruoeder bî im gerne siht :
ob ich si bestüende, der kûnec vertrûege mir sîn niht.'

'Neinâ, herre Blædel, ich bin dir immer holt : 7
jâ gib ich dir dar umbe mîn silber und mîn golt,
und eine schœne vrouwen, daz Nuodunges wîp :
sô mahtu gerne triuten den ir vil minneclîchen lîp.

Daz lant zuo den bürgen soltu haben dir, 1
vil tiurlicher recke. du solt gelouben mir,
daz ich dich sicherliche alles des gewer,
daz ich dir hie benennet hân, ob du leistes mine ger.'

Dô der herre Blœdel die miete vernam, 2
und daz im durch ir schœne diu frowe wol gezam,
mit strite wânder dienen daz minnecliche wip.
dar umbe muosen recken mit im verliesen den lip.

Er sprach 'man sol geswigen der rede überal: 3
ê man es werde inne, sô heb ich einen schal.
ez muoz arnen Hagene, swaz er iu hât getân,
oder ich wil dar umbe mînen lip verlorn hân.'

'Nu wâfent iuch,' - sprach Blœdel - 'alle mine man,' 4
wir suln den vianden in ir herberge gân.
des wil mich niht erlâzen daz Ezeln wip:
dar umbe suln wir degene alle wâgen den lip.'

Dô diu küneginne Blœdelînen lie 5
in des strîtes willen, ze tische si dô gie
mit Ezele dem kûnege und ouch mit sînen man:
si hête swinde râte an die geste getân.

Wie si ze tische gienge, daz wil ich iu sagen. 6
man sach dâ kûnege rîche krône vor ir tragen:
vil manegen hôhen fürsten und manegen werden degn,
die sah man grôzzer zûhte vor der kûneginne pflegen.

Der wirt der schuof den gesten den sedel überal, 7
den hôhsten und den besten, zuo zim in den sal.
den kristen und den heiden ir spise er underschiet.
man gab genuoc in beiden, als ez der wise kûnege beriet.

Ir ander ingesinde zen herbergen äzen : 1
den wären truhsæzen ze dienste läzen,
die muosen ir spise wol ze vlize pflegen.
ir wirtschaft und ir freude wart sit mit jämer widerwegen.

Dô die fürsten gesezzen wären überall 2
und nu begunden ezzen, dô wart in den sal
getragen zuo den fürsten daz Ezeln kint :
dâ von der küneec rîche gewan vil starken jämer sint.

Dar giengen an der stunde vier Ezeln man : 3
si truogen Ortlieben, den jungen küneec, dan
zuo der fürsten tische, dâ ouch Hagene saz,
des muosez kint ersterben durch sinen mortlichen haz.

Dô der küneec rîche sinen suon ersach, 4
zuo sinen konemâgen er gütliche sprach
'nu seht, ir friunde mîne, diz ist mîn einec suon
und ouch iwer swester : der magiu noh vil dienste tuon.

Gevæhter nâch dem künne, er wirt ein küene man, 5
rîch und ouch vil edele, starc und wolgetân.
leb ich deheine wîle, ich gib im drîzec lant :
sô magiu wol gedienen des jungen Ortliebes hant.

Dar umbe ich bite gerne iuch lieben friunde mîn, 6
swenne ir ze lande widere rîtet an den Rîn,
sô sult ir mit iu füren den iwern swester suon,
und sult ouch an dem kinde vil genædeclîche tuon.

Ziehet in zen èren unz er werde ze man. 7
hât iu in den landen iemen iht getân,
daz hilfet er iu rechen : daz habt âf mînen lîp.
die rede hõrt ouch Kriemhilt, des küneec Ezeln wîp.

Im solden wol getrouwen diese degene, 1
 gewühser zeinem manne; - sô sprach Hagene -
 'doch ist der künec junge sô veilich getân:
 man sol mich sehen selten ze hove nâch Ortliebe gân.'

Der künec an Hagenen blichte: im was diu rede leit. 2
 swie niht dar umbe en redete der fürste vil gemeit,
 ez betrübete im sîn herze und beswârt im den muot.
 dô was der Hagenen wille niht ze kurzewile guot.

Ez tet den fürsten allen mit dem küneger wê 3
 daz Hagen von sîme kinde hêt gesprochen ê:
 daz siz versitzen solden, daz was in ungemach.
 sine wessen niht der mære, waz von dem recken sit geschach.

Genuoge, di ez hórten und im doch wâren gram, 4
 in hêten gerne bestanden: ouch hêt der künec alsam,
 getorster von sînen êren; sô wâr ers komen in nôt.
 sit tet im Hagene mære: er sluog in vor sînen ougen tôt.

XXXII AVENTIURE

WIE BLEDEL MIT DANCWART AN DER HERBERGE STREIT.

Die Blædelines recken die wâren alle gar: 5
 mit tûsent halspergen huoben si sich dar,
 dâ Danewart mit den knehten ob den tischen saz,
 dô huop sich under degenen mort und nîtlicher haz.

Alsô der herre Blœdel für die tische gie, 1
 Danewart der marschalch in güetlich enpfie:
 'willekomen her ze hûse, mîn her Blœdelin.
 waz iwer reise meine, des wundert gar die sinne mîn.'

'Jane darftu mih niht grüezen:' - sprach dô Blœdelin - 2
 'wan ditze komen daz mine daz sol dîn ende sîn,
 durch Hagenen dînen bruoder, der Sivriden sluoc:
 des engiltestu zen Hiunen, und ander degene genuoc.'

'Neinâ, herre Blœdel:' - sprach dô Danewart - 3
 'sô möhte uns balde riuwen disiu hovevart.
 ich was ein vil kleiner knecht, dô Sivrit vlôs den lip:
 jane weiz ich waz mir wizet des küene Ezeln wip.'

'Jane weiz ich dir der mære nimêr ze sagene: 4
 ez tâten dîne mâge, Gunther und Hagene.
 nu wert iuch vil ellenden: ir kunnet niht genesen,
 ir müezet mit dem tôde pfant daz Kriemhilde wesen.'

'So enwelt ir niht erwinden?' - sprach dô Danewart - 5
 'sô riwet mich mîn vlêhen: daz wære baz verspart.'
 der snelle degen küene von dem tische spranc:
 er zôch ein scharpfez wâfen, daz was michel unde lanc.

Dô sluoger Blœdeline einen swinden swertes slac, 6
 daz imz houbet mit helme vor den füezen lac:
 'daz si dîn morgengâbe' - sprach Danewart der helt -
 'zuo Nuodunges briute, die du ze freuden hâst erwelt.

Si mac sich morgen mâhelen einem andern man: 7
 wil er die brâtmiete, ez mac im sam ergân.'
 ein getriwer Hiune hêt im daz geseit,
 daz in diu küneginne riet sô grœzlichiu leit.

Dô sâhen Blœdelînes man, ir herre lac erslagen : 1
 daz enwolden si den gesten langer niht vertragen.
 mit ûf erburten swerten si sprungen für diu kint
 in eime grimmen muote. jâ gerowez sie sint.

Vil lûte rief der marschalc al die knappen an 2
 'ir seht wol, edeln knechte, wie ez wil umbe gân.
 nu wert iuch ellenden, als iuch des twinget nôt,
 daz ir frumecliche âne schande liget tût.'

Die swerte niht enhêten, die reichten für die banc : 3
 si huoben ûz den fûezen vil manegen schamel lanc.
 der Buregonden knechte in wolden niht vertragen :
 dâ wart von swæren stüelen durch helme biulen vil geslagen.

Wie grimme sich dô werten diu ellenden kint ! 4
 si triben ûzem hûse die gewâfenden sint :
 doch beleib ir tût dar inne fünf hundert oder baz.
 dô was daz ingesinde von bluote rôt unde naz.

Disiu starken mære wurden dan geseit 5
 den Ezeln recken : ez was in grimme leit,
 daz erslagen wære der herre und sine man.
 daz hêt der Hagenen bruoder mit den knechten getân.

E manz ze hove erfûnde, die Hiunen, durch ir haz, 6
 der garte sich zwei tûsent oder dannoch baz :
 si giengen zuo den knechten - daz muos et alsô wesen -
 und liezen des gesindes ninder einen genesen.

Dô die vil ungetriuwen drungen in daz gadem, 7
 dô huop sich zwischen recken vil ungefüeger kradem :
 waz half ir baldez ellen? si muosen ligen tût ;
 dar nâch in kurzen stunden huop sich engestlîchiu nôt.

Hie mugt ir hoeren wunder bi unfuoge sagen. 1
 niwen tûsent knehte die lâgen tût erslagen,
 dar über ritter zwelfe der Danewart man.
 man sach in alterseine noch bi den vianden stân.

Der schal der was gewifitet, der dôz der was gelegn. 2
 dô blichte über ahsel Danewart der degen:
 er sprach 'owê der friunde, die ich verlorn hân.
 nu muoz ich leider eine bi minen vianden stân.'

Diu swert genôte vielen uf sîn eines lip: 3
 daz muose sît beweinen vil maneges heldes wip.
 den schilt er ruchte hôher, den vezzel nider baz:
 dô frumt er vil der ringe mit bluote vliezende naz.

'Owê mir dirre leide' - sprach Adriânes kint - 4
 'nu wichent, Hiunen recken: ir lât mich an den wint,
 daz der luft erküele mih sturmemüeden man.'
 dô begunder ân ir willen in strite gegen der türe gân.

Der helt in grôzem zorne ûz dem hûse spranc. 5
 waz iteniwer swerte uf sime libe erklanc!
 die niht gesehen hêten, waz wunders tet sîn hant,
 die muosen dâ beliben von dem ûz Burgonden lant.

'Nu wolde got,' - sprach Danewart - 'môhte ich den boten hân, 6
 der minen bruoder Hagenen künde wizzen lân,
 daz ich vor disen recken stên in solher nôt:
 er hülfe mir von hinnen, oder er gelæge bi mir tût.'

Dô sprâchen Hiunen recken 'der bote muostu sîn, 7
 sô wir dich tragen tôten für den bruoder dîn:
 sô siht im êrste leide der Gunthers man.
 du hâst dem kûnege Ezelen sô grôzen schaden hie getân.'

'Nu lât die drô beliben und stêt uf hôher baz: 1
 jâ getuon ich eteslichem noch die ringe naz,
 nu wer mirz swer der welle: ich wil ze hove gân,
 und wil selbe disiu mære minen herren wizzen lân.'

Er leidete sich sô sêre den Ezeln mân, 2
 daz si in mit den swerten nu torsten niht bestân:
 dô schuzzen si der gêre sô vil in sinen rant,
 daz er in durch die swære muose lâzen von der hant.

Si wânden in betwîngen, dô er niht schildes truoc: 3
 hey, waz er tiefer wunden sît durch helme sluoc!
 des muose vor im strûchen vil manec küener man.
 darumbe lop vil grôzen der küene Dancwart gewan.

Ze beiden sinen sîten si im sprungen zuo: 4
 jâ kom ir eteslicher in den strît ze fruo.
 er gie vor sinen vînden alsam ein eberswîn
 ze walde tuot vor hunden: wie môhter küener gesîn!

Sin vart diu wart erniuwet von heizem bluote naz: 5
 jane kûnde ein einer recke gestrîten nimmer baz
 mit alsô vil der vînde, denner hête getân.
 dô muosen si in lâzen âne ir danc ze hove gân.

Truhsæzen unde schenken die hôrten swerte klanc: 6
 vil maneger dô daz trinken von der hende swanc
 und sumelîche spîse, die man ze hove truoc.
 dô kom im vor der stiegen der starken vînde genuoc.

'Wie nu, ir guoten knechte?' - sprach der müede degen - 7
 'jâ soldet ir der geste gûetliche pflegen,
 und soldet nu den herren die edeln spîse tragen,
 und liezet mich diu mære ze hove minen herren sagen.'

Swelher durch sin ellen im für die stiegen spranc, 1
 der sluoger eteslichem sô swæren swertes swanc,
 daz si durch die vorhte ûf hôher muosen stân :
 jâ hêt sin starkez ellen vil maneges ende getân.

Alsô der küene Dancwart under die türe getrat, 2
 daz Ezeln gesinde er hôher wichen bat.
 mit bluote berunnen was allez sin gewant :
 ein vil starkez wâfen daz truoger blôz an sîner hant.

Ez was reht in der wile, dô er kom für die tür, 3
 daz man Ortlieben truoc wider unde für
 von tische ze tischen den fürsten wol geborn :
 von disen starken mæren wart daz kindelin verlorn.

XXXIII AVENTIURE

WIE DANCWART DIU MÆR ZE HOVE SINEN HERREN BRAHTE.

Vil lûte rief dô Dancwart eime degene 4
 'ir sitzet al ze lange, bruoder Hagene.
 iu und got von himele klage ich unser nôt :
 ritter unde knehte sint in der herberge tôt.'

Er rief im engegene 'wer hât daz getân?' 5
 'daz hât der herre Blædel unde sine man :
 ouch hât ers niht genozzen, daz wil ich iu sagen ;
 ich hân im sin houbet mit mînen handen abe geslagen.'

‘Daz ist ein schade kleine,’ - sprach aber Hagene - 1
 ‘swâ man solhiu mære saget von degene:
 ob er von recken handen verliuset sinen lip,
 in suln deste ringer klagen wætlîchiu wip.

Nu saget mir, lieber bruoder, wie sît ir sô rôt? 2
 ich wæn ir von wunden lidet grôze nôt.
 ist er inder inne lande, derz iu hât getân?
 in erner der übel tiufel, ez muoz im an sîn leben gân.’

‘Ir seht mich wol gesunden, mîn wât ist bluotes naz: 3
 von ander manne wunden ist mir geschehn daz,
 der ich alsô manegen hiute hân erslagen,
 ob ich des swern solde, ine kûndeç nimmer gesagen.’

Er sprach ‘bruoder Danewart, sô hûetet uns der tür, 4
 und enlât der Hiunen einen komen niht der für:
 ich wil reden mit den recken, des uns nu dwinget nôt:
 unser ingesinde lit unverdient hie tût.’

‘Sol ich sîn kamerære,’ - sprach dô der küene man - 5
 ‘alsô rîchen kûnegen ich wol gedienen kan:
 sô hûet ich der stiegen nâch den êren mîn.’
 den Kriemhilde degenen kunde leider niht gesîn.

‘Mich nimt des michel wunder,’ - sprach dô Hagene - 6
 ‘waz die recken rûnen in disem gademe:
 si wæn des lihte enbæren, der an der tür dort stât
 und ouch diu hovemære gesaget den Burgonden hât.

Ich hân gehôrt vil lange von Kriemhilde sagen, 7
 daz si ir herzen leide wolde niht vertragen:
 nu trinken wir die minne und gelten skûneges win,
 der junge vogt der Hiunen der muoz hie der êrste sîn.’

Dô sluoc daz kint Ortlieben Hagen der helt guot, 1
 daz im an dem swerte zer hende vlôz daz bluot
 und daz des kindes houbet spranc Kriemhilt in ir schôz :
 dô huop sich under degenen ein mort vil grimme unde grôz.

Ouch sluoger dem magezogen einen swinden slac 2
 mit beiden sinen handen, der Ortliebes pfiac,
 daz im daz houbet schiere vor tischen nider lac :
 ez was ein jâmerlicher lôn, den er dem magezogen wac.

Er sach vor Ezeln tische einen spileman : 3
 Hagen in sime zorne gâhen dar began.
 er sluog im uf der videlen ab die einen hant :
 'daz habe der boteschefte in der Burgonden lant.'

'Owê mir' - sprach Werbel, der Ezeln spileman - 4
 'her Hagen von Tronege, waz hêt ich iu getân ?
 ich kom uf grôze triuwe in iwer herren lant.
 wie klenke ich nu die dôene, sît ih nu vlorn hân die hant ?'

Hagenen ahte ringe, gevidelter nimmer mër. 5
 dô frunt er in dem hûse diu wercgrimmen sër
 an den Ezelen recken, der er sô manegen sluoc :
 er brâht ir in dem gademe zuo dem tôde genuoc.

Volkêr sîn geselle von dem tische spranc : 6
 sîn videlboge im lûte an siner hende erklanc.
 dô videlte ungefüege der kûnege spileman.
 hey, waz er im ze vînden der kûenen Hiunen gewan !

Dô sprungen von den tischen die drie kûnege hêr : 7
 si woldenz gerne scheiden ê des schaden wûrde mër.
 sine kundenz mit ir sinnen dô niht understân,
 dô Volkêr unde Hagenê sô sêre wüeten began.

Dô sach der vogt von Rine ungescheiden den strit: 1
 dô sluoc der fürste selbe vil manege wunden wît
 durch die lichten ringe den vîanden sîn.
 er was ein helt zen handen, daz wart dâ grœzlichen schîn.

Dô kom ouch zuo dem strite der starke Gêrnôt: 2
 jâ frumt er den Hiunen vil manegen helt tôt
 mit dem scharpfen swerte, daz im gap Ruedegêr,
 den Ezeln mâgen frumter diu grœzlichen sêr.

Der junge suon froun Uoten zuo dem strite spranc: 3
 sîn wâfen herrenliche durch die helme erklanc
 den Ezeln recken ûzer Hiunen lant.
 dâ tet vil michel wunder diu Gîselheres hant.

Swie frum si alle wâren, die kûnege und ouch ir man, 4
 doch sah man Gîselhere ze vorderest stân
 bî den vîanden: er was ein helt guot;
 er schuof dâ mit den wunden vil manegen nider in daz bluot.

Ouch werten sich vil sêre die Ezeln man: 5
 dô sah man die geste houwende gân
 mit den lichten swerten durch des kûneges sal.
 dô hîrt man allenthalben von strite grœzlichen schal.

Dô wolden die dar ûzen mit friunden sîn dar in; 6
 si nâmen an der stiegen vil kleinen gewin:
 dô wolden si dar inne vil gerne für die tür;
 done lie der portenêre ir deheinen dar für.

Dô huop sich in der porte vil grôzêr der gedranc, 7
 und ouch von den swerten ûf helme lûter klanc:
 des kom der kûene Dancwart in vil starke nôt.
 daz bedâhte Hagene, als im sîn triuwe gebôt.

Vil lûte rief dô Hagene Volkêren an : 1
 'seht ir dort, geselle, mînen bruoder stân
 vor hiunischen recken under starken slegen?
 friunt, nert mir den bruoder ê wir vliessen den degn.'

'Daz tuon ich sicherlîchen' sprach der spileman. 2
 er begunde videlende durch den palas gân.
 ein scharpfez swert im dicke an sîner hende erklanc:
 die recken von dem Rîne sagten im des grôzen danc.

Volkêr der vil küene zuo Dancwarte sprach 3
 'ir habt erliten hiute grôzen ungemach:
 mich bat iwer bruoder durch helfe zuo ziu gân.
 welt ir nu sîn dar ûze, sô wil ich inrethalben stân.'

Dancwart der vil snelle stuont ûzerhalb der tür : 4
 dô wert er in die stiegen, swaz ir kom der für.
 des hört man wâfen hellen an der helede hant.
 sam tet ouch inrethalben Volkêr von Buregonden lant.

Der küene videlære rief zuo dem degene 5
 'daz hûs ist wol beslozzen, friunt Hagene.
 ez ist alsô verschraket diu Ezeln tür
 von zweier recken handen: dâ gênt wol tûsent rigel für.'

Dô der starke Hagene die tür sô sach behuot, 6
 den schilt warf dô zerucke der küene degen guot:
 dô êrst begunder rechen sîner friunde leit.
 sînes zornes muose engelten vil manec ritter gemeit.

Dô der yoget von Berne daz wunder reht ersach, 7
 daz Hagene der starke sô manegen helm brach,
 der küene der Amelunge spranc ûf einen banc:
 er sprach 'hie schenket Hagene daz aller wirsiste transc.'

Der wirt hêt grôze sorge, sin wip diu hêt alsam 1
 - waz man im lieber friunde vor sînen ougen nam! -
 wand er von sînen vînden vil kûme dâ genas :
 er saz vil angestliche. waz half in daz er kûnec was ?

Kriemhilt diu frouwe rief Dietrîchen an : 2
 'nu hilf mir von dem sedele, ritter, von in dan,
 durch aller fûrsten tugende, ûz Amelunge lant :
 und erreicht mich dort Hagene, ich hân den tût an der hant.'

'Wie sol ich iu gehelfen?' - sprach dô Dietrich - 3
 'vil edeliu kûneginne, nu sorge ich umbe mich :
 ez sint sô sere erzûrnet die Gunthers man,
 daz ich an disen zîten geviden niemen enkan.'

'Neinâ, herre Dietrich, vil edel ritter guot, 4
 lâzâ hiute schînen den tugentlichen muot,
 daz du mir helfest hinne : oder ich belibe tût.
 nu hilf mir und dem kûnege ûz dirre angestlicher nôt.'

'Daz wil ich versuochen, ob ich iu helfen kan ; 5
 wande ich in langen zîten niht gesehn hân
 sô pitterlich erzûrnet manegen ritter guot.
 jâ sihe ich durch die helme von swerten vliezen daz bluoht.'

Mit kraft begunde ruofen der degene ûz erkorn, 6
 daz im sin stimme erlûte alsam ein wisents horn,
 und daz der palas wite von siner kraft erdôz :
 diu sterke Dietrîches was vil unmæzliche grôz.

Dô gehôrte Gunther ruofen disen man 7
 in dem starken sturme. losen er began :
 er sprach 'Dietrîches stimme ist in mîn ôre komen ;
 ich wæn im unser degene haben etewen hie benomen.

Ich sihe in uf dem tische, er winket mit der hant. 1
 ir friunt unde mäge von Burgonden lant,
 gehabt uf des strites, lát hoeren unde sehn,
 waz hie Dietriche von uns ze schaden si gescehn.

Dô der künec Gunther bat und ouch gebôt, 2
 si habten uf mit swerten in des sturmes nôt:
 daz was gewalt vil grôzer, daz dô niemen streit.
 dô reiten mit ein ander die küenen recken gemeit.

Er sprach 'vil edel Dietrich, waz ist iu hie getân 3
 von den mînen mâgen? willen ich des hân,
 suone unde buoze bin ich iu bereit:
 swaz iu iemen tæte, daz wær mir inneclîchen leit.'

Dô sprach der herre Dietrich 'mir ist noch niht getân, 4
 des ich schaden deheinen von iu müge hân:
 wan lát mih von dem strite mit dem gesinde mîn,
 daz wil ich umbe iuch degene immer dienende sîn.'

'Wie vlêget ir sô sêre?' - sprach dô Wolfhart - 5
 'jane hât der videlære die tür nie sô verspart,
 wir entsliezen si sô wite, daz wir dar für gân.'
 'nu swiget,' - sprach her Dietrich - 'ir habt den tiufel getân.'

Dô sprach der künec Gunther 'erlouben ich iu wil, 6
 fûeret ûz dem hûse lützel oder vil,
 âne mine vinde: die suln hie bestân.
 si habent mir zen Hiunen harte leides vil getân.'

Der herre von Berne under einen arm beslôz 7
 die edeln küneginne: der angst diu was grôz.
 dô fuort er anderthalben Ezeln mit im dan.
 ouch giengen mit im dannen sehs hundert siner küener man.

Dô sprach der marcgrâve, der edel Ruedegêr, 1
 'sol aber ûzem hûse iemen komen mêr,
 die iu doch dienen gerne, daz lâzet uns vernemen,
 sô sol ouch fride der stæte guoten friunden immer zemen.'

Des antwurte Gîselher sime sweher zehant 2
 'vride unde suone si iu von uns bekant:
 sit ir sit triwen stæte, beide ir und iwer man
 sult gemeinliche mit iwern friunden hinnen gân.'

Dô der marcgrâve gerûmte den sal, 3
 fünf hundert unde mêre im volgten zetal
 die stiegen von dem hûse: daz wâren sîne man;
 von den der kûnec Gunther vil grôzen schaden sit gewan.

Dô sach ein Hiunen recke Ezelen gân 4
 bi dem Bernære: genozzen wolders hân.
 dem gap der videlære einen swâren slac,
 daz im vor Ezeln fûezen daz houbet schiere gelac.

Dô der wirt des landes kom von dem hûse dan, 5
 dô kêrte er sich hin widere und sach Volkêren an:
 'owê mir dirre geste! daz ist ein grimmiu nôt,
 daz alle mine friunde suln vor in ligen tôt.'

'Ach wê der hôchgezite:' - sprach der kûnec hêr - 6
 'dâ vihtet einer inne, der heizet Volkêr,
 alsam ein eber wilde, und ist ein spileman:
 ich dankes mine heile, daz ich dem vâlände entran.'

Sîne leyche lûtent ûbele, sîne zûge die sint rôt: 7
 jâ vellent sîne dæne vil manegen helt tôt,
 ine weiz niht wâz uns wîze der selbe spileman,
 wan ich gast neheinen nie sô leiden gewan.'

Zir herbergen giengen die recken alsô hêr, 1
 der herre von Berne und ouch Ruedegêr:
 sine wolden mit dem strîte niht ze schaffen hân
 und gebuten ouch ir degenen, daz sis mit fride solden lân.

Und hêten si getrouwet alsolher swære, 2
 daz in diu von in beiden sô künftec wære,
 sine wæren von dem hûse niht sô sanfte komen:
 si hêten eine stroufe an den vil küenen ê genomen.

Sie hêten die si wolden lâzen ûz dem sal: 3
 dô huop sich inrethalben ein grœzlicher schal:
 die geste sêre râchen daz in ê geschach.
 Volkêr der vil küene, hey, waz er liehter helme brach!

Sich kêrte gein dem schalle Gunther, der küene hêr: 4
 'hert ir die dæne, Hagene, die dort Volkêr
 mit den Hiunen videlet, swer gegen der tûr gât?
 ez ist ein rôter anstrich, den er zem videlbogen hât.'

'Mich riwet âne mâze,' - sprach dô Hagene - 5
 'daz ich vor Volkêre ie gesaz dem degene:
 ich wart sîn geselle und ouch er der mîn,
 und kom wir immer widere, daz suln wir noch mit triwen sîn.

Nu schowe, küene Gunther, Volkêr ist dir holt: 6
 er dienet willeclîche dîn silber und dîn golt.
 sîn videlboge im snidet durch den herten stâl:
 er brichet ûf den helmen diu liechte schînenden mâl.

Man gesach nie videlære sô hêrlîchen stân, 7
 alsô der degen Volkêr hiute hât getân:
 die sînen leyche hellent durch helm und durch den rant:
 jâ sol er rîten guotiu ros und tragen hêrlîch gewant.'

Swaz der Hiunen mäge in dem huse was gewesen, 1
 der enwas nu deheiner dar inne genesen:
 des was der schal geswiftet, daz niemen mit in streit.
 diu swert von handen legeten die küenen degene gemeit.

Die herren nâch ir müede gesâzen dô zetal: 2
 Volkêr und Hagene die giengen für den sal;
 sich leinten uf die schilde die übermüeten man:
 dâ wart rede genuoge von in beiden getân.

Dô sprach von Burgonden Giselher der degen 3
 'jane mügt ir, lieben friunde, niht ruowe noch gepflegen:
 ir sult die tóten liute ûz dem huse tragen.
 wir werden noch bestanden; ich wilz iu wêrlîche sagen.'

'Sô wol mich solhes herren:' - sprach dô Hagene - 4
 'der rât enzæme niemen wan eime degene,
 den uns mîn junger herre hiute hât getân:
 des muht ir Burgonden alle vrêlîche stân.'

Dô volgeten si dem kinde und truogen für die tür 5
 wol zwei tûsent tóten wurfen si der für:
 vor des sales stiegen vielen si zetal.
 dô huop sich von ir mâgen ein vil klagelîcher schal.

Ez was ir etelîcher sô mæzliche wunt, 6
 der sîn mit helfe pflege, er wûrde noch gesunt,
 der von dem hôhen valle muose ligen tót.
 die klagten dô ir friunde: des twanc si jâmerhaftiu nôt.

Dô sprach der videlære, ein recke vil gemeit, 7
 'nu kiuse ich des die wâreheit, als man mir hât geseit:
 die Hiunen sint vil bese, si klagent sam diu wîp:
 nu solden si beruochen der vil sêre wunder lip.'

Dô wände ein maregrâve, er reit ez durch guot: 1
 er sach einen sinen mâc gevallen in daz bluot,
 er beslôz in mit den armen und wolde in tragen dan:
 den schôz ob im ze tôde der vil küene spileman.

Dô d'andern daz gesâhen, diu fluht huop sich von dan: 2
 si begunden alle fluochen dem selben spileman.
 noh huober under fûezen einen gêr vil hart,
 der von eime Hiunen in daz hûs geschozzen wart.

Den schôz er dô hin widere durch die burc dan 3
 mit siner kraft sô verre: den Ezelen man
 gab er herberge ûf hôher von dem sal.
 daz sîn vil starkez ellen die liute vorhten über al.

Dô stuonden vor dem hûse Ezel und sine man: 4
 Volkêr unde Hagene reden dô began
 mit der Hiunen kûnege ir willen unde muot.
 des kômen sit in sorgen die helede kûen unde guot.

'Ez zæme' - sô sprach Hagene - 'vil wol, volkes trôst, 5
 daz die herren væhten zaller vorderôst,
 alsô der kûnec Gunther und Gêrnôt hie tuot:
 die howent durch die helme, nâch swerten vliuzet daz bluot.'

Ezele was sô küene, er vazzete sinen schilt. 6
 'nu vart gewerliche,' - sprach mîn frou Kriemhilt -
 'und bîetet ir den recken daz golt über rant:
 wan erreichet iuch dort Hagene, ir habt den tôt an der hant.'

Done wolde der kûnec hêre des strîtes erwînden niht, 7
 daz von sô richen fürsten selten nu geschîht:
 man muos in bî dem vezzel wider ziehen dan.
 Hagene der grimme sîn aber spotten began.

‘Ez was ein nâhiu sippe,’ - sprach dô Hagene - 1
 ‘die Sivrit und Ezele hêten zesamene :
 er minnete Kriemhilt, ê si ie gesæhe dich.
 kûneec vil bæse, warumbe rætest an mich ?’

Dise rede hôte wol des kûneges wip : 2
 des wart vol unmuotes der Kriemhilde lip,
 daz er si torste schelten vor Ezelen man.
 dar umbe si aber râten an die geste began.

Si sprach ‘der mir von Tronege Hagenen slüege 3
 unde mir sîn houbet ze gibe trüege,
 dem fult ich rôtes goldes den Ezeln rant.
 ouch gæb ich im ze miete vil guote bürge unde lant.’

‘Nune weiz ich wes si bitent ?’ - sprach der spileman - 4
 ‘ine gesach nie helde mêre sô zageliche stân
 dô man hôte bieten sô rehte richen solt :
 si môhten gerne dienen die bürge und ouch daz rôte golt.’

Ezele der vil riche hete jâmer unde nôt : 5
 er klagte pitterliche mâge unde manne tôt.
 dô stuont von manegen landen vil recken gemeit ;
 die weinten mit dem kûnege sîniu kreftigen leit.

Des begunde spotten der kûene Volkêr : 6
 ‘ich sihe hie sere weinen vil manegen recken hêr :
 si gestênt ir herren übele in siner starken nôt.
 jâ ezzent si mit schanden nu vil lange hie sîn brôt.’

Dô gedâhten in dje besten ‘er hât uns wâr geseit.’ 7
 doch enwas ez dô niemen sô herzenliche leit
 als ouch Iringe, dem heledê ûz Tenelant :
 daz man in kurzen ziten mit der wârheit wol bevant.

XXXIV AVENTIURE

WIE IRINC MIT HAGENEN STREIT, UND WIE IM SIT AN IM
GELANC.

Dô rief von Tenemarke der marcgrâve Irinc 1
'ich hân uf êre lâzen nu lange miniu dinc,
und hân in volkes stürmen des besten vil getân.
nu brinc mir mîn gewâfen: jâ wil ich Hagenen bestân.'

'Daz wil ich widerrâten,' - sprach dô Hagene - 2
'sô gewinnet iwer mâge mêr ze klagene.
gespringent iwer zwêne oder drî zuo mir her in,
ist daz si mîn erbitent, si scheident schedelîche hin.'

'Darumbe ihz niht enlâze:' - sprach aber Irinc - 3
'ich hân ouch ê versuochet sam sorchlîchiu dinc.
jâ wil ich mit dem swerte aleine dich bestân,
ob du mit strite hêtest mêr danne iemen getân.'

Dô wart gewâfent Irinc nâch ritterlîcher sit, 4
alsam wart von Düregen der lantgrâve Irnfrî
und Hâwart der starke, wol mit tûsent man:
swes Irinc begunde, si woldens alle im gestân.

Dô sach der videlære eine grôze schar, 5
die mit Iringe gewâfent kômen dar:
si truogen uf gebunden vil manegen helm guot.
des wart der küene Volkêr ein teil vil zornec gemuot.

Er sprach 'seht ir, Hagene, dort Iringen gån, 1
 der iuch hie mit dem swerte lobt eine bestån?
 wie zimt helede lügene? ich wil unprisen daz;
 ez gënt mit im gewäfent wol tûsent recken oder baz.'

'Nu heizet mich niht liegen:' - sprach Hâwartes man - 2
 'ich wil ez leisten gerne, swaz ich gelobet hân:
 durch deheine vorhte wil ihs abe gån,
 swie vreislîch nu sî Hagene, ich wil in eine bestån.'

* Ze fûezen bôt sich Irinc mâgen unde man, 3
 daz sin eine liezen den recken bestån.
 daz tâten si ungerne: wan in was wol bekant
 der übermüete Hagene ûzer Burgonden lant.

Doch bat er si sô lange, daz ez sît geschach: 4
 dô daz ingesinde den willen sin ersach,
 daz er warp nâch êren, dô liezen si in gån.
 dô wart ein grimmez strîten von in beiden dâ getån.

Irinc der vil starke hôhe erburt den gêr: 5
 den schilt er für sich zuchte, der tiure degen hêr.
 dô lief er ûz zuo Hagene vaste für den sal:
 dô huop sich von den degenen ein vil grœzlicher schal.

Dô schuzzen si die gêre mit kreften von der hant 6
 durch die vil vesten schilde ûf liehtez ir gewant,
 daz die gêrstangen vil hôhe dræten dan:
 dô griffen zuo den swerten die vil grimme küenen man.

Des starken Hagenen ellen was unmâzen grôz: 7
 ouch sluog ûf in Irinc, daz al diu burc erdôz;
 palas unde türne erhullen nâch ir slegen.
 done kunde niht verenden des sinen willen der degen.

Irine lie dô Hagenen unverwundet stân. 1
 zuo dem videlære gâhen er began:
 er wände in solde twingen mit den grimmen slegen.
 sich kunde wol beschirmen der vil zierliche degen.

Dô sluoc der videlære, daz über schildes rant 2
 dræte daz gespenge von Volkêres hant.
 den liez er dô belîben: er was ein übel man.
 er lief den künec Gunther dô von Buregonden an.

Dô was ir ietwedere ze strîte starc genuoc. 3
 swaz Gunther unde Irine ûf ein ander sluoc,
 daz enbrächte niht von wunden daz vliezende bluot:
 daz behuote ir gewâfen; daz was veste unde guot.

Gunthern er lie belîben, Gêrnôten lief er an: 4
 daz siur ûzen ringen er howen im began.
 dô hête von Burgonden der starke Gêrnôt
 den kûenen Iringen vil nâch gesendet in den tût.

Dô spranger von dem fürsten: snel er was genuoc. 5
 der Burgonden viere der helt vil schiere sluoc,
 des edeln ingesindes von Wormez über Rîn:
 done kunde Gîselhere zoner nimmer gesîn.

Goteweiz, her Irine, - sprach Gîselher daz kint - 6
 'ir müezet mir die gelten, die veige vor iu sint
 gelegen hie ze stunden.' dô lief er in an:
 er sluoc den von Tenemarke, daz er strûchen began.

Er schôz vor sînen fûezen nider in daz bluot, 7
 daz si alle wolden wânen, daz der helt guot
 ze strîte nimmer mêre geslûege keinen slac:
 Irine noch âne wunden hie vor Gîselhere lac.

Von des helmes dôze und von des swertes klanc 1
wären sine witze worden alsô kranc,
daz sich der degen Irinc des lebenes niht versan:
daz hêt mit siner sterke der küene Giselher getân.

Dô im begunde wichen von houbte der dôz 2
- von helm und ouch von swerte der was gewesen grôz -,
er dâhte 'ih bin noch lebnde, min lip ist ninder wunt:
nu ist mir aller êrste daz ellen Giselhers kunt.'

Dô hôrter beidenhalben die viande stân. 3
hêten siz gewisset, im wære mêr getân:
ouch hêt er Giselhere dâ bi im vernomen.
er dâhte wie er solde mit dem lîbe dannen kômen.

Wie rehte tobeliche er ûzem bluote spranc! 4
der siner snelheite er mohte sagen danc.
dô lief er ûzem hûse da er aber Hagenen vant,
und sluog im slege swinde mit siner ellenthafter hant.

Dô gedâht ouch Hagene 'du solt der mine wesen; 5
dich enner der ûbel tiufel, du enkanst nu niht genesen.'
doch wundet Irinc Hagenen durch sinen helmhuot:
daz tet der helt mit Wasechen, daz was ein wâfen alsô gut.

Dô der grimme Hagene der wunden enpfant, 6
dô erwâgt im ungefuoge daz swert an siner hant.
aldâ muose im entwichen der Hâwartes man:
ze tal von dem hûse Hagen volgen im began.

Irinc über houbet den schilt vil balde swanc: 7
und wær diu selbe stiege drier stiegen lanc,
dône liez in Hagene slahen deheinen slac.
hey, waz rôter vanken ob sine helme gelac!

Dô sâhen sine friunde Iringen noch gesunt. 1
 dô wurden disiu mære Kriemhilde kunt,
 waz er dem von Tronege mit strîte hête getân:
 des im diu küneginne hôhe danken began.

'Nu lône dir got, Irinc, vil mærer helt guot: 2
 du hâst mir wol getrostet daz herze und ouch den muot.
 nu sihe ich Hagene rôtez von bluote sîn gewant.'
 dô nam si im selbe den schilt vor liebe von der hant.

'Ir mugt im mâze danken:' - sprach dô Hagene - 3
 'jâ ist noch harte kleine dâ von ze sagene.
 und wolt erz noch versuochen, sô wær er kûen ein man.
 diu wunde frumt iuch kleine, die ich von im gewonnen hân.

Daz ir von mîner wunden die ringe sehet rôt, 4
 daz hât mich erreizet ûf maneges mannes tôt:
 ich bin alrêrste erzûrnet ûf in und manegen man.
 mir hât der degen Irinc schaden kleinen noch getân.

Dô stuont gegen dem winde Irinc von Tenelant. 5
 er kuolte sich in ringen: den helm er abe gebant.
 dô sprâchen al die liute, sîn ellen wære guot:
 des hêt der marcgrâve von schulden hôhen muot.

Irinc der vil küene sînen friunden sagte daz 6
 'nu wâfent mich vil balde: ich wilz versuochen baz,
 ob ich noch mûge betwingen den übermüeten man.'
 sîn schilt der was verhouwen: einen bezzern er gewan.

Vil schiere wart der recke aber gewâfent baz, 7
 und einen gêr vil starken den nam er ûf den haz,
 daz er dâ mite Hagenen wolde noch bestân.
 ez wær im frum und êre, ob erz hête nu verlân.

Sin mohte niht erbiten Hagene der degene : 1
 dô lief er im engegene mit stichen und mit slegen
 der stiege unze an ein ende : sin zürnen daz was grôz ;
 Irinc siner sterke harte wêneç dô genôz.

Si sluogen durch die schilde, deiz lougen began 2
 von viurrôten winden : der Hâwartes man
 wart von Hagenen swerte vil kreftlechl en wunt
 durch schilt und durch die brünne ; des er wart nimmer mêr
 gesunt.

Dô der degene Irinc der wunden enfant, 3
 den schilt er baz bedachte über diu helmbant.
 des schaden in dûht der volle, den er dâ gewan :
 sit tet im noch mêre der vil übermüete man.

Hagen vor sînen fûezen einen gêr er ligen vant : 4
 dô schôz er Iringen, den helt von Tenelant,
 daz im von dem houbte der gêr ragete dan.
 im hêt der übermüete den grimmen ende getân.

Irinc muose wichen zuo den von Tenelant. 5
 ê daz man dô dem degene den helm ab gebant,
 den gêr man brach von houbet : dô nâhet im der tôt.
 daz weinten sîne mâge : des gie in wêrlîche nôt.

Kriemhilt diu frouwe klagen ouch began 6
 den kûenen Iringen, den schadhaften man :
 si weinte sîne wunden, wande ez was ir leit.
 dô sprach vor sînen mâgen der snelle recke gemeit :

‘Lât iwer klage beliben, vil hêrlîchez wip : 7
 waz hilfet iwer weinen ? jâ muoz ich minen lîp
 verliesen von den wunden, die ich empfangen hân :
 der tôt wil mich niht dienen iu und Ezeln lân.

Er sprach zuo den von Düregen und den von Tenelant 1
 'die gäbe sol empfähen iwer deheines hant
 von der küeginne, ir liechtez golt sô rôt:
 und bestêt ir Hagenen, ir müezet liden den tôt.

Sin varwe was erblichen, des tôdes zeichen truoc 2
 Irinc der küene: daz was in leit genuoc.
 genesen niht enkunde der Hâwartes man.
 dô muos ez an ein striten von den sinen friunden gân.

Irnfrit unde Hâwart die sprungen für daz gadem 3
 wol mit tûsent heleden. vil ungefüegen kradem
 hört man allenthalben vil kreftelichen grôz:
 hey, waz man starker gère uf die Burgonde schôz!

Irnvrit der herre lief an den spileman; 4
 des er schaden grôzen von siner hant gewan:
 der küene videlære den lantgrâven sluoc
 durch einen helm vesten. jâ was er grimme genuoc.

Dô sluoc der lantgrâve den küenen spileman, 5
 daz im muosen bresten ringes gespan,
 und daz sich beschutte diu prünne fiurrôt:
 dô viel der lantgrâve vor dem videlære tôt.

Hâwart unde Hagene ze samne wâren komen: 6
 er mohte wunder kiesen, ders hête war genomen.
 diu swert genôte vielen den recken an der hant:
 Hâwart muose ersterben von dem ûz Burgonde lant.

Die Tenen und die Düregen ir herren sâhen tôt: 7
 dô huop sich vor dem hûse ein vil grimmiu nôt,
 ê si die tür gewunnen mit ellenthafter hant.
 des wart dâ verhouwen vil manec helm unde rant.

‘Wichet,’ - sprach dô Volkêr - ‘lât si her in gân. 1
ez ist sus unverendet, des si dâ habent wân.
si müezen drinne ersterben in vil kurzer zît:
si arnent mit dem tôde daz in diu küneginne git.’

Dô die übermüeten kômen in den sal, 2
manegem wart daz houbet geneiget sô zetal,
daz er muose ersterben von ir grimmen slegen.
wol streit der küene Gêrnôt: sam tet ouch Gîselher der degen.

Tûsent unde viere, die kômen dar in: 3
die erzeigten drinne schiere ir degenlichen sin.
si wurden von den gesten al zehant erslagen:
man mohte michel wunder von den Burgonden sagen.

Der nâch wart ein stille, daz der schal verdôz. 4
daz bluot dô allenthalben durch diu lôcher vlôz,
und dâ zen rigelsteinen von den küenen man:
daz hêten die von Rîne mit grôzem ellen getân.

Dô sâzen aber ruowen die kômen in daz lant: 5
ir schilde unde wâfen si leiten von der hant.
dô stuont noch vor dem hûse der küene spileman,
ob iemen zuo zîn wolde mit strite zuo dem sale gân.

Der küenecl klagte sêre, sam tet ouch sîn wîp: 6
mâgde unde frouwen die quelten ouch den lîp.
ich wæne des, daz hête der tût âf si gesworn:
des wart noch vil der degene von den gesten verlorn.

XXXV AVENTIURE

WIE DIE DRIE KÜNEGE MIT EZELE UND MIT IR SWESTER
UMBE DIE SUONE REITEN.

‘Nu bindet abe die helme:’ - sprach dô Hagene - 1
‘jâ lâzen wir den Hiunen sô vil ze klagene,
daz si der hôchgezite vergezzent nimmer hie.
waz hilfet nu Kriemhilde, daz si uns ze Rîne niht enlie?’

Dô entwâfent dâ dez houbet manec ritter guot: 2
si sâzen uf den veigen, die vor in in daz bluot
wâren in dem strite mit dem tôde komen.
sit wart der Ezeln geste vil ûbel goume genomen.

Vor âbendes zite geschuof der künec daz, 3
und ouch diu küneginne, daz ez versuochten baz
die hiunischen recken durch der geste leit:
des man an si gerte, die helde wârens bereit.

Sich huob ein sturm herte hier ûz und ouch dâr in. 4
Dancwart, Hagenen bruoder, durch degenlichen sin,
spranc vor sinen herren zen vinden ûz der tür.
sich versâhens sines tôdes: er kom gesunder wol dâr für.

Der herte strît dô werte unz ez diu naht benam: 5
dô werten sich die geste, als ez in wol gezam,
den Ezeln degenen den sumerlangen tac.
hey, waz noch der helede vor in veige gelac!

Zeinen sunewenden der grôze mort geschach, 1
 daz diu küneginne ir herzenleit errach
 an ir nêhsten mâgen und sus an manegem man :
 dâ von der künec Ezele vil manegen siechen gewan.

Sine hêt der grôzen slahte alsô niht gedâht : 2
 si hêt ez in ir ahte vil gerne dar zuo brâht,
 daz niwan Hagene aleine den lip dâ hête lân.
 dô geschuof der übel tiufel, deiz über si alle müese' ergân.

In was des tages zerrunnen : dô gie in sorgen nôt. 3
 si gedâhten daz in bezzer wâr ein kurzer tôht,
 denne lange dâ ze quelne uf ungefüegiu leit.
 eins vrides si dô gerten, die stolzen ritter gemeit.

Si bâten daz man bræhte Ezelen dar. 4
 die bluotvarwen degene und schône harnaschvar
 trâten ûz dem hûse, die drie küneger hêr :
 sine wessen wem ze klagen diu ir vil grœzlichen sêr.

Ezel unde Kriemhilt die kômen beide dar : 5
 daz lant daz was ir eigen, des mërte sich ir schar.
 er sprach zuo den künegen 'sagt, was welt ir mîn ?
 ir wænet vride gewinnen : daz künde müelich gesin

Uf schaden alsô grôzen, als ir mir habt getân : 6
 irn sultes niht geniezen, sol ich mîn lebn hân :
 mîn kint daz ir mir sluoget und vil der mâge mîn,
 des ensol mit sime lebene iwer deheiner komen hin.

Des antwurte Gunther 'des twanc uns starkiu nôt : 7
 allez mîn gesinde lac von den dinen tôht
 an den herbergen. wie hêt ich daz versolt ?
 ich kom zuo dir uf triuwe und wând daz du mir wærest holt.

Dô sprach von Burgonden Giselher daz kint 1
 'ir Ezeln recken, die noch hie lebende sint,
 waz wîzet ir mir degene? waz hân ich iu getân?
 wande ich vil minneclîche in ditze lant geriten hân.'

Si sprâchen 'diner gûete ist al diu bure vol, 2
 mit jâmer, zuo dem lande: jâ gunden wir dir wol,
 daz du nie komen wærest von Wormez über Rin.
 diz lant ist gar verweiset von dir und ouch den mâgen din.'

Dô sprach in zornes muote Gunther der degene 3
 'welt ir ditze starkez hazzen zeiner süene legen
 mit uns vil ellenden, deist beidenthalben guot:
 ez ist gar âne schulde, swaz uns Ezele getuot.'

Dô sprach der wirt zen gesten 'min und iwer leit 4
 diu sint vil ungelîche: diu michel arebeit
 des scaden zuo den schanden, die ich hân genomen:
 des sol iu deheiner mit dem lîbe hinnen komen.'

Dô sprach zuo dem kûnege Gêrnôt der hôchgemuot 5
 'sô sol iu got gebieten, daz ir wol tuot.
 wîchet von dem hûse, und lât uns zuo ziu gân:
 sît wir zuo dem lebene haben alsô kleinen wân.'

Swaz uns geschehn kûne, daz lâzet kurz ergân: 6
 ir habt sô vil gesunder, und turrens uns bestân,
 daz si uns sturmmüede lâzent niht genesen,
 sît daz ist unwendec, wir müezen hie verderbet wesen.'

Die Ezeln recken diê heten ez nâch getân, 7
 daz si se ûz dem hûse wolden lâzen gân.
 dô daz gehörte Kriemhilt, ez was ir grimme leit:
 des wart den ellenden dô der vride widerseit.'

‘Neinâ, Hiunen recken! des ir dâ habet muot,
 ich rât an rehten triuwen, daz ir des niene tuot,
 daz ir die mortræchen iht lâzet für den sal:
 sô müesen iwer friunde liden tœtlichen val.’

Ob ir nu niemen lebte niwan diu Uoten kint,
 dié mînen edeln brüeder, und kœmens an den wint,
 erkuolten in die ringe, sô sit ir alle verlorn:
 ez enwurden küener degene nie zer werlde geborn.’

Dô sprach der herre Gîselher ‘vil liebiu swester mîn,
 wie mohte ich des getrouwen, dô du mich über Rîn
 sô minneclichen ladetes her in ditze lant,
 daz mir sô grôzzer kumber solde werden hie bekant?’

Ich was dir ie getriuwe: nie getet ich dir leit.
 ûf solhen gedingen ich her ze hove reit,
 daz du mîn friunt wærest, vil edeliu swester mîn.
 begenc an uns genâde, sit ez niht anders kan gesin.’

‘Ine mag iu niht genâden, ungenâde ich hân.
 mir hât von Tronege Hagene sô leide getân
 dâ heime, und hie ze lande sluoger mir mîn kint:
 des mûezen sêre engelten die mit iu dâ her komen sint.’

Welt aber ir mir ze gîsel den mînen vient geben,
 sone wil ichz niht versprechen, ichn welle iuch lâzen leben;
 wan ir sit mîne brüeder und einer muoter kint:
 sô rede ihz zeiner suone mit disen recken die hie sint.’

‘Nune welle got von himele?’ - sprach dô Gêrnôt -
 ob unser tûsent wæren, wir lægen alle tût,
 der sippen dîner mâge, ê wir dir einen man
 gaben hie ze gîsel: ez wirdet nimmer getân.’

'Wir müesen doch ersterben:' - sprach dô Giselher
 'uns enscheidet niemen von ritterlicher wer.
 swer gerne mit uns strîte, wir sîn et aber hie!
 wande ich der minen friunde an triwen nie deheinen lie.'

Dô sprach der küene Dancwart für die degene
 'jane stêt noh niht eine mîn bruoder Hagene.
 die hie den vride versprechent, ez mag in werden leit:
 des bringen wir iuch innen; daz si iu wærlîch geseit.'

Dô sprach diu kûeginne 'ir helde vil gemeit,
 nu gêt der stiegen nâher und rechet unser leit:
 daz wil ich immer dienen, als ich von rehte sol:
 der Hagenen übermüete der gelôn ich im wol.'

Springet zuo dem hûse, ir recken, überall:
 sô heiz ich vieren enden zûnden an den sal:
 sô werdent wol errochen elliu unser leit.
 die Ezelen degene die wurden schiere bereit.

Die noch hier tûzen stuonden, die triben si dar in
 mit slegen und mit schûzzen, wider in den palas hin.
 sich wolden nie geseiden die fûrsten und ir man:
 sine mohten von ir triuwen niht ein ander verlân.

Den sal hiez dô zûnden daz Ezeln wip:
 dô quelte man den recken mit fiure dà den lîp.
 daz hûs von einem winde mit kraft vil hôhe enbran:
 ich wæn ie vole deheinez grœzer angest mêr gewan.

Genuoge ruoften drinne 'owê dirre nôt:
 wir môhten michel gerner sîn in sturme tôt.
 daz müeze got erbarmen: wie vliessen wir den lîp!
 nu richet ungefuoge ir zorn an uns des kûneges wip.'

Ir einer sprach dar inne 'wir müezen ligen tót 1
vor rouche und ouch vor hitze: deist ein grimmiu nôt.
mir tuot vor starker hitze der durst sô rehte wê:
des wæn mîn leben schiere in disen sorgen zergê.'

Dô sprach von Tronege Hagene 'ir edeln ritter guot, 2
swen der durst nu twinge, der trinke hie daz bluot:
daz ist in solhen næten noch bezzer danne wîn.
für trinken und für spise kan niht anders nu gesin.'

Dô gie der recken einer da er einen tóten vant: 3
er kniet im zuo der wunden, den helm er abe gebant.
dô begunder trinken daz vliezende bluot:
swie ungewon ers wære, ez dûhte in grœzlichen guot.

'Nu lôn iu got von himele,' - sprach der müede man - 4
'daz ich von iurem râte sô wol getrunken hân:
mir ist geschenket selten dehein bezzer wîn.
leb ich deheine wîle, ich sol ez dienende sin.'

Dô d'andern daz gehörten, daz ez in dûhte guot, 5
dô wart ir michel mære, die trunken ouch daz bluot.
dâ von begunde kreften der guoten recken lip:
des engalt an lieben friunden sît vil manec schœne wîp.

Daz fiur viel genôte zuo zin in den sal: 6
dô leiten siz mit schilden von in hin zetal.
der routh und ouch diu hitze in beidiu tâten wê:
jâ wæn ez, an heleden der jâmer immer mër ergê.

Dô sprach von Tronege Hagene 'stêt zuo des sales want: 7
lât niht die brende vallen uf iwer helmbant,
und tret si mit den füezen tiefer in daz bluot.
ez ist ein übel hōchgezît, die uns diu küneginne tuot.'

In sus getänen leiden in iedoch der naht zerran. 1
 noch stuonden vor dem huse die zwêne küene man,
 Volkêr und Hagene, geleinet über rant:
 si huoten ir gesindes ûzer Burgonden lant.

Die geste half daz sêre, daz der sal gewelbet was: 2
 dâvon ir deste mère in der nôt genas;
 wan daz si zen venstern von fiure liten nôt.
 dô nerten sich die degene als in ir ellen daz gebôt.

Dô sprach der videlære 'nu gê wir in den sal: 3
 sô wellent diê Hiunen wænen über al,
 wir sin in nôt erstorben, diu an uns ist getân.
 si sehent uns begegene noch ir êteslichen gân.'

Dô sprach von Burgonden Giselher daz kint 4
 'ich wæn ez tagen welle, sich hebt ein küeler wint.
 nu lâze uns got von himele noch lieber zît geleben:
 uns hât mîn swester Kriemhilt ein arge hôchgezît gegeben.'

Dô sprach aber einer 'ich kiuse nu den tac. 5
 sît daz ez uns bezzer wesn nine mac,
 sô bereitet ir iuch, recken, ze strite, deist uns nôt,
 - wir komen doch nimmer hinnen - daz wir mit êren ligen tôt.

Der künec wolde wænen, die geste wæren tôt, 6
 und ouch diu küneginne, von des fiures nôt:
 dô lebt ir noch dar inne sehs hundert küener man,
 daz nie künec deheiner bezzer degene gewan.

Der ellenden huote hête wol ersehen, 7
 daz noch die geste lebten: swie vil in was geschehen
 ze schaden und ze leide, den künegen und ir man,
 man sah ir noch genuoge vil wol gesunt dort inne stân.

Man sagt der küneginne, ir wære vil genesen: 1
 dô sprach diu frowe hère 'daz enkünde nimmer wesen,
 daz ir deheiner lebte in des fiures nôt:
 ich wil des baz getrouwen, daz si alle ligen tót.'

Noch genæsen gerne die fürsten und ir man, 2
 ob in iemen hæte genåde dâ getân:
 dine kunden si niht vinden an den von Hiunen lant.
 dô râchen si ir sterben mit vil willeclîcher hant.

Vil fruo wider morgen grûezen man in bôt 3
 mit starkem urluge: des kômen helde in nôt.
 dô wart zuo zin geschozzen vil manec scharpfer gër:
 noch funden si dar inne ze wer die recken alsô hër.

Dem Ezeln gesinde erwegt was der muot. 4
 si wolden vaste dienen daz Kriemhilde guot:
 dar zuo si wolden leisten daz in der künec gebôt.
 des kômen aber die degene in vil angestliche nôt.

Von geheize und ouch von gâbe man möhte wunder sagen. 5
 dar hiez si golt daz rôte in den schilden tragen:
 si gab ez, swer sin ruochte unde ez wolde enpfân.
 jane wart nie græzer solden mër ûf vînde getân.

Ein michel kraft der recken dar zuo gewâfent gie. 6
 dô sprach der videlære 'wir sîn et aber hie:
 ine gesach zem tôde nie helde gerner komen,
 die daz golt des küneges uns ze vâre hânt genomen.'

Dô riefen ir genuoge 'nâher, helede, baz! 7
 daz wir dâ sulen enden, und tuon bezite daz:
 hie belîbet niemén wan doch der sterben sol.'
 dô sah man schiere ir schilde stechen gërschüzze vol.

Waz mag ich sagen mære? wol zwelf hundert man 1
 versuochten ez vil sère wider unde dan:
 dô kuoltin an den vinden die geste wol ir muot.
 ez ennohte niemen scheiden: des sah man vliezen daz bluot

Von verchtiefen wunden: der wart dà vil geslagen. 2
 dô hörte man genuoge nâch ir friunden klagen.
 die frumen sturben alle dem rîchen kûnege hêr:
 des hêten holde mâge nâch in jâmer unde sêr.

XXXVI AVENTIURE

WIE RÜEDEGER ERSLAGEN WART.

Ez hêten die ellenden wider morgen guot getân. 3
 wine der Göteline kom ze hove gegân.
 dô sah er beidenthalben diu ungefüegen sêr:
 daz weinte inneclîche der getriwe Ruedegêr.

‘O wê,’ - sprach der recke - ‘deich ie den lip gewan, 4
 daz disen starken jâmer kan niemen understân:
 swie gern ihz vriden wolde, der kûnec entuot es niht;
 wander der sinen leide ie mære und mære gesiht.’

Dô sande an Dietrichen der guote Ruedegêr, 5
 ob siz noch kûnden wenden an den kûnege hêr.
 do enbôt im der von Berne ‘wer môht ez understân?
 ezn wil der kûnec Ezele scheiden niemenne lân.’

Dô sah ein Hiunen recke Ruedegêren stân 1
mit weinenden ougen, und hêt des vil getân:
der sprach zer küneginne 'nu seht ir wie er stât,
der doch gewalt den meisten bî iu und Ezeln hât,

Und dem ez allez dienet, liut und ouch diu lant. 2
wie ist sô vil der bürge und der erbe an in gewant,
der er von dem küneger sô vil gehaben mac?
er gesluoc in disen stürmen noch nie lobelichen slac.

Mich dunket ern ruoche wie ez hie umbe gât, 3
daz et er den vollen nâch sime willen hât.
man giht im, er sî küener danne iemen mûge sîn:
daz ist in disen sorgen worden bæseliche schîn.'

Mit trurigem muote der vil getriwer man, 4
den er daz reden hôrte, der helt der blicht in an:
er dâht 'du solt ez arnen, du gihest ich sî verzaget:
du hâst diu dînen mære ze hove ze lûte gesaget.'

Die fûst begunder twingen: dô lief er in an. 5
er sluoc sô kreftecliche den hiunischen man,
daz er im vor den fûezen lac vil schiere tôt.
dô was aber gemêret des künec Ezeln nôt.

'Fürder, zage bæse,' - sprach dô Ruedegêr - 6
'ich hân doch genuoge leit unde sêr:
daz ich hie niht enstrîte, zwîu wîzestu mir daz?
jâ wær ih den gesten grœzlichen gehaz,

Und allez daz ich möhte, daz hêt ich in getân, 7
niwan daz ich die degene her gefüeret hân:
ich was ir geleite in mînes herren lant,
des ensol mit in niht strîten mîn vil ellendes hant.'

Dô sprach zem marcgrâven Ezel der künec hêr 1
 'wie habt ir uns geholfen, vil edel Ruedegêr?
 wan wir sô vil der veigen hie ze lande hân,
 wir bedorften ir niht mêre: ir habt vil übele getân.'

Dô sprach der ritter edele 'dâ beswârt er mir den muot 2
 und hât mir verwîzen êre unde guot,
 des ich von dînen handen habe sô vil genomen:
 daz ist dem lügenære ein teil unstätelichen komen.'

Kriemhilt saz bi Ezelen: diu hêt ez ouch gesehen, 3
 daz von des recken zorne dem Hiunen was geschehen.
 si kleit ez ungefüege, ir ougen wâren naz:
 si sprach zuo Ruedegêre 'wie haben wir verdienet daz,

Daz ir mir und dem küneger mêret unser leit? 4
 nu habt ir uns doch, Ruedegêr, allez her geseit,
 ir woldet durch uns wâgen die êre und ouch daz leben:
 ich hîrt iu vil der recken den pris vil græzlichen gebn.

Ich man iuch der genâden, und ir mir habt geswarn, 5
 dô ir mir zuo Ezelen her ze lande rietet varn,
 daz ir mir woldet dienen an unser eines tût:
 des enwart mir armen wibe nie sô græzliche nôt.'

'Daz ist âne lougen, ich swuor iu, edel wîp, 6
 ich wolde durch iuch wâgen die êre und ouch den lîp:
 daz ich die sêle vliese, des enhân ich niht gesworn.
 jâ brâht ich her ze lande die iuern brüeder wol geborn.'

Si sprach 'gedenke Ruedegêr der grôzen triwen dîn, 7
 der stæte und ouch der eide, daz du den schaden mîn
 immer woldest rechen und elliu miniu leit:
 des man ich dich hiute, degen küene und gemeit.'

Ezele der rîche vlêgen ouch began: 1
 dô buten si sich beide ze fûezen für den man.
 den guoten marcgrâven trûren man dô sach:
 der vil getriwe recke harte jâmerlichen sprach

‘Owê mir gotes armen,’ - sprach der getriwe man - 2
 ‘aller minen êren der muoz ich ab stân,
 triwen unde zûhte der got an mir gebôt:
 vil rîcher got von himele, daz mihs wendet niht der tôt!

Swelhez ich nu lâze und daz ander begân, 3
 sô hân ich bœsliche und übele getân:
 lâz aber ih si beide, mich schiltet elliu diet.
 nu ruoche mich bewîsen der mir ze lebene geriet.’

Dô bâten si genôte, der kûnec und ouch sîn wîp: 4
 des muosen sider degene verliesen den lîp
 vor Ruedegêres handen, dâ ouch der helt erstarp.
 ir muget daz balde hœren, daz er vil jâmerlichen warp.

Er wiste schaden gewinnen und ungefüegi leit. 5
 er hêt dem kûnege vil gerne verseit,
 und ouch der kûneginne: vil sêre vorht er daz,
 ob er ir einen slüege, daz im diu werlt trüege haz.

Dô sprach der marcgrâve Ruedegêr der kûene man 6
 ‘her kûnec, nu nemt hin widere al daz ich von iu hân,
 lant unde bürge; des sol mir niht bestên:
 ich wil ûf minen fûezen in daz ellende gên.

Alles guotes âne sô rûm ich iu diu lant, 7
 mîn wîp und mine tochter nim ich an mine hant,
 ê daz ich âne triuwe belîben müese tôt:
 ich hêt genomen übele iwer golt alsô rôt.’

Dô sprach der künec Ezele 'wer hülfe danne mir? 1
 daz lant zuo den bürgen daz gib ich allez dir,
 daz du mich rechest, Rüedegêr, an den vinden mîn:
 du solt ein künec gewaltec benebn mîme lîbe sîn.'

Dô sprach aber Rüedegêr 'wie sol ihz ane vân? 2
 heim ze mîme hûse ich si geladet hân,
 trinken unde spîse ich in mit triwen bôt,
 und gab in mîne gâbe: sol ich si dar zuo slahen tôt?

Die liute wænent lîhte, daz ich sî verzaget: 3
 deheinen mînen dienest hân ich in widersaget.
 solde ich nu mit in strîten, daz wære missetân:
 sô rouwe mich diu friuntschaft, die ich mit in erworben hân.

Giselher dem degene gab ich die tohter mîn: 4
 sine kûnde in dirre werlde niht baz verwendet sîn
 ûf zuht und ouch ûf êre, ûf triwe und ouch ûf guot.
 ine gesach nie künec sô jungen sô rehte tugentlich gemuot.'

Dô sprach aber Kriemhilt 'vil edel Rüedegêr, 5
 nu lâ dich erbarmen unser beider sêr,
 mîn und ouch des küneges: gedenke wol dar an,
 daz nie wirt deheiner sô leide geste gewan.'

Dô sprach der maregrâve wider daz edel wîp 6
 'ez muoz noch hiute gelten der Rüedegêres lîp,
 swaz ir und ouch mîn herre mir liebes habt getân:
 dar umbe muoz ich sterben; ez mac niht langer nu gestân.

Ich weiz wol daz noch hiute mîne bürge und mîniu lant 7
 iu ledec müezen werden von ir etesliches hant.
 ich bevîlle iu ûf genâde mîn wîp und mîn kint
 und die vil ellenden, die dà ze Bechelâren sint.'

‘Nu lôn dir got, Rüedegêr.’ sprach der künec dô. 1
 er und diu küneginne, si wurden beidiu vrô.
 ‘uns suln dine liute vil wol bevolhen wesen:
 ouch getrouweich mîme heile daz du maht selbe wol genesen.’

Dô liez er an die wâge die sêle und ouch den lîp: 2
 dô begunde weinen daz Ezeln wîp.
 er sprach ‘ich wil iu leisten, als ich gelobet hân.
 owê der mînen friunde, die ich leider muoz bestân.’

Man sah in von dem küneger in starken rîwen gên. 3
 dô sah er sîner recken ein teil dâ nâhen stên.
 er sprach ‘ir sult iuch wâfen, alle mîne man,
 die kûenen Burgonden muoz ich nu leider bestân.’

Dô brâhte man den recken ir gewâfen al zehant, 4
 ez der helm wære und ouch des schildes rant:
 von ir ingesinde wart ez in dar getragen.
 sît hôrten leidiu mære die kûenen ellenden sagen.

Gewâfent wart dô Rüedegêr mit fûnf hundert man: 5
 dar über zwelf recken ze helf er ouch gewan;
 die wolden pris erwerben in des sturmes nôt.
 sine wisten niht der mære, daz in sô nâhte der tôt.

Dô sah man Rüedegêre under helmê gân: 6
 ez truogen swert diu scharpfen des marcgrâven man,
 und dar zuo vor ir handen die liechten schilde breit.
 daz sach der videlære: ez was im âne mære leit.

Ouch sach der junge Giselher sînen sweher gên 7
 mit ûf gebunden helmê: wie mohter dô verstên,
 waz er dâ mite meinte niwan allez guot?
 des wart der künec edele von herzen vrêlich gemuot.

'Nu wol mich solher friunde,' - sprach Giselher der degn - 1
 'die wir hân gewonnen her uf disen wegn:
 wir suln mînes wîbes vil wol geniezen hie.
 mir ist liep uf mîne triuwe; daz ie der hîrât ergie.'

'Ine weiz wes ir iuh trœstet?' - sprach dô der spileman - 2
 'wâ gesâht ir ie durch suone sô manegen recken gân
 mit uf gebunden helmen, die trûegen swert enhant?
 an uns wil dienen Ruedegêr sine bûrge und siniu lant.'

Bedaz der videlære die rede vol sprach, 3
 den guoten marcgrâven man vor dem hûse sach:
 sinen schilt den guoten sazter für den fuoz.
 dô muoser den gesten versagen dienst unde gruoç.

Der edel marcgrâve rief hin uf zehant, 4
 'nu wert iuch, edeln recken von Burgonden lant:
 ir soldet mîn geniezen, ir engeltet leider mîn.
 ê dô wâren wir gefriunde, nu muoç ich iwer vîent sîn.'

Dô erschracten dirre mære die nôthaften man: 5
 in was der trôst enpfallen, den si dô wânden hân,
 dô mit in wolde strîten dem si dô wâren holt.
 si hêten doh von vînden vil michel arebeit gedolt.

'Nune welle got von himele,' - sprach Gunther der degen - 6
 'daz ir iuch sult genâden noch an uns bewegen,
 und der vil grôzen triuwe, der wir doch hêten muot:
 ich wil iu des baz getrouwen, daz ir ez nimmer getuot.'

'Ine mages niht gelâzen:' - sprach dô der küene man - 7
 'ich muoç mit iu strîten, wande ihç gelobet hân.
 nu wert iuch, küenen degene, sô lieb iu si der lîp:
 mich enwoldes niht erlâzen des künec Ezeln wîp.'

‘Ir widersaget uns nu ze späte:’ - sprach dô der künec hêr - 1
 ‘nu müez iu got vergelten, vil edel Rüedegêr,
 triwe unde minne, die ir uns habt getân,
 ob irz an dem ende woldet minneclîcher lân.

Wir soldenz immer dienen, daz ir uns habt gegeben, 2
 ich und mîne mâge - ob ir uns liezet leben -
 die hêrlîchen gâbe, dô ir und iwer man
 uns fuortet friuntliche zuo dirre hôchgezite dan.’

‘Wie wol ich iu des günde,’ - sprach Rüedegêr der degen - 3
 ‘daz ich iu mîne gâbe noch dicke solde wegen
 mit vollen willeclîche, als ich des hête wân:
 sone würde mir dar umbe nimmer schelten getân.’

‘Erwindet, edel Rüedegêr:’ - sprach dô Gêrnôt - 4
 ‘wandez wirt deheiner gesten nie erbôt
 sô rehte minneclîche, als ir uns habt getân:
 des sult ir wol geniezen, ob wir bî lebene bestân.’

‘Daz wolde got,’ - sprach Rüedegêr - ‘vil edel Gêrnôt, 5
 daz ir ze Rîne wæret und ich wære tôt
 mit etelîchen êren, sit ich iuch sol bestân:
 ez enwart noch nie an degenen wirs von friunden getân.’

‘Nu lôn iu got, her Rüedegêr,’ - sprach aber Gêrnôt - 6
 ‘die vil rîchen gâbe: mich riwet iwer tôt,
 sol an iu verterben sô tugentlicher muot.
 ich trage hie iwer wâfen, daz ir mir gâbet, helet guot.’

Daz ist mir nie geschichen in aller dirre nôt: 7
 under sinen ecken lit manec ritter tôt.
 ez ist lûter unde stæte, hêrlîch unde guot:
 ich wæn sô rîche gâbe ein recke nimmer mêr getuot.

Und welt ir niht erwinden, irn wellet zuo zuns gân, 1
 slaht ir mir iht der friunde, die ich noch hinne hân,
 mit iwer selbes swerte nim ich iu den lip:
 sô riwet ir mich, Rüedegêr, und iwer hêrlîchez wip.'

'Daz wolde got, her Gêrnôt, und möhte daz ergân, 2
 daz aller iwer wille wære hie getân,
 und daz genesen wære iwer friunde lip!
 iu sol vil wol getrowen bêdiu mîn tohter und mîn wip.'

Des antwurt im Gîselher, der edeln Uoten kint, 3
 'wie tuot ir sô, her Rüedegêr? die mit mir kômen sint,
 si sint iu alle wæge: ir grîfet übel zuo;
 die iwern schœnen tohter welt ir verwitewen ze fruo.

Swenne ir und iwer recken mit strîte mich bestât, 4
 wie rehte unfriuntliche ir daz schînen lât,
 daz ich iu wol getrouwe für ander alle man,
 dâ von ich zeinem wibe iwer tohter mir gewan!'

'Gedenket iwer triuwe, vil edel künec hêr, 5
 gesende iuch got fon hinnen: - sô sprach Rüedegêr -
 'lât die juncfrouwen niht engelten mîn:
 durch aller fûrsten tugende sô ruochet ir genâdec sîn.'

Daz tât ich wol von schulden: - sprach Gîselher daz kint - 6
 'die edeln mîne mâge, die noch hier inne sint,
 suln die von iu ersterben, sô muoz gescheiden sîn
 diu vil stæte friuntschaft zuo ziu und ouch dem wibe mîn.'

'Nu mûez uns got genâden.' sprach dô der küene man. 7
 dô huoben si die schilde, alsô si wolden dan
 strîten zuo den gesten in Kriemhilde sal:
 dô rief vil lûte Hagene von der stiegen hin zetal.

‘Belibet eine wile, vil edel Ruedegër,’
 - alsô sprach dô Hagene - - ‘wir wolden reden mër,
 ich und mine herren, des uns twinget nôt.
 waz mac gefrumen Ezeln unser ellenden tôt?’

Ich stân in grôzen sorgen, vil edel fürste milt:
 mir gab diu maregrâvinne disen rîchen schilt;
 den habent mir die Hiunen zerhowen vor der hant.
 ich fuort in minnelîchen her in Ezelen lant.’

‘Daz wolde got von himele,’ - sprach aber Hagene -
 ‘und hêt ich schilt sô guoten hie zetrage,
 alsô du hâst vor hende, vil edel Ruedegër,
 sone gerte ich hie zen Hiunen deheiner halsperge mër.’

‘Vil gerne wær ich dir guot mit mine schilde,
 tôrst ich diren gebieten vor Kriemhilde:
 doch nim du in hin, Hagene, und trag in vor der hant.
 hey, soldestu in fûeren in der Burgonden lant!’

Do er im sô willeclîche den schilt zegebne bôt,
 dô wart genuoger ougen von weinen harte rôt:
 ez was diu leste gâbe, die sider immer mër
 gebôt deheime degene von Bechelâren Ruedegër.

Swie grimme Hagene wære und swie herte genuot,
 doch erbarmet in diu gâbe, die der helt guot
 bi sinen lesten ziten sô nâhe hête getân.
 vil manec ritter edele mit im trâren began.

‘Nu lôn iu got von himele, vil edel Ruedegër:
 ez wirt iwer gelîche deheiner nimmer mër,
 der ellenden recken sô milteclîchen gebe.
 got sol daz gebieten, daz iwer tugent immer lebe.’

Nu lôn ich iu der gâbe, - sprach Hagene der degen - 1
 'daz ich mich alles übeles wil gein iu bewegen,
 daz nimmer iuch gerüeret in strîte hie mîn hant,
 ob ir si alle slüeget, die von Burgonden lant.'

Des neig im dô mit zühten der marcgrâve hêr. 2
 die liute weinten alle. daz disiu starken sêr
 niemen scheiden kunde, daz was ein michel nôt:
 vater aller tugende lag an Ruedegêre tôt.

Dô sprach ouch von dem hûse Volkêr der spileman 3
 'sît mîn geselle Hagene den vride hât getân,
 den sult ir alsô stæte hân von mîner hant:
 daz habt ir wol verdienet, dô wir kômen in daz lant.'

Vil edeler marcgrâve, ir sult mîn bote sîn. 4
 dise rôten bouge gab mir die marcgrâvîn,
 daz ih si tragen solde hie zer hôchgezit:
 daz hân ich geleistet; daz ir mîn ziuc des sît.'

'Daz wolde got von himele,' - sprach dô Ruedegêr - 5
 'daz iu diu marcgrâvinne noch solde gebn mêr.
 diu mære sage ich gerne der triutinne mîn,
 und gesihe ich si gesunde: des sult ir âne zwîvel sîn.'

Alser im daz gelobte, den schilt huop Ruedegêr. 6
 des muotes er ertobete. done beit er dâ niht mêr:
 er lief ûf zuo den gesten eime recken gelich:
 manegen slac vil swinden sluoc der marcgrâve rîch.

Die zwêne wichen hôher, Volkêr und Hagene, 7
 wandez im ê gelobten die snellen degene:
 noch vant er alsô küenen bî dem turne stân,
 daz Ruedegêr des strîtes mit grôzen sorgen began.

Durch mortræchen willen sô liezen si in dar in, 1
 Gunther unde Gêrnôt: si hêten helede sin.
 Giselher stuont ûf hôher: zewære ez was im leit.
 er versach sich noch des lebenes; dar umbe er Ruedegêren meit.

Dô sprungen zuo den vînden des marcgrâven man: 2
 man sah si degenliche nâch ir herren gân.
 diu vil scharpfen wâfen si truogen an der hant:
 des brast dâ vil der helme und manec hêrlîcher rant.

Dô sluogen die vil müeden manegen swinden slac 3
 den von Bechelâren, der ebene gelac,
 durch die liechten ringe vaste unz ûf daz verch:
 si frumten in dem sturme diu vil hêrlîchen werch.

Daz edel ingesinde was komen gar dar in. 4
 Volkêr unde Hagene die sprungen balde hin:
 sine gâben vride niemen wan dem einen man.
 von ir beider hande daz bluot durch helme nider ran.

Wie rehte gremlîche vil swerte drinne erklanc! 5
 vil der schildes spangen ûz den slegen spranc:
 des reis ir schiltgesteine verhowen in daz bluot.
 si vâhten alsô grimme, daz man ez nimmer mêr getuot.

Der vogt von Bechelâren gie wider unde dan, 6
 alsô der mit ellen in sturme werben kan:
 dem tet des tages Ruedegêr mit strîte wol gelîch,
 daz er ein degn wære vil kûen und ouch vil lobelîch.

Hie stuonden dise zwêne, Gunther und Gêrnôt; 7
 si sluogen in dem strîte vil manegen helt tôt:
 Giselher und Dancwart, die bêde ez ringe wac;
 des frumten si vil manegen unz ûf ir jungesten tac.

Wol zeigte der marcgrāve, daz er was stark genuoc, 1
 küene und wol gewāfent: hey, waz er helde sluoc!
 daz sach ein Burgonde: dô dwang in zornes nôt.
 dô von begunde nāhen des guoten Ruedegères tôt.

Ez was der starke Gêrnôt. den helt den rief er an: 2
 er sprach zem marcgrāven 'ir welt mir mīner man
 niht genesen lâzen, vil edel Ruedegêr.
 daz müet mich âne mâze: ine kans niht an gesehn mêr.

Nu mag iu iwer gābe wol ze schaden komen, 3
 sīt ir mīner friunde mir habt sô vil genomen.
 nu wendet iuch her umbe, vil edel küene man:
 iwer gābe wirt verdienet sô ich aller hōhste kan.

E daz der marcgrāve vol zuo zim kœme dar, 4
 des muosen liechte ringe werden missevar.
 dô sprungen zuo zein ander die êre gernde man:
 ir ieteweder schirmen für starke wunden im began.

Ir swert sô scherpfe wāren, ez enkunde niht gewegen. 5
 dô sluoc Gêrnôten Ruedegêr der degen
 durch helm vlinsherten, daz nider vlôz daz bluot.
 daz vergalt im wol mit ellen der ritter küen unde guot.

Die Ruedegères gābe an hende er hōhe erwac: 6
 swie wunt er waz zem tôde, er sluog im einen slac
 durch sīnen schilt guoten unz tū diu helmgespan,
 dô von ersterben muose der schœnen Göteline man.

Jane wart nie wirs gelōnet sô richen gābe mêr: 7
 dô vielen bēde erslagene die recken alsô hêr
 gelich in dem sturme von ir selber hant.
 alrêrst erzurnde Hagene, dô er den grōzen schaden vant.

Dô sprach der helt von Tronege 'ez ist uns übel komen: 1
wir haben an in beiden sô starken schaden genomen,
den nimmer überwindent ir liute und ouch ir lant.
die Ruedegêres degene die mûezen nu sîn unser pfant.'

Dane wolde ir dêheiner dem andern niht vertragen: 2
vil maneger âne wunden dar nider wart geslagen,
der wol genesen wære: ob im wart solch gedranc,
swie gesunt er anders wære, dêr in dem bluote doch ertranc.

'Owê mines bruoder, der tût ist hie gefrunt. 3
waz mir der leiden mære zallen zîten kumt!
ouch muoz mich immer riuwen mîn sweher Ruedegêr.
der schade ist beidenthalben und diu vil groezlichen sêr.

Dô die recken sâhen, daz si beide wâren tût, 4
di dô dar inne wâren die muosen liden nôt.
der tût der suochte sêre dâ sîn gesinde was:
der von Bechelâren einer langer niht genas.

Gunther unde Giselher und ouch Hagene, 5
Dancwart unde Volkêr, die guoten degene,
die giengen dâ si funden ligen zwêne man:
dâ wart von den heleden mit jâmer weinens vil getân.

'Der tût uns sêre roubet.' - sprach Giselher daz kint - 6
'lâzet iwer weinen, und gên wir an den wint,
daz die ringe erküelen uns sturmemüeden man:
jâ wæn uns got niht langer nu daz lebn welle lân.'

Den sitzen disen leinen sah man dâ manegen degen: 7
si wâren aber mûezec. dâ wâren tût gelegen
die Ruedegêres helde: vergangen was der dôz,
sô lange wert diu stille, daz sîn die küneginne erdrôz.

‘O wè mir dirre swære.’ - sprach des küneges wip - 1
 ‘si sprächent al ze lange. unser vînde lîp
 mac nu wol vrî belîben vor Ruedegères hant:
 er wil si wider bringen heim in der Burgonden lant.

Waz hilfet, künec Ezele, daz wir geteilet hân 2
 mit im swaz er wolde? der helt hât missetân:
 der uns dà solde rechen, der wil der suone pflegn.
 des antwurt ir Volkêr, der vil zierliche degn

‘Jane zimt niht reden übele deheines küneges wip; 3
 und tirst ich heizen liegen alsus edel wip,
 sô hêt ir Ruedegère vil vreislich an gelogen:
 er und die sînen degene sint an der suone gar betrogen.

Er tet sô willeclîche daz im der künec gebôt, 4
 daz er und sîn gesinde ist hie gelegen tût.
 nu seht alumbe, Kriemhilt, wem ir nu gebieten welt.
 iu hât unz uf den ende gedienet Ruedegêr der helt.

Welt ir des niht gelouben, man solz iuch sehn lân.⁵
 durch ir herzen leide sô wart daz getân:
 man truoc den helt verhouwen dà in der künec ersach.
 den Ezeln degenen sô rehte leide nie geschach.

Dô si den marcgrâven sâhen tûten tragen, 6
 ezn künde ein schribære geprievn noch gesagen
 die manegen ungebære, der wîb unde man
 von ir herzen swære aldâ bezeigen began.

Dô wart der Ezeln jâmer sô starc und alsô grôz, 7
 als eines lewen stimme der rîche künec erdôz
 mit herzen leidem wuofe: alsam tet ouch sîn wîp.
 si klageten ungefuoge des guoten Ruedegères lîp.

XXXVII AVENTIURE

WIE DES HERREN DIETRICHES RECKEN ALLE WURDEN
ERSLAGEN.

Dô hört man allenthalben jâmer alsô grôz, 1
daz palas unde türne von dem wuofe erdôz.
dô hört ez ouch von Berne ein Dietriches man:
durch disiu starken mâere wie bald er gâhen began!

Dô sprach er zuo dem fürsten 'hört mîn, her Dietrich: 2
swaz ich her gelebt hân, sô reht unmügelich
gehört ich klage nie mêre, als ich nu hân vernomen.
ich wæn der künec Ezele ist selbe zuo dem schaden komen.

Wie möhtens anders alle haben solhe nô? 3
der künec oder Kriemhilt, ir einez daz ist tût
von den küenen gesten durch ir nît gelegen.
ez weinet harte sêre vil manec ûz erwelter degen.'

Dô sprach der helt von Berne 'mîne lieben man, 4
nune gâhet niht ze sêre. swaz hie hânt getân
die ellenden recken, des gêt in michel nô:
und lât si des geniezen, daz ich in minen vride bôt.'

Dô sprach der küene Wolfhart 'ich wil dar gân 5
und wil der mâere vrâgen, waz si haben getân,
und wilz iu sagen denne, vil lieber herre mîn,
als ich ez rehte ervinde, waz diu rede müge sîn.'

Dô sprach der herre Dietrich 'swâ man zornes sich versiht, 1
 ob ungefüegiu vrâge denne dâ geschiht,
 daz betrüebet recken vil lihte danne ir muot:
 jane wil ich niht, Wolfhart, daz ir die vrâge dâ zin tuot.'

Dô hiez er Helpfrichen vil balde dar gân, 2
 und bat in daz ervinden an Ezelen man
 oder an den gesten selben, waz ware dâ geschehn.
 done hêt er nie von liuten sô grôzen jâmer mër gesehen.

Der bote vrâgte balde 'waz ist hie getân?' 3
 dô seit man im diu mære 'dâ ist vil gar zergân
 swaz wir freuden hêten in der Hiunen lant:
 hie lit erslagen Ruedegêr von der Burgonden hant.

Die mit im dar in kômen, der ist einer niht genesen.' 4
 done kunde Helpfriche leider nimmer wesen:
 jane sagt er siniu mære sô reht ungerne nie.
 der bote dô hin widere vil sêre weinende gie.

'Waz habt ir uns erfunden?' - sprach dô Dietrich - 5
 'wie weinet ir sô sêre, degen Helpfrich?'
 dô sprach der küene recke 'ich mac wol balde klagen:
 den guoten Ruedegêre hât uns her Gêrnôt erslagen.'

Dô sprach der helt von Berne 'daz ensol niht wellen got: 6
 daz wær ein starkiu räche und ouch des tiufels spot.
 wâ mite hête Ruedegêr an in daz verscholt?
 jâ ist mir daz wol künde, er ist den Burgonden holt.'

Dô sprach der küene Wolfhart 'und hêten siz getân, 7
 sô solt ez in allen an ir leb'n gân.
 ob wirz in vertrüegen, des wæren wir geschant:
 jâ hât uns vil gedienet des guoten Ruedegêres hant.'

Der vogt der Amelunge bat ez ervarn baz: 1
vil harte seneliche er in ein venster saz.
dô hiez er Hildebrande zuo den gesten dan,
daz er an in erfunde waz dâ wære getân.

Der sturmeküene recke, meister Hildebrant, 2
weder schilt noch wâfen truoger an der hant:
er wolde in sinen zühten zuo den gesten gân,
von sîner swester kinde wart im ein strâfen getân.

Dô sprach der grimme Wolfhart 'welt ir dar blôzer gân, 3
sone mag ez âne ein schelten nimmer wol gestân;
sô müezet ir lasterliche tuon die widervart.
ob ir dar komet gewâfent, daz eteslicher wol bewart.'

Dô garte sich der wise durch des tumben rât: 4
ê ez erfunde Hildebrant, dô wâren in ir wât
alle Dietriches recken und truogen swert enhant.
dem helde was ez leide: vil gerne hêt erz erwant.

Er vrâgte war si wolden. 'wir wellen mit iu dar. 5
waz, ob von Tronege Hagene deste wirs getar
gein iu mit spotte sprechen, des er kan wol gepflegen?'
dô er die rede gehôrte, dâ von gestattes in der degen.

Dô sach der küene Volkêr wol gewâfent gân 6
die recken von Berne, die Dietriches man,
begurtet mit den swerten, ir schilde vor der hant:
er sagtez sinen herren ûzer Burgonden.lant.

Dô sprach der videlære 'ich sihe dort her gân 7
sô rehte vîentliche die Dietriches man,
gewâfent under helme: si wellent uns bestân.
mich nîmt des michel wunder, waz wir den recken haben getân.'

In den selben ziten kom ouch Hildebrant. 1
 dô sazter für die fûeze sînen schildes rant:
 er begunde vrâgen die Gunthers man
 'owê, ir guoten degene, waz hêt iu Rüedegêr getân ?

Mich hât mîn herre Dietrich her zuo ziu gesant, 2
 ob erslagen hête iwer deheines hant
 den edeln marcgrâven, als uns ist geseit:
 wir enkûnden überwinden niht diu grœzlichen leit.'

Dô sprach der grimme Hagene 'daz mære ist ungelogen. 3
 wie wol ich iu des gûnde, hêt iuch der bot betrogen,
 durch Rüedegêres liebe, daz lebte noch sîn lîp,
 den immer mûgen weinen bêdiu man und ouch diu wîp.'

Dô si daz rehte erhôrten, daz er wære tôt, 4
 dô klagten in die degene: ir triwe in daz gebôt.
 den Dietriches mannen sah man trâhene gân
 über bârte und über kinne: in was vil leide getân.

Der herzoge ûzer Berne Sigestap dô sprach 5
 'nu hât gar ein ende genomen der gemach,
 den uns ie fuogte Rüedegêr nâch unser leide tagen:
 freude ellender diete lît von iu degenen erslagen.'

Dô sprach von Amelungen der degen Wolfwin 6
 'und ob ich hiute sæhe tôt den vater mîn,
 mir en wûrde nimmer leider denne umbe sînen lîp.
 owê, wer sol nu træsten des guoten marcgrâven wîp ?'

Dô sprach in zornes muote der küene Wolfhart 7
 'wer wiset nu die recken sô manege hervart,
 alsô der marcgrâve vil dicke hât getân ?
 owê, vil edel Rüedegêr, deich dînen tôt gelebt hân !'

Wolfprant unde Helpfrich unde Helmnot, 1
mit allen ir friunden si weinten sinen tót.
vor siuften mohte vrâgen niht mêr Hildebrant:
er sprach 'nu tuot, ir degene, dar nâch mîn herre hât gesant.

Gebt uns Ruedegêren sô tóten ûz dem sal, 2
an dem gar mit jâmer lit unser vreuenden val:
und lát uns an im dienen, daz er ie hât begân
an uns vil grôzêr triuwen und ouch an manegem vrenden man.

Wir sîn ouch ellende, als Ruedegêr der degen. 3
wes lâzet ir uns biten? lát in uns after wegen
tragen, daz wir nâch tóde lônên noch dem man:
wir hêtênz pillicher bi sime lebene getân.'

Dô sprach der kûnec Gunther 'nie dienst wart sô guot, 4
sô den ein friunt friunde nâch tóde tuot.
daz heiz ich stæte triuwe, swer die kan begân:
ir lônêt im von schulden, wand er iu liebe hât getân.'

'Wie lange suln wir vlêgen?' - sprach Wolfhart der degen - 5
'sît unser trôst der beste ist von iu tót belegen
und wir sîn leider mêre mugen niht gehaben,
lát in uns tragen hinnen dà wir den recken begraben.'

Des antwurte Volkêr 'niemen in iu gît. 6
nemt in in dem hûse, dà der degen lit,
mit sinen tiefen wunden gevallen in daz bluot:
sô ist ez ein voller dienst, den ir hie Ruedegêre tuot.'

Dô sprach der kûene Wolfhart 'lát sîn, her spileman, 7
irn durfet uns niht reizen: ir habt uns leit getân.
tôrst ich vor mîme herren, sô kemet irs in nôt:
des müezen wir ez lâzen, wan er uns strit mit iu verbôt.'

Dô sprach der videlære 'der vorht ist gar ze vil, 1
 swaz man in verbiutet, derz allez lâzen wil:
 daz enkan ich niht geheizen rehten heldes muot.'
 diu rede dûhte Hagenen von sinem hergesellen guot.

'Welt ir den spot niht lâzen,' - sprach aber Wolfhart - 2
 'ich entriht iu lîht die seiten, swenne ir die widervart
 ritet gegen Rîne, daz irz wol mugt gesagen:
 iwer übermüeten mag ich langer niht vertragen.'

Dô sprach der videlære 'swenn ir die seiten mîn 3
 verirret guoter dæne, der iwer helmes schîn
 mac wol trûebe werden von der mînen hant,
 swie ich halt gerite in der Burgonden lant.'

Dô wolder zuo zim springen, wan daz in niht enlie 4
 Hildebrant sîn cehaim in vaste zim gevie
 'ich wæn du woldest wüeten durch dînen tumben zorn:
 mînes herren hulde wir hêten immer mêr verlorn.'

'Lât ab den lewen, meister: er ist sô grimme gemuot. 5
 kumt er mir zen handen,' - sprach Volkêr der helt guot -
 'hêt er die werlde alle mit sîner hant erslagen,
 ich slah in daz erz widerspel nimmer mêre darf gesagen.'

Des wart vil harte erzürnet der Bernære muot. 6
 den schilt gezuchte Wolfhart, ein sneller degen guot:
 alsam ein lewe wilder lief er vor in dan.
 im wart ein gæhez volgen von sînen friunden getân.

Swie wîter sprûnge er pfæge für des sales want, 7
 doch ergâhet in vor der stiegen der alde Hildebrant:
 er wolde in vor im lâzen niht komen in den strît.
 si funden daz si suochten an den ellenden sît.

Dô gespranc zuo Hagene maister Hildebrant: 1
 diu swert man hört erklingen an ir beider hant.
 si wâren harte erzürnet: vil wol erkôs manz sint.
 von ir beider wâfen gie der viurrôter wint.

Si wurden dô gescheiden in des strites nôt: 2
 daz tâten die von Berne, als in ir kraft gebôt.
 zehant dô wande Hildebrant von Hagene balde dan:
 dô lief der starke Wolfhart den küenen Volkêren an.

Er sluoc den videlære ûf den helm guot, 3
 daz des swertes ecke unz an die spangen wuot.
 daz vergalt mit ellen der küene spileman:
 dô sluoger Wolfharten, daz er strûchen began.

Fiur ûz den ringen, des hiwen si genuoc: 4
 haz ir ieslicher dem andern vaste truoc.
 die schiet dô von Berne der degen Wolfwin:
 ob er ein helt niht wære, des enkûnde niht gesin.

Gunther der vil küene mit williger hant 5
 enpfie die helde mære von Amelunge lant:
 Giselher der starke diu liechten helmvaz,
 der frumt er dâ vil manegez von bluote rôt unde naz.

Dancwart, Hagenen bruoder, was ein grimme man: 6
 swaz er dâ vor hête in strite getân
 den Ezeln recken, daz was gar ein wint.
 alrêst vaht tobeliche des küenen Adriânes kint.

Gerbart unde Wichart, Helpfrîch und Rîschart, 7
 die heten in manegen stürmen vil selten sih gespart:
 des brâhten si wol innen die Gunthers man.
 dô sach man Wolfpranden in sturme hêrlîche gân.

Dâ streit er, als er wuote, der alde Hildebrant. 1
 vil manec küener recke vor Wolfhartes hant
 mit tôde muose vallen von swerten in daz bluot:
 sus râchen Ruedegêre die recken küene unde guot.

Sigestap von Berne, als im sîn ellen riet, 2
 hey, waz er in dem sturme der herten helme schriet
 den sînen vianden! Dietriches swestersuon
 der kunde in dem sturme bezzers nimmer niht getuon.

Volkêr der vil starke, dô er daz ersach, 3
 daz Sigestap der küene den bluotigen bach
 hiw ûz herten ringen, daz was dem degene zorn:
 dô spranger im begegene. dô hête Sigestap verlorn

Von dem videlære vil schiere al dâ daz leb: 4
 er begunde im sîner künste al solhen teil dâ gebn,
 daz er von sîme swerte muose ligen tût.
 daz rach der alde Hildebrant, als im sîn ellen daz gebôt.

‘Owê vil liebes herren,’ - sprach meister Hildebrant - 5
 ‘der hie lit erstorben von Volkêres hant:
 nune sol der videlære langer niht genesen.’
 zorn der Hildebrandes kunde grimmer niht gewesen.

Dô sluoger Volkêre, daz im diu helmbant 6
 stuben allenthalben zuo des sales want
 von helme und ouch von schilde, dem küenen spileman.
 dâ von der videlære dô den ende dâ gewan.

Dô drungen zuo dem strîte die Dietriches man: 7
 si sluogen, daz die ringe vil hôhe wâten dan,
 und daz man ort der swerte imme gewelbe stechen sach.
 si hiwen ûz den helmen den heize vliezenden bach.

Dô sach von Tronege Hagene Volkêren tôt: 1
 daz was zer hôchgezite sîn aller meistiu nôt,
 die er dâ hête gewonnen an mâgen und an man.
 owê, wie grimme Hagene, den helt rechen began!

'Nune sol es niht geniezen der alde Hildebrant: 2
 mîn helfe lît erslagene hie von des heldes hant,
 der beste hergeselle, den ieman gewan.'
 den schilt den rucher hôher: dô gie er houwende dan.

Helpfrîch der vil starke Dancwarten sluoc. 3
 Gunther unde Giselher, den was ez leit genuoc,
 dô si in sâhen vallen in der starken nôt:
 er hête wol vergolten mit sînen handen sînen tôt.

Swie vil von manegen landen gesamnet wære dar, 4
 vil fürsten krefteclîche gegen ir kleinen schar,
 wæren die kristen liute wider si niht gewesen,
 si wæren mit ir ellen vor allen heiden wol genesen.

Die wîle gie dô Wolfhart beide wider unde dan, 5
 allez houwende die Gunthers man.
 er was die dritten kêre den palas zende komen:
 jâ hêt er den künegen sô vil der rechen dâ genomen.

Dô rief der starke Giselher Wolfharten an 6
 'owê, daz ich sô grimmen vîent ie gewan!
 edel ritter küene, nu wendet gegen mir.'
 si kômen zuo ein ander sit mit ellenthafter gir.

Wolfhart gein Giselhere kêrt in den strît: 7
 dô sluog ir ietwedere vil manege wunden rit.
 sô rehte krefteclîche er zuo dem künege dranc,
 daz im daz bluot von fûezen al über daz houbet sîn gespranc.

Mit grimmen slegen swinden der edeln Uoten kint 1
 enpfie vil pitterliche den küenen recken sint.
 swie küene Wolfhart wære, er mohte niht genesen
 vor dem jungen küenege: niemen dorfte küener wesen.

Dô sluog er Wolfharte durch eine prünne guot, 2
 daz im von der wunden vil sere vlöz daz bluot.
 er wunte zuo dem tôde den Dietriches man:
 ez enhêt ân einen recken ander niemen getân.

Alsô der küene Wolfhart der wunden enpfant, 3
 den schilt liez er dô vallen: hôher an der hant
 huober daz starkez wâfen, daz was scharpf genuoc:
 durch helm und durch ringe der helt dô Gîselhern sluoc.

Si hêten beide ein ander den grimmen tôt getân. 4
 done lebte ouch niht mære der Dietriches man,
 wan Hildebrant aleine: do er den neven vallen sach,
 im wæn vor sime tôde sô rehte leide nie geschach.

Ouch wâren gar gevallen Gunthers degene, 5
 niwan si einen zwêne, er und Hagene:
 si stuonden in dem bluote tief unz an diu knie.
 Hildebrant harte balde hin über sînen neven gie.

Er beslöz in mit armen, und wolde in tragen dan 6
 mit im ûzem hûse: er muose in ligen lân;
 er was ein teil ze swære. wider in daz bluot
 enpfel er im ûz handen: dô blichte uf der degen guot.

Dô sprach der tôtwunde vil lieber œheim mîn, 7
 in muget an disen zîten mir niht frum gesin.
 nu hûetet iuch vor Hagene: jâ dunket ez mich guot.
 er treit in sime herzen einen grimmegen muot.

Unde ob mich mine mäge nâch tôde wellen klagen, 1
den nêhsten und den besten den sult ir daz sagn,
daz si nâch mir niht weinen: daz ist âne nôt.
vor eines kûneges handen lige ich hie hêrlichen tôt.

Ich hân ouch sô vergolten hier inne minen lip, 2
daz ez wol mugen beweinen der guoten ritter wip:
ob iuch des iemen vrâge, sô muget ir balde sagen,
vor mîn eines handen ir lit wol hundert erslagen.

Dô gedâht ouch Hagene an den spileman, 3
dem der alde Hildebrant sîn lebn an gewan:
dô sprach er zuo dem degene 'ir geltet mîniu leit,
ir habt uns hinne erbunnen vil maneges recken gemeit.'

Er sluog ûf Hildebranden, daz man wol vernam 4
Balmungen diezen, daz Sivride nam
Hagene der kûene dâ er den recken sluoc.
dô widerstuont im Hildebrant, der im vil wê nec iht vertruoc.

Der Wolfhartes oheim sluog ein wâfen breit 5
ûf Hagenen von Tronege, daz ouch vil sere sneit.
done kunder niht verwunden den Gunthers man.
dô sluog aber in Hagene durch eine prûnne wolgetân.

Alsô meister Hildebrant der wunden enpfant, 6
dô vorht er schaden mære von der Hagenen hant:
den schilt warf über rucke der Dietriches man.
mit der starken wunden der helt vil kûme danne entran.

Dar inne was niemen lebnde, als ich gesaget hân, 7
niwan die einen zwêne, Gunther und ouch sîn man.
mit bluote gie berunnen der alde Hildebrant:
er brâhte leidiu mære dâ er sînen herren vant.

Dô sah er trûreclîche sitzen hie den man : 1
 leides michel mære der fürste dô gewan.
 als er Hildebranden ersach von bluote rôt,
 dô vrâgt er in der mære, als im diu sorge gebôt.

'Wan sagt ir mir, meister, wie sît ir sô naz 2
 worden von dem bluote, oder wer tet iu daz?
 ich wæn ir mit den gesten zem hûse habt gestriten.
 ich verbôt ez iu sô sære: dô wær ez pillich vermiten.'

'Swie übel disiu mære mir stên ze sagene,' 3
 - er sprach - 'dise wunden sluoc mir Hagene,
 dô ich ûz dem hûse wolde wenden dan.
 wie kûm ich mit dem lebene dem selben vâlände entran!'

Dô sprach der Bernære 'vil reht ist iu geschehn, 4
 dô ir mich friuntschefte den helden hörtet jehn,
 daz ir den vride brâchet, den ich in hêt gegeben.
 hête ihs niht immer schande, ir soldet vliesen daz leben.'

'Nune zürnet niht sô sære, mîn herre Dieterîch: 5
 an mir und mînen friunden der schade ist gremlich.
 wir wolden Ruedegêren getragen haben dan:
 des enwolden uns niht gunnen des künec Gunthers man.'

'Sô wê mir dirre leide, ist Ruedegêr doch tôt. 6
 daz muoz mir sîn ein jâmer vor aller mîner nôt.
 Göteling diu edele ist mîner basen kint.
 ach wê der armen weisen, die dâ ze Bechelâren sint.'

Riwen und ouch leides mant in dô sîn tôt: 7
 er begunde starke weinen; des gie dem helede nôt.
 owê getriwer helfe, der ich verlorn hân:
 iane überwinde ich nimmer des künec Ezeln man.'

Er sprach ze Hildebrande 'muget ir mir doch sagen, 1
wer der deggen wære, der in dâ hât erslagn?'
er sprach 'daz tet mit kreften der starke Gêrnôt:
vor Rüedegêres handen muos ouch der deggen ligen tôt.'

Er sprach 'meister Hildebrant, nu saget mînen man, 2
daz si sich balde wâfen: jâ wil ich dar gân.
und heizet mir gewinnen mîn liehtez wigewant:
ich wil selbe vrâgen die helede üz Burgonden lant.'

Dô sprach meister Hildebrant 'wer sol zuo ziu gên? 3
swaz ir habt der lebenden, die seht ir bi iu stên.
daz bin ich alterseine: die andern die sint tôt.'
dô erschraeter dirre mære: des gie dem recken grôziu nôt;

Wander leit sô grôzez zer werlde nie gewan. 4
er sprach 'und sint erstorben alle mîne man,
sô hât mîn got vergezzen. ich was ein künec rich:
nu mag ich wol heizen der vil arme Dietrich.'

'Wie kundez sich gefüegen,' - sprach aber Dietrich - 5
'daz si alle sint erstorben, die helde lobelich,
von den stritmüeden, die doch hêten nôt?
wan durch mîn ungelücke, in wære vremde noch der tôt.'

Owê, vil lieber Wolfhart, sol ich dich hân verlorn, 6
sô mac mich balde riuwen, daz ich ie wart geborn.
Sigestap und Wolfwîn und ouch Wolfprant,
wer sol mir danne helfen in der Amelunge lant?

Helpfrich der vil küene, und ist mir der erslagen, 7
Gerbart unde Wichart, wie solde ich die verklagen?
daz ist an mînen freuden mir der leste tac:
owê daz vor leide niemen sterben ne mac.'

XXXVIII AVENTIURE

WIE DER HERRE DIETRICH GUNTHERN UND HAGENEN
BETWANC.

Dô suochte der herre Dietrich selbe sîn gewant: 1
dô half daz er sich wâfent maister Hildebrant:
dô klaget alsô sêre der krefftige man,
daz im daz hûs erdiezen gein siner stimme began.

Der helt gewan dô widere rehten mannes muot: 2
in grimme wart gewâfent dô der degen-guot:
einen schilt vil vesten den nam er an die hant.
nâch schaden in dô trôste der vil küene Hildebrant.

Dô sprach von Tronege Hagene 'ich sihe dort her gân 3
den herren Dietrichen: der wil uns bestân
nâch sime starken leide, daz im ist hie geschehn.
man sol daz hiute kiesen, wem man des besten mûge jehn.

Jane dunket sich von Berne der herre Dietrich 4
nie sô starc des lîbes und ouch sô gremelîch,
und wil erz an uns rechen, daz im ist getân,
- alsô reite Hagene - 'ich tarr in rehte wol bestân.'

Die rede erhôrte Dietrich unde Hildebrant: 5
er gie dâ er die recken beide stênde vant
ûzen vor dem hûse geleinet an den sal.
sînen schilt den guoten den sazte Dietrich zetal.

‘In leitlichen sorgen sprach dô Dietrich 1
 ‘wie habt ir sô geworben, Gunther, ein künec rich?
 ich ellender recke, waz ist an mir getân?
 alles mînes trôstes des bin ich eine bestân.

Iuch endûhte niht der volle an der vil grôzen nôt, 2
 dô ir uns Ruedegêren den recken sluoget tôt:
 nu habt ir mir erbunnen aller mîner man.
 jâ hêt ich iu degenen solher leide niht getân.

Gedenket an iuch selben und an iwer leit: 3
 tôt der iwer friunde und ouch diu arebeit,
 ob ez iu guoten degenen beswæret iht den muot.
 owê, wie rehte unsanfte mir tôt der Ruedegêres tuot!

Ez gescach in der werlde nie manne leider mêr: 4
 ir gedâhtet übele an mîn und iwer sêr.
 swaz ich freuden hête, diu lit von iu erslagen.
 jane kan ich nimmer mêre die mîne mâge verklagen.’

‘Jane sîn wir niht sô schuldec:’ - sprach dô Hagene - 5
 ‘ez kômen her zem hûse die iwern degene,
 ze vlîze wol gewâfent mit ir schar sô breit:
 mich dunket wie iu diu mære niht ze rehte sîn geseit.’

‘Waz sol ich anders gelouben? mir sagtez Hildebrant, 6
 dô mîne recken gerten von Amelunge lant,
 daz ir in Ruedegêre gæbet ûz dem sal,
 dô tât ir niwan spottens die kûenen helde her zetal.’

Dô sprach der kûnec von Rîne ‘si jâhen wolden tragen 7
 Ruedegêren hinnen: den hiez ich in versagen
 Ezeln ze leide und niht den dînen man,
 unze daz dô Wolfhart dar umbe schelten began.’

Dô sprach der helt von Berne / ez muose et alsô sîn. L 1 *Verone.*
 Gunther, küene edele, durch die zühte dîn
 so ergetzet mich der leide, diu mir sint getân,
 und süen ez ritter küene: sô wil ich gar die schulde lân.

Ergip dich mir ze gîsel, du und ouch dîn man,
 sô wil ich iuch behüeten, sô ich beste kan,
 daz iu hie zen Hiunen niemen niht entuot:
 ir sult an mir niht vinden niwan triwe unde guot.'

'Nune welle got von himele,' - sprach dô Hagene - 3
 'daz sich dir ergæben zwêne degene,
 die du sô werliche sihest gewâfent stân:
 daz hiez ein michel schande, und wær ouch übele getân.'

'Irn sult ez niht versprechen:' - sprach aber Dietrich - 4
 'Gunther unde Hagene, jâ habt ir beide mich
 sô sere beswæret, mîn herze und ouch den muot,
 welt ir mich ergetzen, daz irz vil pilllichen tuot.'

Ich gibs iu mîne triuwe und gihtes iu mîn hant,
 daz ich mit iu rite heim in iwer lant:
 ich beleite iu nâch den êren, oder ich gelige tôt:
 ich wil durch iuch verkiesen der mînen græzlichen nôt.'

'Nune gewâhent sîn niht mære:' - sprach aber Hagene - 6
 'von uns enzimt daz mære niht ze sagene,
 daz sich iu ergæben zwêne alsô küene man:
 nu siht man niemen mære bi iu wan Hildebrande stân.'

Des antwurt Hildebrant 'iuch möhte wol gezemen,
 den fride mînes herren ob ir den ruochet nemen:
 ez kumt noch an die stunde vil liht in kurzer zit,
 daz ir in gerne næmet und in iu danne niemen git.'

‘Jâ næme ich è die suone,’ - sprach dô Hagene - 1
 ‘è ih sô lasterliche von eime degene
 flûhe, meister Hildebrant, als ir habt hie getân:
 ich wände dar, ir kûndet baz gein viande stân.’

Dô sprach meister Hildebrant ‘zwiu verwîzet ir mir daz? 2
 nu wer was der ûf eime schilde vor dem Waschensteine saz,
 dô im von Spâne Walther sô vil der friunde sluoc?
 ouch habt ir noch ze zeigen an iu selben genuoc.’

Dô sprach der fürste Dietrich ‘wie zimt daz heledê lip, 3
 daz si suln schelten sam diu alten wîp?
 ich verbiut iu Hildebrant, daz ir iht sprechet mêr:
 mich ellenden recken twingen grœzlichiu sêr.’

‘Lât hœren, friunt Hagene,’ - sprach dô Dietrich - 4
 ‘waz ir è redetet, ir recken lobelich,
 dô ir mih gewâfent zuo ziu sâhet gân:
 ir jâhet daz ir eine mit strîte woldet mich bestân.’

‘Jane lougent iu des niemen,’ - sprach Hagene der degene - 5
 ‘ine welle ez hie versuochen mit stichen und mit slegen,
 ez ensi daz mir zebreste daz Nibelunges swert.
 mich mûet daz mînes herren und mîn ze gîsel ist geger.’

Dô der recke erhôrte den grimmen Hagenen muot, 6
 den schilt vil balde zuchte der snelle degene guot:
 wie balde gein im Hagene von der stiegen spranc!
 Nibelunges swert daz guote vil lût ûf Dietriche erklanc.

Dô wesse wol her Dietrich, daz der küene man 7
 vil grimmes muotes wære: schermen im began
 der voget von Berne vor angestlichen slegen.
 wol erkander Hagenen: er was ein ûz erwelter degene.

Ouch vorht er Balmungen, ein wâfen stark genuoc. 1
 under wîlen Dietrich mit listen wider sluoc,
 unze daz er Hagenen mit strîte doch betwanc:
 er sluog im eine wunden, diu was tief unde lanc.

Dô dâht der herre Dietrich 'du bist in nôt erwigen: 2
 ih hân es lützel êre, soltu nu tôt geligen.
 ich wil es sus versuochen, ob ich ertwingen kan
 dich mir zeinem gîsel.' daz wart mit sorgen getân.

Den schilt lie vallen Dietrich. sîn sterke diu was grôz: 3
 mit beiden sînen armen er Hagenen umbeslôz.
 dô wart von im betwungen der vil küene man.
 Gunther der vil edele darumbe trûren began.

Hagenen bant dô Dietrich und fuort in dâ er vant 4
 die edeln Kriemhilde, und gab ir bi der hant
 den küenesten recken, der ie swert getruoc.
 nâch ir vil starkem leide dô wart ir liebe genuoc.

Vor freuden neic dem recken daz Ezeln wîp: 5
 'immer si dir sælec dîn herze und ouch dîn lîp.
 du hâst mich wol ergetzet nâch aller mîner nôt:
 ich sol ez immer dienen, mich enwendes der tôt.'

Dô sprach der herre Dietrich 'ir sult in lân genesen, 6
 vil edeliu kûeginne. ez mac vil wol noch wesen,
 daz iuch sîn dienst ergetzet des er iu hât getân:
 er sol des niht engelten, daz man in siht gebunden stân.'

Dô hiez si fûeren Hagenen an sîn ungemach, 7
 dâ er lac beslozzen und dâ in niemen sach.
 Gunther der kûnec edele ruofen dô began
 'war kom der helt von Berne? er hât mir leide getân.'

Dô gie im hin beegene der herre Dietrich. 1
 daz Gunthers ellen daz was sô lobelich,
 ern beite dô niht mêre, er lief her für den sal:
 von ir beider swerten huop sich ein ungefueger schal.

Swie vil der herre Dietrich lange was gelobt, 2
 Gunther was sô sere erzürnet und ertobt
 - wander nâch starken leiden sîn herzevient was -,
 man sagtez noch für wunder, daz dô Dietrich ie genas.

Ir ellen und ir sterke beide wâren grôz. 3
 palas unde türne von den slegen dôz,
 dô si mit swerten heuwen uf die helme guot.
 ez hêt der künec Gunther einen hêrlîchen muot.

Sit twang in der von Berne, sam Hagenen ê geschach. 4
 daz bluot maþ durch die ringe dem helde vliezen sach
 von eime scharpfen swerte, daz truoc her Dietrich:
 doch hêt gewert Gunther nâch müede lobeliche sich.

Der herre wart gebunden von Dietriches hant, 5
 swie kûnege niene solden liden solhiu bant:
 er dâht, ob er si lieze ungebunden wesen,
 daz si zwêne inme lande niemen liezen genesen.

Der vogt von Berne der nam in bi der hant: 6
 dô brâhter in gebunden dâ er Kriemhilt vant.
 dô was mit sime leide ir sorge ein teil benomen.
 si sprach 'kûnec Gunther, sit mir grôze willekomen.'

Er sprach 'ich soltiu nigen, vil edel swester mîn, 7
 ob iwer grûezen möhte genædeclîcher sîn:
 ich weiz iuch, kûneginne, sô zornec genuot,
 daz ir mir und Hagenen vil swachez grûezen getuot.'

Dô sprach der helt von Berne 'vil edel küneges wip, 1
 ez enwart nie gisel mære sô guoter ritter lîp,
 als ich iu, frowe hère, an in gegeben hân:
 nu sult ir die ellenden mîn vil wol geniezen lân.'

Si jach, si tæet ez gerne. dô gie der kûene man 2
 mit weinenden ougen von in balde dan.
 sit rach sich gremliche daz Ezeln wip:
 den üz erwelten degenen nam si beiden den lîp.

Sie lie si ligen sunder durch ir ungemach, 3
 daz ir sit dewedere den andern nie gesach.
 swie ez verlobt hête daz vil edele wip,
 si dâht 'ich geriche hiute mîns vil lieben mannes lîp.'

Dô gie diu kûeginne dâ si Hagenen sach. 4
 wie reht erbolgenliche si zuo dem recken sprach
 'welt ir mir geben widere daz ir mir habt genomen,
 sô muget ir mit dem lebene wider zen Burgonden komen.'

Dô sprach der grimme Hagene 'diu rede ist gar verlorn, 5
 vil edeliu kûeginne: jâ hân ich des gesworn,
 daz ich den hort iht zeige die wile, deheiner lebe
 der mînen edelen herren, und in niemanne gebe.'

Er wiste wol diu mære, sine liezen niht genesen. 6
 wie möhte ein untriuwe immer sterker wesen?
 er vorhte, sô si hête im sînen lîp genomen,
 daz si danne ir bruoder lieze heim ze lande komen.

'Ich bringez an ein ende' gedâht daz edel wip. 7
 dô hiez si ir bruoder nemen den lîp.
 man sluog im abe daz houbet: bî hære si ez truoc
 für den helt von Tronege. dô ward im leide genuoc.

Alsô der ungemuote sîns herren houbet sach, 1
 wider Kriemhilde dô der recke sprach
 'du hâst ez zeime ende nach dîme willen brâht,
 und ist ouch rehte ergangen als ich mir hête gedâht.

Nu ist von Burgonden der edel kûnec tôt, 2
 Gîselher und Volkêr, Danewart und Gêrnôt.
 den hort den weiz nu niemen wan got unde mîn:
 der sol dich vâlândinne immer wol verholn sîn.'

Si sprach 'sô habt ir ûbele geltes mich gewert. 3
 sô wil doch ich behalten daz Sîvrîdes swert,
 daz truoc mîn holder vriedel, dô ir im nâmt den lîp
 mortlich mit untriuwen.' sprach dô daz jâmerhafte wîp.

Si zôch ez von der scheiden: daz enkunder niht gewern. 4
 dô dâhte si den recken des libes vol behern:
 si huobez mit ir handen, daz houpt si im abe sluoc.
 daz sach der kûnec Ezele: dô was im leide genuoc.

'Wâfen!' - sprach der fürste - 'wie ist nu tôt gelegen 5
 von eines wîbes handen der aller beste degen,
 der ie kom ze stürmen oder ie schilt getruoc:
 swie vîent ich im wære, ez ist mir leide genuoc.'

Dô sprach meister Hildebrant 'jane geniuzet si es niht, 6
 daz si in slahen torste, swaz halt mir geschîht.
 swie er mich selben brâhte in angestliche nôt,
 idoch sô wil ich rechen des vil kûenen recken tôt.'

Hildebrant mit zorne zuo Kriemhilde spranc: 7
 er sluoc der kûeginne einen grimmen swanc.
 jâ tet ir diu sorge von dem degene wê:
 si mohte lützel helfen daz si sô angestlichen scrê.

Dô was gelegen aller dâ der veigen lip : 1
ze stucken lac verhouwen dô daz edel wip.
Ezel unde Dietrich weinen dô began :
si klageten jâmerliche alle ir mâge unde man.

Diu vil michel ère was dâ gelegen tôt : 2
die liute hêten alle jâmer unde nôt.
mit leide was verendet des küneges hôchgezit,
als ie diu liebe leide an dem ende gerne git.

Ine kan iuch niht bescheiden waz sider dâ geschach, 3
wan kristen unde heiden weinen man dô sach,
wib unde knehte und manege schene meit :
die hêten nâch ir friunden diu aller græzisten leit.

Ine sage iu nu niht mære von der grôzen nôt 4
- die dâ erslagen wâren, die lâzen ligen tôt -
wie ir dinc an geviengen sît der Hiunen diet.
hie hât daz mære ein ende : daz ist DER NIBELUNGE LIET.

